

清代傳記叢刊・綜錄類②
周駿富輯

清史列傳

(七)

卷四九至
卷五六

清國史館原編



明文書局印行

清史列傳 卷四十九

大臣畫一傳檔後編五

馬新貽

馬新貽山東荷澤人道光二十七年進士以知縣分發安徽卽用咸豐二年補建平縣知縣尋署合肥縣知縣五年三月官軍圍攻廬州盤踞焦湖賊衆來援新貽擊走之旋敗賊於盛家橋三河鎮敍功以知州陞用先換頂帶九月復敍柘皋節次剿匪功開缺以直隸州知州補用十一月廬州復賞戴花翎六年十一月以巡撫福濟保奏命記名遇有安徽知府缺出請旨簡放十二月補安慶府知府七年七月調廬州府十月擒匪糾合粵匪竄陷桃鎮分擾上中派河新貽擊之敗賊舒城捷入命交軍機處記名以道員用八年署按察使賊犯廬州新貽督練勇出城迎擊賊間道入城新貽軍潰遺失印信事聞得旨著革職留任九年丁母憂巡撫翁同書奏請暫留署任報可十年欽差大臣袁甲三奏新貽督練助剿著有微勞請開復革職留任處分十一年二月翁同書復奏新貽聲名出衆請開廬州府知

府缺以道員候補均從之三月丁父憂袁甲三奏新貽辦理營務屢次親自督隊熟諳戎機調和將士訓練兵勇實屬軍營中不可多得之員已檄令穿孝百日後仍來營當差以資臂助報聞尋留本籍辦團同治元年赴安徽軍營隨大軍復廬州追剿竄賊大捷於壽州之吳山廟賞加按察使銜尋署布政使時叛練苗沛霖作亂新貽隨署巡撫唐訓方防守蒙城臨淮等處疊著戰功二年三月擢按察使九月遷布政使三年陞浙江巡撫新貽奏言浙省甫經底定百度維新所有海塘工程農田水利及整飭海濱水師懲治台屬豪惡各事宜均關緊急前經督臣左宗棠護理撫臣蔣益澧辦有端緒自當遵奉諭旨妥籌辦理實力踵行得旨嘉獎四年五月奏請裁減各府浮收錢漕詔如所請並著馬新貽明白曉示勒石永禁浮收至漕糧概完本色有願完折色者按照市價收納悉聽民便其杭屬之新城於潛等縣向收折色官爲辦運仍舊辦理儻有不肖州縣敢蹈從前勒折浮收積習卽著嚴參治罪至紳士等恃勢把持仍前包攬短交著一併從嚴參辦閏五月奏調翰林院編修王凱泰補用道袁保慶等允之時紹興蕭山嚴州等郡縣均被水災上命新貽派員查勘速籌撫恤尋奏請將應徵本年新舊錢糧分別蠲緩九

月奏言台州府屬民情强悍聚衆械鬪等案層見疊出地方官因吏議綦嚴不免瞻顧消弭之弊擬請嗣後台州府屬各員遇此等案如有知情故縱及諱匿不報者仍照例參處如僅止失於覺察准其寬免處分認真搜捕至仇殺謀殺致斃多命之案照尋常命案開參准免扣限四箇月查參革職留緝處分得旨下部議行初浙江象山寧海交界之南田地方數百里四面環海山木叢茂國初以來永爲禁地自粵匪擾浙後有匪犯邱財青等盤據其中出洋肆劫並分築石壘圖抗官軍新貽飭官軍圍攻生擒邱財青於陣賊遂平十一月黃巖鎮總兵剛安泰管帶巡船出洋緝捕艇匪突至衆寡不敵安泰遇害新貽檄副將張其光等馳擊擒斬首逆等五十餘名事聞上以新貽未能先事預防下部議處五年二月疏陳海塘工程未能迅速集事各情形諭曰海塘爲民命所關著馬新貽督同司道嚴飭各廳弁設法籌款多購物料將土塘埽工認真保護未堵決口趕緊修築七月奏言台州府屬臨海縣所轄之北岸黃巖縣所轄之岐田烏巖寧海縣所轄之海遊亭傍等處地居山僻俗悍民強請將三縣縣丞移改分防藉資安戢下部議行六年奏保杭州府知府譚鍾麟潔己率屬才猷卓著署台州府同知李壽臻署紹興府

任內殫心民事輿論翕然海寧州知州靳芝亭守潔才明實心任事錢塘縣知縣蕭書江山縣知縣陶鴻勳清操自勵誠心愛民命均著送部引見上嘉其留意人材初新貽以嘉興湖州兩府界連蘇省時有槍匪聚衆擄劫爲閭閻害奏請親赴嘉湖巡視至是會同江蘇巡撫郭柏蔭調派員弁將首犯及悍黨數十名一併拏獲槍匪悉平尋擢閩浙總督七年七月調補兩江總督八月命充辦理通商事務大臣十月奏調候選道孫衣言山東候補道袁保慶安徽候補知縣桂中行前赴兩江備差委得旨俞允十一月宿遷商民呈訴水旱兩關擾累蔣壩商民又呈訴淮關差役需索新貽奏言蔣壩地屬安徽之盱眙本爲鳳陽關轄境淮關遠隔洪湖不應設爲子口惟查舊例乾隆十八年始爲淮關差役在蔣壩專查黃豆等六則此外無論何項貨物淮關巡役概不得過問當令淮關監督申明舊例嚴禁需索至宿遷早關係同治元年添設試行之初每年尙徵銀千餘兩近則不過數百兩旣非舊例爲數又微應請裁撤照舊例專收水關以順輿情從之十二月幅匪高歸等在山東江蘇交界處糾衆占踞民圩肆行劫掠新貽派員擒獲首逆正法九年七月新貽赴箭道閱兵事竣回署突遇人刺傷脇肋次日卒兇犯被獲訊據

稱河南人張汝祥而行刺緣由供詞閃爍江寧將軍魁玉奏入上命魁玉督同司道各官趕緊嚴訊務得確情盡法懲辦又諭曰馬新貽持躬清慎辦事公勤由進士卽用知縣歷任繁劇咸豐年間隨營剿賊疊克堅城自簡任兩江總督於地方一切事宜辦理均臻妥協方冀長承恩眷倚畀優隆茲因被刺遇害披覽遺章實深悼惜馬新貽著賞加太子太保銜照總督例賜卹並入祀賢良祠任內一切處分悉予開復伊子馬毓楨著加恩賞給主事分部行走該督靈柩回籍時著地方官妥爲照料應得卹典該衙門察例具奏用示憫念疆臣至意八月安徽巡撫英翰臚陳新貽功績奏請予諡建祠並將事蹟宣付史館諭曰本日據禮部奏請業經予諡惟念馬新貽服官安徽最久當髮捻交乘之際力保臨淮堅守蒙城厥功甚偉迨擢任浙江巡撫兩江總督所在有聲此次猝被兇徒戕害追念勛勤深堪嘉惻馬新貽著再加恩准其於安徽立功地方建祠事蹟宣付史館用示褒獎蓋臣至意旋據給事中王書瑞奏言張汝祥供詞閃爍恐事關行刺或其中有牽制窒礙之處難以縷晰推詳請旨添派親信大臣澈底根究疏入復命漕運總督張之萬會同江寧將軍署兩江總督魁玉嚴訊十月張之萬等奏言審明張汝祥曾

從髮逆復通海盜因馬新貽前在浙撫任內剿辦南田海盜戮伊夥盜甚多又因伊妻羅氏爲吳炳燮誘逃曾於馬新貽閱邊至寧波時攔輿呈控未准審理該犯心懷忿恨適在逃海盜龍啟雲等指使張汝祥爲同夥報仇卽爲自己洩恨張汝祥被激允許旋至新市鎮私開小押適當馬新貽出示禁止之時遂本利俱虧追念前仇殺機愈決同治七八等年屢至杭州江寧欲乘隙行刺未能下手於七月二十六日隨衆混進督署突出行兇再三質訊矢口不移供無另有主使各情等語入奏並請比照大逆問擬諭曰馬新貽以總督重臣突遇此變案情重大張汝祥所供各情恐尙有不實不盡若遽照所擬卽正典刑不足以成信讞前已有旨令曾國藩抵任後會同嚴訊務得實情著再派鄭敦謹馳驛前往江寧會同曾國藩將全案人證詳細研鞫究出實在情形從嚴懲辦十年二月欽差大臣刑部尙書鄭敦謹等以覆審兇犯行刺緣由並無另有主使之人驗明兇器亦並無毒藥請仍照原擬罪名比照謀反叛逆凌遲處死並摘心致祭該故督等語奏入諭曰張汝祥以漏網髮逆復通浙江南田海盜等匪竟敢乘閒刺害總督大員實屬罪大惡極旣據鄭敦謹等審訊確實著卽將張汝祥凌遲處死並於馬新貽柩前摘

心致祭以彰國法而慰忠魂逆子張長幅著照所擬按律懲辦又諭曰馬新貽公忠體國歷次剿辦海寇殄除積年匪首地方賴以安靖詎以匪盜餘孽挾仇逞兇倉卒殞命實堪悼惜著再加恩照陣亡例賜卹並於江寧省城建立專祠三月兩江總督曾國藩奏稱新貽以縣令洊陞安徽布政使當其駐軍安慶每遇商摧政事沈幾內斷言必中理厥後每莅一任從不輕事更張而卒能遇事變通其在總督任內於用人行政籌餉練兵反覆推究晝夜孜孜徧訪官紳士民僉無閒言茲因山東紳士劉毓敏等呈稱新貽於丁憂回籍時適值南捻北竄新貽辦團築圩不避艱險卒能卻退悍賊荷澤獲安洵屬有功桑梓懇請代奏准其於山東荷澤縣建立專祠七月浙江巡撫楊昌濬疏言新貽在浙江巡撫任內正值地方新復加意撫綏辦理善後事宜諸臻妥協並將海塘工程督修完固民賴以安茲據紳士陸齊壽等呈懇代奏請於浙江沿塘處所建立專祠並允之尋賜卹如例予諡端敏賞騎都尉兼一雲騎尉世職襲次完時以恩騎尉世襲罔替子毓楨襲

曾望顏

曾望顏廣東香山人道光二年進士改翰林院庶吉士三年散館授編修十三年

轉江西道監察御史十四年轉掌江南道監察御史十五年五月奏整頓科場事宜凡十四條如所請行六月遷刑科給事中八月遷光祿寺少卿諭曰曾望顏平日遇事敢言間有指陳亦皆明白曉事其有關繫國事切中時宜者無不量加採納立見施行是以將該員擢任京卿該員自當仰體朕意遇事敢言一切毀譽榮辱之念俱不應存於中十二月遷太常寺少卿旋奏請禁止廣東學政陋規允之十六年擢順天府府尹二十年授福建布政使二十三年銀庫虧短案發望顏曾充查庫御史部議褫職尋於限內將庫項賠完以主事用咸豐三年引見以五品京堂候補五年補通政使司參議六年七月復擢順天府府尹十二月授陝西巡撫七年粵匪竄踞湖北竹山縣分擾陝西平利縣境望顏派河州鎮遊擊常有等進剿協同楚軍克復竹山縣城其襄樊餘匪竄距均州之武當山望顏復飭延綏鎮總兵龍澤厚會同湖北候補道唐訓方殲除淨盡八年以推廣捐輸望顏奏請無論原籍何省准照原例銀再加四成報捐貢監生在上兌省分就近鄉試應試之時仍照順天鄉試例由同鄉印官出結印卷備文齎送學臣錄科免其回籍起文中式者由各省就近咨送禮部歸入原籍一體會試詔不准行旋以粵匪闖入

維南縣屬之雞頭關分擾商南望顏撥兵擊退之九年十月署四川總督時粵逆竄擾川省圍撲敘州府城望顏督帶陝兵赴川助剿十二月滇匪竄入川境敘州土匪勾結肆擾望顏檄屏山縣知縣黃漢章等進攻斃賊甚衆陣斬僞元帥李祖資等十年正月婺匪王帶周作亂望顏疊飭提督孔廣順等剿撫兼施隨將大巖尖山八寨賊衆解散擒王帶周於五龍寨花盤洞婺匪一律肅清先是滇匪上竄進撲犍爲縣城望顏飭提督卓陞嚴防要隘至是賊自箭板場竄至河口欲紮筏渡河官軍水陸夾擊斃賊甚多復恐渡河賊匪肆擾嘉定望顏飭總兵占泰等督兵截擊賊據觀音場官軍由黃閣寺前進戰於羅城鋪敗之賊竄踞貢井爲巢並於天池寺等處紮營數十座分途抗禦望顏飭占泰等督勇進剿屢有斬獲黔匪李志高等據長阡壩等寨經都司吳毓光攻剿官軍乘隙殺入燬長阡壩斬獲多名捷入上命望顏飭令在事文武乘此聲威分投圍剿時總兵虎嵩林由程家場進剿貢井賊匪望顏分遣勁旅截擊先後擒僞先鋒藍興盛斬僞元帥穆老五將打狗蕩礮臺數座及賊巢一律平毀三月婺匪屯聚濯水等處望顏派遊擊劉興榮等進攻賊衆滾崖墜斃者甚多生擒賊首賀世愚等餘黨悉平閏三月滇匪藍

大順闖入青神等縣被官軍擊退竄邛州望顏檄占泰馳往迎頭截剿復飭署重慶鎮總兵傅崑力防回竄旋以逆首李短搭搭攻撲嘉定府城省城戒嚴上以望顏未能先事防範下部議處賊尋陷名山縣城據之望顏復下部議處四月給事中李培祐奏劾望顏濫保軍功朦混報銷知情徇隱縱子干預沿途納賄委員滋擾徇庇劣員私開例禁縱容勒派抑勒檢舉誤參屬員徇私保薦等款上命陝甘總督樂斌偕署陝西巡撫譚廷襄查明覆奏疏入諭曰給事中李培祐以曾望顏任性妄爲聲名狼籍參劾經樂斌會同譚廷襄查明各款雖訊無贓私重情惟舉劾屬員多有粗率錯謬且明知其誤不行檢舉又令伊子查街拏賭干預公事致招物議實屬不知檢束著交部嚴加議處尋議革職暫留署任會官軍進剿名山賊匪奪獲隘口並嘉定官兵剿辦牛華谿等處賊巢屢戰獲勝其西秀黔防官軍會合黔省各營連拔茶溪老巢及紅巖坪險寨望顏復嚴飭各將弁迅圖進取尋攻奪金雞關並將圍撲雅州賊匪擊退毀嘉定賊營旋以藍逆竄陷榮經縣城隨即克復望顏下部議處五月以知府翁祖烈訐告諭曰撤任知府翁祖烈訐告上司各款經崇實查明雖有不實而事多不合曾望顏身任總督大員未能整躬率

屬種種荒謬又聽信伊子曾捷魁不能嚴加防範因而家人藉勢招搖致招物議實屬咎無可辭仍行革職留於四川聽候另案查辦六月藍逆由榮經縣犯天全州陷之望顏未能豫防復下部議處七月李短搭搭在五里浩地方築壘分竄富順宜賓等州縣楚軍追之賊竄懷德鎮望顏飭永寧道音德布擊退之餘匪遁榮昌復檄川楚各軍合力進剿敗賊於馬鞭山斃賊多名尋逆首馬源盛悔罪投誠抗拒者以次誅滅餘黨解散川滇邊界肅清十一年敕望顏回籍同治元年命來京候旨錄用尋以四品京堂候補五年授內閣侍讀學士九年卒

張亮基

張亮基江蘇銅山人道光十四年舉人捐內閣中書十七年補官二十年充文淵閣校閱二十一年隨大學士王鼎赴河南查辦事件二十二年以大工合龍出力詔加侍讀銜並賞戴花翎二十五年陞侍讀二十六年京察一等記名以道府用尋授雲南雲南府遺缺知府二十七年補臨安府知府二十八年調永昌府二十九年五月以騰越廳卡外野夷滋擾亮基籌商軍務督率有方下部優敘七月擢按察使三十年三月陞布政使八月遷巡撫十二月兼署雲貴總督咸豐二年二

月以捐備江蘇賑銀下部優敘五月調湖南巡撫八月由滇之任時粵匪竄入湖南亮基行及常德聞長沙被圍疏請防守常德有旨飭速進兵迅解省城之圍亮基乃馳入長沙尋又諭曰聞逆首洪秀全楊秀清等仍在郴州城內並分距永興縣城其分股撲省安知非牽率官兵大隊馳救省城陰圖竄擾他處爲聲東擊西之計見在各路援兵到省務將撲城股匪全數殲除毋任旁竄嗣郴州大股賊匪由小路北竄而長沙城外之賊距妙高峯負嵎抗拒屢攻未克九月亮基等飭副將鄧紹良選敢死士潛由城邊決空地道突出焚其壘斃賊多名旣而賊亦穿地道以火藥轟陷南城數丈蠶擁而上亮基飭副將瞿騰龍等堵擊之賊退乘勢追剿遂夜遁長沙解圍捷入諭曰此次省城防守八十餘日該撫等統兵晝夜嚴防內外夾攻疊挫賊鋒保衛省垣辦理尙無貽誤張亮基著交部議敘十月以岳州府城失守下部議降四級留任有旨改降二級留任十一月以長沙寶慶辰州等府土匪疊起劫掠疏請假以便宜從事允之十二月賊由岳州竄入湖北漢陽武昌相繼陷上褫湖廣總督徐廣縉職以亮基署湖廣總督尋命派委總兵晉德布等於長沙多雇船隻再挑防城楚兵千名並令鄧紹良於岳州洞庭湖一帶招募

水勇二三百名馳赴漢口爲進剿計亮基以防賊回竄爲辭意在專顧湖南諭曰賊陷岳州棄而不守合股竄踞漢陽武昌其將順流東竄已屬無疑我兵必須於上游多覓船隻豫備火具乘流駛下防剿方可得手豈可再將有用之兵置之無用之地雖湖南各處土匪亦應剿辦祇須本省防兵自可保衛張亮基有統轄兩省之責豈可置湖北於不問著仍遵前旨飭令音德布等速帶船隻赴湖北聽調三年正月瀏陽縣匪徒周國愚等作亂檄知府江忠源剿滅之二月疏陳籌辦收復撫恤各事宜三月檄江忠源等剿通城崇陽嘉魚廣濟各土匪先後平定時禮部尙書宗室奕湘疏稱湖北江西徧山產木可隨時砍伐編造木筏上安礮位上命亮基議辦亮基設三難奏寢其議五月下游踞匪分股還竄江西彭澤亮基遵旨駐軍道士洑黃石港一帶並於漫流設筏岸上結壘力遏兇鋒六月疏陳擇要防剿並分兵援江西省城略言察看地勢道士洑江面過寬難以控制黃石港江面七八里無險可扼且兩處相距甚近設防於此下游之黃梅廣濟興國等處不能兼顧惟廣濟之田家鎮地方對面爲半壁山壁立江心江面最狹稍上爲沙村對岸爲牛關磯江流駛急舟行逆水頗形艱阻茲擬於田家鎮洲尾安設木筏環

列竹篋實以沙土以禦銃礮沙篋中豫留礮眼箠上駐兵勇數百名安大礮遇有賊船上駛看準轟擊繫箠於洲洲上紮營深溝固壘以護木箠防賊由陸鈔襲之路大營安於沙村以便策應南岸可以兼顧興國陸路北岸可以兼顧廣濟陸路相距俱不過數十里兩路有警即使分兵就近堵截且廣濟甫定興國民情浮動有此重兵彈壓亦建威銷萌之道逆船進薄江西省城亟請分兵馳援而湖北據長江上游此時賊蹤較近見在已到防所兵勇計三千餘名一面分撥精壯兵勇馳赴江西聽候調遣七月兼署湖北提督尋以逆匪分竄河南回省籌辦北路防堵事宜疏言楚省北境與河南毗連向爲捻匪出沒之所見飭應山孝感等州縣迅速整飭團練加意防範適聞各匪有取道西平直徧信陽之耗信陽爲楚豫驛遞衝途信陽有警則孝感應山處處宜防而應山之黃土平靖武勝三關爲自古南北有事必爭之地孝感之九里關等處與三關皆有險可憑爲全楚門戶賊蹤雖在豫省全楚之戒備宜嚴疏入報聞尋河南竄匪由羅山入湖北黃安麻城境亮基督兵水陸夾擊殲除殆盡八月調山東巡撫命俟新任總督吳文鎔到鄂再赴新任尋以提督任務勢難兼顧疏請簡員署理從之九月江西南昌解嚴賊下

竄安慶尋由湖口上竄陷九江偪近田家鎮防所亮基飭督糧道徐豐玉等禦之
既而賊船直犯田家鎮陸路賊由彭塘分撲岸上營盤並陷興國州等處徐豐玉
失利陣亡亮基降四級留任會赴山東巡撫之任上以豫省南路兵勇空虛捻匪
出沒無定深恐竄楚之匪與之勾結命亮基由豫入東遇賊北竄卽行剿辦時粵
匪竄入直隸陷靜海大軍三面扼守東邊近海處獨缺亮基抵山東德州一帶督
防扼其沿海要路十一月請以布政使崇恩等在武定德州辦理防剿事自回省
城上切責之命仍赴德州扼要防堵十二月以江南賊勢猖獗東省兗沂曹三府
偪近淮徐飭按察使厲恩官分兵駐紮宿遷池北四年正月疏調已革布政使王
簡帶兵駐防如所請行三月江南賊闖入東境陷金鄉及鉅野亮基以該逆渡河
而北志在救援北賊必圖迅入直境遂馳扼濟寧以防閒道北竄之路旋以逆賊
攻陷鄆城欲撲范縣壽張東平等處乃復趨東平繞出賊前迎頭截剿尋擊賊於
臨清州之黑家莊斬馘甚多奪其礮臺並毀木城旋以失守屬境城池自請嚴議
得旨加恩交部議處旋以幫辦軍務大臣勝保劾亮基玩視軍務觀望逗遛並欺
飾冒功諭曰張亮基由雲南巡撫調任湖南適聞賊竄長沙卽奏請防守常德擁
大臣畫一傳檔後編五

兵折回並截留長沙軍餉舉動乖方不知時勢緩急嗣經嚴飭赴省防守城池並辦理湖北湖南善後事宜尙有頭緒是以調令巡撫山東該員交卸時賊氛將近武昌並不將以前有無布置如何守禦情形詳細向吳文鎔告知輒卽趕緊渡江專爲自全之計未及奏報起程迨抵河南卽以山東軍餉匱乏等詞入奏豫占地步朕已知其居心狡詐當經硃批訓飭該員應如何愧奮固守疆圉乃賊匪竄入東境疊陷城池以致臨清被圍重煩兵力猶不知趕赴城下與崇恩等內外夾擊由德州紆折回省繞道東平遷延不進至臨清後紮營八里莊地方距賊遙遠經勝保咨商仍不移營前進並不肯分撥練勇爲崇恩守禦之助推諉取巧已堪痛恨復向黑家莊無賊地方空放槍礮縱火焚燒閒房捏報殺賊多名冒功陳奏經該大臣查明該處並無殺賊痕迹不知張亮基是何肺腑敢肆欺罔若將其於軍前正法亦屬罪所應得姑念其平日尙能辦理地方公事張亮基著卽革職發往軍臺效力贖罪不必再留軍營俾軍務告竣後轉得希冀邀恩也五年五月奉詔釋回發往湖北軍營交欽差大臣西凌阿差遣委用六月改發東河交東河河道總督李鈞差委時給事中毛鴻賓劾勝保臨清之役袒護提督善祿妄參亮基上

遂褫勝保職御史宗稷辰疏保人才言亮基有勇肯任事而未盡其用以罪罷去臣甚惜之尋命往安徽隨同巡撫福濟辦理軍務七年六月賞五品頂帶命赴雲南幫同雲貴總督吳振械辦理剿匪事宜十二月雲南梭草塘地方漢回互鬪回匪肆行焚殺擾及宣威城亮基督兵擊敗之八年正月又敗之於袁家屯殺賊數百人立解其黨餘匪就撫捷入上嘉獎之六月授雲南巡撫十一月擢雲貴總督時臨安回匪以報復漢民爲詞聚衆攻城並分擾阿迷州等處亮基派兵次第剿平疏入上嘉其辦理得手九年正月檄守備何占標剿滅平彝縣馬頭山奸匪二月擒邱北縣匪黨瞿騰霄戮之先是雲南省城回衆就撫後時聚悍回於南城外劫奪不法並立營於碧鷄關亮基檄署安寧州知州慶安招集練目與各鄉團疊次分剿殲斃甚多至是回勢窮蹙各散歸籍又榆城順寧逆回分股犯緬寧者我兵擊毀其營六十餘座擒斬甚衆緬境悉平十月池西逆回潛入楚雄鎮南甸結夷匪滋事勢張甚亮基委署楚雄縣知縣積壽等往剿勝之復派都司高天澤等同往會剿破其營追殺十餘里楚鎮肅清又檄都司何自清攻嵩明州回逆復其城其夷匪竄踞武定州及羅次富民祿豐祿勸等縣者經各州縣員弁先後克復

十二月擊匪犯朱開甲等於鍋底槽大敗之生擒要犯諸有佩等寘諸法尋又檄守備段定邦剿大關鄉賊斬首從千餘人十年三月護理巡撫徐之銘疏保亮基之子陝西候補知府張向宸隨營剿賊疊著戰功請加獎敘亮基以軍營出力將士未邀保獎者尙多具疏辭之先是逆回勾結黑元永等并夷民滋事衆至萬餘分踞羊毛關新哨等處亮基派兵分路進剿至是并地悉平四月回匪馬合等圍攻晉寧州城檄遊擊何自清等援剿誅馬合十月因病疏懇開缺許之嗣以回夷勾結同時滋擾亮基未能先事豫防各郡縣相繼失守坐降二級留任尋因徐之銘之請命亮基暫留本任督辦雲南軍務俟新任總督劉源灝到滇再行交卸同治元年七月兼署雲南提督十一月命以總督銜署理貴州巡撫並署貴州提督亮基自滇赴黔道經四川敘州府適髮逆石達開大股由橫江來逼近郡城川軍一時未能遽集亮基與署知府孫濂等布置城防飭隨營副將楊發貴帶隊迎擊數戰皆捷郡城轉危爲安二年三月抵任時黔亂正熾黃白號匪及苗教各匪竄擾遵義府桐梓等縣踞螺螄堰亮基檄總兵沈宏富等帶隊擊之拔螺螄堰招安屯寨居民四十餘處殲餘逆於上稽場尋思南教匪又起擾府城並分撲印江亮

基檄總兵劉義方等分投進剿五月事平並復普安安南二縣七月督飭官軍克古州下江八月遣將擊號匪於桐梓之鼎城擊苗匪於水城廳之馬龍勝皆全勝又以黃白號匪勾結黔西州匪徒四出擾掠亮基督派兵弁馳剿擒匪首何潤科等梟之餘黨投誠者萬人黔西肅清三年正月湖南敗匪合夥黨包茅仙竄松桃廳境陷石峴衛汛城亮基檄總兵周洪印等馳援立克之嗣尙大坪逆匪約黨徑撲省垣亮基督同藩司龔自閔等率兵登陴飭沈宏富等軍於城外往來衝擊斃賊千計生擒賊目百餘名餘賊遁去收復修文縣城省城遂安先後疏保出力將弁均得旨陞賞有差三月因病疏請開缺有旨賞假一月調理時賊竄擾清鎮縣襲陷龍里縣城檄總兵林自清趙德昌等攻拔之四月以興義府縣各城久被賊踞派知縣陳聘儒等帶兵進剿復縣城五月逆首何二等糾衆二萬餘人復攻清鎮並分陷定番廣順長寨各城牽制援兵林自清等時出奇兵奮擊賊大潰清鎮解嚴其定番等城亦經趙德昌先後收復奏入上嘉勉之又飭知縣邵維新等剿龍泉湄潭二縣賊其所屬之申岑等處爲黃白號匪老巢次第剿洗九月克滇西衛城十一月復興義府城四年四月復以病體難支續請開缺得旨賞假兩月五

月遣兵擊賊於尙大坪焚其巢閏五月黎平髮苗各匪被剿窮蹙匪首陳輝良率黨乞降六月克黔西州七月石阡府失守旋克復之五年克永寧州及荔波縣六年以捐助餉銀下部優敘先是翰林院侍讀學士景其濬劾亮基玩兵侵餉縱暴殃民上命布政使嚴樹森查辦至是查明入告諭曰張亮基以封疆大吏不知振作竟有辦事粗率袒護劣員縱容子弟濫保家丁等情著交部嚴議尋褫職十年卒十一年湖南巡撫王文韶疏陳亮基功略言咸豐二年粵逆撲犯湖南亮基由湘春門梯城而入激勵將士晝夜巡視城防立持危局克解城圍其後瀏陽土匪周國愚等聚徒乘間竊發距省祇一日程朝暮不能自保亮基派兵赴剿出賊不意一鼓平之至今紳民感德不衰請於湖南省城建立專祠光緒元年貴州巡撫曾璧光疏言亮基於同治二年三月到任正值軍務喫緊上下游徧地皆賊餉精奇紕軍飢民困全省岌岌可危亮基籌剿設防心力交瘁時或兵勇索餉鼓譟必多方撫慰激以大義自將領以下無不知感知奮合力禦敵省垣恃之無恐地方賴以粗安嗣因案被議罷職去黔臣以菲材接任撫篆幸得埽除羣醜底定全疆而措置一切實本亮基規畫爲多茲亮基已身故考其在黔政績清廉慈惠民間

被其德澤者至今稱道弗衰請開復原銜並於貴州建立專祠先後得旨如所請
行子向宸按察使銜候補道光宸三品銜候選道翊宸工部郎中拱宸知府銜東
河候補同知

何桂清

何桂清雲南昆明人道光十五年進士改翰林院庶吉士十六年散館授編修十
七年充河南鄉試副考官十九年二月大考二等五月充貴州鄉試正考官二十
二年正月陞詹事府右春坊右贊善五月命在南書房行走旋轉左贊善十一月
擢司經局洗馬十二月充日講起居注官二十三年二月京察一等記名以道府
用三月大考二等十二月遷翰林院侍講二十四年三月充會試同考官五月充
廣東鄉試正考官六月陞太僕寺少卿二十五年九月擢光祿寺卿十二月遷太
常寺卿二十六年提督山東學政二十七年陞內閣學士兼禮部侍郎銜仍留學
政任二十八年擢兵部右侍郎七月丁繼母憂咸豐元年五月服闋署吏部右侍
郎命仍在南書房行走充實錄館副總裁八月復補兵部右侍郎閏八月充順天
鄉試覆試閱卷大臣十月充順天武鄉試較射大臣十二月署戶部左侍郎兼管

三庫事務旋調戶部右侍郎兼管錢法堂事務二年三月充會試副考官旋充覆試閱卷大臣四月偕尙書祁寯藻等議覆戶部左侍郎王慶雲會同山西巡撫兆那蘇圖酌議河東鹽務留商收票先課後鹽各節疏請通籌全局設法妥辦又議覆御史黎吉雲奏請行鈔並早遞江蘇候補道胡調元刊刻稟稿各款謂該道所論鈔法與原議大略相同惟鈔上銀兩數目統限一兩爲準未免過於畸零不如整散兼製行用較爲利便其議發鈔並議收鈔尤爲見在試行第一關鍵請自京師爲始所有應放各項酌覈情形分別以鈔搭放其京中官民所交常捐大捐並一切交官等項亦酌覈情形分別以鈔搭收總期章程畫一上下均平俾用者毫無疑慮又議覆左副都御史文瑞等奏請變通鈔法各條謂變通舊法易銀鈔爲錢票其論錢票之利用切中事情而條款節目尙須酌量熟籌方歸完善請就京城適中之地設立官錢總局卽將寶源寶泉二局每月鼓鑄卯錢全數運解作爲票本並由部庫應放款項內酌提見銀藉資轉運凡官俸兵餉以及各衙門支用雜款分成搭放奏人均得旨依議尋以前署兵部侍郎任內失察副都統容照服闋漏未調取引見部議罰俸六箇月五月歷充大考翰詹閱卷大臣考試廕生閱

卷大臣七月充署經筵講官尋議覆御史富興阿奏籌庫款倉儲各條疏言庫款捐輸向俱收銀而部庫每月搭放錢文此後捐輸應請交納銀錢各從其便至藍甲米石原以養贍王府包衣及津貼分府宗室之用若將應領米石驟議裁減未免有妨生計應毋庸議詔如所請八月提督江蘇學政三年正月捐輸軍餉交部議敘時粵匪竄據江寧江南府州各屬多被蹂躪勢難照常分試桂清奏請就能考之處援因災歲科連考成案變通考試如所請行十一月調禮部右侍郎旋調吏部右侍郎均留學政任四年四月以江蘇捐輸奉旨獎敘尋調倉場侍郎命馳驛卽赴新任閏七月海運完竣奏請鼓勵轉運各員並請開復愧奮自效之監督阿靈阿等均得旨俞允九月授浙江巡撫時賊據金陵扼長江之險江皖各屬戒嚴徽寧爲蘇浙屏蔽籌兵運餉皆歸浙江辦理桂清抵任卽派兵密布要隘日以黃池當蕪湖江口之內爲蘇浙咽喉急檄都司江長貴帶兵駐廟埠高淳一路以扼其衝並派兵馳赴黃池助參將楊瑞乾防剿飭知縣曾承禧帶兵駐灣沚同知裕英等帶兵駐徽州又調江蘇得勝軍會防寧國各隘十二月賊大股犯黃池各軍會合提督鄧紹良兵擊走之斬馘千餘樂清匪徒瞿鎮海等糾黨闖入縣城副

將姚武成等被戕桂清撥兵進剿並檄知府瑞春等會兵內外夾攻克之生擒瞿鎮海正法餘黨擊斃殆盡五年正月賊大隊犯石埭之琉璃嶺遊擊周天受戰不利嶺隘盡失賊遂由羊棧嶺竄擾黟縣桂清調道員徐榮帶兵迎剿屢戰皆捷進至漁亭賊衆大至徽勇先潰徐榮督軍力戰衆寡不敵死之適所派江長貴繼至擊斬千餘賊始退去桂清爲徐榮請卹建祠並上言徽郡與浙省毗連先後派往兵勇數千是爲之謀者已不遺餘力但必主客同心相爲表裏方能濟事乃聞該郡民團不甚可靠且黟縣之警徽勇先潰逆匪與土匪卽乘機勾結而入雖前經舉行團練而苦於經費不足地方官不爲接濟甚至兵餉亦不豫籌遊擊周天受一軍竟有七日絕糧者該郡官紳如此雖有客兵安能代守疏入諭曰徽州練勇籌餉事宜已諭怡良等嚴飭府縣實心辦理何桂清仍當不分畛域力圖援應以固浙防方徐榮之挫也周天受等各軍相繼飢潰徽州被陷所屬州縣亦多失守二月桂清檄知府石景芬及副將魁齡等帶勇分路進攻並調礮船水師協剿石景芬等從紫陽橋一帶進兵連戰皆捷遂將徽州府城克復三月復休寧縣城賊分股四竄桂清飭副將阿麟保駐昌化之昱嶺關知縣湯成烈駐於潛之千秋關

以扼由徽至杭之路檄知府張玉藻駐淳安之威平副將豫祺等帶兵輪巡以扼由徽至嚴之路並令金衢嚴道劉成萬駐嚴州應援之威平而下桐廬之七里瀧爲由嚴至省要衝派職員黃一清等率水師防之由徽至衢以開化常山爲門戶檄總兵富勒興阿駐常山都司封九貴駐開化兼防徽饒兩路之賊時休寧敗賊糾黨萬餘竄陷婺源桂清急飭總兵鄧紹良與知府石景芬等會兵追剿生擒僞司馬僞將軍等二十餘名餘匪竄江西遂復婺源捷入上嘉獎之四月桂清以浙省防剿孔亟奏留學政萬青藜督辦防務並請在籍前任河督潘錫恩前任鹽運使陶士霖等辦理糧臺又以前任浙江糧道胡元博總辦局務出力請開復原官已革守備薛舉奏留募勇先後均得旨俞允時安慶省城被陷皖撫移駐廬州徽寧兩郡遠隔江南一切遷調防剿之事諸多不便御史王茂蔭暨安徽學政幫辦軍務沈祖懋先後奏請暫將徽寧改歸浙撫管轄桂清將礙難統轄各節奏復上命桂清仍兼理徽寧兩郡事宜並諭曰徽寧兩府何桂清自應通盤籌畫應如何派撥兵勇扼守要隘之處卽著妥爲布置至逆匪之得以肆擾總由土匪潛爲勾結此等不法匪徒亟應嚴密搜捕以絕根株並著何桂清諭令該處紳士辦理團

練杜絕內外勾結之萌一切善後章程均著設法辦理以期周密江西賊匪由樂平德興竄入弋陽浙江衢州更形喫重該撫務宜實力防堵以杜內竄至衢嚴與江西處處毗連閩浙總督王懿德已派總兵饒廷選等扼援嚴州此際何處喫緊卽從何處進兵勿得株守一隅著何桂清斟酌情形妥爲調遣尋以江西賊股竄陷廣信玉山郡縣遂犯浙境攻陷開化進犯遂安桂清急調鄧紹良等合力兜剿並飭都司馬永清扼之航頭賊退去復竄陷休寧桂清復飭周天受石景芬等力剿復其城旋克復黟縣石埭兩城徽州一律肅清桂清遂飭周天受馬永清各軍分紮漁亭崇覺寺等處扼守以固徽郡門戶奏入上嘉其剿辦妥速優詔獎之時皖南近與賊隣防剿善後各務在在需人桂清奏請添改鎮道各員以專責成上遂命石景芬爲徽寧池太廣道加按察使銜得以專責奏事添設總兵專司防剿以副將豫祺升任之兼命前侍郎張芾經理團防並諭曰皖南旣設鎮道需兵需餉仍恃浙江金陵不分畛域互相聯絡使可戰可守則地方日有起色該撫如有所見仍當隨時奏報旋以石景芬率行奏請統轄全局並請帶兵協剿蕪湖桂清劾其私心自逞有意邀功並前招募不實各款褫其職總兵豫祺亦以人地生疏

難勝重任桂清奏罷之請以遊擊江長貴調署又請留張芾督辦徽寧防務奏留在籍知府何國琛等辦理浙江鹽務並以本年杭嘉湖所屬災歉米質未能一律純潔奏請紅白兼收秬稷並納且請鼓勵海運船商人等先後奏入均允之十一月以率屬倡捐米石得旨下部獎敘先是安徽亳州蒙城一帶時有捻匪出沒經副都御史袁甲三督師剿辦匪徒斂跡自甲三緣案革職查辦捻勢復熾江蘇河南兩省均被竄擾桂清上言捻匪蔓延三省萬一與江南逆匪河北饑民互相勾結必益鷓張亟宜設法翦除毋貽後患見雖蒙特派都統容照往辦而該匪東竄西奔勢恐難於兼顧查毫穎各境惟袁甲三最爲熟習聞該革員見在常州聽候查辦如果有應得之罪固不可量從末減若罪止革職其才尙爲有用且人地實屬相需應請敕令袁甲三馳往該處協同官紳剿辦當可得力奏入上以袁甲三前在臨淮辦理不善著不准行旋命開復袁甲三原官督師援剿十二月查覆侍郎王茂蔭奏參前任歙縣知縣劉毓敏隱存捐款並安徽學政沈祖懋信任練首潘炳照糜餉縱練尙無其事惟劉毓敏潘炳照辦理均有不合請分別褫奪嚴追奏入詔如所請時粵賊大股竄擾江西各屬嚴衢與江西接界兵力單薄桂清奏

請飭令金衢嚴道羅澤南急赴江浙之交扼要剿辦上以羅澤南襄辦武漢正在得力不便調回乃命張芾總理徽婺衢嚴事宜仍與桂清會同籌辦先是湖南巡撫駱秉章奏撥准鹽十萬引由浙江運赴湖南六年正月桂清以淮鹽運楚必須藉資商力私販仍難盡杜且恐停滯浙河隨處售賣又與浙省餉鹽同途並運亦有擁擠之虞事多窒礙請停辦運從之四月桂清檄提督鄧紹良出建平剿辦寧國踞賊添派總兵秦如虎等由孫家埠汪家山進剿復經副將都隆阿等分路夾擊遂直逼寧國府城桂清又以浙省額兵不經戰陣多難倚用奏請裁撤而以軍營出力保陞將弁酌留閒補並請以浙營壯勇陸續挑補兵額得旨下部議行時江西寧都會匪勾結粵匪竄擾廣信八月桂清調總兵饒廷選擊退之賊乘虛竄襲太平桂清檄署皖南鎮總兵江長貴剿敗之賊復由焦村羊棧嶺一帶撲踞祁門縣城江長貴追躡之圍逼城下賊遁去九月江西賊由德安竄陷安徽婺源並結各路匪徒攻踞休寧桂清移咨張芾派兵夾擊遂將休寧克復十月以積勞成疾籲請開缺調理得旨賞假兩月安心調理俟簡放有人再行開缺交卸十一月皖南各軍連獲大捷克復寧國府城桂清疏入上嘉其不分畛域調度有方賞戴

花翎七年二月詔以二品頂戴署理兩江總督卽赴新任時江寧久爲賊踞大江南北郡縣多被淪陷將軍和春等駐師鍾阜爲規復江寧之計桂清駐常州籌濟餉項因淮北鹽綱道梗停運正陽關等處雖已肅清而餘匪尙多商販未能通行奏請乙卯新綱先行派辦額引認運到壩俟河南通行再接續配運又以寶山屬之五岳墩龍王廟等處海塘被風潮激塌奏請捐修又查明御史張興仁奏劾前任長洲縣知縣王如林匿荒包庇各款並無實據並請開復督辦團練之知府溫紹原獎敘捐輸軍餉之在籍藩司王藻紳士潘誦誥等奏參濫保兵丁之都司陳國柱均得旨俞允六月實授兩江總督上以在籍中允馮桂芬有徇庇捐戶等情諭令桂清查參八月奏稱馮桂芬鄉評毀譽參半其捐輸吳江太湖等處均由衆紳公議尙無包庇情事詔毋庸議時以京米缺少戶部奏請江蘇浙江招商買米桂清飭布政使王有齡等設局趕辦速運天津並議定商販章程奏上詔優獎之又以江蘇合屬捐輸踴躍奏請加廣文武中額並請加廣各屬學額允之九月江寧踞賊分黨竄踞鎮江瓜洲都統德興阿先進兵克復瓜洲十一月提督張國樑等合兵克復鎮江府城捷聞諭曰何桂清籌濟軍餉不遺餘力能令士飽馬騰奮

勇用命加恩賞加太子少保銜八年四月以淮南引鹽豫籌銷路請派候補鹽運使金安清前往湖北察看情形又以丹徒運河涸淺奏請捐濬以工代賑從之時靖江吳江鎮洋等縣均有盜匪搶劫桂清奏劾廢弛捕務之署知縣翟鏞觀等褫其職通州各屬瀕海地方匪徒嘯聚出洋肆劫桂清檄遊擊文裕等購緝緝捕先後拏獲盜犯陳小胖子等四十七名訊治如律並將各處賊巢一律平毀十一月命桂清爲欽差大臣辦理各國通商事務九年正月荆溪縣蘭莊地方匪船滋事都司方錦榮緝捕被戕桂清派兵剿平之又以揚關所轄白塔等四口徵收已儘數撥充軍餉實無盈餘請俟江北軍務平定再將關閘復設並請獎敘籌餉之布政使王有齡及糧臺出力各員均允其請二月大學士彭蘊章奏收獲匿名書函事涉蘇州漕弊並有牽涉彭姓之處上令桂清及江蘇巡撫徐有壬確查參奏並諭令因時整頓三月以率屬捐濟皖省賑需詔查明子弟覈給獎敘五月以江南鄉試因亂久停偕巡撫徐有壬遵旨會議奏請借用浙闈舉行鄉試並條陳章程分別辦理九之十一月奏請故提督向榮入祀江蘇名宦祠並請簡任布政使薛煥鹽運使喬松年等兼理江蘇糧臺詔從其請十年正月賞加太子太保銜御史

林之望奏參督辦軍務侍郎勝保提督李世忠安徽巡撫翁同書道員黃元吉等各款命桂清暨提督和春查奏尋奏稱或事出有因或並無其事惟勝保退守蔣壩正軍務緊急之時未能拒絕將弁慶賀生辰實屬不知遠嫌疏入得旨翁同書等免議勝保以副都統降補二月賊由廣德竄入浙省杭州失守浙江巡撫羅遵殿殉難上令桂清等速派軍應援時桂清已檄提督張玉良等帶兵援浙馳抵大關立將武林錢塘門外及昭慶寺賊壘全行掃蕩杭州將軍瑞昌當賊陷省垣時堅守駐防內城至是亦出兵夾擊將城隍山教場屯聚之賊斬馘殆盡遂復杭州省城捷入諭曰何桂清派兵援救不分畛域深堪嘉尚著先行交部議敘方浙江之有警也蘇常戒嚴商販裹足不前釐捐各務減色通省軍需款項均不敷用桂清偕巡撫徐有壬等設法籌辦毫無所絀並能兼顧江北清江各營經漕督庚長等奏其功上深獎之三月溧陽埠踞賊糾黨上竄冀由厚圩犯撲常州桂清檄總兵馬得昭等督軍分路剿平之又檄副將劉成元等擊敗圍攻金壇城之賊總兵熊天喜等克復廣德州城賊遂南竄乘虛撲陷江陰飭常熟縣知縣周沐潤等督同各路河勇攻復之旋以江寧大軍失利和春張國樑等陣亡賊分股東竄官軍

水陸防禦之師皆潰丹陽亦陷桂清退駐常熟自請議處諭曰何桂清自丹陽失守卽思前往蘇州見又輾轉退至常熟以照料糧臺爲詞希圖掩飾實屬畏葸無能有負委任著卽革職來京聽候審訊四月江蘇巡撫徐有壬奏劾桂清退避各節復諭曰前因何桂清輾轉退至常熟當經降旨革職來京聽候審訊茲據徐有壬所奏桂清自丹陽失守以後旣不能固守常州阻扼兇鋒以總督重臣輒思逃避見在常州紳民尙能登陴固守而該革督節節退守以致賊氛愈熾實屬殃民誤國著卽拏問交徐有壬派員押解來京聽候審訊十一年五月給事中唐壬森奏請將桂清趕緊解京諭以何桂清日久尙未到京著薛煥查明該革員見在何處逗遛卽行派員押解迅速起程並著沿途各督撫催令前進不准稍涉延緩同治元年五月解送到京上令大學士會同刑部審定罪名旋經給事中郭祥瑞及給事中謝增卞寶第王憲成何桂芬御史何兆瀛聯銜具奏均以桂清情罪重大請速正典刑以昭炯戒得旨何桂清身膺總督重任輒敢棄城逃避致令全局潰敗實屬罪無可逭惟朝廷明慎用刑方足以伸國憲而昭公允著大學士六部九卿翰詹科道將何桂清所供並給事中郭祥瑞謝增等各摺片公同會議定擬迅

速具奏尋桂清呈出司道公稟刑部奏請查辦諭以該革員呈出公稟一件係前任江蘇按察使查文經前任江寧布政使薛煥前任江南鹽巡道英祿江安糧道王朝綸於丹陽失守後聯銜稟請何桂清退守蘇州各情該司道等均有地方之責當常州危急之際應如何幫同總督竭力守禦乃聯銜稟請退守蘇州顯係見事危急意在同逃徐有壬原參摺內亦有何桂清率領地方官逃避之語若不從嚴查辦何以肅軍律而飭官方著曾國藩李鴻章將該司道據實查明參辦六月大學士桂良及大學士銜禮部尙書祁寯藻等遵議罪名請旨諭曰前據大學士會同刑部定擬何桂清罪名以情節較重於斬監候律上從重擬以斬立決當因何桂清曾任一品大員復諭大學士六部九卿翰詹科道再行會議茲據大學士桂良等公同會議請仍照原議將何桂清比照守邊將帥被賊攻圍不行固守而輒棄去因而失陷城寨者斬監候律上從重擬以斬立決復據大學士銜禮部尙書祁寯藻等各摺以刑部原奏卽稱徧察刑律如臨陣而退棄城先逃等條均罪至斬監候而止明知舍此本律不能改引又云情罪較重擬以斬決是爲擬加非律非臣下所得擅請等語此案既疊經廷臣等會同刑部定擬罪名自應按律科

斷卽不必於法外施刑以昭公允何桂清著仍照本律定爲斬監候歸入朝審情實秋後處決此係爲查照定律詳慎用刑之意起見非爲何桂清情有可原將來可從末減致蹈輕縱也九月以刑部招審冊內未將桂清罪案奉諭旨緊要之語錄入嚴旨申飭十月刑部具題朝審情實守犯本上得旨已革兩江總督何桂清一犯因廷臣會議互有異同酌中定議將該犯比照帶兵大員失陷城寨本律予以斬監候秋後處決已屬法外之仁今已秋後屆期若因停句之年再行停緩致情罪重大之犯久稽顯戮何以肅刑章而示炯戒何桂清著卽行處決遂棄市

李續宜

李續宜湖南湘鄉人兄續賓起義勇討賊續宜以文童隸部下咸豐四年十一月隨克江西泰和安福授從九品五年七月克義寧州城擢知縣六年從續賓剿賊湖北累戰皆捷陞同知賞戴花翎旋克武昌漢陽湖北巡撫胡林翼奏續宜功多諭曰李續宜隨伊兄籌剿賊匪頗資得力著以知府用加道銜七年六月剿賊黃州戰於壩崎山三路包鈔毀賊壘六七月攻蘄水黃岡連界之馬家河火石港柳林灣賊壘賊傾巢來犯續宜率隊伏山而行出其不意突擊之賊亂衆軍乘之毀

壘四十移營蘄水皖賊萬餘來援遇之於月山誘賊至山角以劈山礮轟之賊潰直擣賊巢焚賊壘六十三破僞城五捷聞詔以道員用賞伊勒達蒙額巴圖魯名號九月會克江西湖口縣十月逆酋韋俊率二萬衆復竄湖口續宜駐蠓虬山分兵一出馬影橋一出流澌橋一扼勞家渡賊來拒擊卻之而西洋橋排龍口二賢寺之賊直趨蠓虬山續宜麾三路軍奮擊殺賊千餘援賊屯彭澤泰坪關續宜馳抵磨盤山以正兵誘敵以伏兵夾攻賊敗遁八年四月賊陷黃安續宜親攻北門平其四壘賊夜竄遂復黃安九年四月授湖北荆宜施道六月逆酋石達開率衆數十萬自江西南安府犯湖南境掠祁陽攻寶慶甚急湖北巡撫胡林翼飭續宜率師赴援續宜渡資江而軍賊數萬薄營續宜麾軍分擊之賊衆大潰旋造浮橋渡江官軍蹙之皆溺越日賊悉精銳來犯續宜自率騎兵蹂之賊復大敗遂趣諸軍分擣其巢賊屍枕藉賊乃渡江東竄土以續宜赴援神速加布政使銜七月續宜追及賊於賀家坳石達開以死黨二萬人拒戰續宜急擊之賊敗走遂合援軍馳之斃賊無數餘賊遁廣西楚境肅清十年九月陞安徽按察使時楚軍攻安慶久未下而僞英王陳玉成率悍黨十萬衆自廬江上竄圖解安慶之圍桐城西南

賊壘布滿十月續宜督軍往剿與副都統多隆阿設伏誘賊賊嬰壘不出多隆阿自挂車河掠賊壘而北續宜自新安渡掠賊壘而南賊傾巢出戰戈旂如林官軍夾擊盡破棠梨山尊上庵香鋪街望鶴墩賊壘各營會合裹賊於中呼聲動天地賊屍枕藉流血成渠共破賊館百餘處平賊壘四十捷聞賞二品頂戴十一年正月擢安徽巡撫時湖北孝感德安均爲賊踞三月續宜偪孝感城下與廣東惠潮嘉道彭玉麟水陸夾攻乘夜縱火縣城立復進攻德安六月竈地道克之七月會克武昌縣並派員會克通城咸寧蒲圻崇陽等縣八月署湖北巡撫官軍克復安慶省城以續宜有隨同籌辦功賞穿黃馬褂尋授湖北巡撫命駐湖北安徽交界地方督辦軍務十月官文及續宜以官軍克復黃州府城情形上聞上以調度有方褒獎之十一月豫捻竄擾湖北光化穀城均州及棗陽襄陽等處皆擊走之是月調安徽巡撫同治元年二月黔匪攻陷湖北來鳳縣城令臬司劉嶽昭攻拔之石逆復由龍化闖入楚境並窺施南府亦經嶽昭敗之三月命幫辦欽差大臣勝保軍務時捻粵各匪合攻安徽潁州府已數月圍急續宜令記名提督成大吉總兵蕭慶衍渡淮來援大吉軍至大橋集賊以步騎四萬餘張兩翼圍官軍官軍殊

死戰殫悍賊千餘賊乃卻是夜賊悉衆圍慶衍營慶衍開壁縱兵擊之大吉應之於外賊大潰斬馘二千擒首張落刑復盡驅攻城匪衆來拒官軍轉戰而進賊走穎圍解事聞得旨褒獎五月疏言天堂巡檢馮焯之子馮福基年十四歲爲賊所獲以藥置飯中毒殺賊十七人亦自仰藥死童年智烈請予旌卹從之霍邱縣城久陷於賊續宜令道員蔣凝學攻復之並剿撫附近諸賊墟奏入上嘉其辦理安速七月命爲欽差大臣督辦安徽全省軍務旋丁母憂上以安徽軍情喫緊續宜簡任巡撫以來辦理深合機宜命在軍營穿孝百日改爲署理巡撫賞銀治喪又諭欽差大臣僧格林沁蒙亳徐宿等處剿匪事宜與續宜會商籌辦八月疏請奔喪甚力諭曰李續宜瀝陳哀悃籲懇賞假回籍覽其所奏出於至誠且該撫舊病未痊若令其在營穿孝強抑悲哀非所以示體恤著賞假百日回籍治喪假滿後卽馳赴安徽軍營接署撫篆惟見在安徽軍務甫經就緒鎮撫機宜在在需人李續宜著俟唐訓方抵任後再行回籍該撫當體朝廷破格奪情之意務以軍事爲重毋再瀆請閏八月尙書羅惇衍大學士賈楨先後疏言皖省軍情緊要請敕續宜旋任視事得旨該撫到籍後趕緊料理喪事剋日旋皖任事毋庸按定假滿始

赴署任二年四月命續宜會合僧格林沁等兜剿逆練苗沛霖續宜途次患病疏請開缺專辦軍務允之十一月卒經湖南巡撫惲世臨奏言續宜治軍嚴整日以忠義禮讓訓勉士卒身經數百戰未嘗挫失自其兄續賓敗沒於三河續宜並統其衆毅然以滅賊爲己任其爲皖撫革除苞苴有惠政百姓賴之實屬不可多得之才人望鄉評同稱惋惜諭曰前任安徽巡撫李續宜由諸生帶勇剿賊忠勇奮發沈毅有爲與其兄李續賓戮力行間受文宗顯皇帝特達之知洊擢封圻轉戰湘鄂江皖數省屢克名城戰功卓著咸豐十年間逆匪石達開竄擾湘南該員統師援剿力解寶慶之圍厥功尤偉朕御極後調任湖北安徽巡撫辦理一切深合機宜上年因丁母憂賞假回籍治喪本年復准開缺專辦皖北軍務旋因患病節次賞假回籍調理方冀漸起沈疴長資倚畀茲聞溘逝悼惜殊深著加恩照總督軍營病故例賜卹任內一切處分悉予開復應得卹典該衙門察例具奏並准於湖南湖北安徽省城寶慶府城及原籍湘鄉縣城建立專祠其歷年戰績著官文曾國藩詳查具奏宣付史館伊父李登勝著賞給人錢四兩並著該地方官以時存問伊子一人尙幼俟及歲時由該部帶領引見尋賜卹如例予諡勇毅三年七

月上以金陵克復加恩有功諸臣賞續宜子直隸州知州光緒十一年安徽巡撫盧士杰以續宜與西安將軍多隆阿功德在民請將民建私祠改於潛山縣建立專祠列入祀典以彰忠藎而順輿情允之十五年慈禧端佑康頤昭豫莊誠皇太后歸政追念功績最著諸臣各賜祭一壇續宜與焉

張芾

張芾陝西涇陽人道光十五年進士改翰林院庶吉士十六年散館授編修十八年充會試同考官十九年二月大考二等遇缺題奏賞文綺五月充廣東鄉試正考官二十年擢詹事府右春坊右中允二十一年三月充會試同考官四月陞翰林院侍講十月署日講起居注官十二月轉侍讀二十二年四月命在南書房行走八月擢右春坊右庶子九月轉左庶子二十三年三月大考一等以少詹事陞用四月補缺七月充江西鄉試正考官八月授安徽學政十一月調江蘇學政二十四年陞內閣學士兼禮部侍郎銜二十五年授工部右侍郎兼管錢法堂事務均留學政任二十六年抵京命仍在南書房行走二十七年教習庶吉士二十八年八月調吏部右侍郎九月署工部右侍郎十一月兼署戶部右侍郎均兼管錢

法堂事務十二月充經筵講官二十九年七月署戶部左侍郎兼管三庫事務芾自二十七年至是年歷派充舉人覆試庶吉士散館進士朝考大考翰詹考試試差閱卷大臣八月授江西學政三十年正月以被參江西袁州協副將達崇阿廢弛營務挾優縱子九江府知府劉熾昌侵蝕公項玩視民命諭芾確查密奏尋奏請分別傳訊褫職允之是月文宗顯皇帝登極詔陳言芾以四條奏入一明黜陟以勵人材一寬出納以培元氣一禁靡費以端民俗一求制勝以重海防上嘉納之尋命查江西巡撫陳旻被參各款十二月查明分別奏入得旨陳旻著卽革職聽候查辦旋經陳旻奏參前任江西學政兵部侍郎孫葆元見任學政張芾收受陋規致江省鉅虧上命兩江總督陸建瀛查奏尋查明孫葆元張芾考試均係循照舊章並無格外需索奏入得旨著無庸議咸豐二年正月調吏部左侍郎三月調刑部左侍郎均留學政任八月命署江西巡撫十月以捐備軍餉下部優敘十一月粵西會匪竄入湖南陷岳州命芾赴九江防堵十二月實授江西巡撫三年正月匪復竄湖北攻陷武昌申諭芾於大江兩岸節節扼防賊旋竄入九江芾奏請從重治罪得旨革職留任見在賊竄下游著卽回省於沿江一帶密爲防範會

欽差大臣湖北提督向榮將兵東下九江賊匪竄出旋奏言逆匪東竄本年漕運關繫綦重可否敕下廣東督撫招商買米運至天津實於京倉有裨經部議覆請敕兩廣總督勸諭紳民捐米仍照輸銀獎勵從之時粵逆竄踞江寧大兵雲集需餉浩繁均由江西轉解芾奏稱各省應解江西接濟江南軍餉其未解各款請由戶部查明嚴催應由江西經過者江西轉解如距江寧較近卽徑解大營以免遲誤從之五月率屬續捐軍餉下部優敘尋以江寧久爲賊踞芾奏籌設江防並咨兩湖督撫撥兵會剿得旨該逆被剿窮蹙難保不回竄上游著該督撫各就地方情形擇要布置四月有賊船千餘隻揚帆自江寧回竄芾檄飭湖北臬司江忠源星夜馳赴安慶下游相機剿辦續奏官兵擊賊敗回九江探聞安慶業已失守請敕催江忠源迅速赴剿又奏賊船蔽江謀犯江西請添兵援應均報聞賊船旋入湖口芾奏拏獲奸細四十餘名見在豫備守禦江忠源亦奏兼程馳赴江西省城諭曰所奏拏獲奸細至四十餘名其所帶布袋及偽號封條難保非遣散後未暇燬棄之物該撫仍當會商分別應剿及應遣散之處妥籌速辦六月奏稱賊船乘北風大作撲犯南昌江忠源督飭兵勇分三路直撲賊隊奮勇剿擊斃匪百餘名

匪復拚死回撲知府覺羅耆齡林福祥等然礮轟擊該逆潰走並請撥兵援救旨令湖廣督撫迅速撥兵應援嗣奏連日縋城攻剿先後獲勝該逆於永和得勝門外連紮三營江忠源派兵進擊焚燬賊壘賊船芾與在籍尙書陳孚恩登城督陣兵勇分撲賊營殲賊甚夥川楚及九江南昌各勇三面接應鏖戰二時之久賊始敗退惟兵力稍單攻剿總未得手請敕湖廣督撫迅撥精銳一鼓殲除疏入諭曰逆匪攻撲南昌兵勇縋城殺賊疊獲勝仗江忠源所帶楚勇尤能勇往出力見在向榮已派鎮將大員帶兵馳赴江西湖北湖南各督撫亦撥將弁兵勇助剿蠢茲醜類不難指日蕩平也旋奏稱賊用地雷轟城城垣傾蟄六丈餘兩旁膨裂各三四丈匪又施放火箭槍礮子密如雨江忠源督勇挺立缺口指麾衆勇血戰逾時逆勢始卻芾等督員搶築缺口一律完全是日斃匪約五六百人奪獲器械六十餘件疏入賞江忠濟五品頂戴花翎餘陞敘有差旋因逆匪竄入南康復擾及湖口彭澤奏請從重治罪諭曰湖口彭澤雖據稱並未失守難保非飾詞稟報所請從重治罪俟圍解後再降諭旨七月奏逆匪撲城江忠源督飭員弁擊毀賊數壘總兵馬濟美等兩路夾攻殲賊三百餘名見於永和章江門外紮營爲左右翼偪

近賊巢並掘濠甃聽以防地道得旨辦理甚合機宜著趕緊剿辦東西四門防守較易不可稍存大意旋奏逆匪復用地雷轟城塌卸三處均經江忠濟守備李朝輔等嚴督兵勇奮力堵擊又馬濟美等自永和等門分路追殺前後殲賊二百餘名城垣趕緊修築一律完復得旨嘉獎又奏未幾賊撲大營馬濟美整隊出敵遇賊伏中矛陣亡官軍勢卻芾於城上督放大礮擡槍適中賊隊將弁出城分路攻剿殺賊無數匪大敗泅水而逸上以芾奮力督戰轉敗爲功復傳旨嘉獎會河水漲發逆匪乘閒竄入瑞州府城芾下部議處八月豐城高安相繼失守泰和縣土匪滋事竄擾萬安並分攻興國知縣潘安國同在籍武進士韓進春登陣守禦匪乘夜爬城兵勇奮力擊退該縣各堡首事約集助剿斬級二百十三顆生擒百七十一名焚燬賊營三座餘匪奔逃奏入報聞上嘉獎之九月江西省城圍解芾等會奏略曰逆匪攻城日久城內時出奇兵兇鋒漸挫連日於城頭分布大礮轟擊賊壘並先後奪毀賊船數十擒斬逆匪數百名燒斃溺斃無數奪獲礮械多件餘匪下竄見派將弁兵勇繞出賊前截擊江忠源與總兵音德布等亦跟蹤追剿諭曰逆匪攻撲江西省城九十餘日經張芾等督率文武官紳嬰城固守雖未能盡

剿賊匪而省會得以保全張芾著開復革職留任處分陳孚恩著賞戴花翎江忠源著賞給二品頂帶其出力文武員弁及紳民兵勇人等著據實保奏十二月保奏江西守城出力文武員弁上以單開文武各員保舉過優文職人員爲數尤多命部臣覈議部議未上芾又申奏諭曰前據張芾奏保守城出力人員朕以其所保過優當交部覈議具奏該撫應候續降諭旨懍遵辦理乃於未接部文之先曉曉置辯該撫捫心自問此文武二百餘員中竟無一人冒濫耶至該省紳士業經加恩其餘聞警遷避之員該撫乃稱仍俟酌量請獎既經參奏於前又復迴護於後尤屬紕謬張芾著傳旨申飭旋疏言武職有捍衛地方之責必周知山川形勢熟悉風土人情乃可得力江西自副將至守備共五十三缺題補僅八缺餘歸部選武職廉俸無多赴任資斧不易本省題補既少拔至千總永無陞階人材每多湮沒應請敕部將選缺較多省分酌改題缺庶武職由本省陞轉情形較熟並免赴任之苦方今軍務未竣遇有開缺可否卽於本處陞補以免員缺久懸似於戎行有裨奏聞命下部議先是芾奏截留滇黔銅鉛銀兩上以其不知緩急嚴旨切責之至是廬州需餉孔急諭將前項銀十萬兩迅速委員解廬旋奏言昨奉硃諭

憂懼驚惶莫知所措因思庫款支絀各省皆然江西有事閩浙楚粵無不動搖於大局有礙在籍尙書陳孚恩自蒙恩賚感激涕零乃忽蒙嚴旨若非言官風聞糾彈卽係大臣挾嫌攻訐見值寇氛未息士民聯爲一氣地方可冀稍安若羣情渙散必致事事掣肘諭曰據張芾奏留滇黔銅鉛銀兩朕於摺內嚴旨切責正望其激勵有爲乃本日奏籌軍餉摺內仍復嘵嘵致辯轉視訓諭爲多事實屬有負委任張芾著交部議處四年正月部議革職諭曰江西巡撫張芾陳奏截留銀兩濫保員弁率多任意妄行朕於摺內批示原係成全造就之意乃張芾負氣逞詞並另片奏尙書陳孚恩守城時積勞成疾忽奉嚴旨若非言官糾彈卽係大臣挾嫌攻訐等語朕獎功黜罪一秉大公從未嘗以風聞影響之詞遽加罪戾張芾敢以私意揣測朕躬實屬膽大糊塗著照部議革職十二月兵部左侍郎王茂蔭以徽寧圍防事宜請芾籌辦得旨著發往安徽軍營交將軍和春巡撫福濟差遣委用五年浙江巡撫何桂清奏收復休寧石埭芾協剿出力賞給六品頂戴六年二月兩江總督怡良等奏皖南軍務緊要必須才識兼優聲望素著者方足勝任六品頂帶前任江西巡撫張芾自上年籌辦徽池防剿聯絡紳民勸捐軍餉約計五十

萬兩且文武員弁均樂與共事如假以事權必事半功倍上納其言五月逆匪擾婺源祁門兩縣芾親督兵勇扼隘堵截敗賊於七里橋及屯溪口等處斃賊甚夥匪由潛口竄楊邨等處兵團追剿斬馘無算餘匪潰逃徽境肅清福濟上其功賞換五品頂戴十月福濟奏安徽團練請由芾調度從之時江西德安賊匪復竄踞休寧芾派撥兵勇親自督陣殲賊千餘名匪尋以大股撲營經副將周天受等督飭兵勇鄉團拒卻之時芾丁母憂上以軍務緊要命留營辦事尋復休寧浙江巡撫何桂清奏入諭曰張芾辦理徽州防剿甚爲出力深得民心此次克復休寧尤屬調度有方該員見丁母憂俟服闋後以三品京堂候補七年八月呈請葬親諭給假六個月旋復奉諭曰見在徽州防剿喫緊張芾仍著暫留俟軍務稍平卽遵前旨給假六個月回籍營葬八月匪犯徽境之清華街芾飭參將王慶麟等截擊斃賊甚衆嗣復四面兜剿賊潰竄官軍追殺殆盡十一月諭徽郡一帶防剿事宜卽著張芾妥爲籌辦在防將士並著張芾委員統領以期得力尋以婺源祁門先後擊退賊匪景德鎮業已收復奏懇回籍兩江總督何桂清等會奏池太各屬敗匪窺伺徽寧不宜遽易大員疏入命仍留徽州督辦八年六月奏參提督銜福建

漳州鎮總兵周天受調度乖方縱兵騷擾並有擅殺鄉團情事上以周天受係芾保奏之員下部議處七月浙江巡撫晏端書奏浙江全境肅清以芾先後撥兵援剿有功賞戴花翎十二月浙江巡撫胡興仁奏張芾以母服已滿咨請代奏回籍補行守制奉諭俟軍情大定請旨遵行先是安徽婺源縣城被賊竄踞九年二月芾密派將弁斷賊接濟督隊薄城賊日張宗相乞降署皖南鎮總兵江長貴乘機進攻斬關直入立復縣城並將高沙賊壘一律平毀餘匪西竄三月補通政使司通政使六月以安徽紳士情願籌捐津貼舉行鄉試奏入允之十月授都察院左副都御史十一月官軍由穰嶺進發襲破太平縣郭邨賊卡殲其衆江長貴率衆直逼二卡副將王恩榮首先攻入匪潰走克復郭邨汀州鎮總兵米興朝聞捷乘夜進攻石埭縣夏邨賊壘鄉團助戰賊衆狂奔夏邨亦卽克復尋奉諭皖南四府一州軍務均著張芾督辦其寧國一軍自周天受以下俱歸節制十年二月涇縣旌德復陷三月賊由績溪撲犯徽州府城經張芾督同總兵江長貴分軍先後繼進賊衆傾巢曰賊由績溪撲犯徽州府城經張芾督同總兵江長貴分軍先後繼進賊衆傾巢而至官軍大呼衝入馬隊從山後包鈔賊勢大潰復於二十二日夜間密派隊伍

進攻績溪匪倉卒迎拒棄城逃竄縣城克復張芾著加恩改爲交部議處尋部議上命暫行革職仍督辦皖南軍務閏三月芾遣知府蘇式敬湖北道員蕭翰慶總兵江長貫等分路進規太平旌德石埭等城三日之內均克之乘勝復涇縣時溧陽踞匪回竄安徽建平芾派兵救援未及而城陷下部議處五月浙江淳安縣踞匪復竄徽州南山之蕩坑芾豫飭已革副將羅承勳等同軍堵禦斃賊無算得旨迅速攻剿毋留遺孽六月南陵敗匪回竄涇縣廣德亦同時告警旋卽先後失陷芾下部議處七月命來京十月奏請開缺回籍守制允之諭曰汝年尙壯將來報效爲日正長朕自中秋抵承德後身體安健特諭汝知十一年陝西回匪滋事三月命督辦陝西團練事宜四月命出同陝西巡撫瑛棨辦理陝西防堵事同治元年四月芾親赴渭南倉頭鎮曉諭回匪責以大義回衆頗有感悟者逆首任老五謂不戕芾無以堅衆心喉令其黨擁出芾坐地大罵日皆皆裂遂被害八月經瑛棨查明奏入諭曰陝西回匪滋事張芾率同臨潼縣知縣繆樹本山西候補知縣蔣若訥等分往勸諭行至油房街被回匪擁至倉頭鎮於五月十二日先後將張芾等殺害張芾罵不絕口被禍尤慘見危授命大節凜然著照侍郎例從優議卹

伊子二品廕生張師劬賞給舉人准其一體會試並於陝西省城建立專祠繆樹本等一併附祀九月鴻臚寺少卿朱夢元等奏稱張芾前在江西學政任內爲士林所宗仰迨擢任巡撫粵匪撲犯省城張芾激勵兵勇士民登陴固守歷九十六晝夜卒保危城士民至今感戴請於江西省城建立專祠並懇賜諡以昭忠盡允之尋賜卹如例予諡文毅賞騎都尉兼一雲騎尉世職襲次完時以恩騎尉世襲罔替芾之被害也逆匪將其首懸河灘榆樹數日容色不變其子師劬於事平後往覓遺骸時渭水漲發河流漫樹而北莫可蹤蹟有土人知其事者指點被害處所在李氏祖塋碑亭側覓得骸顛手面手腕各骨共九節齒已臂出血滴驗一著深入因負歸歛葬三年師劬赴巡撫衙門呈請將芾死事顛末宣付史館並請將芾親支殉難之二品頂戴張蔭等二十七名婦王氏等二十五口及同時遇害之家丁余榜等六名附祀省城專祠巡撫劉蓉據情奏入諭曰前因張芾在陝西辦團撫回遇害曾降旨從優議卹並加恩予諡在陝省建立專祠以彰忠烈茲復據劉蓉奏稱查明該故員殉難顛末及其眷屬人等殉節甚多並據其子二品廕生舉人張師劬呈報尋獲伊父殘骸歸葬等語張芾秉性忠直敷歷中外前在江西

等處屢保危城迨辦理陝西團練當回匪初起親往彈壓曉以大義逆首恐衆匪心動遂擁至渭南倉頭鎮地方殺害甚慘洵屬大節凜然覽奏倍深憫惻著照所請將死事實蹟宣付史館並於倉頭鎮再建專祠該故員家屬二品封典張廢婦王氏等五十二名口或守城遇害或城陷捐軀忠烈萃於一門尤可嘉憫均著交部分別旌卹准其附祀陝省專祠以彰節義該故員家丁余榜等六名罵賊遇害均著於陝省專祠附祀四年四月禮部題准入祀江西名宦祠五月安徽京員鮑康等赴都察院呈稱原任都察院左副都御史張芾於咸豐四五年間赴徽防剿經歷六年之久堅守苦戰保障一方紳民感戴願捐資於徽州府城建立專祠前湖南提督周天受候選知縣徽州府學訓導李應昭等請一併附祀經左都御史全慶等代奏得旨允行七年江西巡撫劉坤一奏芾及江忠源江忠義等專祠落成請列入祀典春秋官爲致祭以垂久遠從之光緒十五年慈禧端佑康頤昭豫莊誠皇太后歸政愍念亮節孤忠諸臣各賜祭一壇芾與焉子師劬舉人襲世職鹽運使銜河南知府

趙景賢

趙景賢浙江歸安人父炳言刑部右侍郎景賢道光二十四年舉人誤注烏程縣籍經炳言奏請革去舉人二十六年景賢呈請捐復並更正籍貫禮部覈與例符奏入允之尋捐教諭二十八年選宣平縣學教諭二十九年改捐內閣中書咸豐三年粵逆竄江寧江浙震動署湖州府知府王有齡飭所屬舉行團練舉景賢爲之倡巡撫黃宗漢遵旨督辦通省團練捐輸復以景賢總其事五年巡撫何桂清奏景賢辦理捐輸團練已歷兩載勸捐至百萬兩之多請加獎勵命以知府歸保舉班卽用並賞加道銜六年以知府分發甘肅候補十年以吏部尙書許乃普奏保辦理浙江團練命交督辦團練大臣邵燦差委時賊竄廣德景賢在江蘇聞警卽馳歸籌布城守適衢州鎮總兵李定泰參將周天孚先後失利景賢收集潰兵爲固守計偵知江南援軍水陸並至乃親督隊出城夾擊擒斬數千名立解城圍逆旋由埭溪竄入杭州景賢隨同提督張玉良馳援復其城並於湖州召募兵勇添築新城製造礮船飭各屬集團以次克復長興德清安吉武康孝豐等縣四月賊陷蘇州擾嘉興景賢派隊駐南潯扼其衝賊旋從宜興溧陽竄至太湖夾浦偪湖郡之西北門記名道蕭翰慶率軍進援遇賊戰歿景賢招集潰勇入伍賊圍五

門景賢督隊開奉勝門出擊血戰數晝夜斃賊無算賊遁五月賊踞平望復督礮船往剿馳抵梅堰六里橋見匪沿河築壘釘樁自率親兵及團勇由鶯脰湖一帶進攻偪近六里橋賊率衆迎拒官軍水陸並進鏖戰四時之久賊敗走隨將沿河賊卡燒燬復添調楚軍馳赴平望密遣南潯雙林等處民團襲破賊營東路合軍於米市湖突過賊濠毀其礮臺斃匪千餘賊驚竄遂復平望時賊僞英王仍由宜溧竄入窺伺湖郡景賢回救合民團擊走之經巡撫王有齡奏入奉旨以道員用賞給額德木巴圖魯名號並賞戴花翎六月賊竄踞廣德州景賢派兵堵剿七月賊大股來撲我軍擊敗之乘勝追剿直抵城下遂復州城杭州將軍瑞昌等奏入奉旨著交軍機處記名遇有道員缺出請旨簡放方杭城之初復也潰賊分竄湖屬之南鄉新市陳市埭溪各鎮景賢督水陸各軍馳剿三閱月始就肅清十月賊復圍省城景賢率隊赴援圍甫解而湖防又告急星夜馳歸賊已至南山之峴山忽報副將劉仁福督帶廣勇由昌化來援駐軍北門新城內潛與賊通景賢偵得實派隊由南門擊峴山之賊自率勇出北門誘擒仁福梟其首標示峴山賊膽落尋分股擾東鄉之雙林馬要等鎮官軍合攻二十餘日將賊營悉數踏平十月賊

由機坊港大錢口等處來撲分犯青銅門及橫渚塘橋馬賊由楊家莊來犯均擊退復由奚家莊西分撲後路賊船直犯西門官軍水陸迎剿轟斃甚多其分踞仁黃山之賊亦經擊散並殲其渠遂分攻各山賊營由隴山進剿賊分路迎撲斃悍賊多名水陸夾擊復將後山弁山及楊家莊賊卡盡行燒燬生擒二百餘匪湖城圍解敘功賞加按察使銜十一年正月克復長興遂分剿東西及八都九都山岑並擊散宜興來犯之賊尋賊陷太湖之洞庭東西兩山踞之全湖失險長興不能守郡之北路七十二漚港橫被竄擾景賢於大錢口添紮水師大營聯絡民團分顧各路大小數十戰皆捷五月賊大股由溲山溪竄踞南鄉之菱湖鎮景賢親督水師戰於雙福漾分隊由長生橋夾擊轟沈賊船數十生擒賊目奪獲船數百號七月平望之賊復竄南潯鎮直至東遷石門之賊由新市仍竄溲山溪官軍分路迎擊大破之九月賊併力攻驥村晟舍復偪郡城景賢督軍水陸出剿鏖戰五晝夜賊遁追至江蘇震澤境斃賊無數適太湖賊來犯夾浦順帆往剿時杭城被圍餉道隔絕景賢慮軍食不繼率大隊滾營前進由平政高橋雷甸一帶猛攻連破賊卡二十餘座東山賊偵知官軍南向乘虛襲大錢口景賢且戰且退回軍掩

擊奪獲大小船二百餘隻賊遁而東南鄉從逆之匪復劫擾雙林鎮景賢派隊馳救旋聞杭州陷歎曰四面皆賊湖城孤注惟當效死弗去以報國恩耳遂與在城文武將弁民團誓以死守十月授福建督糧道同治元年正月諭曰趙景賢督帶團練殺賊守城戰功卓著見當杭城失守尙能激勵紳團力保湖郡及所屬地方並將遞送僞示之李元林李元桂正法洵足以伸大義而固人心在辦團人員中最爲異常出力著加恩賞布政使銜初賊匪偪郡城僅太湖大錢口可通運道忽上年十二月大雪三晝夜礮船膠不能動太湖冰堅如平地於是洞庭東山之賊履冰來撲水師不能開礮大錢陷餉道遂斷賊以湖防受挫死傷枕藉恨景賢刺骨至是覓掘景賢父墓戒不與交戰但斷絕糧道以困之景賢疊次開門出擊輒不利遂密寄帛書至滬與其叔炳麟訣誓以守死盡臣子之職時上猶以景賢能否赴任寄諭兩江總督曾國藩酌度情形辦理復諭浙江巡撫左宗棠設法傳諭該道交代經手事件輕裝赴任三月景賢於圍城中密奉飭知並聞恩命軍氣復爲一振乃於各營挑選壯勇三千名由南北兩門出斫賊壘並奪獲賊糧而還時城圍日久軍火糧餉日絀每兵只給米二合五勺官民均食粥糜繼而糠粃亦盡

但以草根樹皮充飢道殫相望景賢意氣不少挫偵知管帶宜興勇縣丞李士元通賊擒斬之飢軍有搜掠民間者仍按軍法五月援絕城陷景賢呼曰我死無憾誤我十數萬軍民耳賊首譚紹洸已擒擁到局景賢冠帶見賊喝曰軍民幸勿殺速殺我譚逆爲之改容徐曰亦不殺汝景賢遂抽刀自斫爲所奪擁之而去至蘇州幽之牢始則挫辱之至批頰流血繼復謬爲恭敬百端誘脅景賢不爲動作絕命詩四章云豈待孤城破方嗟力莫支從來疆守義敢以死生辭亂刃交揮處危冠獨坐時相持不相殺鼠輩爾何知裂背呼狂寇奚煩講說多斷頭身自反抗手意云何厚貌徒爲爾孤忠矢靡他空勞樽酒獻罵坐更高歌猝爲羣盜困遑敢學文山且盡從容義聊驚醜類頑單詞明順逆正氣懾神姦反覆誰家子相看只厚顏是豈天良見環觀涕泗揮但期能悔禍豈必與生歸伏劍余何憾投戈汝莫違漫收吾骨葬暴露益光輝僞忠王李秀成致書景賢欲誘之降復云景賢奉命督辦民團保守湖城籌畫不周糧絕致陷其時被執在局即可自戕因欲保全軍民親見譚紹洸言之言畢請殺不解何意堅不允從抽刀自斫又被奪阻延息至今揆之城亡與亡之義一死已遲無怪左右動疑詢及尊意云何賢世受國恩萬勿

他說張睢陽慷慨成仁文信國從容取義雖不能效法古人私心竊嚮往之若墮節一時貽笑萬世雖甚不才斷不爲此也來書引及洪承疇錢謙益馮銓輩當日已爲士林所不齒清議所不容旋奉純皇帝御定貳臣傳名在首列此等人何足比數哉國家定制失城者斬死於法孰若死於忠泰山鴻毛審之久矣左右果然見愛則歸我者之知己不如殺我者之尤爲知己也再來書稱賢爲清官提及清字顧名思義刻不容留云云尋李逆前赴江北密戒勿殺景賢譚逆稍善視之景賢初以未得死法欲伺隙手刃李逆自李逆去蘇此志莫遂與譚逆日詈罵逆攜常熟地圖以詢遽付於火曰天戈所指汝輩齏粉死矣在城中不蓄髮日危冠索飲脅從者隱爲化導皆怛怛有反正心遇鄉人則促之歸或洩其事於譚逆於是又欲殺之適太倉敗賊到蘇播言景賢通官兵襲蘇譚逆設席招飲酒次詰曰汝通妖兵耶答以我本官兵何得謂通汝獻蘇城耶答以蘇本大清土地何得謂獻又曰汝今死期至矣景賢仰天大笑曰求之一年而不得者今何幸也遂肆口謾罵譚逆卽取洋槍對胸一擊而殞二年五月曾國藩等遵旨查明死事情形具奏略言景賢幼隨父任讀書有奇氣輒以志在千古爲言遇事喜任人所難能丁父

憂閉門讀禮足不履長吏庭素爲浙江巡撫王有齡所器重以紳士辦理團練專湖防一面之任三解城圍每戰輒數晝夜殺賊動盈萬至不可數計先後奪獲賊船大小千數百號時乘間四出赴援當簡放福建糧道之時閩疆喫緊需才孔急假使景賢遵旨交替湖防自赴新任誠如恩諭移其捍衛桑梓之力以保障閩疆厥功亦屬甚偉揆以爲國惜身之義亦未始無辭而景賢感激益深效死益堅義不忍去城陷之日距賊圍城五月有餘從來各處守城未有如此之久者臣等遠隔賊巢數百里無路能援負疚徒深景賢大義凜然終能尋約洵屬忠貞蓋世可敬可哀其長子趙深彥年甫十二聞湖州失陷痛父情切卽先服毒自盡經湖南巡撫毛鴻賓奏請獎卹其次子年甫數歲幼者尙在襁褓遠寄湖湘孤苦無依聞景賢在圍城中未嘗一置念也奏入諭曰曾國藩等奏稱趙景賢誓守湖郡血戰三年並分兵四出恢復遠近堅城賊匪畏不敢與戰以大股合圍斷其運道至五閱月糧盡援絕城陷後該道抽刀自斫被賊奪阻執至蘇郡多方誘脅百折不回至本年三月間罵賊不已被賊槍傷殞命覈其死事顛末洵屬皎然不欺其志無愧完人請照布政使陣亡例議卹賜諡建祠並將事蹟隨摺咨送軍機處付史館

立傳等語趙景賢係湖州在籍紳士並無守土之責集團訓練每戰必捷迨至孤城困守糧餉軍火俱盡仍復堅持數月力竭被擒經賊匪誘脅百端矢志不移卒以身殉勁節孤忠實屬可嘉可憫布政使銜福建督糧道趙景賢著改爲照巡撫例從優議卹並加恩予諡准其於湖州府地方建立專祠其業經議卹之長子趙深彥著一併附祀所有該員事蹟節略著宣付史館予立特傳以彰忠盡其子趙濱彥趙潤彥趙滋彥趙溱彥趙淶彥均著俟及歲時交吏部帶領引見尋賜卹如例予諡忠節光緒元年五月先後引見得旨趙濱彥以主事用趙溱彥趙淶彥以通判用濱彥補戶部主事襲世職洊陞道員溱彥補湖北漢陽府通判淶彥洊陞知府

周之琦

周之琦河南祥符人嘉慶十三年進士改翰林院庶吉士十四年散館授編修十八年充山西鄉試副考官二十年陞國子監司業二十五年七月擢詹事府右春坊右中充十一月遷翰林院侍講道光元年授四川鹽茶道六年三月遷浙江按察使七月擢廣西布政使十年署巡撫十二年二月擢江西巡撫六月奏南安贛

州二府所屬廳縣缺苦政繁每遇緝捕籌辦無資以致情弊多端請於九江關贏餘項下借銀十二萬兩發商生息以資津貼上以國家經費有常關稅餘銀亦屬正項豈容任意借撥不許八月遵議裁汰冗員奏請裁建昌九江二府通判袁州九江撫州三府照磨武寧縣高坪司新淦縣懷山司德興縣白山司三巡檢均如所請行又奏贛州上年水災糧價日昂匪徒乘青黃不接之時糾衆求賑停徵已飭地方官捕其首從按治刁風稍戢又奏贛南二府賊盜充斥率鹽糧贛南三道捐資助捕分縣撥各府縣存儲如遇情罪重大之案須該府親行卽由庫存項下支給以冀緝捕得力又以廬陵匪徒持齋念經煽誘至二千餘人奏將偽造經典咨送軍機處請分別辦理閏九月偕兩江總督陶澍奏稱江西例食淮鹽惟廣信府食浙鹽贛州南安寧都食粵鹽而饒州與廣信連界吉安與贛州連界建昌與閩省之邵武連界以致浙閩粵三路私鹽充斥浸灌淮界請遴員巡緝均從之時上聞江西學政鄭瑞玉不協輿情命之琦認真訪察尋奏鄭瑞玉場規不嚴覆試點名遲至巳午疏入得旨瑞玉下部議處之琦以未能覺察下部察議又奏南昌新建墟隄被水衝塌被災之後民力難於自修請借庫款動工十二月奏豐城縣

杜家門首接連甘家角土隄七十餘丈爲章江下游隄在東北章由西南下注直至隄身始折轉由西北而去下流上游均有沙洲從前洲未長大河身平行土隄尙能杜禦今則上游之金鷄洲偪緊河身下游之中宿洲日見長大來水急而去水緩土隄屢修屢塌必須改建石隄請於司庫鐵鑪項下動支修建均如所請行又奏南康府星子縣萬蓼花池爲衆水之匯日久淤塞因於池口東北挑去淤沙疏通溝道並於溝旁起築避沙塹壩添建閘板其蘆溝外緊接鄱陽湖口有平沙一片橫塞於前復令挑疏水患少息又奏廣信府界連閩浙有大乘教匪南贛二府有三點會等匪匪衆推年長者一人爲首號爲老大復多布耳目以避官捕已飭州縣嚴拏首從民情漸靖均報聞十三年四月奏准鹽頻年滯銷由浙私浸灌請定饒州府屬七縣與食浙鹽之廣信府連界變通緝私章程一安仁縣石港水卡應置巡船一安仁縣藍橋水卡與鄧家埠陸卡應行裁撤以專責成一安仁縣長塘陸卡應復原設兵額一德興縣香屯卡宜分路梭巡一鄱陽縣黃龍廟卡應設巡船一餘干縣瑞洪卡宜設卡兵一運省漕船宜稽查夾帶如所請行五月遵議江西被水各區酌借籽種疏言查進賢都昌建昌湖口四縣食穀無多恐青黃

不接之時不敷平糶請援成案每石折銀六錢給與貧民從之時有言南昌府查夜委員多乘夜至殷實鋪戶誣爲吸食鴉片臨時僞行搜出任意訛索者命下之琦查奏尋奏江西毘連粵東煙販最易侵入一經查拏則造爲謗言安思挾制報聞六月奏江西上游五月間因雨盛漲鄱陽湖水勢倒灌南昌新建各屬傍湖墟隄多被衝塌請分別賑卹又奏江西界連閩粵兩湖山川遼闊武備宜修火器尤關緊要率屬倡捐製造分撥九江贛南二鎮演習七月奏自六月後連日陰雨南昌二十餘縣被災尤重請於九江關庫內就近撥銀賑卹又奏續查吉水萬安二縣低田被水請分別賑蠲十四年二月奏江西被水較廣鄰省楚皖亦多災區米價日昂早稻登場尙須時日請借撥倉穀運省平糶又上年鄱陽等縣被水衝決墟隄請借款興修允行六月奏言江西境內入夏多雨濱臨江湖州縣多被水淹命先由司庫撥銀撫卹七月續查南昌等十三縣水災請撥藩庫及借九江關贛關銀分別賑恤十五年三月奏江西濱臨江湖州縣民舍田廬全賴墟隄捍衛今被水衝塌多係連年被災之區民力萬難自修請借款動工以防春漲均如所請行時有言江西封禁山過路行客多白晝被劫者命下之琦偕陶澍查奏九月奏

言禁山外口隸江西者十二汛隸福建者二汛禁山正面卽銅塘山其東北卽江西之上饒廣豐其西南卽福建之崇安浦城山之基址在江西者共三百餘里外口漸次開墾作爲民田者不止三分之一口內之大東坑小東坑等處間有平地或可開地二三頃此外如洞門底橫梭口等處可墾者不過一二畝餘則崇山峻嶺毫無隙地若加開墾不但衙署規模無從建立卽小民棲止亦防山水沖漂查封禁山自唐季以迄元明久經封閉雍正乾隆年間侍郎趙殿昂江西巡撫陳宏謀兩次請開未遂良以人情趨利若鶩一聞弛禁勢必日聚日多藐法負嵎不若照舊封禁以杜事端仍酌定巡防章程報聞又奏本年被旱之上高縣等三十三州縣請將錢糧展緩允之十六年二月調湖北巡撫七月奏均州之池口上通豫省爲潞私屯集之所時侵淮鹽網地請設卡查辦又奏夏秋間江河盛漲沔陽潛江監利等縣田禾淹沒請分別展緩並因庫項支絀請撥鄰省銀接濟下所司議行十二月偕湖廣總督訥爾經額及陶澍奏言淮鹽捆載之儀徵等處距漢口幾二千里輓運不易船戶水手夾帶私鹽稽察本屬難周加以湖北之宜昌府緊接川江銅船自四川捆載北上沿路收買私鹽入楚售賣致宜昌一府盡食川私並

灌及荆門遠安當陽等處又隨州應山近豫省之信陽州被潞私浸灌黃安麻城近豫省之光山固始及皖省之英山被蘆私浸灌而襄陽府屬與豫省南陽各處均犬牙相錯豫省行銷潞引較之淮鹽貴賤相懸浸灌本易而奸販屯集之地又迫近楚省甚至包運至楚謹會議緝私章程下部議行十七年正月奏武昌城外石隄近因上游白沙洲尾坍缺江勢東徙大溜直射岸腳以致膨裂坍塌臣親往查驗天后宮地方原建迎水石壩長二十七丈高三丈七尺若照舊修補隄身過高難期穩固應改爲上下二層各高丈餘旁築護岸相地制宜乘此水落歸槽之時趕緊興修以防春漲又奏上年襄河秋漲鍾祥縣老隄過頂內灌新修月隄隨溜捲塌六百四十餘丈急應修補均如所請二月上聞楚豫交界有巨盜張開運大爲民害命之琦嚴密查拏尋奏襄陽府係行銷淮鹽之地與豫省行銷潞鹽之南陽新野接壤價值低昂迥別時有背負肩挑濫入楚境張開運陸續收買業經拏獲並獲私鹽萬餘斤七月奏荆江水漲異常李家埠隄湧出黑水源源不絕因偕督臣林則徐督令以江柴搶護排釘大椿高與隄等隄內滲漏之處以篾簾麻袋盛土填壓其上魚埠隄底先有裂縫探明裂處以縣被包石灰堵塞後以大鍋

覆之外加搶護又監利縣隄居荆江下游南鄰洞庭時值川江洞庭二水並漲隄身處處皆險飭地方官星夜搶築化險爲平請將攤徵隄費概行豁免十八年三月偕林則徐奏黃梅縣與江西之德化安徽之宿松接界德化所屬之祁公隄殘廢多年民力未能修復以致江潮倒灌又地界三省互相觀望此修彼闕雖上下游各有隄而中間獨缺江潮乘虛直灌愈刷愈寬上下隄亦難保固請於董家口以下築新一千五百餘丈直接大田尾以資堵禦上如所請四月丁母憂二十年七月服闋八月授太僕寺卿旋署刑部右侍郎十一月實授二十一年閏三月授廣西巡撫九月奏粵西盜匪充斥見督飭地方官認真緝捕至再至三並定章程限三月內通報見在審明二十七案緝獲七百餘人仍飭令上緊追捕二十二年奏捕獲貴縣滋事匪首關亞烏等正法匪徒斂迹六月奏廣西搶劫拜會案內在逃各犯續行拏獲七百餘名均報聞十一月奏請設奉議州學額三名二十四年五月遵議酌減馬乾銀兩疏言廣西地處邊隅鄰近越南多係陸路並不濱海專借馬隊以壯軍威通省額設馬一千四百餘匹數本無多一經裁撤勢必改馬兵爲步兵恐於公事有礙請於提督以下守備以上酌減馬一百三十餘匹千總以

下應免裁撤均下部議行五月奏廣西劫案續行拏獲七百餘名報聞時部議開採金銀礦之琦奏廣西五金並產近年產銀之區僅存賀縣之蕉木廠及河池洲之南丹桂紅二廠每年課銀四五百兩查臨桂縣有野鷄銀廠興安縣有平峽嶺銀廠荔浦縣有崇溪山銀礦河池州有霑紅金銀廠思恩縣有廬山銀礦蒼梧縣有金盤嶺金廠懷集縣有汝塘山荔枝山銀廠雍正乾隆間皆經開採嗣因沙薄山空先後題請封閉以後並開採二十五年正月奏平樂府之賀縣梧州府之蒼梧藤縣容縣岑溪懷集皆界連粵東易藏奸匪嘉慶二十年督臣蔣攸銛奏請於義寧協撥把總一員外委三員帶兵往巡議俟三五年後酌量情形應否裁撤嗣經屢次奏請留巡日前盜風未靖仍應留防均從之十二月因民人黃亞組起釁糾毆重案之琦未能確實根究率行定讞經刑部奏參下部議處二十六年因病陳請開缺允之咸豐三年命辦理本籍捐輸團練事宜同治元年卒

徐之銘

徐之銘貴州開泰人道光十六年進士改翰林院庶吉士十八年散館授編修十九年丁母憂二十一年服闋二十五年補授四川保寧府知府咸豐三年擢陝西

潼商道兼辦糧臺防務四年六月陞湖北按察使七月丁父憂六年署四川總督成都將軍樂斌奏留四川辦理西秀防剿事宜七年五月服闋六月補湖南按察使旋調雲南按察使八年正月雲南東路回匪聚衆焚掠句結昭通東川等處猥夷麇集永安鋪之銘督帶兵練擊敗之復會同參將麟志等分路進剿斃賊四百餘搶上池谷山梁紮營二月賊來撲營之銘等指揮兵練分兩翼從山後鈔出左右夾擊乘勝移營直逼永安鋪賊巢添築礮臺施放火箭燒毀望樓兵練繼進賊膽懾乞降捆獻首逆沐成林白正營正法餘匪就撫賞加布政使銜並賞戴花翎旋護理雲南巡撫十一月授雲南巡撫九年四月以滇省軍務未竣請展緩本年恩科鄉試允之六月逆回馬凌漢等聚黨數千攻襲昆陽州城之銘檄外委陳起龍招集兵練進攻槍斃馬凌漢乘勝追至城下馘斬無算時雲南回氛甚熾臨安緬寧等處皆有賊蹤官軍剿滅甫竣七月回匪又踞富民宜良兩縣之銘檄副將福兆等分路進攻復兩城首匪馬鴻軒伏誅逆回又踞大理順寧等府縣之銘督飭兵練進攻賊已窮蹙適鶴麗練勇互鬪遊擊張正太等遇害該匪遂乘勢攻撲雲南縣及彌渡營兵練退守普湖沙橋一帶之銘以翼長署永昌協副將福申等

堵剿不力奏請降革留營以觀後效從之旋以藥材收稅抽釐請俟集有成數再行報部查覈諭曰該省見辦剿匪事宜經費支絀准其將抽釐一款實用實銷報部備覈至所徵土藥仍著遵照部文收有成數卽報明解部不得擅行動用以重稅課十月之銘派兵討平嵩明州回匪又剿滅武定州暨祿豐祿勸等縣夷匪上嘉獎之嗣以池西逆匪分遣姚州回匪馬定幘暨蒙化回匪潛入楚雄鎮南境內勾結哨地大池能小池能等處夷匪滋事勢甚猖獗之銘委署楚雄縣知縣積壽等帶練往剿斃匪首陳鍾禮等又檄優貢生丁燦文攻襲燒香寺山頂賊營生擒回匪姚小七戮之又派都司高天澤等會剿打卦山等處賊營斃賊二千餘楚雄境內肅清十二月昭通府屬匪首羅保林等聚衆數千在大關鄉之新場等處出掠之銘派鎮雄營守備段定邦管帶兵練殺斃匪首殲擒千餘餘賊逃竄四川筠連一帶上命之銘嚴飭地方文武督率兵練越境進剿會同川省帶兵提督阜陞等併力夾擊不得稍分畛域是月討廣西州匪徒瞿騰霄等平之十年正月滇省界內老鴉灘黃毛壩豆沙關兩河口等處有匪首馬沆盛李偏鬍子等聚衆盤踞橫順一帶牛皮寨老巢賊匪亦思蠢動其地皆距川甚近四川總督曾望顏飭令

來川助剿之雲南知府夏廷楫帶勇回滇先將牛皮寨入川各路要隘堵禦上命之銘等速調精兵簡派得力大員管帶馳往牛皮寨等處探明賊蹤所向會合夏廷楫所帶之勇迎頭截擊分路掃蕩毋令闖入川疆是月宣威州屬永安鋪回匪丁發桂等就撫復叛之銘檄知縣徐承勳等平之又討平安寧州屬逆匪馬三先鋒等暨阿陋井各處回夷三月之銘疏陳滇省昭通東川一帶與四川壤地毗連僅隔一江春間有巴部夷人黑蠻偷渡過江肆行燒殺並擄人勒贖此股夷蠻係四川寧遠府西昌縣各屬土司所轄請飭四川會剿四月回匪馬合等圍攻晉寧州城之銘檄遊擊何自清等馳往救援連破環城賊營生擒匪首馬合等悉置諸法州境肅清又元江夷匪句結九龍山獠匪攻撲州城之銘檄普洱府文武馳援分路進攻斃獠夷各匪五六百人燒毀賊營九座乘勝攻拔烏薩黃楊樹等處賊巢生擒首逆刁阿寨等梟之八月回匪竄廣通元謀等縣楚雄府城亦相繼失陷之銘以未能先事豫防降二級留任十月路南州匪首趙慶春胡添潰等句結外回夷二萬餘人竄踞州城攻撲宜良縣境之銘檄署參將何自清等討之連獲大捷遂將州城克復迤南臨安等處夷民均震懼投誠尋蜀滇接壤之豆沙關等處

復有匪徒滋擾之銘飭昭通文武會團剿辦殲斃首匪羅星斗等乘勝移師大灣等處生擒首逆鍾二達頁等梟之卽進偪豆沙關將川省著名流匪李偏鬍子等殲斃昭通大關等處一律肅清又派兵疏通羊毛關鹽路十二月兼署雲貴總督奏請以回務掌教馬德新等辦理撫回事宜允之尋奏稱滇省軍務緊要未能兼署督篆請留前任總督張亮基在任調理上諭令張亮基仍暫留本任督辦雲南軍務俟劉源灝到滇再行交卸十一年二月雲貴總督張亮基奏回務掌教馬德新等懇請就撫隨商同之銘先詣江右館親加曉諭之銘疑不敢往密令從九品單功定煽惑刁紳李祖植等恣恧散練赴督署懇求不准撫回並將署內什物搶毀殺斃通海縣知縣雷焱旋縱兵練將就撫之回轟退偪令浙江候補道馬椿齡自盡謀殺招撫委員福建候補知府孫鈞諭曰雲南漢回互鬪辦理之法分別良莠不分漢回剿撫兼用不可稍存私見張亮基奏稱亟宜招撫係爲大局起見徐之銘任性妄殺阻回民向善之機必致激生他變種種妄爲實屬大負委任劉源灝接奉此旨著卽迅赴新任將徐之銘被參各款確查據實具奏不得稍涉回護五月之銘奏調任陝西巡撫鄧爾恆行抵曲靖府城暫居府署夜間突被竊賊拒

傷殞命諭曰鄧爾恆係巡撫大員被賊戕害首犯李寶等雖經兵役戮斃並拏獲董有等正法惟曲靖府文武各員所稟情節支離著劉源灝查明據實具奏六月疏陳滇省回匪攻踞澂江府城聲稱帶兵進省設立回局惟回匪開列多條必籌議妥善方能辦理詎該匪既欲求撫忽又從澂江起事攻破呈貢縣省中兵練紮營石虎關防堵匪首徐元吉統率三四千人乘夜暗襲石虎關直抵江右館環省紮營二十餘座假裝兵練混入南城喊殺被守城官兵擊出仍歸江右館紮踞城內萬分危迫疏入報聞又奏回匪屯踞昆明海口之馬老街等處阻遏運糧要道見派臨元鎮總兵何自清等督練進攻將出拒之賊前後夾擊轟斃數百人踏毀賊營六座復將接應之賊擊斃千餘連克賊營二十七座追至海濱溺斃無算乘勝圍逼大材寨將賊巢焚毀轟斃者不計其數其大小營莊等處賊營亦經焚毀殆盡殲斃首逆楊添寶等立將海口克復諭曰前據張亮基奏徐之銘擅殺就撫回民各情當諭令劉源灝查明覆奏嗣據徐之銘奏稱回匪假撫攻襲省城鄧爾恆被戕別有情由與張亮基前參各款均不相符劉源灝已令來京另候簡用福濟昨授雲貴總督著福濟於到任後詳細確查將張亮基與徐之銘辦理回務如

何意見不合並張亮基所參徐之銘各款一併秉公詳查具奏八月諭曰前據張亮基奏鄧爾恆在曲靖被戕傳聞係候補副將何有保之練並有撫臣主使等語此事情節種種可疑著福濟到省後詳查鄧爾恆被害確情據實具奏九月奏報尋甸州屬回匪占踞柯渡八甲等處檄何自清帶練馳剿克之村寨一律肅清十月疏言逆回占踞尋甸州屬易隆各處驛站要道見檄翼長保陞知府岑毓英專辦澂江一帶回匪攻毀賊營十餘座賊勢已蹙卽挑選勁練併力兜圍連克堅壘斃賊千餘將易隆賊巢攻克殲斃僞帥多名餘匪潰竄驛站疏通同治元年三月疏言回匪高起等率衆進逼雲南省城分股竄踞安寧各要隘署雲南提督林自清攻克碧鷄關後賊勢已蹙署澂江府知府岑毓英亦襲攻大樹營賊壘焚殺無算臣出示勸諭率衆歸誠林自清亦臨陣開導岑毓英親督兵練赴省援應途遇各回就便曉諭回衆等棄戈投地訴冤適武生馬如龍馳赴省城約林自清出城馬如龍自以世受國恩情願解散招撫親赴各壘勸導林自清會同回目將各路漢回營盤撤退臣親赴江右館與馬如龍相見飭令安速安撫省圍立解所踞昆陽新興嵩明呈貢各州縣均卽退出漢回各復舊業疏入諭曰林自清辦理省城

撫回事宜奮勉出力著交軍機處記名遇有提督缺出請旨簡放並賞穿黃馬褂武生馬如龍係殉難九江鎮總兵馬濟美之姪世傳忠勇赤心報國此次曉諭回衆就撫解圍洵堪嘉尚著加恩以總兵用並賞戴花翎其餘出力員弁著徐之銘擇尤保奏候朕施恩又奏稱四品掌教馬德新率回衆就撫該掌教爲回教所信服請賞給頭品頂戴花翎上如所請尋以委署文武員缺有違定例自請交部嚴議上免之四月疏言林自清呈請擬帶兵練八萬人自備夫糧分兵三路同抵川境助剿賊匪一俟川省底定卽全師進攻江南粵逆以圖報稱諭以川省股匪業經駱秉章督兵剿辦屢獲大捷漸就肅清江浙一帶見在兵力已敷剿賊之用無庸該總兵前往助剿見已諭令駱秉章於該練未入川境時先期檄止此時大理府城尙未克復滇省軍務未平需材孔亟著徐之銘卽飭林自清統率所部馳赴大理迅克郡城懋膺殊賞尋奏稱署布政使花詠春旣老且病恐難勝任岑毓英剿辦回匪爲漢夷回所悅服兵練亦能彈壓查新任藩司蕭浚蘭至今未經到任可否將道員岑毓英於兩司畀予一缺於邊疆大有裨益疏入報聞八月奏言尋甸州接壤之潁莊地方練日冷國洪等招集練衆占踞村寨勒派鹽糧擁衆自固

見檄回將馬青雲前往剿辦攻克馬銜子象頓山各營將附和練衆盡行解散殲除巨匪陳老五李國曾等穎莊各處肅清又疏陳滇省撫局初定前雲貴總督張亮基統兵赴滇回民驚疑請敕張亮基輕車減從不可多帶兵練並無用張貼告示以定撫局諭曰張亮基奉旨辦理滇省事務帶領兵練護衛亦係體制當然使滇中已如常安堵該前督卽無須用武所帶兵練卽可於到滇後遣散已諭知張亮基酌辦至張亮基所發滇省告示係屬剿撫兼施並非專主剿辦徐之銘於曉諭回衆後卽行張貼無庸避忌該撫惟當鎮撫回衆明白曉諭令其不必驚疑並就見在應辦事宜悉心籌畫俾張亮基入滇後相助爲理悉臻妥協以副委任又奏稱大理西路撫局尙未就撫已諭馬德新等設法開導林自清不可再令赴滇辦理大理事宜諭曰林自清應否隨同赴滇抑或留川差遣著駱秉章潘鐸張亮基妥籌辦理至林自清部下兵練尙紮瀘州該督等設法安置以弭後患旋以滇省鹽價平減請令川省停止加運額鹽又請將前督張亮基所收銀兩令解交滇省藩庫以重帑項允之閏八月諭曰林自清率衆入川一節茲據韓超奏稱飭令鎮寧州地方官傳詢林自清之父據稱林自清家信內有係徐之銘授意等語且

徐之銘行文韓超始則稱林自清赴川助剿未奉諭旨率行起程不可節制恐入黔境擾累地方繼又稱貴州安南縣城危急委林自清赴援前後自相矛盾是該撫之欺飾已可概見著潘鐸傳訊林自清是否自願赴川抑係徐之銘授意遣往據實覆奉十一月雲貴總督潘鐸奏省城安靜情形並察明鄧爾恆被戕原委並無他人指使諭曰滇省自回教就撫而後漢回各釋猜疑羣思休息省城既已粗安外郡縣亦可漸期復業潘鐸蒞任伊始當隨時宣布朝廷威德使已靖地方永遠相安其未能嚮化如大理等處亦須一律疏通得以休息疆宇張亮基已令署理貴州巡撫毋庸前赴滇南徐之銘在滇年久熟悉情形一切地方事宜潘鐸正可與之和衷商榷妥爲籌辦徐之銘亦當振刷精神勉策桑榆之效正不必以萬里孤臣自危自阻也至鄧爾恆被戕一案據潘鐸奏稱實係何有保令史榮等帶練戕害其爲並無他人指使尙屬可信史榮等業經到案著潘鐸等督飭承審各員嚴行審訊窮究黨與盡法懲治以申國憲毋得稍涉寬縱十二月潘鐸奏拏獲戕害鄧爾恆要犯戴玉堂等訊明正法並請將疏於防範各員議處諭曰雲南巡撫徐之銘於鄧爾恆被戕一案據潘鐸奏稱訊據各犯供稱並無知情徇縱情事

惟案情重大疏於防範實難辭咎著交部議處部議降三級留任二年正月廣西石逆由黔竄滇盤踞橫江雙龍場各處上命徐之銘等督飭帶兵員弁實力剿除與川軍會合夾擊毋留餘孽三月之銘奏稱池西逆匪杜文秀遣其黨李俊等乘馬如龍出省勾結武定嵩尋等處回匪數千賺入省城督臣潘鐸在南門彈壓復親赴五華書院勸諭解散該逆猝然鼓譟督臣登時遇害臣會同署藩司岑毓英等分頭巷戰署雲南府黃培林等陣亡臣赴掌回教馬德新寓所會議防守並飛催馬如龍檄調練勇分攻城內賊營生擒僞都督李俊等正法省城見已安堵諭曰前因駱秉章韓超奏雲南省城被匪襲陷當經降旨令駱秉章等派兵援剿將該省文武下落及督撫死難情形查奏茲據徐之銘所奏情形與駱秉章前奏大相歧異徐之銘在滇有年於回衆勾結進城未能先事防範致令督臣被戕府縣殉難該撫尙覲然苟活實屬罪無可解著革職來京聽候議罪五月之銘密陳鶴麗鎮總兵馬如龍忠誠無二爲漢回夷所憚服池西杜逆占踞大理等府勢甚猖獗惟如龍一人足與抗衡又署藩司岑毓英與馬如龍共事時以忠孝互相砥礪省城之變若非該署司謀勇兼優極力維持焉能保守危城半月之久以待馬如

龍授兵實屬膽略過人堪勝將帥大任見在滇南之事惟賴該署司與馬如龍二人回教兵練有馬如龍節制漢夷兵練有岑毓英安輯如此辦理則滇疆有安靖之期臣雖死無憾疏入上命雲貴總督勞崇光等詳查密奏妥籌辦理三年八月卒光緒五年翰林院侍講王先謙疏言之銘情罪重大請旨查辦從之尋據雲貴總督劉長佑等覆奏稱鄧爾恆被戕並非徐之銘主謀其爲逆黨馬榮說合一節當時徐之銘曾改裝赴岑毓英軍營計議因岑毓英一意進剿旋即會商戰守事宜肅清省城亦非甘心從逆疏入得旨王先謙所請不准其子出仕應試之處著無庸議

徐宗幹

徐宗幹江蘇通州人嘉慶二十五年進士以知縣用分山東道光元年署曲阜縣知縣數月案無留牘尋補武城縣知縣二年大隄口決合而復開者再宗幹露坐小舟周歷災區撫恤之二三年臨清教匪馬進忠等謀逆隨巡撫琦善往剿平之四年調泰安縣知縣八年充山東鄉試同考官十年大計卓異十一年充山東鄉試同考官以歷年錢漕全完加五級並得旨不論俸滿卽陞又以獲盜多名加三級

泰安地丁銀四萬兩向以錢折納嗣銀價昂貴不敷火耗解運費民求加羨不許然在任十年終無逋賦縣南徂徠山爲盜藪深入剿捕並嚴治掖刀匪徒盜賊屏息修岱麓書院購經史藏其中設醴泉義塾於岱麓延師教民俊秀朔望偕師生行釋奠禮十三年陞高唐州知州十四年復充山東鄉試同考官十七年正月濰縣教匪馬剛等戕官謀逆隨巡撫經額布剿擒之時議將首犯解省監禁候旨宗幹以戕官之犯未可稍稽請於巡撫就地戮之衆心以安濰邑距省五百里其緣坐家屬婦女百餘人並請就地發遣免其解省任高唐四年朔望及三八日宣講聖諭廣訓衍義放告之日老幼麇至堂下皆滿暇則關門坐堂上觀書有呼冤者立召問之聽訟每至夜分始退復微服巡行幽僻曲巷亦徧歷之州境內有十虎棍徒誅治殆盡修鳴山書院鄉試前期令諸生至院授以餐親督課之嘗訪一炷香教匪令黠役入其黨偵得實於其聚會日密掩捕之無一脫者罪其魁餘宥之自新六月署臨清直隸州知州值運道水淺親自督輓糧艘復以捐修運河剝船下部議敘十八年陞濟寧直隸州知州二十一年歲旱宗幹爲文禱於嶧山雨立沛撤淫祠改祀先賢樊子高子曹子鄭子訪其後裔使奉祀之割三官廟僧道田

爲漁山書院膏火朔望令獄吏誦御史陸隴其勸諭盜犯文並宣講聖諭使獄囚環聽察其實心愧悔者給以工值令挑濬河泥或積土牛防汛以食其力詞訟待質者按日分除在標牌以懸之無敢私押者時金鄉縣民挑濬彭河下游屯民集千餘人阻之刀械誤傷差員勢洶洶宗幹聞報輕騎往中途遇役齎文書請兵宗幹取文書懷之叱役返抵境曉諭解散屯民皆匍匐自首大吏欲置重典宗幹以爲民畏水災非與官敵聚衆出於阻工毆官非其本意力爭之乃遣戍爲首者七人尋署兗州府知府以捐修濟寧州城垣學宮賞加知府銜兗屬鄒縣滋陽河隄年久殘缺兼苦雨澇民修以工鉅不能集請借帑於上官輒格不行宗幹上言水利爲民田所關民田爲國課所出暫時停工省費有限歷年緩災爲數甚多況涸復啟徵所得倍蓰於所用爲民計卽所以爲國計也卒奉諭旨允行二十二年以巡撫托渾布遵旨保奏入都引見旋授四川成都府遺缺知府召見諭以實心實力勿染外官習氣二十三年三月補保寧府知府尋兼署川北道時南江縣因奉文採伐柏木修造廣東戰船旋經停止鄉民以官爲私集數千人斷其木幾成大獄宗幹單騎往集首事者數語解散之四月擢福建汀漳龍道漳屬有械鬪案官

莫敢問宗幹蒞任後先以他事買舟泊城外密書帶壯勇胥役若干授聞者令逾時始拆閱隻身夜登舟至其地牌示不焚屋不准從人犯秋毫道遇差弁向宗幹附耳語請速返宗幹不爲動壯勇數十人亦至直入莊內老幼環集有積仇久鬪不休者集兩造令同酒食以解之諭子弟爲非者既往不咎見在犯事者當自獻皆唯唯設鼓樂香案送登舟一時著名巨匪皆投首並自縛其子弟及黨羽來獻二十五年丁母憂二十七年服闋在籍授福建臺灣道初閩浙總督劉韻珂密疏宗幹廉正明達精勤果銳前在汀漳龍道任內除暴安良械鬪擄贖之風頓減漳民至今思之故有是命咸豐元年以前在山東誤接濫抵流攤賠款部議革職留任二年六月剿擒結盟豎旗之匪犯王湧等十二月以剿滅謀逆之匪犯洪紀等辦理訊速先後下部議敘旋經總督季芝昌疏陳宗幹循聲懋著講求吏治整頓地方並剿擒匪犯調度合宜賞戴花翎三年四月匪徒洪泰等謀逆連陷臺灣鳳山兩縣撲郡城宗幹偕總兵恆裕督率將弁聯絡莊董防剿兼施時有旨命宗幹帶兵內渡剿漳泉逆匪以臺地擾亂中止六月官軍復鳳山縣尋擒首逆楊汝愛等八月逆匪擾及噶瑪蘭廳經宗幹督兵剿平之逆首吳瑛等就擒四年正月擢

按察使先是臺郡戒嚴宗幹以與恆裕意見不合密呈督撫請將總兵委員署理並自請開缺經巡撫王懿德奏參撤任調回內地察看八月王懿德疏陳上年臺灣鳳山等縣逆匪分竄滋擾經宗幹剋期撲滅無煩內地兵力得以迅速蕆事第遠隔重洋底蘊難以周知茲朝夕相見留心體察洵屬有才有識之員乞將宗幹留於閩省差委並請各省按察使缺出仍一體簡放得旨著來京交吏部帶領引見五年十一月抵京疊荷召對十二月命赴河南幫同英桂辦理剿匪事宜六年命赴安徽幫同福濟辦理剿匪事宜英桂旋以防剿需人奏請暫留河南允之七年正月授浙江按察使九月以前在河南剿賊出力賞加布政使銜十一月署布政使九年正月實授十月以短解甘餉降三級調用十年六月命交江北團練大臣晏端書等差委旋經江南團練大臣龐鍾璐奏請以宗幹辦理通泰一帶團練事宜允之十一年六月以辦理團練出力賞還布政使銜十二月命來京聽候簡用同治元年正月擢福建巡撫二年四月奏請將三品武職之參遊大員停止捐輸下所司議行十月匪首李阿四竄擾延汀各屬臺灣逆首戴萬生陷彰化縣先後剿擒之三年二月江西竄匪犯汀郡邊境四月飭署按察使徐曉峯等率師駐

延郡防剿五月飭延建邵道康國器擊賊並收復江西新城縣城六月檄署汀州鎮總兵關鎮國署汀州府知府朱以鑑擊賊並收復江西瑞金縣城九月逆首李世賢汪海洋等由廣東突犯汀郡直撲漳城時龍巖州雲霄廳及武平永定南靖平和等縣相繼失守宗幹咨請江蘇巡撫李鴻章派兵來援閩浙總督左宗棠亦由浙督師入閩宗幹自請督師出剿得旨留辦省防四年五月偕左宗棠飭提督高連升黃少春等剿平各賊閩境肅清九月偕左宗棠派兵剿捕興泉漳永各屬小刀會匪首要各犯次第擒斬得旨嘉獎五年正月以捐輸軍餉下部議敘十月卒福州將軍兼署閩浙總督英桂調任陝甘總督左宗棠合詞疏陳宗幹以循良著聞蒙列聖特擢洊至藩臬皇上御極之初特授福建巡撫時臺灣小醜跳梁汀郡寇氛偪擾上下游各郡匪盜時復鷓張宗幹戰守兼籌次第平定同治三年巨逆李世賢汪海洋突犯漳龍宗幹會商剿辦練團籌餉並規畫援剿事宜料理轉運各務晝夜勤瘁未敢告勞其居官廉惠得民所至皆有聲績日坐堂皇手治官書自爲牧令至今皆然卽在病中未嘗廢事病篤猶以閩事及西征餉事相問語不及私諭曰徐宗幹居官廉惠所至有聲由道府洊至藩臬擢授福建巡撫戰守

兼籌將臺灣汀州各匪次第平定及髮逆突犯漳州辦團籌餉倍著勤勞本年九月間偶患脾泄方給假調養以資倚任詎意因病出缺身後蕭然無異寒素披覽遺摺悼惜良深徐宗幹著照巡撫例賜卹任內一切處分悉予開復歷任政績著編入國史循良傳並加恩予諡入祀福建名宦祠伊子中書科中書徐毓海俟服闋後由該部帶領引見用示篤念盡臣至意尋賜祭葬予諡清惠子毓海恩賞主事

翁同書

翁同書江蘇常熟人父心存體仁閣大學士自有傳同書道光二十年進士改翰林院庶吉士二十一年散館授編修二十三年三月大考二等六月充廣東鄉試正考官二十七年大考二等賜文綺二十八年提督貴州學政三十年擢詹事府右春坊右中允咸豐元年應詔條陳四事一廣撫卹自粵匪橫行失業良民宜早籌撫卹且免狡黠者轉而從賊一寬賦稅直省官吏額外橫徵轉致正供缺乏宜撙節愛養並令各督撫察舉一二潔己愛民之守令以爲標準一修水利江浙湖廣地本水鄉近年灌溉之利少泛溢之患多良由江身壅墊淮瀆不得暢流其餘

廣澤通津亦多壅遏宜責成地方官實力興修一練水師粵賊肆擾嶺海相連易於竄伏宜訓練水師加意巡防以期有備無患上達之三年正月命馳赴江南軍營交欽差大臣琦善差委三月擢翰林院侍講學士六月轉侍讀學士七月擢詹事府少詹事四年以在營辦理文案出力賞戴花翎六年二月奏言安民自足兵始足兵自理財始方今理財之要惟有就固有之利爲化裁通變之方謹擬數端以備採擇一疏通滇銅以廣鼓鑄近年小醜跳梁江運不通滇中之銅愈壅京師及各省之錢愈絀雍正年間曾於雲南產銅處所設局鑄錢由漢口搭運至京行之有效查滇銅起運由四川瀘州登舟直抵湖北荊州今若查明舊章或於滇中設局鼓鑄運至荊州收儲或設局荊州運滇銅以鑄制錢水運則可浮大江以達武昌充楚省軍需之用陸運則可由襄樊以達開封充豫省河工之用且於軍營皆有裨益一暫換引地以銷滯鹽淮鹽之利甲天下每歲額徵課銀報部銷者二百二十餘萬兩計出自淮南者幾及十之八九今沿江戒嚴淮南片引不行軍餉不繼持籌者計無所出而不知失淮南鹽課之利爲可惜也臣以爲江運雖未通而引地可暫易查江西一省向食淮鹽今若借以予浙則由杭州抵玉山直達廣

信距南昌諸府甚近水陸運費尙不爲重況江西乏鹽之地行銷甚易湖廣商販且聞風而來如行之有效銷路日廣於江西設局稽查坐收其利此浙引之可行於江西也至蘇松常鎮三府太倉一州請暫令改食淮鹽舟楫可通形勢尤便如此則江楚之民無淡食而淮南之滯鹽得銷矣一河海並運以利漕行粵寇闖入長江梗阻運道三載以來全賴江浙之米由海運以達於通倉其數不及全漕之半而頻年海寇竊發登州洋面卽有覬覦運艘之事若徒恃海運恐中途有阻漕不時至則天庾何由而裕且會通一河前人百計經營儻廢置累年必致淤淺請酌分海運米若干石仿剝淺之法雇用民船由水次以達清江而臨清而天津節節置倉節節易舟無風波盜賊之虞無守凍擱淺之滯且運河一通則商賈往來百貨輻輳其所經濟墅揚州淮宿臨清天津諸關收課日贏於國計亦有裨益一清釐馬政以重帑項馬政之廢弛莫甚於今日者有二一曰營馬之弊定例額設馬兵卽應騎官馬一匹近雖奉議裁汰而例設之馬尙多實則徒存冊籍並無馬匹各省馬乾多入於不肖營員之手徒飽私橐今宜於額設營馬之中量減數成稍減芻秣之費如是則一省所節以數萬計合直省計之可成鉅款一曰牧馬之

弊甘肅一省甘州提標及西寧涼州肅州諸鎮標皆有牧廠其地水草肥沃牧馬蕃息果使得人經理馬數可以日增乃近聞各廠於孳生之馬往往以多報少隱匿大半上下通同一氣加以野番鈔掠幾無虛歲由是卒不獲草場之利請敕陝甘總督設法抽查將孳生之馬撥給各營之外其餘全數變價解存司庫則牧廠可收實濟一嚴汰羸卒以杜虛糜伏思用兵制勝惟恃精銳今遠調士卒轉戰累年驍勇者多戰歿水土不服尤多物故加以鄉勇口糧優於營兵逃兵充勇時時有之兵額缺則補餘丁餘丁盡則隨地募補其人皆負販細民市井游手驅以戰則見賊而怯繩以法則畏罪而逃軍心何由堅軍威何由振臣所深憂實在於此請就原營中添調精銳十分之一俟其到營即將原調之羸疾遣歸新募之游惰裁汰庶兵皆勁旅餉不虛糜矣滿營官兵亦多受傷患病不能臨敵者留之軍營虛糜餉糈何若聽其撤回稍可節省請恩准滿營官兵之傷病者量予撤回仍責成大員親加點驗以杜規避再空糧闕伍行軍最忌上年侍郎杜翻奏請稽覈實爲切要請敕各路統兵大員一體實力整頓務使軍伍無曠信賞必罰將士用命如是而謂賊未易平臣不信也一籌補倉穀以崇本計竊惟州縣倉穀所以濟凶

荒補緩急牧令賢否不一侵漁影射勢所不免軍興以來遭蹂躪者倉廩如洗卽大軍所過行不齎糧州縣無以供億往往糶變倉穀求濟目前報明碾動者有之私自通挪者有之其碾用若干實存若干監司尙不盡知何況督撫何況司農請敕督撫通查造冊報部以便稽覈一面督令該管道府率各州縣設法籌補賊退之後首重耕耘如人病痊當培元氣不可謂非急務也近年被兵之地雖廣猶幸年穀豐稔民困稍蘇該地方官誠以此時勸諭富民納粟入倉視其捐數量予獎勵其州縣官行有成效者準計典列入卓異儻敢藉端科派立予參革如是倉儲充實可備水旱而民鮮飢寒亦不至流爲盜賊矣並請嚴禁種植罌粟以重農政而維民風又疏陳江防五要一曰扼要津自漢口蕪湖而下各隘口已有水師駐守惟和州之鍼魚嘴在西梁山之下見無水師故賊船得由皖省內河及巢湖出江援應運糧直抵金陵是鍼魚嘴亟宜撥船堵截二曰聯陸路凡江面屯泊水師之處岸上必須有陸軍接應今觀音門水師孤立宜於陸路派一軍駐紮南岸燕子磯棲霞山一帶三曰斷岸奸查浦口南岸之七里洲丹徒境內之世業洲儀徵境內之老河影皆岸奸聚集之所應設法緝拏四曰議火攻自艇師上駛皆以火

攻得勝宜令水師兵勇泅水登陸燔燒賊營五日增小船艇船過於笨重卽龍哨快船亦未十分靈捷儻賊衆划船難期返擊宜多設小船與大船相輔而行庶賊船無從竄脫疏入並下部議行三月江寧鎮江悍賊萬餘渡江糾合瓜洲踞賊直撲揚州官軍潰敗托明阿退守三岔口城遂陷上禱欽差大臣托明阿職以德興阿易之命同書幫辦軍務並諭以先就見在兵勇擇要分投堵剿毋令擾及清淮一帶同書馳抵邵伯鎮收集潰兵聯絡民團擊賊於蔣王廟賊敗遁進攻薛家橋及七里橋賊壘搜殺伏賊殆盡復會合提督鄧紹良進攻揚城復之回駐邵伯防賊北竄四月與德興阿會師攻復浦口及江浦縣城七月擢詹事十一月奏陳揚營兵餉久缺請仍照托明阿前奏月支三兩零九分之數毋庸議減允之十二月會攻瓜洲踞匪水陸並進斃賊千餘七年三月至五月疊次進攻賊壘擒斬無算六月敗賊三汊河毀其瞭臺望樓三十餘處十一月親督諸軍更番出戰以火礮毀賊壘克瓜洲上嘉其功賞穿黃馬褂以侍郎候補方官軍之破瓜洲也金陵賊船圖駛入爲援同書偵知之分軍堵截水師直入內河進逼金山寺擒僞總制蕭有方斬僞將軍陳恩書賊衆大潰追至巴斗山又敗之斬僞元帥賴元益等餘匪

悉遁八年四月來安賊犯六合敗之於施家集賊益兵來援又擊敗之復來安城下部優敘六月授安徽巡撫督辦軍務時廬州再陷捻粵各匪互相勾結淮南北蹂躪殆徧上命同書幫辦欽差大臣勝保軍務皖境各軍均歸節制同書移營進駐定遠九月賊竄馬頭城同書督兵分路擊敗之天長踞匪復犯三河集同書派兵迎剿賊敗遁遂復天長十月疏請嚴禁徽寧等府花會略曰軍興以來皖南各郡遠隔賊氛徽州處萬山之中其俗樸茂儉勤道光二十八年間忽有閩省傳來花會用射覆之計避聚賭之名角勝分曹注金奪采浸相傳習愚民敗產傾家釀成巨案徽郡亂源已伏於此乃地方官不能禁止轉用其人以禦賊地方遂日以不靖已飭各屬嚴拏懲辦惟皖南逆氛梗阻又與浙省毗連難免傳染請飭令一體嚴禁以絕亂萌上韙其言時懷鳳捻逆竄擾定遠同書督軍迎剿累戰皆捷粵逆來犯又分路擊卻之九年二月疏請嚴定查辦卹典限期毋任胥吏需索下部議行三月捻匪大股糾集安慶賊黨陷六安州遂犯定遠勝保督隊出戰同書夾擊大破之復派兵練進攻六安復其城四月以擅調已革淮徐道郭沛霖赴營部議降二級留任五月國史館臣工列傳書成同書以前充總纂官下部優敘六月

擒匪龔逆率大股撲定遠同書督郭沛霖等擊敗之賊復句合廬州粵匪數萬來犯城遂陷同書移駐壽州上以同書身任封圻未能督兵固守下部嚴議旋命革職留任七月疏陳練兵選將裕餉事宜一請調陝甘督標固原提標漢中鎮標兵各一千名來皖助剿一以提督鄭魁士忠勇有謀請令來營帶兵俾資鎮壓一請與勝保軍營均分協餉十月以賊踞明光淮鹽不得渡河請令皖北暫採蘆鹽以濟民食下部議行又以皖北糜爛已極疏陳補救三策略曰近來可用之兵莫如楚師諜聞楚師之順江而下者已破石牌將扼安慶之吭而拊潛山之背儻別遣勁旅萬人閒道疾趨英霍直搗舒城則桐城潛山太湖皆下矣廬城堅大宜且按甲勿攻徐出奇兵以圖懷定牽賊之勢使不得東向然後清江可以無虞皖境可以漸復此上策也如楚師轉戰潛霍間未能深入法當先圖懷遠勝保一軍爲明光賊勢所牽未能西來傅振邦一軍爲宿北擒勢所撓亦難南邁欲制淮遠惟苗沛霖練丁可用所居距懷遠不及百里若以河南省漕糧三萬石賙給苗軍輔以官軍再由湖北督撫派勇將引偏師徑趨下蔡以爲聲援並請敕下戶部發實銀二三萬兩添置水師礮船浮淮而下計百日內可拔懷城則臨淮鳳陽一鼓可下

此中策也若二者皆不能行則以勝保一軍攻復明光急檄李世忠一軍踰清流關而入以保東路臣扼守壽州與傅振邦關保互相應援制孫葵心劉添幅二巨擒又用剿撫兼施之策徐翦其羽翼以保西路雖未能使賊大創或不致十分決裂此下策也否則因循日久徒以勁騎重兵畫淮而守恐淮南盡失卽淮北泗靈一帶亦難遏燎原之勢疏入報聞是月擒逆孫葵心率大股賊圍撲潁州同書派兵迎剿賊敗走復敗於太和境乘勝攻粵逆於霍山復其城並分攻霍屬之毛坦廠賊壘平之十二月粵擒合股圍撲壽州同書派兵擊卻之十年正月攻擒逆於定遠之鑪橋焚其壘二月進擊舒城援賊連獲大勝三月擊王家海賊圩破之擒其渠申連復時河北團練響應練總褚開泰率練勇擊粵擒巨股於全椒斬其僞佐將阜陽團練亦攻破任家圩臨湖鋪兩處賊巢並收撫張家岡賊圩四月攻克小華家圩賊巢擒其渠尋疏陳鹽利開屯之策略曰潁壽六霍之間受粵擒荼毒白骨成邱青蒿蔽野廬舍耕具蕩爲灰燼欲甦民困非興屯墾不可欲興屯墾非籌經費不可今兵食浩繁度支匱乏惟有以鹽利開屯一策蓋自長淮梗阻淮北票鹽片引不行今雖漸次廓清然人心未定商賈裹足故票鹽尙未暢行莫如官

爲捆運由西壩上達三河尖銷售聽各販轉運阜穎霍六各州縣及豫之汝寧光州等處先鹽後課免抽釐金俟銷鹽後將鹽價水腳一一清還計尙有贏餘之利卽以爲屯墾經費有經費卽可勸立屯田章程如清釐絕產收買官田召募耕農買牛給種發糧蓋棚可次第籌畫舉行並陳屯田六利疏入下部議行時捻首孫葵心擁衆數十萬勝保屢遣人招撫之上命同書與勝保妥辦六月同書奏言孫葵心黨羽太多衆心不一撫之則憑恃其衆不樂遣散若令自成一軍徒糜口糧見在官軍進攻程家圩賊巢程圩若拔則兵威旣壯又何必曲意招撫耶疏入報聞旋拔程家圩逆巢收撫捻圩六十座二月夷氛偪近畿地勝保請飛召外援以資夾擊同書因疏請苗練迅赴通州候勝保調遣並自請開巡撫缺躬率苗練北行上以皖防緊要止之九月粵逆陳玉成率大股犯壽州撲北關同書親督諸軍堵禦夜令水勇晁渡至山麓縱火賊衆驚潰圍遂解賊竄六安復擊退之十月密陳四事曰請回鑾以孚民望戒浪戰以審事機裕京倉以安人心發德音以聳羣聽上韙之十一月復陳五事一曰謹天戒二曰固邦本三曰收人才四曰練京營五曰爭形勢疏上諭曰收人才一條利少弊多餘將隨時措施矣十二月壽州紳

練因嫌讐殺命同書會同袁甲三查辦尋奏苗沛霖所部練勇因勇目都司李學曾等被害輒糾衆圍攻壽州經袁甲三派員開導始悔悟撤隊苗沛霖亦知感激圖報應交部議以示薄懲仍責令剿賊以贖前愆從之十一年召來京尋以壽州紳練讐殺未能速辨部議鐫秩留任同治元年正月兩江總督曾國藩奏劾同書於定遠失守時棄城奔壽州復不能妥辦致紳練有讐殺之事迨壽州城陷奏報情形復前後矛盾命褫職逮問經王大臣等定擬罪名奏入上以同書遺誤地方厥罪甚重卽照所擬斬監候秋後處決十一月以同書父心存病篤上加恩命刑部暫行釋放俾侍湯藥心存卒復命穿孝百日再行監禁二年發往新疆效力贖罪三年經西安將軍署陝甘總督都興阿奏留赴甘肅軍營效力允之四年八月同書督兵在花馬池定邊一帶截擊大股竄匪疊獲勝仗並陣斬首逆僞平西王孫義保賞四品頂戴十一月卒都興阿以聞諭曰已革安徽巡撫翁同書前在江北屢著勞績嗣在安徽巡撫任內失守定遠壽州降旨革職發遣新疆上年六月經都興阿奏請留營差委統領直晉官兵扼守花馬池疊次帶隊立功並擒獲逆首孫義保業經加恩賞給四品頂戴茲因積勞成疾於病勢沈重之際猶以未能

蕩平回匪爲恨語不及私情殊可憫著加恩開復原官照軍營立功後病故例賜卹尋賜卹如例贈都察院右都御史予諡文勤七年兩江總督馬新貽奏揚州府紳士請捐建同書專祠從之子曾源翰林院修撰曾桂二品頂戴江西按察使孫斌孫侍講銜翰林院檢討

馮德馨

馮德馨山東濟寧州人道光三年進士以主事用分戶部十七年補官十八年陞員外郎二十一年遷郎中二十三年京察一等二月記名以道府用旋截取以繁缺知府用三月授貴州糧儲道二十四年調山西河東道二十五年擢廣西按察使暫留山西決讞二十六年抵任二十七年湖南土寇雷再浩勾結廣西羣盜擾新寧德馨奉檄會楚兵堵剿以殲渠功賞戴花翎二十八年擢江寧布政使二十九年七月高寶運河漲溢德馨率屬啟車邏壩以洩水八月陞湖南巡撫十一月新寧土匪李沅發倡亂戕官據城劫掠黃龍白沙一帶德馨檄軍進剿賊入城踞守十二月以克復新寧首逆就殄入告上獎其督率有方下部優敘德馨尋知賊實棄城遁疏劾所屬妄稟並自請嚴議調回所撤兵防剿添募鄉兵爲堅壁清野

之計賊遂遠颺蔓延益甚上責德馨遷延貽誤奏報失實命革職逮問下刑部治罪獄上遣戍新疆咸豐三年正月以從事葉爾羌勤奮加恩釋回二月命在籍辦團練六年防堵出力賞六品頂帶十一年賞加四品頂戴同治五年山東巡撫閻敬銘疏言修築濟寧州圩工保衛民居德馨晝夜宣勞始終勤奮得旨下部議敘七年卒

劉蓉

劉蓉湖南湘鄉人咸豐四年以附生隨侍郎曾國藩水軍剿辦粵匪復湖北武昌府城紘訓導五年八月復蒲圻崇陽擢知縣賞戴花翎加同知銜請假回籍十一月署湖北巡撫胡林翼奏劉蓉熟悉營務足資襄辦上命湖南巡撫駱秉章卽飭劉蓉前赴軍營十年駱秉章奉命督師四川奏以劉蓉襄辦軍務十一年八月官軍復綿州秉章奏劉蓉悉心籌畫動中機宜故能屢獲大勝立解城圍命以知府選用九月賞三品頂戴署四川布政使同治元年二月實授八月陳情乞退秉章以聞諭曰劉蓉瀝陳到任六月於民生吏治挽救毫無因見前順天府府尹蔣琦齡所陳中興十二策中有慎名器一條益爲愧悚請賜罷黜劉蓉以湘楚諸生經

駱秉章胡林翼保奏受兩朝特達之知不次超擢原與各路軍營濫保驟進者不同姑無論川省軍務方殷不宜遽行乞退卽以朝廷用人而論黜陟賞罰一秉大公果其人才出衆不妨破格錄用若以後不能稱職該督撫卽可隨時劾參朝廷見聞所及亦必加以擯斥此中權衡操之自上非臣下所能干預該藩司無所用其引嫌惟當如常供職盡心地方公事以圖報稱勉爲名臣不必務退讓之虛文也是月逆首李泳和苑得輿敗竄龍窰場官軍圍之蓉馳抵軍營設伏誘賊出巢擒李苑二逆餘匪悉平諭曰劉蓉運籌決勝生擒渠魁實屬異常出力著交部從優議敘二年六月湖廣總督官文奏言劉蓉曉暢戎機勇於任事刻下石逆成擒川省軍務得手卽於滇黔各匪環伺川疆得駱秉章指揮調度想能次第蕩平應令劉蓉獨當一面俾資展布如蒙天恩予以疆寄令督辦陝南軍務與荊州將軍多隆阿各張一幟必能綏靖邊疆疏入七月命劉蓉督辦陝南軍務尋授陝西巡撫奏調在川之湘果等軍提督蕭慶高何勝必等赴陝會剿敗賊西鄉屬之斗山毀焚其壘進擣寶山賊營破之餘賊竄石泉蓉督軍進剿漢南壘有斬擒會道員張由庚等軍攻油坊街深入致敗漢中城固相繼陷十二月中旗逆匪由郭家

壩竄略陽趨寧羌之戴家壩圖撲陽平關蓉遣總兵周達武等擊走之三年正月賊竄廣元之梨坪蓉遣知縣黃鼎戴炳奎等由旺倉壩扼剿賊退守黃官嶺蓉謀知漢中之賊糧盡思遁檄何勝必蕭慶高由青石關出師防中旗賊偷竄分兵徑擣漢中自法慈院直趨油坊街賊棄漢中竄石泉漢陰一帶時中旗賊前隊竄城固與偽啟王合中隊尙在黃官嶺紅廟塘一帶何勝必等馳擊破之餘賊竄上元觀副將蕭元等破中旗後隊於木家壩搜斬殆盡上元觀爲偽啟王黨與盤踞之地築壘十餘座凶燄甚張官軍分四路進攻賊不支潰走毀其巢進攻城固復之斃賊數千餘黨竄西鄉蓉檄諸軍攻洋縣洋縣自藍潮柱竊踞已逾二年留其悍黨據守官軍攻之不克退駐捷順橋潛派壯勇入城吹角舉火爲號外軍乘之遂復洋縣餘賊向華陽敗竄與郿縣首逆曹燦章合三月蓉疏言漢南踞逆合股東竄其前隊扶端各酋由山陽竄商南浙川後路馬啟各逆聞漢陰有兵防禦北趨鎮安圖犯興安爲候補四品京堂李雲麟擊敗馬逆竄而北啟逆餘黨及中旗一股游弋葉家坪一帶李雲麟擊之賊竄鎮安於是興安以西肅清蔡逆一股由蜀河偷渡回川爲澄漢水師所扼退駐雙河口將由郿西上犯洵陽臣與李雲麟會

商以蔡逆已入穀中機不可失而髮逆下竄自應盡力窮追爲夾擊聚殲之計擬以該京堂所部各營分爲兩路一由洵陽之蜀河一由安康之傅家河派英毅六營由鎮安徑趨山陽三路並進以取建瓴之勢如馬啟各逆併力東竄則英毅六營可由山陽跟追駐商州之藍斯明一軍亦分道並進是爲尾追之師李雲麟全軍侯蔡逆破滅卽由水路下駛襄樊相機邀擊是爲攔截之師多隆阿圍藍潮柱於盤屋功在垂成臣飭黃鼎等折赴寧陝與湘果各營專剿曹藍餘孽飭按察使劉嶽昭果後九營回川剿辦黔匪疏入上聽之官軍尋復盤屋藍潮柱率餘黨竄金鷄兩河將與曹逆合黃鼎連破曹逆等於八斗坪洵陽壩又破藍逆於朗板橙賊奔北山蓉飭官軍分道搜剿屢敗竄匪自駐西安妥籌布置四月賊糧盡勢蹙藍逆竄安康之紫溪河爲團勇所殪官軍破曹逆老巢曹逆遁擒之於玉皇廟山窩陝南肅清是月蔡逆啟逆由大小心川合竄鎮安蓉出省督剿賊分踞盤屋所屬之店子頭樓觀臺黑水峪西駱峪等處聯營數十里蓉與荊州將軍穆圖善提督曹克忠偪賊而壘賊出撲連敗之賊據堡樹柵堅守蓉令逐日出隊巡哨絕其糧路步步進逼七月賊竄南山官軍躡追敗之八閣坪大河壩賊由西水河竄城

固爲各軍扼剿遂趨略陽陷階州蓉督諸軍越境圍之九月甘肅回逆竄入陝境蓉調兵進剿賊退竄秦州捻首張總愚由湖北西竄圖犯陝省蓉派兵堵扼於商南山陽等處並飭各州縣齊集民團分防隘口賊不得逞四年正月回逆由隴州回竄陝境蓉督官軍追擊餘孽竄醴泉踞趙村提督彭基品等掩賊不備將所踞村堡攻克擒斬無遺陝境肅清五月官軍復階州斬蔡逆餘黨悉殲七月固原提督雷正綰剿金積堡失利部將胡士貴等索餉譁潰圍涇州陝西大震蓉遣將扼駐要隘曉以順逆解散脅從悉令歸伍擒胡士貴等置之法先是編修蔡壽祺奏參蓉行賄夤緣上命蓉明白迴奏蓉奏言前蔡壽祺在四川自刻關防徵調鄉勇聚衆橫行臣曾宣言驅逐故蔡壽祺銜恨造詞羅織並疏陳臣以湘楚諸生志安貧賤咸豐三年曾國藩在籍辦團出境剿賊邀臣襄其軍事前後兩年旋與羅澤南李續賓等各率一軍由江西赴援湖北轉戰崇陽通城蒲圻各縣值臣弟蕃殞命疆場負骸歸葬咸豐六年胡林翼奏調赴營時臣父年已篤老不忍遠離不幸臣父見背胡林翼旋有敬舉賢才力圖補救一疏濫列臣名十年六月欽奉諭旨垂詢胡林翼前保之同知劉蓉見在何處聞該員才具尙好應如何錄用之處著

胡林翼酌量具奏林翼覆陳有器識遠大堪勝封疆藩臬之任等語疊奉旨以知府歸部銓選賞三品頂戴署四川布政使擢補陝撫以重事權臣受朝廷特達之知超越非常實屬儒生曠世之遇惟自慙經術迂疏知識闇陋無以仰稱朝廷破格錄用之意卽當世士大夫之賢者亦不過以爲朝廷過聽胡林翼之言遽使叨竊至此至於出處大節固共信其無他乃蔡壽祺以其不肖之心造作夤緣之謗肆情侈口惟所欲言臣幼承庭訓頗識禮義之歸壯遊四方雅以志操相尙其於希榮慕祿之情降志辱身之事不待禁戒而自絕於心且臣起自草茅未趨朝闕於皇上左右親貴之臣未嘗有一面之識政府樞密之地未嘗有一緘之達夤緣之謗將何自來而蔡壽祺肆口詆訶遽至於此乞皇上嚴加查察推究根由如果涉曖昧之情著交納之迹卽請嚴治臣罪或仰荷聖明遠垂無私之照深察致謗之由亦乞憫臣孤危放歸田里奏入諭曰朝廷聽言必期詳審劉蓉旣被指參豈能不加訊問轉致大臣名節無由共白今劉蓉摺內有請歸田里等語詞氣失平殊屬非是黜陟進退朝廷自有權衡非臣下所能自便劉蓉所請著毋庸議尋御史陳廷經奏參劉蓉放言高論妄自尊大請旨嚴行治罪以爲大臣之輕量朝廷

者戒上命駱秉章查明劉蓉參蔡壽祺在川招搖各款據實奏覆至是秉章覆奏命革蔡壽祺職並諭以劉蓉於明白迴奏之件語多過當有乖敬慎交部議處尋部議應比照言官條奏失體降一級調用詔如所請十月諭曰陝甘總督楊岳斌奏陝西紳士雷致福等稟稱劉蓉自莅任以來疊遇賊匪竄近省垣及甘省潰勇東竄均能不動聲色派兵剿辦全陝倚若長城今聞以事去官遐邇驚疑據情代奏並據奏稱劉蓉爲甘省籌餉籌糧不遺餘力一旦解任甘省亦失指臂之助等語前派瑞常羅惇衍馳赴陝西查辦事件於劉蓉品行才具及平日居官聲名如何民情是否愛戴辦理軍務吏治是否合宜自必確有聞見著據實具奏尋吏部尙書瑞常等奏稱劉蓉秉性樸實惟吏治尙未熟悉自負閒有過高而辦理軍務有膽有識本年甘肅潰勇竄入陝境劉蓉調撥兵勇不動聲色誅其渠魁餘俱遣散歸伍甘肅逆回時或東竄劉蓉分兵布置居民恃以無恐奏入諭曰劉蓉任陝西巡撫已經數年地方情形俱能諳悉詎可因語言小過致令閒退自應俯順輿情以期裨益地方劉蓉著帶革職留任處分署理陝西巡撫十一月奏報署任日期並陳患病未痊請迅簡賢員來陝接任俾臣暫息仔肩藉資調理諭曰陝西軍

務未竣剿防均關緊要該署撫仍當懷遵前旨力疾從公以圖報稱毋許固辭五年二月以前保賢能牧令龔衡齡等酌給陞階虛銜經吏部議駁奏言近來登進之途多在軍營而究心民瘼者仍潦倒於下吏陝省瘡痍未起亟應舉善勸能請仍照前議獎勵從之又奏言陝西當兵燹之後沃土久荒地方官以招來開墾爲急務應查明被災之輕重荒地之多少墾種之成數分別勸懲責成該管府州督率考課諭嘉其章程周妥命照所議辦理八月奏病難速痊懇請開缺回籍調理上允其開缺暫留陝辦理軍務時捻匪愈熾肆擾陝豫皖鄂之間官軍疊次失利十二月諭曰劉蓉以獲咎之員特令署理陝西巡撫嗣復允其開缺暫留陝辦理軍務倚任不爲不專乃屢諭該署撫出省督剿置若罔聞以致官軍挫失捻勢愈張貽誤地方實堪痛恨劉蓉著卽革職毋庸再留陝西十二年卒湖南巡撫王文韶奏聞諭曰劉蓉前因剿賊失利降旨革職茲據王文韶奏該員前在湖南湖北四川陝西等省會著戰功所有前得革職處分著加恩開復十三年六月四川總督吳棠奏言咸豐十一年駱秉章督師援蜀邀劉蓉佐理軍事時滇匪李永和踞青神藍潮鼎巨股攻綿州何懋順張瀾富何螞蟻等分擾川東川南各州縣縱橫

馳突全蜀幾無完土楚軍節節進剿於是年八月大破藍潮鼎數十萬衆於綿州藍逆奔綿竹乘勝追擊軍威大振劉蓉奉旨署理川藩旋蒙實授籌畫軍儲遣撤游勇附省人民始獲安枕次年春間藍逆授首石達開擁衆入蜀李泳和負嵎自固劉蓉親詣軍前激勵將士密授機宜不數日而有龍窕場之捷石逆亦被諸軍擊退張瀾富周澤泳郭刀刀等以次削平又明年石達開率十餘萬衆由滇入蜀劉蓉稟商駱秉章馳往雅州一帶自督諸軍遏其前密調各土司截其後屢戰俱捷石逆就縛計楚師至蜀前後不過二年各匪次第蕩平固由駱秉章調度有方知人善任而軍中機宜多由劉蓉親自指畫績殊偉矣劉蓉自任四川藩司陞補巡撫前後未踰二載整飭吏治講求軍實倡辦捐釐革除時弊搜訪眞才汲汲如不及當兩浙糜爛時左宗棠移書告急劉蓉立籌餉數萬兩派在籍知縣楊昌濬募勇馳援厥後全浙肅清甚賴此軍之力其規畫宏遠不沾沾於一省而蜀都人士感戴尤深仰懇天恩宣付史館並入祀名宦祠暨附祀駱秉章成都專祠以順輿情而彰蓋績十月陝西巡撫邵亨豫奏言劉蓉起家儒素擢任封圻自同治三年統兵來陝值逆燄方張會同荊州將軍多隆阿籌畫機宜親冒鋒鏑粵回各逆

次第剿除旋奉命督辦全陝軍務其治兵籌餉察吏安民興利除弊竭力盡心日夜憂勤積勞成疾迄今軍民愛戴不忘仰懇恩准入祀陝省名宦祠均從之光緒二年陝甘總督左宗棠等復以蓉夙著勳勞士民感戴請於陝省建立專祠以表勳勤而隆食報十四年湖南巡撫卞寶第以蓉等前隨曾國藩辦理軍務運籌決勝請與已故貴州布政使李元度已故內閣中書郭崑燾一併附祀湖南曾國藩專祠以彰忠藎而符公論均得旨允行子麒祥江蘇候補道

清史列傳 卷五十

大臣畫一傳檔後編六

蔣益澧

蔣益澧湖南湘鄉人咸豐三年粵匪竄陷岳州益澧由文童隨大軍攻下之以功
敘從九品四年隨克湖北黃梅晉縣丞賞戴藍翎十二月官軍進規九江取道白
水港賊乘半渡蹙我益澧偕道員羅澤南等分途迎剿敗之又敗賊於小池口五
年三月進攻廣信大軍駐城西烏石山益澧以所部駐山右爲犄角賊見營壘未
定悉衆來攻益澧嚴壁以待俟其怠縱擊之斬賊酋數人於陣直逼城下諸軍蟻
附而登復其城七月進兵義寧州入州故有二道一由坑口達西門一由乾坑入
鼇嶺達北門羅澤南偵知鼇嶺三峰相連形勝可據潛師直進而先命益澧駐乾
坑賊以二千人爭之復分七八千人出坑口鈔官軍後林箐深密伏賊莫測益澧
謂諸將曰今以數百人當七八千賊不死戰盡殞於賊矣衆皆奮益澧揮兵直前
擊之賊披靡遁去追北十餘里會師於鼇嶺乘勝急攻拔之捷入以知縣陞用加

同知銜九月復蒲圻十一月克武昌益澧皆在事有功洊晉知府賞換花翎七年五月廣西賊踞興安靈川勢張甚湖南巡撫駱秉章檄益澧剿之師次寶珠嶺賊以大隊來犯擊卻之比至唐家市賊復傾巢出拒並於瓦子鋪密林中伏賊數千將伺官軍進攻而鈔其尾益澧分軍先剿伏賊賊不虞官軍突至驚潰諸軍繼進大敗之俘斬無算餘賊遁入城遂偪興安賊復於北門築柵內開礮穴外列竹籤三日而濠壘具益澧會道員江忠濬等軍四面環攻縱火焚之柵立燬燔斃者山積靈川賊率衆來援敗之賊遁去兩城先後報復得旨以道員選用賞額哲爾克克巴圖魯名號十一月艇匪竄平樂益澧以兵討平之加按察使銜八年四月巡撫勞崇光以益澧剿賊屢勝疏請留於廣西以道員補用尤之六月駐軍雞石灣令同知蔣澤春等由雒容進屯山門都司謝年豐等護水師沿江而上遇賊於洛垢墟水師稍卻益澧大呼突陣火其船賊敗退翼日賊船復蔽江而下陸賊列隊護之勢甚熾益澧督軍力戰斬級數千遂次鷓鴣山進攻柳州拔之磔女賊日李潘氏等奏入賞加布政使銜尋署廣西按察使時賊猶踞慶遠益澧偕右江道張凱嵩會兵進剿掘長濠斷其出入賊困欲渡河竄逸復邀擊敗之慶遠平命以按

察使記名十月剿賀縣賊累戰不利益澧赴湖南募勇潯匪乘虛上駛柳州戒嚴九年三月益澧以兵至援之賊退四月授按察使旋擢布政使八月僞國宗石鎮吉由興安竄入訶知會城無備遂犯桂林學政李載熙疏劾益澧貪鄙任性僨事殃民自擊退平樂賊匪後並不追剿反赴修荔致賊蹈虛窺省迨省城被圍益澧僅以疲病之兵千餘人回援以養勇爲名浮冒錢糧遇有調發屢募充數賀縣團勇擊賊得力乃忌其功不用坐擁厚貲不發軍餉疏入上以益澧尙有戰功革去布政使以道員留於廣西差委所參各節交撫臣查明覆奏會益澧與道員蕭啟江等軍水陸合剿桂林圍解十月湖南巡撫駱秉章疏言查楚省赴援廣西之蕭啟江劉長佑諸軍已於八月二十八日九月初九日先後馳抵桂林賊聞楚軍大至悉數由南路竄遁城圍立解竄撲廣西省城者僞石國宗一股至石達開尙踞義寧永福一帶廣西學臣李載熙原奏係八月二十七拜發蕭啟江蕭榮芳均於二十八日抵省賊已解圍李載熙近在一城何以先一日拜摺之時竟無聞見乃以省城危急外援未到情形入告致煩聖慮至蔣益澧少年氣盛閱歷甚少自以身經百戰頗習兵事每論戎機於僚屬多所凌忽臣早經慮及然廣西一省除益

澧所部實別無兵勇可以調撥巡撫曹澍鍾亦疏稱益澧克平樂後因各軍疲病暫留養銳而賊伺瑕竄省初令知府潘家讓回援不甚得力繼又自統全師協籌防剿守禦完固人心以安所部湘勇向照楚省原定營制條款難悉與例符綜計冊籍尙無侵蝕惟連年軍需匱乏移前濟後不克按期而益澧年輕性急間有過當於傷病士卒未能優恤致有刻薄寡恩之謗賀縣團勇因係新撫之衆未經督帶來省實非忌功不用請宥其罪仍以道員留省從之十年六月賀縣賊分擾昭平平樂益澧自率湘勇進擊連破之於畫眉嶺公會墟斬偽官王鼎新等是時下郢賊未靖益澧恐大兵一撤賊必繼出謀知逆首陳金剛糾集悍賊屯聚沙田勢將復振遂進軍戰於大灣嶺益澧親執桴鼓軍士呼聲動天火其寨殲戮殆盡盡奪茶菴各要隘賀境肅清論功加鹽運使銜尋諭曰蔣益澧身先士卒擒斬賊目克復賀縣尙屬奮勉賞還布政使原銜十一月會廣東援師剿下郢至竹洞嶺賊悉衆出拒益澧率副將陳友勝等自高坡馳下擣其中堅賊大潰竄潯州下郢平命以按察使記名十一年七月授廣西按察使進駐平南會總兵李揚陞水師攻潯州復之焚逆艇四百餘艘斃賊二千以功開復布政使原官並賞三代一品封

典同治元年正月授浙江布政使八月自湖南募勇東下時賊由蘭溪竄壽昌分黨出上方嶺九月益澧至衢州分軍復壽昌僞侍王李世賢竄裘家堰結壘自固浙江按察使劉典各營先進益澧繼之賊日李侍祥內應官軍銜枚夜進悉拔其壘由羅埠攻湯溪屢敗援賊射書入城曉以禍福二年正月以計誘賊日李尙揚等磔之克其城自酤坊開化村至白龍橋賊壘數十悉平上以益澧戰功卓著賞文綺荷囊玉鞞翎管並下部優敘二月總督左宗棠進屯嚴州規富陽援賊麇至益澧由南岸渡江築壘新橋令諸軍分三路迎擊大敗之賊於雞籠山築壘十餘據地險要八月令遊擊徐文秀副將楊政謨等攻之益澧自率親兵督戰徐文秀先登陷陣官軍繼進盡破其壘遂以大小礮船攻城賊披靡竄走富陽復新橋賊壘皆平時賊自杭州至餘杭連營數十里益澧沿江而下漸偪清波鳳山兩門令總兵高連陞等營十里長街六和塔萬松嶺俯瞰杭城自將徐文秀等紮東嶽廟九月賊由饅頭山分路來犯督軍遏退之奪其楊家橋新壘十月賊由萬松嶺清波門分道來犯迎擊之皆負創走十一月左宗棠檄益澧偕道員楊昌濬總兵黃少春會剿餘杭賊由西北兩門出悍黨萬餘拒戰背城而陣官軍三面蹙之自辰

至西斬級六百餘餘賊堅匿不出十二月益澧督諸營列隊秦亭山牽制賊勢令高連陞攻鳳山門連破九壘直抵吳山麓水師亦破清泰門外賊壘由錢江入西湖奪賊艘十餘平湖乍浦海鹽均下僞會王蔡元隆以海寧州來降易名元吉三年正月襲桐鄉降賊酋何紹章命率六營駐烏鎮雙橋以扼嘉興之賊令知府陳恩燭將降人蔡元吉會蘇師以復嘉興賊勢日蹙二月饅頭山地雷火發壞城垣三丈餘諸軍擁入賊死拒益澧令以火器環擊之鏖戰竟日悍日多斃餘賊夜逸遂復杭州餘杭亦同時下上以益澧自調任浙江戰功卓著屢拔堅城茲復親督各軍克復省垣寶屬奮勇異常賞穿黃馬褂尋給雲騎尉世職三月分軍克德清石門進攻湖州六月蔡元吉一軍深入爲僞堵王黃汝金所困益澧親赴菱湖令李邦達等攻思溪高連陞等攻雙福轉戰而前距元吉營僅隔一河僞賊營未得達時江寧僞幼王洪福瑱亦入湖州黃汝金衆尙十餘萬七月益澧作浮橋以通蔡元吉各營改由袁家匯荻港出湖舩漾襲賊後路連戰克之賊目譚侍友降遂由荻港出太湖攻袁家匯賊壘擒斬有差蔡元吉亦潰圍出賊氣阻且懼棄城走益澧自西安激擊之遣散脅從數萬上以益澧統兵入浙身先士卒所向無前廓

清浙境懋著戰功晉騎都尉世職十一月護理浙江巡撫疏陳善後事宜一籌閩
餉一濬湖汊一築海塘一捕槍匪諭曰該護撫縷陳事宜惟當實心實力審度時
勢次第籌理總期弊無不除利無不興不可稍有畏難之心四年劉典軍於楊坊
失利益澧疏言左宗棠駐浦城較衢州尤爲扼要見檄衢鎮劉清亮進扼浦城歸
左宗棠調遣復令副將余朝貴領新湘五營屯衢與浦城軍聯絡保護糧道上躔
其言尋回本任五年正月命辦理廣東軍務兼籌糧餉二月授廣東巡撫九月疏
言粵省太平關稅康熙間改歸巡撫委員監收乾隆閒奏歸南韶連道經理如果
承辦之員潔己奉公何至有虧短之弊乃自咸豐八年以來均未徵收足額再四
訪察半皆耗於苞苴卽如臣衙門到任節壽月費每年合計銀二萬五千八百兩
此外省中文武各衙門陋規暨南韶連鎮薪水數又萬餘約計共四萬兩送者不
敢少減受者視爲成規猾丁奸吏藉口侵漁以維正之供爲官吏揮霍殊堪髮指
請將臣衙門及各署規費一併裁禁並經徵太平關稅家丁書吏卽行斥革由臣
派員襄辦著爲定章從之十二月因粵東鄉試人衆奏請增同考官三員受卷彌
封對讀謄錄官各一員六年二月五坑客匪倡亂督軍剿平之客日黃煥章等投

誠分別遣散安插於高廉各府及賀縣貴縣等處借總督瑞麟疏請將客民讀書子弟另編客籍每二十人取進一名均如所請六月因病請開缺優詔給假調理十一月總督瑞麟疏劾益澧任性妄爲列款入奏命閩浙總督吳棠查辦吳棠奏稱蔣益澧久歷戎行初膺疆寄到粵東以後極思整頓地方興利除弊惟少年血性勇於任事凡事但察其當然而不免徑情直遂以致提支用款覈發勇糧及與督臣商酌之事皆未能推求例案請交部議處尋議降四級調用上改爲降二級以按察使候補發往左宗棠軍營差委七年二月授山西按察使以病給假回籍八年正月開缺十三年命來京陛見十月入都十二月卒旋據太常寺少卿周瑞清疏言益澧謀勇兼備調度有方治軍嚴明秋毫無犯有古名將之風臣籍隸廣西見聞所及知之最詳粵西之危而復安實賴該員之力合省士庶頌德歌功億萬人如出一口奏乞優卹奉旨開復原官照巡撫例賜卹生平政績宣付史館立傳光緒元年四月浙江巡撫楊昌濬奏稱益澧自統軍入浙連克名城血戰數十無不身冒鋒鏑出奇制勝殺賊數十萬克復省城廓清全境其行師之略紀律最嚴秋毫無犯沿途收埋骸骨資遣難民每復一城所得賊糧贍軍之外皆散諸閭

閩全活甚衆接護撫篆籌辦善後井井有條百廢具舉是以農商相率來歸首重學校優其廩糈增書院膏火建經生講舍設義學興善堂乙丑補行鄉試貢院新成一切草創應試士子均沾實惠據浙中紳士籲請於省城建立專祠春秋官爲致祭三年七月浙江巡撫梅啟照復行疏請賜諡略言益澧再造浙江功旣加於粵西事且艱於閩豫士民感念不忘聯名呈請奏乞天恩賜卹以彰忠藎疏入先後均奉俞旨尋賜祭葬予諡果敏子德椿十五年由通政司經歷兼襲騎都尉及歲引見賞主事分刑部

袁甲三姪保慶

袁甲三河南項城人道光十五年進士以主事用分禮部二十年補官二十三年充軍機章京二十七年八月陞員外郎九月以捐備本籍賑需下部議敘二十九年遷郎中三十年五月擢江南道監察御史尋稽察豐益倉文宗顯皇帝御極六月疏云洋務之興已及十年在事諸臣或倉皇失措坐失機宜或庸懦無能藉以要挾我宣宗成皇帝軫念民生曲從所請藉示羈縻上年廣東力拒進城制其要領薄海臣民同深歡頌我宣宗成皇帝爲民屈己之心亦歷年始獲稍慰本年春

間英人乘我皇上御極之初故智復萌藉端嘗試幸賴聖志堅定屹然不搖俾英人不戰而屈儻當時稍有游移則疆事又多反覆矣今當外患稍平內政急宜修治應請旨敕下大學士九卿將從前之錯誤後此之防維虛衷詳議久遠是圖俾天下咸知公論之難誣自強之足恃振興鼓舞衆志成城則外人咸懍然於天朝之紀綱整肅莫得動搖自可日久相安矣報聞七月擢兵科給事中九月疏劾廣西巡撫鄭祖琛慈柔釀患致賊充斥及粉飾彌縫狀詔褫祖琛職又疏劾江西巡撫陳阡與屬吏狎妓飲酒賄賂交通命下江西學政張芾按之得實褫陳阡職十一月轉兵科掌印給事中時戶部請開捐例甲三奏言皇上御極之初曾詔停捐輸未及一年不便舉行請收回成命咸豐元年正月詔免各省錢糧積欠甲三疏言官吏奉行恩旨每遲久而後覈定挪移侵蝕弊竇叢生請限以三月開單奏明並嚴禁延匿贍黃均允行二月上以祈穀禮成加恩太常寺執事各員悉予議敘甲三疏云滿假之漸卽驕泰之機天難忱斯不易維王請皇上宸居齋心益勵寅畏時懍克艱之義彌嚴昭事之忱上嘉納焉又疏舉將才廣州副都統烏蘭泰京營總兵達洪阿江蘇道員嚴正基湖北道員姚瑩等報聞十月南河豐北決口甲

三疏請因決口導河由大清河入海使水行地中免隄防之勞橫決之患二年五月以廣西賊首洪秀全等竄擾湖南命湖廣總督程裔采督辦防剿欽差大臣賽尙阿自廣西移軍追賊甲三疏陳軍務事權宜一程裔采以總督駐衡州守土之臣責無旁貸若復令賽尙阿持節移軍恐在事文武各分畛域諉過爭功互相掣肘況賊已出巢尾追更難制勝請命賽尙阿回京供職而詔程裔采便宜行事如有疏虞按律定罪時湖北巡撫龔裕聞賊入境託疾乞休甲三疏請治罪以昭炯戒並言失守人員每奏請隨營曲爲開脫請飭禁止報聞六月列款奏參定郡王載銓及刑部侍郎書元貪鄙險詐詔事載銓疏云載銓在先帝時本未深資倚畀書元由司員循例陞至侍郎更屬無所表見今蒙皇上稍示優容遂各肆意妄行不恤物議邪正消長之機當亦先帝之所降鑒也皇上見以孟秋大祀虔宿齋宮先帝之靈實式憑之儻蒙乾威獨斷俾大小臣工無不知感知懼天下幸甚臣受先帝參養之恩十餘年如有挾私妄訐淆惑聖聽之處先帝陟降在天斷不令臣幸逃法網也疏入命甲三明白回奏甲三覆奏辭益切詔除載銓內大臣差使並奪王俸三年書元亦鐫級三年正月工部侍郎呂賢基奉命赴安徽辦理團練防

剿事宜奏請調甲三赴營幫同辦理軍務允之時粵匪陷鳳陽府踞臨淮關煽動土匪連陷懷遠蒙城將由亳滁窺河南甲三至軍疏言賊勢未遽北犯請益定聖志以固民心諭在事諸臣勿涉張皇及其羽翼未成力爲圖制報聞六月署廬鳳道八月抵正陽關時潁州漢回相焚殺圍府城甲三出示曉諭謂同係朝廷赤子不問漢回但分良莠別首從誅倡亂者毋致結黨尋釁遣同知張家駒解散良民擒首犯張銀盤等斬之九月兵部侍郎銜前任漕運總督周天爵卒於亳州之王市集命甲三代領其衆先是周天爵奏蒙亳匪衆合五十八捻爲一有四大天王諸名目宜急討未及剿而天爵卒甲三至王市集兵勇已散民無固志賊進踞孫村店甲三收集散勇飭鄉團扼要隘遣遊擊朱連泰等擊賊高公廟大破之捷聞得旨袁甲三接辦剿匪事宜卽能激勵兵勇將大股捻匪迅速兜剿辦理尙合機宜尋賞加三品卿銜署安徽布政使甲三疏言見在剿辦捻匪正當喫緊一署地方限於職守剿匪事宜轉恐貽誤得旨毋庸署理布政使卽以三品卿銜兵科給事中剿辦安徽捻匪時擒首鄧大俊由雒河集擾及標里鋪甲三分兵襲之擒其渠鄉民先後緝獻者二千餘悉實諸法尋疏言江寧百姓有爲義約告上元江寧

兩縣訂期圖收復者揚州難民有於城上言賊不多怨官軍不戰者且有願殺賊以應者無如統兵大臣均置之不聞致百姓謀洩被戕忠義解體然朝廷厚澤在人忠憤未泯急作其敵愾之心許以非常之賞義旗所指當可奏功得旨飭欽差大臣向榮琦善剋期攻剿十月粵逆由安慶犯集賢關竄據桐城縣旋陷舒城縣呂賢基死之命甲三由潁州移軍桐城甲三疏言捻逆張茂踞懷蒙間稱僞西懷王窺廬郡非臣親往督辦人心愈搖應先赴蒙亳一帶爲各郡聲援以便聞警馳應如所請行時穎亳捻匪經官兵屢剿併踞雉河集甲三飭縣丞徐曉峯等破之擒賊渠孫重倫賊另股潛竄臨湖鋪復分兵擊之擒賊首宮步雲賊黨馬九等謀劫步雲甲三遣遊擊李城虎等分兩路擊之擒馬九等並賊目數十各捻首搜捕殆盡得旨嘉獎甲三以張茂在懷遠勢尤熾遣遊擊錢朝舉等往剿與知縣朱鎮督團勇一戰破之張茂受傷遁十一月疏言皖省南路宜剿北路宜防防剿兼施非兵多不可皖省兵力過單查陝甘總督舒興阿所帶陝甘兵尙在陳州請敕赴南路會剿從之旋以賊撲廬州甲三馳赴宿州防賊北竄奏催舒興阿速援廬州並分兵扼正陽關上命舒興阿撥兵駐防甲三於徐宿擇要駐紮爲臨淮後應十

二月賊陷廬州巡撫江忠源死之甲三奏請及賊未定急圖收復上命在籍侍郎曾國藩以水陸軍由九江急趨安徽並劾舒興阿擁兵坐視致廬州陷舒興阿遂褫職四年正月甲三以賊久踞廬州慮其旁擾疏請撥兵防壽州六安上命河南巡撫英桂調兵防堵二月賊陷六安竄蒙城甲三進擣蒙城賊走永城甲三奏言永城四路可通賊將竄宿州趨徐州徐州爲糧臺重地急應嚴防上命甲三確探賊蹤迎頭截剿甲三追賊及於蕭縣賊前股已渡河後股折而南走乃奏云賊蹤飄忽渡河者萬難追及徐州鎮道兵勇足剿土匪臣應折回宿州嚴堵南路竄匪遂引軍還上嚴飭之諭曰糧臺重地必應嚴爲防範前有旨令袁甲三趕援以遏賊匪北竄該給事中何以竟行折回置北來之賊於不顧三月賊由黃河南竄甲三敗之於潁州復敗之於正陽關餘賊掠舟遁回六安甲三遂回軍剿亳蒙擒匪時擒首張捷三等糾合粵匪以義門集爲總巢分踞雉河集臨湖鋪勢張甚甲三進軍擣臨湖鋪賊潰甲三遂偪雉河集雉河賊已先期移踞趙旗屯將誘官軍入集而夜襲之且分股由河北斷官軍後甲三偵知之飭船隻盡泊南岸候補直隸州知州張家駒陣河干候補參將朱連泰李成虎等敗賊馬家樓復迫之渦河殲

賊殆盡遂破義門集賊巢捷入得旨嘉獎時永城賊爲官軍所敗由正陽掠舟回竄六安潁亳一帶賊尙縱橫上以臨淮爲前路要隘命甲三馳紮臨淮遏賊北竄四月奏陳臨淮布置情形又疏劾護理廬鳳道立誠巧滑貪鄙劣迹昭著請革職提訊並獎勵督帶練勇首先殺賊立功之鳳臺縣練總王恩綬等均從之五月擢都察院左副都御史六月六安民團克復州城甲三疏請立沛恩施並免糧賦其捐糧助剿者優敘官職以資激勵如所請行時淮南土匪以俞家灣爲巢穴七月甲三分兵進剿先敗其外援斃賊日史學江等旋偪賊巢百步爲壘以大礮碎巢內屋壁賊亂官軍填壕入火之焚賊甚衆擒賊渠李占青等四十餘人悉寘諸法八月疏言見在兵勢分賊勢合惟有剋期共舉塞江路據險要然後江南北同時進兵輔以民團兼散賊黨雖有一二死守之賊亦不難合力翦滅請敕各統兵大員併力合謀而以重臣統之以收指臂之效又言皖省軍務以克復廬州爲最急壽定肅清附近無虞旬結若出偏師赴南路斷廬賊接應不特廬南各屬可清且翦其逆黨卽廬郡踞賊孤立臣已令紳民等密行糾約多備糧米卽擬進駐六安上嘉勉之尋以粵匪陷和州窺江浦將北竄甲三奏請緩赴六安遣參將吉連扼

關山廬鳳道張光第赴滁河集團練爲聲援上是之十月以皖北賊復熾遣張家駒朱連泰等進軍蒙城敗蘇天幅等於寺覺集會粵匪由和含踞烏江一帶檄張光第與署按察使恩錫擊敗之甲三策賊必復來飭光第嚴防十一月賊果乘夜結五壘於駐馬河官軍乘賊營初立薄之擒殲無數甲三復以桐城之賊恃大小關爲固遣參將劉玉豹舉人臧紆青由六安進連奪兩關圍桐城廬江援賊乘夜大至復擊走之甲三恐孤軍深入無援奏言桐城南連安慶西連潛山東連廬江我軍深入重地三面受敵卽克復亦難爲守臨淮復無兵可撥疏入命提督秦定三由舒城迅撥兵勇爲紆青等聲援尋臧紆青攻桐城西門安慶潛山援賊麇至城賊復分門出應之官軍三面受敵紆青力戰死劉玉豹方攻北門聞警赴援收合餘衆退保六安詔嚴飭甲三及和春等撥兵策應以贖前愆五年正月甲三疏言廬州居江北腹地之中水陸四通賊又旁陷十餘州縣江寧資其輓輸安慶倚爲後應廬州不克不特江北各路防兵爲所牽制楚師東下亦不能急擣江寧請飭曾國藩等以水師偪安慶陸兵由北岸埽太宿潛山而以勁旅出賊後先克廬州由北而南取舒桐趨安慶並偪江岸直下江寧可無後顧旁顧之憂報聞二月

疏籌全皖軍務分東西中北四路略曰北路以臨淮爲要正陽次之臣駐臨淮牛鑑扼正陽聲勢聯絡可無虞賊北渡廬州爲中路臣所以請先克廬州者蓋廬州一克無後顧之憂各路防兵皆可前進廬南各州縣不攻可下無如和春福濟師老力疲急難奏效西路斬黃無處非賊兵力過單終屬無濟東路沿江鉞魚背西梁山一帶賊船賊壘來去無常雖有張光第等分軍進攻而水師不能夾擊終難蕩事刻下楚賊力爭江路驍悍必盡聚上游廬州機會誠大可乘請益厚兵力分扼廬城東南或添兵並剿舒巢使其應接不暇自可一鼓成擒矣尋疏請將宿州知州郭世亨開缺辦理軍務而以王啟秀代之命與和春福濟妥商具奏甲三輒疏言之諭曰朕以調署牧令必須與督撫會銜並非不准袁甲三與聞舉劾乃閱另摺覆奏祇稱往返函商仍未聯銜具奏袁甲三著傳旨申飭仍著福濟會同和春袁甲三詳細酌度辦理和春福濟遂疏劾甲三堅執己見無從會銜並劾甲三株守臨淮粉飾軍情擅截餉銀冒銷肥己等款得旨袁甲三先行交部嚴加議處卽來京候旨至擅截餉銀冒銷肥己等情著和春福濟確查具奏尋議革職五月甲三遣丁赴都察院呈訴被參摺內所稱擅截餉銀等情爲和春等所誣緣上年

桐城之役事後曾函責和春等置不應援本年復以廬州未復兩次具奏和春等銜恨遂捏造蜚語誣參請奏明查辦都察院以聞命下兩江總督怡良秉公查辦怡良覆奏入事獲雪是年亳州擒匪張落刑宮得韓狼子句結河南擒匪蘇添幅王貫三等踞雉河集四處焚劫給事中孫觀御史曹登庸宗稷辰先後疏言甲三在臨淮剿辦有方地方藉以安謐自離任後擒匪大肆蹂躪請仍起甲三視師怡良及江蘇巡撫吉爾杭阿浙江巡撫何桂清復交章薦六年二月命甲三隨同英桂剿辦河南擒匪時張落刑等分踞鳳潁徐州各境圍亳州陷懷遠蒙城夏邑虞城犯歸德府江皖豫三省之兵屢挫甲三至軍卽合南陽鎮總兵邱聯恩大名鎮總兵史榮椿等擊之三戰皆捷會甲三之子編修袁保恆集舊部三千人至軍遂力解亳州之圍進戰於翟村寺北復大敗之斃賊四千餘張落刑等糾蒙城悍黨於白龍王廟據險爲砦悉力拒守宮得王貫三爲之援五月甲三會邱聯恩河北鎮總兵崇安馬步併進已革察哈爾都統西凌阿與保恆以馬步隊沿江襲之殺賊數千平其砦乘勝攻燕家小樓賊黨數萬列長陣以拒官軍衝其中堅貫賊陣賊大潰遂乘夜疾進破趙旗屯穆家寨沙土集越日抵雉河賊憑壘力拒槍礮雨

注官軍齊力併攻毀其南岸土牆擁而入遂破賊巢窮追四十餘里獲蘇添幅等張落刑僅以身免捷入得旨袁甲三自永城亳州急抵雒河集賊巢督陣摧堅累戰皆捷洵屬懋著勤勞著以三品京堂候補張落刑既南走徐圖復逞七月踞三河尖尋犯潁州甲三敗之於大橋口賊北走北路官兵不能禦賊遂復踞雒河集甲三督邱聯恩等擊賊於太清宮又敗之於十八里鋪殲王貫三七年四月以另股捻匪分踞王鄧諸圩深溝高壘伏匿不出甲三檄史榮椿等誘戰敗之進攻王圩賊冒死突出官軍蹙之入林一炬殲焉五月督諸軍填濠進築礮臺臨圩中如指掌賊殊死守鄧圩賊來援擊卻之遂火王圩薄鄧圩築長濠困之是月授太僕寺卿六月分兵拔宋圩鄧圩以糧盡內訌縛獻首逆李寅等百餘人鄧圩平姚圩亦旋破奏入上以甲三剿撫兼施調度有方賞戴花翎七月副都統銜勝保攻張落刑於正陽關久不下奏請甲三移師助剿甲三遂檄朱連泰署徐州鎮總兵史榮椿留剿敗匪之踞韓圩者九月克韓圩十月粵匪李秀成圍河南固始縣甲三偕勝保赴援八年二月固始圍解遂進攻六安復之五月擒匪由東路擾銅山偪徐州飭史榮椿擊走之擒斬巨匪孫大旺於睢寧縣泥溝六月宿南賊踞王家圩

甲三自正陽移軍宿州檄知府徐曉峯乘夜襲之殲賊首王紹堂等乘勝復七圩七月命代勝保督辦三省剿匪事宜時張落刑襲破陳家莊分踞各圩甲三分兵擊走之八月擒匪李大喜糾羣賊由懷遠北犯正紅旗蒙古副都統伊興額遏賊於蕭縣失利賊陷豐縣甲三遣兵復其城令徐州鎮總兵傅振邦繞出城北截擊之十月賊南趨銅山之孫家集傅振邦率馬隊追剿適保恆與知府李榮等以步卒至合擊敗之賊西竄甲三敗之於褚莊又敗之於木牌坊尋蒙亳賊竄歸德府甲三令保恆偕傅振邦以馬隊馳援賊聞風遽趨西北偏近開封省城震動甲三以賊窺周家口已久其向西北者特爲牽制官軍計乃檄傅振邦等疾馳八晝夜及賊於太和之李興集保恆豫糾各團迫賊於橋口傅振邦督馬隊分三路進保恆督兵團張兩翼策應遂大破之追奔四十餘里斃賊數千豫境肅清河南巡撫恆福奏入賞保恆伊勒圖巴圖魯名號餘各賞賚有差是月疏陳統籌全局略言兵分則勢孤合則勢盛張宮等逆踞地千餘里奸徒附和良民被脅賊圩徧地一氣相通東可以擾清淮西可以犯歸陳北可以窺山東若連粵逆爲害更甚臣所統兵勇除各處留防外不過數千僅能爲應敵之軍不能制賊死命東豫各省防

兵零星分布與其畫界散處終歸無濟曷若併力大舉迅圖成功請敕各督撫合力規籌與臣軍聯絡一氣進逼賊巢爲埽穴擒渠之計報聞九年正月檄協領關保遊擊滕家勝等擊張落刑於草溝破其巢追至沱河賊溺死者無算越日復追擊於雙渡口張落刑僅泅水免適奉諭曰袁甲三督辦三省剿匪事宜已逾半載但知防堵徐宿不能直搗賊巢日久遷延迄無成效著卽來京供職甲三遂請假省親禹州四月到京旋命以三品頂戴署漕運總督時科爾沁親王僧格林沁在天津海口擊退英船軍威方振甲三與河道總督庚長奏陳通籌南中軍事亟須添派重兵合力大舉請特簡親信知兵重臣如僧格林沁者乘此英人被創之後暫爲移緩就急之計酌撥馬步大隊數千統帶南來節制各軍迅速兜剿以期埽除南賊卽以廓清北路報聞十月勝保以母憂解任甲三接署欽差大臣關防督辦皖省軍務旋實授漕運總督欽差大臣時賊踞臨淮關跨兩岸爲壘甲三以援賊皆自鳳定而來其火藥糧米亦取給於鳳定非斷其糧道絕其外援關不可拔乃築營於關之西南扼要處賊屢出撓且戰且築十一月營成乃進圍鏖戰月餘先破南岸賊巢北岸之賊爭棄械乞命甲三以其抗違日久令自七十以下十五

以上盡誅之北岸賊數千亦無得脫者生擒僞翼天侯顧大隴等遂克臨淮關移師進擣鳳陽十年正月督馬步軍薄城下鳳陽府縣兩城相距三里甲三併圍之屢戰屢捷軍威大振賊目鄧正明潛詣軍前乞降甲三密遣總兵張得勝誘首逆張元隆出斬之鄧正明等益震驚縛獻僞丞相張先等十四人遂復府城縣城猶未下以大礮擊之擒斬乞援之僞軍師趙玉奇賊登城環跪乞命賊日常四邵殿倫等出降縣城亦復甲三於城外別築七營驅兩城降賊入擇尤悍者三百餘人誅之餘悉遣散捷聞上以甲三疊次克復城池調度有方賞穿黃馬褂鳳陽既定飭江南提督李世忠擊潤溪賊巢克之先是保恆隨甲三至京遂留京供職二月命保恆赴甲三軍營差遣是月擒匪陷清江浦甲三恐賊犯山東檄道員張學醇等軍出賊前破走之遂復清江浦粵賊由廬州襲滁州李世忠擊走其衆賊退保全椒復乘勝克之降賊黨二千得旨嘉獎三月粵賊陳玉成由和含復撲全椒分擾滁州甲三檄李世忠等解滁州之圍奪大橋草茅嶺諸賊壘乘勝抵全椒城下內外夾擊盡毀賊營陳玉成遁甲三移軍攻定遠連挫賊鋒壁城下五月賊乘李世忠剿古城土匪陷來安縣甲三責李世忠卽圖收復數月乃克之時江寧官

軍潰將軍和春提督張國樑等戰歿江南州縣盡陷甲三飭道員徐曉峯九江鎮總兵黃開榜督水師嚴防高寶諸湖賊不得渡六月文宗顯皇帝三旬聖壽賜甲三母郭氏懿築頤齡扁額及福壽字如意紬緞等七月以定遠未下檄張得勝副都統花尙阿合保恆之軍圍之連戰皆捷奪賊壘十七復於城東北築礮臺擊之八月陳玉成糾大股來援力戰數日會粵捻合撲鳳陽據九華諸山連營數十里城中食盡甲三督諸軍屢戰圍不解遂令張學醇督參將黃國瑞以銳卒四百夜銜枚薄九華山賊營躍而入槍礮齊發賊爭潰走城上發巨礮應之賊愈亂同時棄營走鳳境以清是年秋英法聯軍犯順甲三奏請勤王拜疏後卽遣鑲藍旗漢軍副都統穆騰阿率張得勝先發將自督後隊繼進上以臨淮爲南北鎖鑰飭甲三仍留鎮守甲三再疏請行又詔止之尋和議成甲三疏言國家於洋人不得已而議和非本意也夷情叵測後患方長臥薪嘗膽當在此時因陳四策一曰慎采納津沽構釁以來亦嘗屢戰屢敗之矣近之失利非我忽怯敵忽勇也祇以宜戰宜和左右本無定見卽若迎若拒將帥無所適從夫戰不勝則和難久雖權時言和亦必終歸於戰從古如斯也是在聖明獨斷不爲衆議所搖然後人得堅敵愾

之心轉弱爲強矣一日節糜費京師旗綠各營歲糜帑數百萬不足以贍而未嘗可用也夫游手者得以坐耗則敢戰者疲於不飽請釋其不願入伍者聽自謀生特選精銳三四萬優其糧餉專習戰守則兵可用而費亦節矣一日精訓練旗丁以操演爲具文雖健銳各營號稱嫻熟亦臨敵而靡以兵未歷行陣而將統領非常也若於京營中擇其精壯者若干人分置各路軍營俾資歷練定限換防久之則摧堅陷陣皆視爲故常然後擇而任之使久於其職以期兵將相習庶幾戰克守固矣一日選將才練兵必先擇將夫不試之於平日而欲責之於臨時用人者既將就而不暇擇任事者亦竭蹶而不敢辭此兩誤也請敕下各路統兵大臣擇其素經戰陣能得兵心者各保數人以備選擇庶幾羣策羣力緩急足恃矣奏入上嘉納之下行營王大臣議行時駐蹕灤陽十二月甲三疏請還京謂行殿蕭條非森嚴之體天時寒沍非調衛之宜且洋人在京距灤陽僅三百餘里萬一率衆數百人北踞關隘詔書不得下逮疏報不得上通天下洶洶何所屬望疏入報聞十一年四月遣張得勝等破泗州靈璧之賊張落刑方糾衆屯聚渦河之北甲三遣李世忠擊走之七月穆宗毅皇帝御極元年九月奏道員甘心叛逆請急派兵

進討論曰苗沛霖以生員辦理團練受皇考厚恩四年之間擢任道員記名鹽運使賞布政使銜並賞花翎勇號該員宜如何感激圖報乃因所部練勇被害糾衆圍攻壽州皇考不加譴責諭令袁甲三秉公查辦迨經翁同書查明起釁根由將徐立壯正法孫家泰於監禁後旋亦畏罪自盡該員自己無可藉口乃圍攻壽州之練不卽撤退復遣其黨苗金開等竄擾河南日形跋扈茲據袁甲三奏該練圍攻壽州愈急並令死黨張士端等踞守懷遠抗拒官兵且受粵逆僞封偪令練衆蓄髮四出搶掠其爲甘心謀逆自外生成萬難寬貸四川川北道苗沛霖著卽行革職拔去花翎撤銷勇號卽著袁甲三督同李世忠調派官軍會同賈臻田在田嚴樹森毛昶熙等各路兵勇奮力追剿以伸國法各路帶兵大員祇將逆首苗沛霖擒獲盡法懲治其餘黨與如自拔來歸概免究辦其從前立功得有官職者亦各照舊如能縛獻首逆或能隨同官軍剿賊出力仍當優加獎勵並著袁甲三等曉諭各該練衆人等知之甲三遂檄李世忠等援壽州世忠等軍未至壽州四十里沛霖已陷壽州甲三自請議處得旨寬免嗣以安徽巡撫翁同書逮問甲三亦下部嚴議沛霖之入壽州也翁同書奏稱沛霖並未滋事害民祇求辨明心蹟詔

甲三罷攻懷遠適張落刑復率大股將由長淮衛渡淮而北甲三遂移軍擊之落刑敗走甲三駐軍長淮衛解散苗沛霖脅從諸圩先後反正者二百餘圩十一月保恆及張得勝等襲定遠定遠賊懼於軍威無固志甲三復縱間搖之保恆等抵城下賊卽棄城走追殲殆盡遂克定遠捷入諭敘保恆戰蹟毋引嫌甲三奏保恆隨營藉資閱歷不得與將士爭功特旨賞保恆遇缺題奏十二月粵匪由和含竄滁州甲三檄李世忠等軍分三路擊敗之進剿六合陣斬悍賊馮真林賊驚潰遂拔六合上以甲三調度有方下部優敘尋乘勝克天長縣同治元年正月移軍攻克江浦縣及浦口鎮復下部優敘四月粵匪犯六合檄李世忠擊敗之賊犯滁州來安復敗之時陳玉成久踞廬州甲三飭張得勝總兵徐鵬副都統克蒙額等會將軍多隆阿之軍攻之張得勝設伏北門外誘賊出戰賊大敗遂薄城下賊分門出戰諸軍合擊賊又大潰官兵乘勝踰城濠人遂克廬州陳玉成率死黨突走壽州官軍沿途追殺蹙之肥水溺斃無算苗沛霖開城納陳玉成甲三及多隆阿索之急沛霖乃執玉成送勝保軍前六月甲三因病請假七月以病勢增劇疏請開缺回籍調理允之並諭曰前因壽州失陷袁甲三與翁同書共辦一事且有督辦

軍務之責降旨交部嚴加議處惟念該大臣督辦安徽軍務三載時值艱危竭力支持一切尙屬穩練該部所議袁甲三應得革職處分著加恩寬免甲三行至歸德疏陳四事一聖學之緩急宜權一議政之精力宜專一用人宜審一聽言宜斷上嘉納焉時楚師攻克安慶僧格林沁亦連破捻衆聲勢赫然苗沛霖懼退出壽州正陽爲乞撫緩兵之計十一月甲三奏言苗練終難就撫萬不可再令其厚集財力占據上游形勢二年三月苗沛霖果復叛甲三奏宜亟乘其初起迅圖剿辦以遏兇鋒而定人心並敕當事諸臣此後毋得再及撫之一字則奸人氣折士志益堅矣疏入命甲三在籍會籌防剿甲三疏請調吉林黑龍江馬隊並請敕山東河南練步卒備會剿允行五月苗逆圍蒙城斷官軍糧道詔甲三急籌接濟甲三乃倡捐餉需募敢死士由閒道解至蒙城尋苗逆復陷壽州捻首張總愚等犯陳州甲三遣軍擊敗之時蒙城被圍久甲三疏言蒙圍非尋常比救蒙之軍亦非尋常行軍比請遣僧格林沁急趨蒙城曾國藩迅攻壽正唐訓方迅攻懷遠使苗逆專力自顧不暇旁擾庶可輓回大局六月捻匪再犯陳州甲三擊走之時甲三病已亟猶日召將士議戰事是月卒遺疏入諭曰前任漕運總督袁甲三老成正直

強毅有爲蒙先皇帝特達之知畀以欽差大臣關防自捻逆縱橫皖豫數年統軍淮甸擒滅張元隆等巨股疊次克復鳳陽府縣各城勤勞懋著備歷艱難前在臨淮軍營積勞致疾適值苗逆復叛以該漕督矢志滅賊本籍陳州毗連淮潁復諭令在籍督率兵團兼籌防剿猶能籌餉籌兵悉心捍禦前據奏稱沈疴未愈又復疽發於背方冀調理就痊堪資倚畀茲聞溘逝念其力疾籌防歿於王事披覽遺摺悼惜殊深袁甲三著照漕運總督軍營病故例從優賜卹歷任一切處分悉予開復應得卹典該衙門察例具奏伊長子前詹事府右庶子袁保恆著俟服闋後以翰林院侍講學士卽補次子舉人袁保齡著賞給內閣中書用示篤念盡臣至意尋賜卹如例予諡端敏八月大學士湖廣總督官文疏陳甲三治軍堅苦狀詔於陳州建立專祠將歷任事蹟宣付史館三年三月安徽巡撫唐訓方奏請於臨淮建甲三專祠七月漕運總督吳棠奏請於淮安建甲三專祠均允之旋因兩江總督曾國藩等遵查孫家泰等死狀上以甲三辦理未善撤銷臨淮專祠四年曾國藩暨安徽巡撫喬松年復據安徽全省紳民以甲三統兵淮甸清廉勤苦有拊循保障之功至今遺愛在民奏入特予給還尋河南巡撫張之萬題請入祀河南

鄉賢祠江蘇巡撫李鴻章題請入祀淮安名宦祠均允行光緒十五年慈禧端佑康頤昭豫莊誠皇太后歸政追念功績最著諸臣各賜祭一壇甲三與焉子保恆進士戶部侍郎自有傳保齡直隸候補道保慶甲三從子也咸豐八年舉人隨甲三剿辦粵逆攻克安徽六安州城副都統勝保等疏列戰績請以光祿寺署正卽補允之十年報捐郎中籤掣刑部時順天府府丞毛昶熙督辦河南團練保慶以刑部郎中發往河南交毛昶熙差遣委用十月山東竄匪七八萬句結亳州出巢捻逆牽掣官軍力圖西竄保慶偕內閣中書劉錫鴻等督率練丁迎擊於開封歸德與官軍互爲聲援四面截剿保慶首先陷陣鏖戰數日擒斬數千人賊敗歸亳州河南全境安謐敍功加四品卿銜並賞戴花翎十一年正月捻酋劉添幅大股竄擾宋集雷集平臺一帶保慶與道員周煦徵等約總兵成景分帶兵練前後夾擊連破丁小樓張椿等四寨直逼賊巢賊自是不敢遠出亳北居民藉以少休同治二年莠民趙鳳岡勾引捻首王九現李如松盤踞項城之尙店寨深溝高壘拒敵官軍保慶督率團勇與總兵張曜等晝夜環攻力克堅巢俘斬略盡並生擒陳州汝寧各屬著名首逆李如松等十九名河南巡撫張之萬上其功加鹽運使銜

四年張之萬疏言保慶在籍辦團防剿髮捻親冒鋒鏑動中機宜請以道員分發省分歸候補班儘先補用下部議不准行尋浙江巡撫馬新貽遵旨疏舉所知請以道員留於浙江補用仍格部議五年引見得旨以知府發往山東補用七年敘剿辦捻逆功免補本班以道員仍歸山東儘先題補時馬新貽陞兩江總督疏調保慶差委命赴兩江俟差竣仍回原省九年馬新貽疏請留於江蘇仍歸原班酌量補用從之署江寧鹽法道十二年卒兩江總督李宗羲疏言保慶少有大志讀儒先書身體力行咸豐年間髮捻交訌陳州爲四戰之區保慶練民團授拳勇技擊之法捍衛鄉里衆咸信服隨袁甲三臨淮軍營適當餉竭兵疲危殆萬狀保慶能以忠信固結飢軍聲名遂震嗣經毛昶熙張之萬等先後檄辦團練往來南陽汝光各府州戰功卓著前督臣馬新貽疏稱其德性堅定膽識俱優堪膺重任蓋馬新貽在袁甲三軍營與保慶相處最久知之最深洵非溢美自留兩江數年來講求吏治查勘河工督銷鹺務總理留防水陸各軍無不心精力果實事求是歷任督臣曾國藩何璟張樹聲皆倚之如左右手由其性情懇摯器識沈毅不隨流俗爲轉移故見許上官如出一口臣莅任後察其言動不苟論事持大體從公之

暇手撰格言闇然內修不自表暴方思具疏薦列爲國家備干城之選不意遽殞
齋志無窮保慶從戎十有餘年離營已久遵例不敢奏請賜卹惟生平所志所學
卓然可傳應請宣付史館並附祀袁甲三臨淮專祠疏入諭曰已故署江寧鹽法
道袁保慶前在原任漕運總督袁甲三軍營頗資得力復在河南南陽等處督辦
團練歷著戰功旋經調赴兩江於吏治河工陂務及整頓防軍均能實事求是據
所奏各節卓有賢聲齋志以歿殊深矜憫著加恩將袁保慶事蹟宣付史館附列
袁甲三傳後並附祀袁甲三臨淮專祠以彰蓋績

多隆阿

多隆阿呼爾拉特氏滿洲正白旗人黑龍江駐防由前鋒於咸豐二年補驍騎校
三年廣西會匪竄擾河南懷慶多隆阿隨欽差大臣正藍旗漢軍都統勝保進剿
旋解城圍敘功賞戴藍翎四年補防禦復以功補佐領五年陞協領六年江西九
江踞匪竄入湖北黃州分擾新洲等處多隆阿以欽差大臣湖廣總督官文檄首
先渡河會合黃州練勇奮力兜剿殲擒多名匪旋竄廣濟多隆阿隨江寧將軍都
興阿分路截擊賊潰復由曹家河進剿大破之遂復廣濟縣城七年四月賊踞九

江對岸之段窰楓樹坳獨山鎮等處復添築多壘與小池口之賊爲犄角勢都興阿偕副將鮑超攻小池口飭多隆阿進剿段窰賊分三路出撲經鮑超擊退其分股往援段窰之賊亦經伏兵截殺多隆阿遂直抵段窰大隊衝入射斃騎馬賊目數名毀賊壘十餘座追至八里江斃賊無算復由黃梅縣進剿楓樹坳踞匪多隆阿令副將王國才等分兵繞出賊後擊斃守壘悍賊賊衆大潰乘勝攻獨山鎮賊壘賊深溝密樁爲死守計多隆阿派兵分伏要隘提督孔廣順等輕騎誘之賊出伏盡起多隆阿派勇潛越賊濠拔樁登壘賊驚竄官軍乘勢剿殺賊壘悉平八年九月都興阿偕浙江布政使李續賓等督軍分攻安徽太湖縣城賊卡多隆阿先運大礮向東山池南轟擊大隊由山後鈔攻斃賊無數乘勢進攻東岸及河西各壘悉敗之遂偕都興阿攻城二更時將火器射入燔其火藥所城賊驚亂官軍奮呼登城賊由東北突走追殺甚衆並將黃泥菴所屯賊糧悉數焚燒遂復太湖縣城都興阿上其功得旨優敘匪旋屯聚石簾地方多隆阿攻破之進剿安慶節次繞攻漸偪城垣毀北門及東西山灣各逆壘十一月都興阿軍於宿松一帶賊竄花涼亭多隆阿會合鮑超進剿豫伏馬隊殲斃賊目甚夥賊衆大潰九年八月補

授福州副都統九月賊於石簾鎮增築堅城圖爲太湖踞匪援應多隆阿馳至先將木城拆毀越濠施放噴筒火箭逆衆洶懼適潛山安慶賊衆分股來援多隆阿派馬隊擊退之遂斬毀礮眼而入僞城火發賊大亂殲僞官霍天燕石廷玉等並餘匪數千遂克石簾十年正月皖逆陳玉成於地靈港東西兩岸築壘將分路上犯多隆阿偕總兵鮑超以次掃平之十一年四月陳逆竄安慶集賢關外多隆阿添調步隊於高路鋪駐紮適桐城廬江逆首林紹章等糾合大股二萬餘匪冀與陳逆聯合督軍擊走之參將余福等復由橫山鈔殺其新安渡逆衆出援並經各路官軍圍剿殆盡五月命幫辦官文胡林翼軍務時逆首黃文金糾黨渡江築壘天林莊圖竄安慶多隆阿率軍由新安渡陣而進賊衆披靡並擊敗攻撲挂車河老營股匪進攻天林莊逆衆大潰其踞集賢關之賊以驍悍留守分隊竄馬踏石地方多隆阿派隊尾追賊晷水過河追至包家橋及蔣家山等處設伏敗之賊竄桐城遂將江家橋麻子嶺黃家鋪等處賊壘悉數焚燬六月得旨優敘七月賊句結桐城土匪圖解安慶城圍多隆阿派兵於馬鞍山堵剿並撥兵分攻蔣家山及高河鋪踞匪均敗之自是安慶賊勢益蹙官軍先後踏毀城外賊壘數十座八月

開芝地道成火發轟塌北門殲賊殆盡省城克復奏入賞給雲騎尉世職九月進攻桐城直抵西南北三門拔毀木城梯而上賊大奔遂復桐城並乘勝收復廣濟黃州等處十月官文以多隆阿所向克捷奏聞賞加都統銜遇有都統將軍缺出請旨簡放是月補授正紅旗蒙古都統尋授荊州將軍仍辦理江北安徽軍務時逆匪陳玉成久踞廬州同治元年四月多隆阿派總兵雷正綰等攻之增修礮臺二十餘座晝夜以大礮轟擊令總兵張得勝於北面設伏誘敵賊突出多隆阿揮兵掩殺並分軍攻其西門克之陳逆奔壽州中津渡地方尋誘擒伏法官文等以聞諭曰狗逆久踞廬郡經楚軍會合皖軍奮力攻剿克復堅城斬馘甚衆實足伸天討而快人心多隆阿身臨前敵調度有方深堪嘉尙前於克復安慶案內業經給雲騎尉世職此次著加恩賞給騎都尉世職五月命督辦陝西軍務七月上以陝省軍務緊急多隆阿遲至兩月之久尙未到陝命官文催令前進尋以玩視軍務部議革職上念其冒暑遄征隨營官弁均多患病且節經阻雨遲誤有因改爲降三級留任八月髮捻各逆竄踞荆紫關圖擾秦鄂多隆阿由商南回剿令副都統穆圖善督隊擊賊於柳林溝山口賊率衆迎拒穆圖善分軍爲四前後策應槍

礮環施賊勢不支立將荆紫關克復上以多隆阿回軍堵剿卽能以少擊衆克復要隘優詔獎之十月亳穎捻逆復糾匪由豫西永宜等處併力西趨多隆阿飭總兵陶茂林等扼守武關親率總兵王萬年等進紮捉馬溝賊分股來撲多隆阿令穆圖善於二更後由商南進剿復分飭各軍前進策應而自率親兵繞出賊背登山大呼匪衆大亂斬馘萬計餘匪窮奔督軍由武關合兵於三角池等處夾擊之殲戮殆盡諭曰多隆阿調度有方旬日間卽將巨寇剿除殊堪嘉尙著賞給黃馬褂一件大卷江紬袍料二件大荷包一對小荷包二箇白玉四喜搬指一箇白玉柄小刀一把以示優異十一月授爲欽差大臣督辦陝西軍務二年二月同州回匪盤踞王閣村羌白鎮等處多隆阿督軍分道併進設伏誘之賊擁衆鼓譟而出大敗之遂克羌白鎮分兵直擣王閣村四月匪於倉頭鎮負隅抗拒多隆阿移營進剿揮隊縱擊賊大亂遂揮軍奮勇登城斬殺無算倉頭鎮及東路同朝等處以次肅清七月進攻蒲桃窪拜家村等處賊寨均克之乘勝馳赴南平攻剿三府里逆衆毀白鴨觜馬烏什堡沙窠諸賊巢八月進攻高陵縣踞匪多隆阿派馬隊伏於十三村之北復飭穆圖善由南路進自統大軍由東路進匪蠡擁而至三路夾

攻匪衆大潰遂復縣城時官軍已節次攻拔高陽莊東穆家寨各處賊壘直薄蘇家溝多隆阿督軍踰溝並擊退援賊直抵渭城副將孟宗福總兵姜玉順揮軍突入斃匪逾萬救出難民千餘人九月調西安將軍尋分兵援鳳翔賊衆迎拒大敗之城圍立解時匪首藍逆久踞熬屋三年二月多隆阿親督兵勇前進破其東面月城賊搶築內卡多隆阿身受槍傷仍派兵扼守月城令穆圖善於縣城西南北三面晝夜環攻潛由東路乘其不備填濠拔椿緣梯而上克其東門賊奪路奔逃官軍截殺無算餘匪竄新口峪縣城克復入奏諭曰多隆阿奮勇督戰雖身受槍傷曾不稍挫卒拔堅城實屬忠勇性成勞勩卓著賞假一月安心調理並由內府發去如意拔毒散四料交該大臣祇領以冀速痊三月卒於軍遺疏人諭曰欽差大臣西安將軍多隆阿前在湖北帶兵剿賊疊著戰功同治元年率師入皖攻拔廬州匪首陳玉成敗竄被擒伏法旋由湖北督師入陝授爲欽差大臣將同朝一帶回巢悉數削平先後克復城寨數十處並分兵解鳳翔之圍俾陝省回匪一律肅清厥功尤偉嗣藍逆占踞熬屋縣城屢攻不下該將軍忠勇奮發躬親督戰力拔堅城頭面致受槍傷節經賞給內府如意拔毒散及人灑等件交該將軍祇領

方冀醫治速痊長資倚畀茲據因傷出缺披覽遺章實深悼惜多隆阿著加恩晉贈太子太保照將軍陣亡例從優賜卹賞給一等輕車都尉世職任內一切處分悉予開復應得卹典該衙門察例具奏並准入祀京師昭忠祠其曾經立功省分各該督撫查明建立專祠賞銀一千兩經理喪事由陝西藩庫給發其靈柩回旗時著沿途地方官妥爲照料伊子孫幾人著黑龍江將軍查明俟百日孝滿後由該旗帶領引見以示篤念忠藎至意尋賜卹如例予諡忠勇七月上以江寧克復追念死事諸臣復賞加一雲騎尉世職歸併爲一等男爵光緒十一年安徽巡撫盧士杰以多隆阿與前任安徽巡撫李續宜功德在民請於潛山縣建立專祠列入祀典以彰忠藎而順輿情尤之十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇多隆阿與焉十六年安徽巡撫沈秉成以多隆阿安徽省城專祠落成請列入祀典詔如所請子雙全三等侍衛襲一等男爵

托明阿

托明阿鄂棟氏滿洲正紅旗人由護軍校於嘉慶二十二年授三等侍衛道光元年陞副護軍參領二年揀發山東以遊擊用四年以捕蝗出力下部議敘六年補

兗州鎮中營遊擊旋因喀什噶爾回匪滋事巡撫武隆阿請將托明阿帶往軍營差遣允之七年四月在蘭山等處戰勝賞戴花翎七月凱撤回營十二年陞山東台莊營參將十六年陞膠州營副將十八年正月巡撫經額布以堪勝陸路總兵奏保七月陞曹州鎮總兵二十年署四川松潘鎮總兵二十一年實授二十四年三月調重慶鎮總兵五月陞四川提督二十六年因病開缺二十七年病痊授烏魯木齊提督二十八年調陝西提督尋授綏遠城將軍二十九年疏請派撥閒散與甲兵一體操練槍礮每年支發銀兩於該處地租生息等項內籌款津貼允之三十年查出口外各廳虧欠銀米與山西巡撫兆那蘇圖奏請按數追補如所議行咸豐二年來京賜紫禁城騎馬尋以捐備軍餉下部優敘三年三月粵匪陷揚州偪近淮徐命赴江南山東交界防堵山東巡撫李德奏言淮安府之清江浦已有河臣楊以增遏其前擬以托明阿帶領歸化綏遠等兵繼其後相機助剿署四川總督慧成亦奏請擬令托明阿帶兵駐清江浦以爲應援四月馳至清江浦時賊已竄入滁州托明阿請由洪湖以北直趨泗州與兵部侍郎銜周天爵會剿得旨進剿機宜朕難遙制總以迅速爲安五月賊由蒙亳一路入河南陷歸德復竄

開封托明阿偕提督善祿等馳抵歸德沿途追剿於睢州杞縣陳留各處與賊接仗均有斬擒尋以省城圍急遵旨馳援時賊已西竄中牟諭令趕緊追剿勿墮賊之詭計旋偕善祿及已革都統西凌阿追賊至汜水賊方爭渡蹙之斃多匪燬逆船多隻生擒五十餘名並殲黃巾紅袍賊目四名賊尋陷汜水托明阿親督各兵攻其北門克之斃賊千餘上嘉其調度有方賞玉翎管玉搬指等件命幫辦軍務六月賊竄河北圍懷慶托明阿會合各軍渡河由武陟分三路進剿賊亦分三路抗拒我兵迎擊斃七八百匪奏入得旨嘉獎賊添設土城木壘爲負隅計托明阿分軍三面連日環攻斃匪二三千名七月遂移營直偃賊巢晝夜攻擊破賊壘解懷慶圍捷聞賞穿黃馬褂並賞給西林巴圖魯名號時潰賊由山西垣曲縣陷平陽幫辦軍務內閣學士勝保帶兵繞出賊前復其城上授勝保爲欽差大臣仍命托明阿幫辦賊旋由涉縣武安竄入直隸永年之臨洛關上以托明阿未能遏賊致竄畿輔重地降五級留任先是托明阿在山西豐儀鎮地方截剿竄匪身受槍傷賞假醫治並諭曰汝歷練多年打仗奮勇朕盼汝迅速痊愈汝子敬文已給假省親該侍衛到營後著卽常川隨侍學習打仗十月疏陳傷疾難痊懇請回旗調

理允之四年二月病痊命馳赴欽差參贊大臣科爾沁親王僧格林沁都統銜勝保軍營幫辦軍務並賞文綺時粵匪北竄踞阜城經僧格林沁計誘出巢托明阿督帶馬隊遙爲聲勢侍衛達洪阿等從旁攻擊斃賊多名三月另股賊竄清河勝保由阜城帶兵迎剿托明阿等移駐阜城東北賊出撲托明阿督率已革總兵德坤等極力抵禦敗退回巢旋於東南面竄出至連鎮踞之托明阿與西凌阿等分紮連鎮東西兩岸嚴密圍攻並防其回竄適欽差大臣琦善在揚州軍營病故上命爲欽差大臣馳往揚州督辦軍務並諭以悉心籌畫與陳金綬雷以誠迅掃妖氛尤當與向榮等咨商聯絡不可稍存意見八月授江寧將軍九月進攻瓜洲賊用鐵索聯貫巨木橫截運河飭副將鞠殿華等率水勇砍鐵索直隸提督陳金綬等由東岸進攻賊從東門出撲擊敗之十月江寧賊簿下駛官軍轟斃僞丞相黃起茅等多名並續獲賊簿二托明阿親督師船進攻北固山毀賊望樓旋至金山轟賊墜江者無數其分踞浦口九洑洲各賊營亦節經官軍先後攻破並擊走援賊復會合各軍分路夾攻賊潰竄十一月復攻瓜洲分東西兩路截剿經遊擊馬永泰等開礮轟擊匪敗竄回巢五年正月匪糾約鎮江逆黨竄撲儀徵飭總兵李

志和等防堵並督副都統德興阿進剿連敗之四月督兵由三汊河進剿賊突出官軍佯退德興阿設伏以待賊冒雨來衝擊敗之八月督築長圍堵剿瓜洲踞匪復偕陳金綬等分路進攻江寧賊以輪船來援總兵葉長春等擊沈之九月賊竄江浦之石磯橋飭總兵武慶副都統銜總管西昌阿等馳援殺賊二千餘名將石磯鎮克復並飭總兵陳國泰等礮船直逼金山賊勢遂蹙尋得旨瓜洲久爲賊踞所築長圍僅能防賊旁竄仍未能遏截賊蹤若非水陸併力進攻剿辦何能蕝事著督飭水陸大軍奮力夾擊並約會吉爾杭阿同時進攻鎮江俾南北兩岸賊匪不能互相援應又諭曰該逆奸詭之謀總在援應鎮江瓜洲如先將二處克復則江寧自成孤立之勢萬勿以長圍爲可恃十二月會江蘇巡撫吉爾杭阿南北合攻吉爾杭阿在黃山督戰連環大礮擊入城中托明阿扼剿北岸援匪敗之六年二月賊屢伺隙圖竄均經擊退復乘霧暗撲西路圍牆經德興阿等督兵截擊轟斃無數其分撲尹家橋等處之賊復經副將英桂等夾擊殲斃多名旋突圍出分股竄入揚州府城上以托明阿既不能先事嚴防迨逆匪撲出又不能力扼而營盤連陷府城復失調度無方著先行革職時賊踞揚州並分竄西北各路疊經官

軍擊敗三月督隊攻城協領烏爾恭額攻其西營總巴林保等攻其南德興阿由司徒廟進攻巴林保首先衝擊德興阿手斬賊目一名各將領連斬賊目逆衆大潰十月因病請回旗調理允之八年四月病痊賞三等侍衛赴勝保軍營防剿復得旨賞頭等侍衛前往天津會同直隸總督譚廷襄辦理洋務尋授直隸提督六月授西安將軍仍署直隸提督十月到京請訓赴將軍任十年二月恭逢上三旬萬壽托明阿子敬文得旨免補參將以副將用同治元年粵匪竄入陝境由華陰犯潼關托明阿飭官軍追剿斃賊千餘千總李蘊和臨陣脫逃並逃兵張滿彪等十名均拏獲正法奏入諭曰辦理尙屬認真嗣後各路統兵大員著卽照此辦理以肅軍律七月川匪竄至陝西上元關官軍進剿敗之八月回匪撲犯省城滇匪復竄平利均遣軍擊卻之九月以傷疾舉發請開缺調理允之四年卒子敬文直隸河間協副將

覺羅耆齡

覺羅耆齡正黃旗人由工部筆帖式中式道光十七年舉人陞刑部主事二十四年陞員外郎二十五年陞郎中二十六年京察一等記名以道府用二十七年授

江西廣信府知府二十八年調南安府旋署建昌府二十九年署撫州府三十年署吉安府調袁州府咸豐三年四月交卸回省派管官團局事務六月廣西逆匪竄撲江西省城耆齡會同文武分段守禦擊退各股逆匪巡撫張芾奏入賞戴花翎並加道銜十一月補贛州府知府五年七月陞吉南贛寧道十一月賊竄義寧州耆齡帶兵赴援六年四月擢布政使六月以賊匪窺伺饒州命耆齡實力防守七月饒州陷旋即克復上以克復迅速免其置議十二月逆匪偪瑞州署巡撫陸元烺檄耆齡帶勇赴省辦理防剿尋以瑞州陷兵部右侍郎曾國藩奏稱耆齡帶領贛兵在饒防堵聯絡紳團屏障東北今瑞州已陷九江重兵已撤赴省城局勢更變耆齡等宜仍駐饒州無庸調往他處疏入允之七年三月擢江西巡撫六月克復萬安縣城尋復樂安縣城七月攻剿寧都州楊逆率黨數萬由新城來援敗之九月贛屬各匪次第殲除十二月克復臨江府城八年五月克復建昌府城節次克復金谿新城及吉安府城得旨嘉獎十月福建竄匪陷瑞金縣城上命耆齡會同曾國藩等進剿剋期收復九年正月克復瑞金縣城逆匪復竄擾安遠信豐分股攻陷南安府城命耆齡嚴飭各軍併力進剿三月克復南安府城並解信豐

之圍九月調廣東巡撫十年以廣東州縣署事太多請以實缺人員各赴本任允之十一月逆匪翟明開等由廣東南雄州敗竄江西圍攻安遠縣城耆齡派兵越境追剿立解城圍十一年正月逆匪由安遠敗竄粵東陷平遠縣四月復陷福建武平耆齡分軍進剿均克之十一月以覆奏採辦洋米遲延降四級留任同治元年正月命赴福建辦理援浙軍務五月以援浙耽延交部議處七月擢閩浙總督閏八月逆匪竄踞處州耆齡派總兵秦如虎等分道進攻直逼城下賊勢窮蹙竄縉雲縣遂復府城秦如虎等復率各營追擊並復縉雲縣城十月克復奉化縣城二年正月二月先後克復湯溪永康武義龍游蘭谿等縣並金華府城浙東全境肅清三月調補福州將軍六月命查辦福建布政使裕鐸等信任劣紳姚鏡圖交通賄賂等款尋翰實裕鐸等降革有差十月卒遺疏入諭曰福州將軍耆齡由部曹簡放外任擢授封圻上年陞授閩浙總督以來督師援剿浙江會同攻復蘭谿金華等城所向克捷本年三月簡任福州將軍方期整飭操防長資倚畀茲聞溘逝悼惜殊深耆齡著照將軍例賜卹伊長子主事承斌次子承銓均著俟及歲時由該旗帶領引見尋賜祭葬予謚恪慎子承斌廕主事

明緒

明緒諾洛氏滿洲鑲紅旗人由繙譯生員捐納筆帖式道光十八年分刑部二十一年補官二十六年京察一等記名以理事同知通判用二十七年陞主事二十九年陞員外郎咸豐元年陞郎中二年二月京察一等記名以道府用六月充張家口監督以捐輸軍餉下部優敘四年四月授江西撫州府知府旋調直隸永平府五月擢甘肅西寧道五年陞按察使旋署布政使六年以捐助剿辦番匪經費賞戴花翎七年續捐經費銀兩移獎子弟八年三月丁母憂十一月命署陝西按察使十年服闋賞副都統銜充塔爾巴哈臺參贊大臣尋授鑲藍旗漢軍副都統十一年復以捐廉助餉下部優敘時俄羅斯國使臣請勘辦西北地界上命烏里雅蘇臺將軍明誼前往塔爾巴哈臺會同明緒妥爲辦理尋奏請約俄使在西北兩路適中之處據圖會議議定後卽各就近互換信約建立界牌鄂博疏入總理各國通商事務衙門議行同治元年四月明緒疏言上年俄國派廓米薩爾官二員前來接見時察其言語欺朦情多譎詐且據該匡蘇勒官呈來草圖一張留心閱看大抵該國之意總在多占伊犁塔爾巴哈臺兩處之界爲收服哈薩克布魯

特計查該國條約所指特木爾圖淖爾則在伊犁境內宰桑淖爾則在塔爾巴哈臺輝邁喇虎卡倫之內該國約於此處議分心存欺混已可概見若照前約定議中國原設卡倫被其包入若指明不許則該國必將以條約既定爲辭以此揆之是會議西界尤重於北界夷情無厭得寸思尺不可不豫防其漸五月疏言接俄國覆文據稱原議勘辦地界分兩路前往恐山嶺無路難以商辦請仍照條約到塔爾巴哈臺會議換約議定後再行分赴各本境據圖建立界牌鄂博從之上復以該國欲於未勘界址之先會議換約意存侵占特命總理各國通商事務衙門發去地圖一張並諭伊犁將軍常清將新疆地圖繪出分送覈對嗣俄人於伊犁呢瑪圖一帶設立卡倫阻我前赴勒布什查邊之路又於沙拉托羅海地方率兵攔截聲稱哈薩克布魯特爲該國之地並於鄂爾果珠勒卡倫搶奪牲畜器物詔明緒等向俄國公使剴切理論時明緒已調伊犁參贊大臣諭令俟分界事竣再赴新任尋俄國使臣到塔分遣將領帶兵於附近卡倫及卡內先立鄂博十七處明緒等言不得於尙未議定地址率行侵越委員帶同俄官往查毀其鄂博六月疏言特木爾圖淖爾宰桑淖爾均在伊犁塔爾巴哈臺界內距伊犁之索倫錫伯

營不及百里距塔爾巴哈臺僅三五十里日久恐爲心腹之患亟應據圖剖辨毋令侵占然後互換信約上嘉其所慮周備又因哈薩克攜帶男女老幼氈房牲畜移進卡倫聲稱爲俄羅斯偪迫求給近地游牧明緒等以哈薩克布魯特前曾隨俄兵滋擾卡倫茲於兩國分界未定之先相率入卡事屬可疑遂派員開導遣回原牧疏入上韙之七月俄國使臣博普考等來會以續約第二條內載有西疆未定之界此後應順山嶺大河之流及見在中國常住卡倫爲界之語執爲定論並呈出地圖一張內以紅點爲限所有卡外盡作應給該國之地明緒等以條約內載白沙賓達巴哈界牌末處起至浩罕邊界爲界其中表延萬里僅有三處地名並未詳細指定逐段立界之處且所載中國常住卡倫等處並無爲界之語自應遵照地圖於已定舊界之外專論從前未定之界秉公商辦卽如烏里雅蘇臺科布多所屬唐努烏梁海及塔爾巴哈臺所屬愛斯勒布什之哈薩克伊犁所屬特木爾圖淖爾哈拉塔拉之哈薩克布魯特皆中國給予游牧養牲之地並各賞爵職祿俸若將其地分隸爾國其人生計立蹙必仍甘心內附恐與爾國不利博普考等語塞翼日復議仍執前說語漸不遜至以稱兵爲詞明緒等謂兩國和好有

年秉公會議誰敢遽云用兵博普考等詞屈而退旋遣使言彼國復派雜哈勞爲會勘地界全權大臣俟到再行議期雜哈勞者前駐伊犁之匡蘇勒官也前在伊犁卡外攔阻查邊繪圖官兵皆其主謀特僞爲彼國全權大臣主持議事以爲侵地之助比來見仍堅持常住卡倫一說以中國不照條約爲廢約明緒等言據圖以議何謂廢約且勒布什邊界地方自乾隆年立有石碣至今尙存伊犁塔爾巴哈臺歲遣官兵查收哈薩克租馬均在此會哨非大清境界而何而雜哈勞以此界爲私立明緒等辨論移時仍未決尋雜哈勞等持圖至明緒等指圖節節辨駁雜哈勞詞遁遂謂圖不足憑仍以條約爲準明緒等卽以條約沙賓達巴哈一條折之復不能答但謂宜候兩國復派委員會同繪圖方能定議明緒等因疏陳會議狀言該使臣呈出所繪地圖並未照依條約內載山嶺大河之流分晰何山何水名目但以見在常住卡倫等處均畫紅綫指爲應分之界其欲分之大山大河多在烏里雅蘇臺科布多邊界之內必須細覈輿圖有無侵占地方方能定議科布多塔爾巴哈臺伊犁三處常住卡倫距各城近者不過數十里遠者亦止二三百里至塔爾巴哈臺所屬之哈薩克布魯特各部落住牧皆在卡外邊境內西南

西北一帶若許其自卡倫議分不特三處西南西北疆界均被侵占且烏科二城所屬之蒙古割截數處每年出產例進貂皮之地亦皆裹去而伊犁塔爾巴哈臺所屬歲收租馬之哈薩克布魯特各部落盡屬該國儻該蒙古不受該國欺陵仍求內附不惟無地安置並恐俄國藉端尋釁如不指給游牧之地該哈薩克等衆族內徙必致軍民慌亂況今各城軍民俱不甘心於俄若被侵占必皆有憤發思戰之心是求息事而反生事請敕總理各國通商事務衙門卽與俄國駐京大臣會同商定照會俄國轉飭該使臣照依條約妥議庶不致任意貪求以弭兵隙又奏言詳覈舊圖面訊烏里雅蘇臺塔爾巴哈臺委員俱已履勘查對明白瞭如指掌惟科布多伊犁二城卡外疆界不能指實礙難懸揣辦理當經飛咨常清並科布多參贊大臣錫霖派員分赴各本境逐一復查繪圖貼說何處有礙蒙古及哈薩克布魯特生計何處無關緊要可以議分以便彙辦至烏里雅蘇臺白沙賓達巴哈末處至科布多向無舊定界址無從適中擬分其卡外之唐努烏梁海阿勒坦淖爾烏梁海游牧有無關礙應俟復查明確再與覈議上以明緒等據理駁斥詞嚴義正諭知總理各國通商事務衙門與在京公使剖辨復諭明緒曉以利害

適中定議不可畏難遷就亦不可專俟在京商議致誤事機既而雜哈勞等固執不允呈來議單仍欲以常住卡倫分界經明緒等疊次駁詰俄使竟不候議而歸明緒等念夷情譎詐此後再來議界難保不帶兵豫占地方爰分咨各城豫爲之防唐努烏梁海蒙古部落及哈薩克布魯特等地方亦豫爲撫綏俾資聯絡奏入得旨嘉獎並以前後奏稱分界事宜極爲周匝命堅持定見相機妥辦勿開邊釁二年四月塔爾巴哈臺有俄兵三四百名駐巴克圖卡倫之外圖占地方明緒請飭總理各國通商事務衙門告知駐京公使行文西悉畢爾總督撤回俄兵並催勘界使臣來塔會議上從之六月奏查科布多吹河有道光年間俄人建蓋之木房塔爾巴哈臺有咸豐初年駐紮之俄兵伊犁勒布什池南有俄人所設之卡倫木城今又移進卡倫一層當經派員巡查曉諭令其撤回上以從前疆吏不能慎固封守至爲俄人潛占命將軍大臣等力求自強之道毋得再蹈前轍旋雜哈勞又帶馬步二百餘人闖赴博羅胡吉爾卡倫尋隙並屢揚言內犯上命明緒等行知西悉畢爾衙門令切實回覆又諭曰會議分界一事該國日久總未定期若再向催促該國必以我意存懼怯愈加倔强此次行文祇宜責其不俟議定界址稱

兵肇釁殊失兩國和好之誼較爲妥當七月俄國駐京公使經總理各國通商事務衙門以疊次肆擾面加詰責該公使謂因邊界未能早定恐該地民人滋事是以撥兵彈壓委無他意其言尙爲恭順明緒等亦疏言審度時勢於兩害相形之下酌其重輕勉圖收束上因諭明緒等准照該使臣議單妥爲辦理十一月奏言俄人建立界牌鄂博期在明年五月其阿勒坦淖爾烏梁海蒙古部落中如有真心內附者宜亟行擇地令移於卡內住牧阿勒臺烏梁海游牧內潛居之哈薩克人衆應往卡外驅逐請豫行商辦得旨著於會議時卽就當時情形徑行酌辦不得游移瞻顧動輒咨商總理各國通商事務衙門以致貽誤又諭曰塔爾巴哈臺所屬藩部卽由明誼明緒查明情願內附人衆若干設法籠絡無任與俄人勾結一面查明卡內空曠處所以便於定界後酌籌內徙至伊犁各城有礙蒙古人等生計數處能否令俄國讓出數百里以便安置此項人衆之處並著於會商時相機辦理毋稍拘執三年二月授內閣學士兼禮部侍郎銜仍留伊犁參贊大臣之任復諭曰議分地面如與索倫奈曼生計無礙卽著相機辦理速爲了結儻萬難令其占踞仍當遵照前諭令俄國讓出數百里安置此項人衆如該國藉口中國

已與駐京公使議定不能稍有所讓卽告以總理衙門前給駐京公使照會內原有妥商照辦之語且從前該國分界使臣博普考亦有不必盡照議單之說既與索倫奈曼等生計有礙則兩國自應按照照會妥商以期彼此均有裨益儻該國於此二者均堅執不允或卽將烏科等城邊界先行勘分其伊犁境內暫從緩辦以期徐圖補救尋明緒等遵旨給與照會俄使覆文謂前遞單內所指界址業經廷臣允許而疆臣不肯行且以妥商之語誣爲擅添明緒與之辨論謂議單內所指地名與原約不符之處不能不共同妥商且指出游牧安插兩層爲應商辦之處詔嘉其措辭周妥五月俄使覆稱卡外住牧蒙古哈薩克布魯特人衆本應歸入俄國並未占索倫奈曼人等居住之處又稱總理各國通商事務衙門雖有妥爲商辦之語並無令其讓出一二百里之意若照俄國議單毫無更改卽派分界大臣到塔會議否則具奏國王將分界大臣撤回停辦先是陝甘逆回四出煽惑有大兵淨洗回人之謠塔爾巴哈臺回民亦疑懼思亂經明緒傳令回目石金斗等明白開導始各遵服至是烏魯木齊等處逆回寇迪化陷漢城圍滿城東路大擾塔爾巴哈臺回民亦自危明緒密拏外來勾誘匪徒出示安撫良回撥兵扼守

邊要傳集石金斗等分諭各戶共安生業回衆乃安未幾葉爾羌失守英吉沙爾喀什噶爾相繼起事伊犁防守尤關要緊明緒尙在塔爾巴哈臺見逆焰日張而俄兵以分界未結又節節移近圖爾根河西駐紮強占卡內地方口舌不能爲力通常清咨請檄調蒙古兵統帶來伊因商同行文西悉畢爾衙門准照該國議單分界檄調土爾扈特官兵五百名飭營長巴霞管帶先進庫爾喀喇烏蘇一帶會同堵剿自率察哈爾額魯特兵五百名督飭領隊大臣榮全同赴伊犁並以回日石金斗鄉約陳生福等素爲回衆敬服稽查彈壓始終不懈疏請獎勵時上已有旨令明緒統帶蒙古兵二千名迅赴伊犁得疏均如所請八月明緒至伊犁之五臺聞金頂寺巴燕岱各城回衆訛傳官兵剿洗驚疑聚衆明緒派員往諭授以機宜盡散其黨並疏言回衆紛紛變亂連陷數城揆厥所由皆該大臣及各地地方官平日不能推誠撫馭不問是非曲直但屬回民一切從嚴以致該回心懷不平禍由內生又疏言爲政之道以用人理財爲先非講求吏治開源節流不足以收治平之效奏入上嘉之十月授伊犁將軍先後擊敗庫爾喀喇烏蘇諸賊並解烏城之圍復疏劾常清優柔膽怯毫無振作以致營務廢弛呼應不靈常清亦自陳罪

狀言明緒到伊後事無鉅細悉合機宜軍民藉爲長城之倚請加顯擢遂權以今箭授明緒軍務悉由主持旋賊陷庫爾喀喇烏蘇伊犁北關回民數千同時皆叛攻撲城垣領隊大臣托克托奈死之所屬各城次第淪陷伊犁孤懸賊中岌岌難保明緒疏陳緊急情形且言俄兵貿易圈地爲賊擾占已行文西悉畢爾衙門暫借俄兵相助請敕下總理各國通商事務衙門與該公使商辦從之時賊圍伊犁多日明緒調派知印房章京額騰額帶兵出城會同榮全等軍夜襲賊壘殺賊數百盡燬其營城圍遂解上嘉其調度有方賞穿黃馬褂會巴燕岱領隊大臣穆克登額告急明緒派兵援剿總管德克都臨陣先逃師遂大敗疏入詔明緒嚴切查明該總管失事情形卽行按照軍法從事時賊數十倍於官兵軍又乏食明緒出俸錢八千緡充軍餉搜括在城餘兵剋期親督出戰圍城官民環向泣阻乃以兵屬榮全自率在城官民登陴防守旣而官軍攻賊三戰皆捷卒以寡衆不敵致挫十二月明緒以前任撫民同知崇熙素得民心擢辦軍務旗兵素驕情擇其尤甚者立予正法兵弁肅然並查出舊存鐵塊尙夥監造槍礮日勤操練又親選馬隊四百名招集八旗閑散民勇教演刀桿爲守城之用逆回屢以大隊撲城疊有斬

獲官軍膽益壯以賊衆我寡誠勿窮追值除夕輕騎歷各營拊循激勸士卒咸鼓舞權用印券按名給賞卽牛酒之犒亦以票據畀之四年正月令額騰額崇熙出師進援巴燕岱自督所訓馬隊爲後應抵窩鋪逆回悉衆抗拒官軍以馬隊排陣衝突槍礮環擊賊大潰諭曰該將軍自到任以來堅忍苦守深得軍民之心竟能以少擊衆實堪嘉尙尋授正白旗蒙古都統時塔爾巴哈臺回衆又叛明緒遣領隊大臣布爾和德往援而伊犁三面受敵東面精河綏來池東一帶賊衆麕聚明緒飭烏魯木齊章京錫拉春等募勇扼紮精河之東檄庫城糧員瑞琳就地籌畫口糧接濟檄精河糧員吉拉圖等防賊鈔襲四月錫拉春移營進逼庫城賊棄城走追至安集海奪其營乘勝直抵烏蘭烏蘇軍臺賊傾巢出復三戰三勝之東路漸通方擬進規綏來而巴燕岱城困守數月卒陷於賊賊又猖獗糾衆攻伊犁明緒督令額騰額等擊卻之賊復潛繞官兵之後崇熙等奮力衝殺圍乃解五月賊薄綏定城官軍有臨陣退縮者明緒立斬以徇官兵爭先效命殲紅衣逆首一名斃匪數百賊乘夜來襲佐領烏勒德春陣斬二千餘名翼日賊分隊攻撲大城明緒親督官兵迎擊殺傷無算奏入溫旨褒美自是賊越二三日必分股來撲官軍

晝夜不得休息荊州將軍穆圖善等援軍久不到藉助俄兵之策迄無成議戶部前後奏撥新疆餉銀共一百餘萬兩亦無解到者官軍枵腹待餉至折棟桷以爲薪刲驢馬以爲食得勝收隊輒以自用鞏馬衣服充賞犒軍積券累數萬戰馬日餓斃由是蒙古官兵抗不赴調察哈爾潛與賊通哈薩克布魯特乘亂劫掠官兵傷亡者多至以十歲以上幼丁充補甲缺然賊困左營城時猶驅飢疲之卒以解其圍明緒先後奏陳略言以四面數十萬之回逆伊犁孤守其中縮食減糧不過苟圖目下雖各兵勇尙能衝鋒陷陣足見天良具在不辜朝廷豢養厚恩而目睹情形心實難忍苟無以續其命而使有所希冀則渙散卽在旦夕此臣所以殫竭血誠而束手無策者也於是上切責烏里雅蘇臺將軍明誼科布多參贊大臣廣鳳等畛域太分命將已到伊犁餉銀儘數運解十月錫伯索倫兩營囤糧全行焚燬城關隘要盡爲賊踞明緒以孤城困守官兵殍死過半設法用樹皮油渣磨麵散放充飢賊薄城下督官兵親冒矢石晝夜無間如是者又兩月五年正月賊掘地道轟陷城牆猶盡法堵守三日俄北門火起賊蠶擁上率餘兵退守將軍衙署又二日賊攻衙署明緒率妻宗室氏子員外郎銜二品廕生麟保員外郎鍾保闖

家自焚卒光緒元年署伊犁將軍榮全查明奏聞諭曰前任將軍明緒見危授命大節凜然殊堪憫惻著交部從優儀卹同時殉難之該員家屬著一併交部旌卹尋賜卹如例贈太子少保銜予諡忠節賞騎都尉兼一雲騎尉世職襲次完時以恩騎尉世襲罔替十五年慈禧端佑康頤昭豫莊誠皇太后歸政懋念亮節孤忠諸臣各賜祭一壇明緒與焉嗣子延增襲世職

宗室常清

宗室常清鑲藍旗人道光九年授三等待衛十七年陞二等待衛二十一年賞頭等侍衛二十四年授正白旗蒙古副都統二十七年充烏什幫辦大臣咸豐三年五月授庫車辦事大臣九月調喀什噶爾辦事大臣四年授葉爾羌參贊大臣因捐助軍餉下部優敘時喀什噶爾回民沙木滋事常清捕擒之及餘犯斯拉木等均正法得旨嘉獎五年喀什噶爾賊首鐵完庫里與倭里罕霍卓率衆闖卡命常清就近往剿擒逆黨玉散霍卓依善其首逆倭里罕霍卓與鐵完庫里潛逃經浩罕伯克胡連雅爾轉求將獲犯釋回常清拘禁之令將首逆擒送再行釋放上聽其議六年十月擢伊犁將軍十一月補鑲白旗蒙古都統初葉爾羌滿營官兵裁

撤後所餘牛馬廠中有可耕之地經常清招募回戶墾種陸續墾地一萬二千畝七年察看收成豐稔議定科則奏聞下部議行八年授熱河都統九年遵旨查辦已革貝子德勒克色楞念誦黑經一案以案內要犯日久未獲下部議處尋因整頓熱河銀礦廠課加增得旨嘉獎又以熱河所產銅斤日形短絀奏請封禁允之時奉天騎馬賊竄擾朝陽赤峰一帶常清飭屬緝捕匪徒張泳幅等治罪如律因疏請嚴定捕盜章程上以奉天西北與熱河接壤時有盜夥出沒命常清派員帶兵與奉天各員合力緝拏尋疏言熱河地面遼闊岡巒叢繞處處可以藏奸擬請挑選得力兵丁每年分班梭巡疏入允之十年二月調烏魯木齊都統七月再授伊犁將軍十月補正白旗漢軍都統十一年因俄國續約內載東西兩邊設立界牌奏請派員會勘得旨著派明誼前往塔爾巴哈臺會同明緒妥爲辦理時逆匪斜黑阿渾之子阿布都拉依木竄入喀什噶爾卡內滋擾常清商令喀什噶爾辦事大臣奎英檄總兵福珠凌阿統帶滿漢官兵迎擊並飭章京文德訥等率領回兵截賊歸路分馬隊爲兩翼進剿生擒首逆阿布都拉依木餘匪殲焉地方肅清上嘉其辦理迅速尋奏參葉爾羌參贊大臣英蘊於回匪抗差逞兇一案並不按

例懲辦輒照回子經典斬決多名且有違例演戲各情命偕參贊大臣景廉確查具奏同治元年四月查明究出三品阿奇木伯克阿克拉克依都等攤派回莊銀兩濫行枷責據實奏聞均論罪如律時烏里雅蘇臺將軍明誼奉命會同俄使查勘地界而俄國匡蘇勒官覆文遽約兩國大臣同到塔爾巴哈臺會議換約上以界址尙未會勘先行會議恐彼國意存侵占命常清迅將伊犁庫存新疆地界圖說繪出分送明誼等以憑覈對七月常清旋奏言俄國忽於呢瑪圖地方擅立卡倫並於沙拉托羅海地方攔阻查邊官兵請旨敕下總理各國通商事務衙門行文俄國轉飭該邊界頭人等將卡倫官兵撤回各守疆圉以篤夙好如所請行二年正月明誼等將會勘地界情形具奏諭曰俄國使臣上年在塔爾巴哈臺議界未遂所欲隱忍回國見在伊犁卡外游駛之俄人業經全行撤回趁此春融凍釋卽可將該處地界詳細查勘著常清迅派妥員將伊犁本境邊卡何處可以議分有無關礙哈薩克及布魯特生計之處逐一詳查繪圖貼說由常清覈准咨送明緒妥籌辦理三月奏言伊犁近年以來內地糧餉不至積欠軍餉至一百數十萬兵丁苦累難支上年回匪滋事各處戒嚴籌餉調兵諸形拮据值此有事之秋何能

令其枵腹從事而接濟之源毫無涓滴伊犁舊有河工捐輸之案請援照辦理再部頒籌餉條款官犯納贖各款均極詳妥應仿照一律捐輸至回子伯克捐輸贖罪加級等項均照理藩院所頒條款分別銀數遵行辦理以昭平允而廣招徠疏入均如所請時伊犁惠遠城之三道河地方有回民搶劫庫存槍械殺斃兵丁常清派員緝捕前後生擒首從各犯百餘名置於法奏入上嘉之七月奏言俄國因分界未定闕卡尋釁經我伏兵擊退該使復揚言攻取索倫沙岡等情疏聞命總理各國通商事務衙門面責俄國公使並諭明誼等酌量情形妥爲辦理先是哈薩克句結俄人越卡尋釁屢經官兵堵禦八月俄人復於喀爾奇拉河地方肆意滋擾常清調派弁兵及內附之哈薩克布魯特等出力堵禦勝之尋奏言俄國咨稱哈薩克布魯特爲伊國所屬查該國於咸豐三四年間始准在伊犁通商輒欲將百數年內附之哈薩克布魯特等據爲己有實屬荒謬況和約內並無哈薩克布魯特屬與該國之語請旨敕下總理各國通商事務衙門轉諭該國使臣斥其所言之謬及早息兵並奏稱俄國頭人在各營投遞字據云該國王將此滋事之人喚回治罪不准伊等再行打仗是該國自知釁由己起似有轉機乃又私寄哈

薩克布魯特信勸其不可內附而歸罪於錫伯索倫兵丁窺其用意分明畏錫伯索倫兵勇強勁敢戰故爲此挑唆之語詭譎多端心懷叵測見已飭令各營帶兵領隊大臣加意防守勿墮其術疏入諭常清相機防範毋稍疏忽三年庫車城池被漢回延燒吐魯番所屬之托克遜哈密所屬之奇臺相繼亂起諭曰常清爲諸城領袖應如何調兵豫防均係分內應辦之事豈能莫展一籌任令匪蹤延蔓著迅速設法妥籌辦理初新疆各城漢回互相煽惑經常清徧諭各城妥爲撫輯及庫車漢回滋事常清以阿克蘇四路通達素稱饒裕之區地距庫車甚近恐賊衆垂涎卽派員帶兵五百名馳援並咨烏魯木齊都統平瑞派兵一千名由大路進攻咨喀喇沙爾辦事大臣依奇哩調土爾扈特兵二千名相機剿辦又以冰嶺爲伊犁南路出入要隘亦派兵防守詎各城回民叛亂葉爾羌等處紛紛求援伊犁一帶皆爲賊擾烏魯木齊漢城亦陷至是常清疏言伊犁爲極邊偏隅之地南山冰嶺不通東南那拉特山外賊匪盤踞西南俄人帶領兵隊占卡惟東北軍臺僅通塔爾巴哈臺一城此二城孤懸緩急無恃伊犁附近尙有巴燕岱等八城多係回民卽伊犁城內外回民亦復不少夤夜一呼烽火響應軍餉涓滴俱無外援空

勞指望目下僅餘存城兵勇暫將根本重地協力保護再圖機會惟有籲懇天恩
敕下烏里雅蘇臺將軍等迅派喀爾喀蒙古兵二萬名出關分路剿賊收復各城
疏入得旨如所請尋賊陷葉爾羌英吉沙爾中營守備藍發春喀什噶爾中營把
總王得春等暗約漢回同時謀叛經官軍奮勇擒斬多名餘逆始散十月官軍馳
解庫爾喀喇烏蘇之圍遂進剿庫車回逆敗之時伊犁城圍緊急常清奏言前因
各城軍務浩繁請調參贊大臣明緒會同辦理軍務該大臣自抵任以來事無鉅
細任勞任怨悉合機宜軍民藉爲長城之恃當此危急存亡之秋何敢虛詞諛美
藉以卸肩惟恐事權不一官弁兵勇無所適從勢難再事拘泥當即將令箭送交
該大臣收領隨時調度懇恩錫以極品之榮俾軍民仰望彌形踊躍奏入詔旨切
責授明緒爲伊犁將軍奪常清職留伊犁聽候查辦四年逆回圍撲伊犁常清與
明緒登陴固守城陷親率家丁巷戰死之闔家同時殉難光緒元年經都察院奏
聞諭曰同治四年回匪攻撲伊犁時常清因革職留伊查辦遂隨同該城將軍等
登陴固守城陷後常清巷戰陣亡全家同時殉難殊堪憫惻常清著照四品官議
卹其庶母程氏子德潤女貞格安格蘭格定格妾王氏趙氏著一併分別旌卹尋

賜卹如例子諡勤毅賞雲騎尉世職襲次完時以恩騎尉世襲罔替姪恩韶襲恩韶故子寶第襲

明誼

明誼托克托莫特氏蒙古正黃旗人祖策丹副都統兄明訓吏部右侍郎內務府大臣副都統明誼嘉慶二十四年進士以主事用分兵部道光五年補官十三年充武會試提調十四年陞員外郎歷充則例館提調馬館監督十六年充張家口稅務監督十八年二月京察一等記名以道府用三月授廣東瓊州府知府二十一年陞甘肅安肅道二十五年調鎮迪道二十七年八月以喀什噶爾回匪滋事卡外安集延布魯特糾約本地回衆乘隙肆擾上命明誼馳赴肅州隨同陝甘總督布彥泰辦理糧臺事務十月擢山西按察使二十八年正月以前在甘肅捐修烏魯木齊城垣下部議敘八月調甘肅按察使二十九年署布政使先是明誼在甘肅時招道士蘇姓醫病嗣道士易服更名爲薛執中至京師用符咒等術祈雨治病意圖惑衆三十年被獲下部嚴訊供稱明誼曾令醫病並佈施銀兩轉薦至伊犁將軍薩迎阿處治病命明誼赴部質訊旋以明誼親供與薛執中所供未符

飭薩迎阿明白回奏旋覆奏該犯自往伊犁募化明誼並未給與信函經刑部覆覈得旨明誼降四級調用咸豐三年三月賞二等侍衛充哈密辦事大臣十一月捐助軍餉下部優敘四年二月率屬續捐軍餉復下部議敘八月奏言戶部議准覈減條款一節查哈密經費銀兩按照此款變通所有應發款項擬請照舊給銀者三款減成給銀者三款折給錢鈔各半者五款每銀一兩折給制錢二千者三十二款仍給制錢一千五百者五款俟各城擬議條款到部彙總覈議以免歧異再哈密庫存經費祇有實銀其擬改折制錢及鈔票者均暫照甘肅見發臺餉章程每錢鈔二千補發銀六錢五分統俟奉到部覆如有增減再行覈扣補支並俟鈔票領到庫有錢文時再遵照見議以錢鈔支發下所司議行嗣以哈密經費銀兩不敷支放奏請敕下陝甘總督在甘肅藩庫先行借款動撥銀二萬兩務於明春解到哈密以資接濟如所請行十月賞頭等侍衛充庫倫辦事大臣五年賞副都統銜充塔爾巴哈臺參贊大臣六年七月疏言塔爾巴哈臺應行備調七年經費議將本處官兵應支俸餉鹽菜銀兩照餉折糧各半支放下部議行八月授鑲黃旗蒙古副都統八年疏言俄羅斯國前被燒圈搶貨若徒空言和解彼自不甘

折本恐終不免決裂自蒙恩准伊犁將軍扎拉芬泰之奏豫徵茶稅與以貼補並調戍員薩碧屯等來此豫購工料立許修圍凡此消弭邊釁皆仰賴神謨廣運見在該國商貨已到順便運回茶箱沿途毫無事故且洋貨到卡時聽從查點不似從前任意攙越及橫阻卡官查點情形與華商交易亦極公允足徵心折報聞九年六月奏請豫調塔爾巴哈臺經費七月疏陳俄羅斯派管貿易之匡蘇勒官到城恭順情形並飭革員薩碧屯阿弼善等賠修貨圍房屋工竣十月擢烏里雅蘇臺將軍十一月奏言本年應許貼補俄羅斯國茶箱經山西巡撫綏遠城將軍採買由臺運到交付俄商以稍有水溼挑剔不收當曉以長途解運匪易始行收領該商總以此次茶斤因木箱繩索較去年交付分兩加重希圖補給斤數始肯出具收足字樣奴才以俄人貪得無厭令委員等不可輕增加實在不能交付再將備用茶箱酌給若干以完巨案而免葛藤從之旋以已革防禦薩碧屯筆貼式阿弼善賠修貨圍工程完竣奏請免其發遣並免繳臺費銀兩薩碧屯貼修銀數尤多請賞給筆貼式以示鼓勵允之十年以率屬捐助軍餉下部優敘尋授鑲黃旗漢軍都統時英人犯順上駐蹕熱河明誼偕參贊大臣阿爾塔什達署烏里雅蘇

臺將軍平瑞合疏奏達行在略言英法二國肆意要求更復陳兵直犯天威震怒不得已而用兵復蒙聖慈不遽絕悔罪投誠之路但能回心向化仍許和好通商見在該國等已於九月換約通商和好天津百姓各安生業此皇上恩同覆載爲該國等施法外之仁卽爲中土善安內之策也因念時事多艱皆賴宸謨指示此次剿撫夷氛更必重勞宵旰謹將邊地人心安靜各由奏慰聖廬報聞十一年赴塔爾巴哈臺會同鑲藍旗漢軍副都統明緒與俄國使臣查勘西界事宜同治元年奏撥駱駝二百隻赴科布多應用允之四年三月疏陳科布多十四臺站蒙古游牧屢遭旱災牲畜多斃黑龍江官兵到臺必誤軍資得旨令管帶黑龍江官兵之記名副都統花尙阿改道由內地徑赴山西歸聯捷統帶前進五年以病奏請開缺允之七年卒遺疏入諭曰烏里雅蘇臺將軍明誼由部曹簡放知府洊陞烏里雅蘇臺將軍持重老成克供厥職前以積勞患病開缺回旗調理遽聞溘逝悼惜殊深明誼著加恩照將軍例賜卹任內一切處分悉予開復應得卹典該衙門察例具奏尋賜祭葬予謚勤果子常瀨兵部員外郎

裕瑞

裕瑞佟佳氏滿洲鑲藍旗人祖嗣存散秩大臣父舒明阿杭州將軍裕瑞由閒散於道光五年二月補鑾儀衛整儀尉十月開缺隨父之杭州任六年補原官十一年陞治儀正十二年擢雲磨使十三年充協理辦事章京十五年擢冠軍使充續辦事章京十八年八月得旨記名以副都統用十一月署正白旗蒙古副都統尋補鑲黃旗蒙古副都統十九年正月授山海關副都統十二月遵旨查訊兵丁馬棚餘項積欠一案驍騎校富忠阿等逞刁展狡請革職交刑部審辦從之二十年調廣州副都統二十一年英人犯順擾及廣東裕瑞督率文武防守省城擒斬英兵多名賞戴花翎二十二年二十五年兩次署廣州將軍二十七年四月入覲五月命署江寧將軍六月實授二十九年調福州將軍咸豐元年八月調成都將軍九月署閩浙總督十月疏參福寧鎮總兵孫鼎鼐等捕盜不力請革職留緝並奏保拏獲鄰境盜犯之莆田縣知縣馬百慶請加同知銜均如所請又奏海壇鎮總兵沈河清拏獲洋盜二十二名治如律二年赴成都任以福建官犯何士節脫逃處分降四級留任尋署四川總督三年五月疏請成都駐防官兵春秋兩操兼閱槍礮允之旋以率屬捐餉下部優敘時大竹縣知縣楊得質鹽源縣知縣盛朝輔

訐告署布政使蘇敬衡收受節禮陋規命裕瑞偕副都統伊琿額提訊尋以楊得質誤聽人言自行檢舉奏結八月補四川總督戶部左侍郎王慶雲疏稱借徵濟餉首在得人四川辦理津貼幾費周章裕瑞資望尙淺恐難鎮撫等語會裕瑞具疏謝恩諭曰朕聞汝在川一切未免寬緩殊少果斷又有二語謂汝嚴明不如琦善廉介不如徐澤醇今特諭汝有則改之無則加勉十二月遵諭督辦省城團練以立局募勇操演情形奏入報聞四年三月率屬捐餉下部優敘九月貴州桐梓縣民楊隆喜藉團肆擾界連四川綦江等縣裕瑞飭都司趙應熊等分往堵禦自率重兵赴瀘州防堵先是南江縣民鄭懷江與解邦潔互爭場市牙息勢欲械鬪居民訛傳謀反紛紛遷徙懷江族人鄭映芳懼累報縣知縣伊克精阿傳訊尙無不法情事取結完案嗣經裕瑞風聞派把總曾芝荃等偵之芝荃等探聽不實遽以謀逆稟覆裕瑞遂將鄭懷江等六人凌遲處死至是爲學政何紹基所劾並稱有收受屬員陋規作爲捐款情弊上命侍郎載齡崇實往鞫得實褫裕瑞職六年六月賞三等侍衛充喀什沙爾辦事大臣十一月賞二等侍衛調喀什噶爾辦事大臣八年賞加副都統銜授葉爾羌參贊大臣九年七月奏定葉爾羌變通錢法

章程如所議行十月補正紅旗漢軍副都統十二月授理藩院左侍郎時來京進貢之阿布都剴里木浩罕額爾沁於奏請停止來京後在葉城逗遛行兇爲衆兵毆斃裕瑞未能先事豫防下部議處旋命來京十一年四月署鑲紅旗滿洲都統尋署兵部右侍郎九月署鑲藍旗護軍統領十一月署鑲紅旗護軍統領十二月署兵部左侍郎同治元年正月署正藍旗護軍統領四月葉爾羌攤派回衆銀錢參贊大臣英蘊以不遵定律擅照經典議罪斬絞回子多名褫職遣戍裕瑞以前任參贊大臣下部議處十一月充右翼監督二年三月充武職六班大臣六月署正藍旗護軍統領八月署鑲白旗漢軍副都統九月充稽查壇廟大臣三年六月署正紅旗護軍統領七月署正黃旗護軍統領八月署鑲紅旗滿洲副都統四年五月授正白旗護軍統領八月充管理營房大臣五年五月補正白旗蒙古都統九月署察哈爾都統六年四月授綏遠城將軍五月以牛羊羣副總管扎克都爾私徵網利有玷官箴請褫職允之七年卒遺疏入諭曰綏遠城將軍裕瑞於道光年間由整儀尉洊陞將軍歷陞四川總督緣事罷斥旋授葉爾羌參贊大臣內擢侍郎都統同治六年簡授綏遠城將軍辦理防剿事宜謹慎趨公不辭勞瘁方冀

克享遐齡長資倚畀遽聞溘逝悼惜殊深裕瑞著加恩照將軍例賜卹任內一切處分悉予開復並准入城治喪伊子徵林著賞給三等侍衛俟及歲時在大門上行走用示眷念耆臣至意尋賜祭葬予諡恪勤子岳林理藩院右侍郎嵩林戶部員外郎嶸林理藩院主事徵林三等侍衛

平瑞

平瑞那拉氏滿洲正黃旗人由繙譯生員補印務筆帖式洵陞公中佐領咸豐三年二月陞副參領十月陞參領五年補印務參領以軍政卓異奉旨交軍機處記名八年署正紅旗蒙古副都統九年賞副都統銜充烏里雅蘇臺參贊大臣十年署烏里雅蘇臺將軍十一年授烏魯木齊都統同治元年考驗烏魯木齊各營軍政二年二月提督業布冲額所部營兵脅官索餉平瑞奉旨查辦立將首要各犯分別懲治嗣因兵民缺食請於烏魯木齊廠地開墾屯田以裕倉儲又以巴里坤兵多糧少請酌量遷移以資養贍均下部議行先是前任烏魯木齊都統法福禮以寶迪局鑄額加增具奏請獎於咸豐十一年三月奉旨交戶部議奏其勸捐人員及十次捐輸人員亦於是冬交部議奏事經兩年迄未咨覆平瑞抵任後奏請

覈覆奉旨敕部查明並將漏未移付之司員查明嚴議四月以署哈密協副將恩賢於錢糧重款並不查察任令字識藉端侵扣並以都司全齡放款牽混奉旨拏問交平瑞等嚴訊究辦九月以吐魯番領隊大臣並新疆各城大臣簡放日久請催赴任以重職守俱如所請三年八月烏魯木齊地震半刻始息城垣衙署兵民房屋間有塌損城樓傾圮尤多查報兵民壓斃及受傷者以數十計當卽分別撫恤其不堪棲止房屋並撥給帳房暫令棲身嗣據所屬先後稟報同時地震情形各有不同而塌毀皆所不免疏入得旨查明撫恤十月回匪攻撲迪化州城平瑞督兵守禦已閱數月卒以糧盡援絕城陷平瑞力戰陣亡闔家被害事聞諭曰本年夏間漢回變亂攻撲州城烏魯木齊都統平瑞等督兵固守數月之久糧道斷絕九月初三日州城被陷都統平瑞全家殉難實屬無忝職守忠烈可風平瑞著照都統例交部從優議卹入祀昭忠祠平瑞之妻妾子女均著交部查明分別旌卹以彰忠節並著該旗查明是否另有子嗣奏明請旨尋賜卹如例贈太子少保銜予諡忠壯並賞騎都尉兼一雲騎尉世職襲次完時以恩騎尉世襲罔替旋經正黃旗滿洲都統查明京中並無子嗣該族公議以伊胞姪護軍桂明承襲四年

二月本旗帶領引見奉旨賞給三等侍衛在大門上行走十二月襲職光緒十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇平瑞與焉

舒保

舒保舒穆魯氏滿洲正黃旗人道光二十五年由護軍補護軍校二十六年陞委護軍參領二十九年遷副護軍參領旋擢護軍參領咸豐四年隨參贊大臣科爾沁郡王僧格林沁圍剿連鎮逆匪時賊因大風雨向東而奔撲意圖逃竄舒保督兵截剿殲斃無數五年四月賊竄踞馮官屯僧格林沁引水灌之首從擒戮奏獎出力員弁舒保與焉賞加副都統銜五月荊州將軍宗室綿洵奏調赴楚北帶領馬隊時賊竄德安舒保以馬隊助剿奮力直前所向有功六年四月髮逆竄陷黃州蔓延麻城等處築壘固守舒保督隊環擊先將李家集賊壘攻破追殺三十餘里斃賊百餘名復會同鄉團追至團風地方以火器轟擊賊壘次第削平八月武昌踞逆分撲洪山舒保率馬隊截擊賊大潰敗復追斃三四百名又敗之於沙子嶺小龜山雙鳳山等處經湖北巡撫胡林翼奏稱旬日之間大小二十八戰水陸

用命而舒保馬隊之力居多得旨賞倭什洪額巴圖魯名號十月襄陽匪徒高二先等擾樊鎮另股賊匪圖擾棗陽偕知府唐訓方直趨黃龍橋截擊敗之追至余山店槍斃甚多遂抵襄陽會剿屢有斬獲高二先等竄匿張家集復偕唐訓方乘雪夜行四面進攻先敗賊於白家集乘勝剿殺戮賊目楊五先等於陣遂擒高二先軍前正法餘匪西遁襄樊肅清經湖廣總督官文等先後奏獎七年襄樊餘匪由南漳竄陷河南之內鄉縣城適舒保帶隊追及遂會合豫軍攻克之殲匪淨盡八年正月授鑲黃旗漢軍副都統四月髮賊復竄陷麻城等縣偕副將張文煥進剿率馬隊往來策應力攻三時將賊壘一律平毀復有髮逆由豫竄鄂擾及黃安舒保帶隊往援分路迎剿賊大潰敗擒斬無算適有由皖竄鄂之賊壘陷德安黃州等府孝感等縣荊州將軍都興阿劾舒保調遣遲延意存觀望下部議處十一年四月道員金國琛督兵攻剿德安踞賊舒保以馬隊接應先將孝感克復八月會合水陸各軍圍攻德安賊由西北兩門竄出馬步官軍左右鈔擊水師復列礮排轟登陸援應賊衆潰亂官軍緣梯登城連斬守城悍賊多名立將德安克復下部優敘十月經官文奏舒保調度合宜所向克捷賞加都統銜同治元年正月補

鑲紅旗護軍統領七月髮捻各逆復由河南分東西兩路竄入楚疆偕總兵穆正春等分途截剿西路之賊經穆正春等擊敗舒保擊其東竄之賊初敗之於黃陂復追敗之於廣濟應山賊遂竄回豫境官文奏其功賞穿黃馬褂九月應山股匪下竄孝感攻撲縣城舒保帶隊開南門奮擊賊勢已卻突有後股馬步賊數千人由北城缺口闖入副都統德克登額及署知縣韓體震等巷戰陣亡舒保聞報飛馳入城鏖戰兩時之久賊敗出城乘勝追殺三十餘里二年賊由隨州分擾應城圖撲漢口號十餘萬官軍屢卻之遂由雲夢之義壇等處直撲孝感舒保先後在李家灣等處奮力攻擊又追擊於黃岡縣屬之倉子埠及新州一帶陣斬長髮老捻千餘名其分竄麻城盤踞宋埠等股復督飭將士晝夜血戰斬馘甚多捻遁豫境官文等疊次奏入賞大小荷包及玉搬指玉翎管等件三年由湖北揚家河追剿髮逆分路追擊二十餘里直抵壽山時已薄暮層岡深澗不利馬戰賊來愈衆舒保直搗中堅陷入重圍越坎落馬猶復手刃悍賊力竭陣亡事聞諭曰舒保自到湖北帶兵以來屢卻悍寇疊復名城十餘年來戰功卓著此次因極力追賊陷陣遇害覽奏殊深悼惜著照都統陣亡例從優議卹任內一切處分悉予開復並

加恩予謚入祀昭忠祠於湖北武昌漢陽黃州德安襄陽建立專祠歷年戰績宣付史館伊子倭克吉納侯及歲時由該旗帶領引見用示篤念勳臣至意尋賜卹如例加贈太子少保銜予謚貞恪賞騎都尉兼一雲騎尉世職襲次完時以恩騎尉世襲罔替光緒十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇舒保與焉繼子雙明襲世職

宗室奕紀

宗室奕紀鑲紅旗人和碩成哲親王永理孫多羅貝勒綿懿子也由應封宗室於嘉慶二十一年十一月賞頭等侍衛十二月封二等輔國將軍道光二年命在乾清門行走六年七月授尙茶正十二月擢奉宸苑卿七年充嚮導大臣九年授正白旗蒙古副都統十年閏四月兼正紅旗總族長七月命管理左翼鐵匠營事務八月授內閣學士兼禮部侍郎銜十一月命在御前侍衛上行走充右翼監督十一年七月署正藍旗護軍統領八月補鑲白旗護軍統領十二月署理藩院右侍郎十二年五月署正黃旗滿洲副都統九月補理藩院右侍郎調正黃旗滿洲副都統充繙譯鄉試副考官調兵部右侍郎署奏事班長十三年四月充繙譯會試

副考官考試筆帖式閱卷大臣六月以失察書吏假發隨營武舉驗票降一級留任十一月署正白旗滿洲副都統充崇文門副監督十四年正月命偕都察院左都御史昇寅前赴山東河南查閱營伍並查辦控案二月偕昇寅查明河南桐柏縣知縣寧飛濱查拏販私故出人罪奏請發往軍臺效力從之六月轉兵部左侍郎充國史館清文總校七月調吏部右侍郎正黃旗護軍統領授總管內務府大臣管理清漪園太醫院事務十二月補左翼前鋒統領調戶部左侍郎兼管三庫事務十五年二月賞鎮國將軍賜紫禁城騎馬三月署鑲黃旗滿洲副都統閏六月補鑲黃旗漢軍都統管理上駟院事務九月以恭修龍泉峪萬年吉地工程整齊堅固賞加太子少保銜十二月管理武英殿御書處事務十六年九月署正紅旗漢軍都統總理工程處事務是月圓明園不戒於火奕紀以救護出力賞加三級十月命管理健銳營十一月補內大臣充總理行營大臣陞理藩院尙書署正黃旗領侍衛內大臣十七年正月授御前大臣三月充後扈大臣賞穿黃馬褂四月以保送護軍校富呢雅杭阿馬步箭平常鐫一級留任五月調禮部尙書署工部尙書六月又以保送副翼長擬陪之凌山弓箭脫扣鐫一級留任十八年正月

授鑲黃旗領侍衛內大臣閏四月調戶部尙書正白旗滿洲都統閱兵大臣管理御茶膳房事務八月兼管理藩院事務先是杭州副都統善英參奏將軍桓格於揀選佐領以防禦勒爾精阿弓箭輒弱率令其具呈告退奉旨敕調來京九月命奕紀偕大學士潘世恩侍郎文慶覈實考驗旋驗明覆奏諭曰勒爾精阿雖弓馬不能出色尙屬平平不致廢棄何以率令具呈告退殊屬非是桓格著交部嚴加議處善英接到桓格飭令具呈告退咨文並不咨駁於具摺參奏後又復咨商倒填月日居心狡詐善英亦著交部嚴議十一月奏參精捷營教習之河南額外委羅錦川訓練無方不遵營制得旨交兵部解往河南交該撫嚴加管束是月參領福拉訥稟稱正白旗副督統功普於該旗揀選佐領輒函託將前鋒校吉慶入選奕紀以大員營私參奏諭功普著革職嚴訊十九年二月署正藍旗護軍統領五月命管理溝渠河道授鑾儀衛掌衛事大臣十一月以保舉前經逐出乾清門侍衛裕祥引見侍衛什長議降二級調用上改爲降三級留任十二月命管新建神機營酌撥兵丁專操訓練二十年正月賞用紫韁充經筵講官初哲布尊丹巴呼圖克圖入京擅用旗繖經理藩院禁止呼圖克圖旋呈出乾隆年間案據奕紀

以管理理藩院大臣未及具奏部議褫職得旨革去御前大臣戶部尙書總管內務府大臣並革去紫韁罷管理理藩院事務留都統任管理神機營事務仍帶革職留任處分先是理藩院書吏陳八於呼圖克圖那旺吹木丕勒來京藉稱辦公向那旺吹木丕勒索詐多金旋經告發詞連奕紀曾由喇嘛沙布朗遞受那旺吹木丕勒銀物旋即退還等語得旨著革職逮問尋鞫得實諭曰此案已革都統奕紀以一品大員管理理藩院事務乃於沙布朗代送銀兩並不正言絕拒存至八日之久方始退還厥咎較重著發往黑龍江充當苦差以示懲儆七月丁母憂命暫行釋回補穿孝服俟百日期滿仍發往黑龍江二十一年英吉利船駛入各海口命赴廣東效力旋改發天津二十二年六月賞四等侍衛交欽差大臣賽尙阿差遣委用十一月復以前在內務府大臣任內失察庫掌珽璋私雕印信冒領庫項革職嚴訊尋經刑部訊明具奏上以奕紀有心諱匿從重發盛京充當苦差二十三年將軍宗室禧恩奏言此次製辦火藥鑄造礮位均責成奕紀經理可否量予恩施旨俟扣滿三年再行奏請二十五年釋回三十年醫生薛執中編造妖言傳授道術事發訊供奕紀曾令其在家求雨上命宗人府會同刑部質訊得實命

發吉林交該將軍嚴加管束咸豐元年諭隨同將軍固慶等巡查禁荒三年四月釋回賞給六品頂戴命赴河南軍營交恩華差遣委用八月隨理藩院尙書幫辦大臣宗室恩華解懷慶之圍十一月飭帶兵前赴天津會同都統勝保等圍攻獨流逆匪燬賊木壘並擒斬多匪十二月諭曰奕紀隨同進剿尙能奮勇著賞給三等侍衛旋因病請赴天津就醫上以攻剿喫緊之際奕紀藉詞巧避始終不知愧奮革職回旗五年賞給四品頂戴同治二年故子載鏞候補筆帖式載肅盛京工部侍郎

全順

全順薩爾圖拉氏蒙古正藍旗人咸豐六年繙譯進士改翰林院庶吉士尋以宣宗成皇帝實錄慶成全順恭與校輯賞加侍講銜九年散館授編修旋陞詹事府右春坊右中允十年正月英吉利各國兵船駛至海洋欽差大臣科爾沁親王僧格林沁督兵設防奏調全順隨營差委五月遷翰林院侍讀旋擢侍講學士十一年直隸山東河南土捻會教各匪滋擾全順奉僧格林沁檄充翼長尋以剿捻出力賞戴花翎尋轉侍讀學士同治元年教匪踞商邱金樓圩官軍疊攻弗克僧格

林沁檄全順隨侍郎宗室國瑞督兵馳剿匪首郜姚氏就戮金樓圩平時捻首李廷彥竄擾亳州池北盤踞數寨官軍進攻盧廟賊巢賊匿不出適邢大莊匪徒率衆來援官軍誘戰並分隊馳攻附近之張大莊等處首逆窮蹙僞乞降斬之由是邢大莊及孫老莊王新莊各匪以次殲除全順與有功命以三品京堂候補二年巨捻張落刑等麕聚尹家溝及雉河集官軍攻克之捻首王懷義等先後投誠全順等奉敕駐花果集進剿捻首蘇添才等按名弋獲首逆李勤邦等籲請反正誘擒張落刑父子以獻蒙亳一帶肅清賞穿黃馬褂尋因淄川踞匪屢抗官軍全順帶兵奮擊克之十二月擢內閣學士兼禮部侍郎銜三年授西安左翼副都統四年隨僧格林沁剿賊於曹州高樓集陣亡幫辦軍務杭州將軍宗室國瑞以聞諭曰內閣學士全順隨同僧格林沁帶隊剿賊在曹州中伏失利僧格林沁陣亡該學士身陷重圍受傷甚重猶復短刀殺賊力竭捐軀被害尤慘該員從戎數省轉戰多年功績卓著其至死不離主帥見危授命尤屬可嘉可憫全順著加恩照尙書陣亡例從優議卹並附祀僧格林沁專祠以慰忠魂尋賜卹如例予諡忠壯賞騎都尉兼一雲騎尉世職襲次完時以恩騎尉世襲罔替弟全恆襲職七年以捻

逆肅清賜祭一壇八年附祀昭忠祠光緒十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇全順與焉全恆故姪慶岱襲世職

關保

關保烏扎拉氏滿洲正黃旗人吉林駐防道光六年及十年兩次隨征喀什噶爾積功補領催十四年擢伊通正黃旗驍騎校十八年五月授伯都訥正紅旗防禦九月調吉林鑲藍旗防禦二十三年陞三姓鑲紅旗佐領咸豐三年充委參領隨侍郎恩華在河南懷慶府剿賊獲勝追奔至山西平陽府又敗之還屯正定欽差大臣勝保拔補委營總率三姓馬隊剿深州靜海遺匪旋攻天津獨流鎮有功得旨以協領卽補並賞戴花翎尋補三姓協領四年正月隨參贊大臣科爾沁親王僧格林沁由獨流逐寇至阜城三里莊賊首林鳳祥率衆攔截關保右額中槍丸裹創奮擊賊遁追殺四十餘里僧格林沁勝保上其功賞年昌巴圖魯名號五月賊自臨清竄豐縣勝保等督兵殲之關保在事出力以總管陞用五月調赴安徽剿匪會大軍克廬州敘功賞二品銜六年正月江南提督和春進剿五河踞匪飭關保以吉林馬步隊設伏伺賊至突出擊之賊驚竄斬馘甚多三月偕副都統麟

瑞以馬隊衝五河賊營賊以三千餘人襲我後路關保首先陷陣賊少卻有黃衣馬賊三人手長矛扼其後麾衆來撲關保所部吉林兵以火槍擊斃二人賊大潰官兵勇氣百倍殲賊千數百名獲首級二百生擒十三名奪器械四百餘件四月隨僧格林沁山東高唐州剿賊蹙諸馮官屯殲之尋調赴湖北助剿甫次德安又調河南復派赴安徽和春軍營隨剿捻匪道經歸德遇江蘇邳州援賊擊敗之尋解壽州之圍毀賊兩營六月設伏兵敗賊於潁上縣高橋追至八里河斷其來援馬隊大獲又隨軍擊賊十八里堡轉戰至小青龍尾小河沿一帶遇馬賊千餘步賊四五千列陣抗拒關保等馬隊當先排槍奮擊多應聲而倒賊遂遁九月隸河南巡撫英桂軍營敗賊於馬村橋十月統吉林黑龍江馬隊及步隊鄉團由亳州雙溝進擣賊巢遇賊隊於姬橋兜剿殲焉乃分兵三路進三丈口遇賊大隊敗之旋擊賊舊縣集又敗之尋安徽巡撫福濟疏調關保率所部赴蒙城剿賊而英桂以捻匪大股非馬隊不可制疏請暫留豫省諭曰英桂與福濟剿辦皖豫捻匪自應察看何路緊要和衷商推調兵策應乃關保所帶馬隊福濟請調赴蒙城英桂請暫留豫省幾致靡所適從見已派鄭魁士會同英桂剿辦捻匪三省官兵均歸

節制著鄭魁士會同英桂體察情形斟酌調派十二月擒匪竄徧徐州適關保統兵赴懷遠繞道過境助剿獲勝上允漕運總督邵燦等之請敕關保暫留徐州剿辦七年邵燦等以察哈爾馬隊未到關保一軍連次獲勝實爲得力仍請暫留徐州從之關保偕徐州鎮總兵史榮椿往永城岳家集擒首李月聞風先遁焚其巢既而疾發腰骹麻木不可騎是冬撤回原營八年病愈值津沽有警命統吉林官兵駐天津十月命來京引見十一月命率吉林黑龍江察哈爾兵一千七百五十名往徐州太僕寺卿袁甲三軍營剿賊詔袁甲三妥爲調度時擒逆擾山東官軍與戰失利蔓及嘉祥鉅野大股屯金鄉上命關保行抵東境時豫爲戒備整隊而進遇賊卽剿毋參差落後爲賊所乘嗣擒逆蘇添幅等窺伺濟寧勢頗披猖敕關保暫留東境候調如捻氛已遠仍速詣袁甲三軍營九年正月抵徐州袁甲三令偕宿睢兩營馬隊分兩路攻滄北賊圍擒首曹金斗踞圩死守關保等先以火器轟之賊衆自亂乘勢督馬隊破其圩銜枚疾趨復破首逆張寶全並剿洗百善站一路餘匪盡淨時懷遠逆首張落刑糾馬步一萬餘人繞由五河水陸並竄直趨東北破泗州踞草溝民寨並北築一圩爲援應關保等會合民團先奪其北圩外

礮臺旋用火攻立毀之寨賊大驚向東南兩門出竄自相踐踏落壕死其逸出者官軍前後兜截數十里屍積如麻人馬填沱河水爲不流追至五河西雙渡口賊正奪船紛渡復槍斃過半是役凡獲大小船一百餘隻槍礮旗幟一千九百餘件擒長髮老捻張起等三百五十二名捷入上以此次出其不意立破賊圩殲斃殆盡關保臨陣甚爲得力詔以副都統記名簡放時江南徐州鎮總兵傅振邦督辦三省剿匪事宜命關保爲幫辦二月逆首張添幅自滄北敗遁方亮水渡滄關保截殺之進擣捻首任乾於畢圩該逆率黨突圍不得脫反身卻走官軍乘勢蹙之圩民內應先斬任乾官兵入圩殲死黨千餘人無一漏網四月上以副都統伊興阿統帶河南防剿官兵不勝委任命關保接統之該省防剿事宜悉歸督辦仍作爲傅振邦幫辦復諭河南巡撫瑛棨俟關保馳赴永城接替後卽令馳赴鹿邑督率豫軍相機攻剿五月授黑龍江副都統七月捻逆大股撲亳州關保遣總兵朱連泰副將王鳳翔參將承惠等迎剿獲勝並布置沈邱太和一帶邊防八月上以捻股甚多徐宿一帶地方緊要敕傅振邦與關保等務爲犄角之勢以固北路藩籬時竄撲亳州之賊爲關保所敗兇鋒已挫而捻匪劉狗等忽由間道北趨欲走

鹿邑並聲言赴東省築圩盤踞意圖北竄關保還駐鹿邑諭令確探北路賊情分投迎剿斷不可令其肆意蔓延擒首孫葵心等由宿西永東分路北趨尤應與傅振邦等會合剿擊關保卽派參將承惠等馳往會剿以遏北竄仍嚴扼鹿邑偵賊所向迎頭堵截九月孫葵心等在岳家集聚黨分起至永城會齊出竄上以江蘇豐碭等處賊勢已將蔓延未可令其闌入山東邊界敕關保親督承惠等前迎進紮就近截其西路偪賊歸巢嗣孫葵心等股匪二萬分擾河南商邱柘城圍睢州賊蹤且至杞縣開封戒嚴巡撫瑛瑩咨令關保檄承惠王鳳翔等率隊繞出賊前力顧西北兩路上以開封情形喫緊命關保卽由鹿邑赴援旣而承惠等兵挫於亳境而賊擾睢杞竄蘭儀分股至通許尉氏距省尤近關保馳抵陳留飭兵夾擊偕瑛瑩疏報情形上責其著著落後徒成尾追之勢令嚴飭將弁併力殲除十月賊避竄南路關保由通許進軍鄆陵聞許州告警馳援之賊由臨潁襄城竄舞陽後股復沿鄆城之洪河西行期與前股合關保飭王鳳翔率馬隊馳扼洪河親督步隊繼進王鳳翔出賊不意擊之洪河北岸逐北十餘里明日大股攻撲臨潁縣城關保麾兵奮擊匪勢漸靡一賊執旗呼嘯突出匪衆從之官軍抵死迎戰擒之

歸則孫葵心親屬孫套也斬訖復追之拔出被脅難民千餘口獲大車二百餘輛賊後隊踵至又敗之夜選精騎劫賊營斬殪又無算明日整隊復進賊潰而東奔聞別股竄扶溝太康關保卽時馳往戰於王隆集賊狂奔沿路搜殺甚夥南路餘擒皆還巢北路亦三戰三捷豫境肅清十年正月命都統勝保督辦河南剿匪事宜關保仍爲幫辦二月賊竄虞城夏邑鹿邑關保遣別將擊走之三月賊又大至其前隊距省垣僅五六十里上以關保駐鹿邑何以並未截剿致賊深入諭勝保查明是否年老遲鈍抑或恇怯據實參奏閏三月勝保奏言關保一軍方歷周家口至項城汝陽扼剿東路股匪其忠愫勇敢衆所共知惟賊情狡詐每避兵而行地廣賊多此堵彼竄關保此次實已派兵迎截而賊經深入是以由睢赴援並非年老恇怯河南鄰賊之處袤延千里無險可扼而兵力單薄是以防務較他省爲難復疏言另股擒逆竄西平遂平上蔡關保督隊擊之於蔡溝追至槐店斗門斃賊數千有旨嘉獎尋轉戰汝寧確山又截剿於魏橋皆勝之七月賊撲鹿邑縣城關保督兵嚴守遣部將破劉集並解邱集之圍賊東還復糾援賊圍攻鹿邑關保一面守禦密飭偏師閒道出賊後擊之賊大敗遁豫境又一律肅清九月以舊傷

復發疏懇賞假調理尋得旨給假一月十一月復賞假兩月旋奉諭關保病久未痊著撤去幫辦俟假滿卽回本任十一年二月離營同治元年至黑龍江副都統任八年卒

錫霖

錫霖博爾濟吉特氏滿洲正藍旗人由貢生捐筆帖式道光十六年補兵部筆帖式二十年陞主事二十六年陞員外郎二十九年京察一等尋陞郎中三十年遷光祿寺少卿咸豐三年以捐助軍餉下部優敘四年陞內閣侍讀學士九年賞頭等侍衛充科布多幫辦大臣十年以蒙古筆帖式托體揭控辦事大臣色克通額命馳赴庫倫會同科布多辦事大臣多爾濟那木凱審訊尋以訊無實據按如律是年授科布多參贊大臣十一年正月賞副都統銜十一月命來京同治元年仍賞副都統銜授塔爾巴哈臺參贊大臣四年塔爾巴哈臺回匪蘇玉得等爲亂劫奪庫中器械踞城外禮拜寺錫霖馳往彈壓開導與領隊大臣博勒果素同時遇害事聞命照陣亡例議卹尋賜卹如例予諡武烈賞騎都尉世職襲次完時以恩騎尉世襲罔替五年二月塔爾巴哈臺城陷錫霖之子候選知州安達二品廕生

安通女四姑安達妻他塔拉氏及僕婢三十五人闔門殉難錫霖之姪安興具呈經都察院奏請旌卹允之光緒五年塔爾巴哈臺參贊大臣錫綸奏請於塔城地方建立專祠以彰忠藎詔如所請

德興阿

德興阿喬佳氏滿洲正黃旗人黑龍江駐防道光二十六年由前鋒駐京旋賞藍翎侍衛在乾清門行走二十七年陞三等侍衛二十八年二月陞二等侍衛三月以拏獲驚馬賞穿黃馬褂咸豐元年賞給善騎射二年陞頭等侍衛尋命帶領黑龍江官兵赴河南欽差大臣琦善軍營候調遣時粵賊踞江寧餘黨四竄浦口揚州一帶皆賊巢穴琦善等分途進剿兵力甚單德興阿領黑龍江官兵由河南改道馳往三年二月抵軍三月琦善等圍賊揚州以蔣王廟爲揚州赴儀徵要路慮賊越竄檄德興阿帶兵嚴防四月賊由南門竄出行近蔣王廟德興阿等奮擊敗之賊回竄揚城不敢再出六月援賊大隊由瓜洲進占虹橋琦善檄守備毛三元駐三汊河德興阿駐蔣王廟爲策應七月賊舍舟登陸分三隊來攻三汊河營盤德興阿與毛三元合兵擊敗之賊結筏渡河德興阿單騎直前射斃賊目一人賊

始卻官軍乘之酣戰竟日賊大敗遁琦善等上其功得旨賞加副都統銜時另股賊目攻破儀徵來援揚城由新集子東石人頭分兩路進德興阿留兵駐七里溝以防新集子儀徵之賊親率所部赴東石人頭毀賊浮橋而賊益增衆至瓜洲築土城於河西意欲近逼三汊河與儀徵賊爲犄角德興阿與總兵瞿騰龍等由高明寺渡河分三路進直毀賊營殲斃無算自是賊每渡河西竄德興阿疊擊退之十二月東路施家橋等處鄉勇敗潰揚州賊乘勢竄瓜洲德興阿隨同收復揚州儀徵四年正月陞正白旗漢軍副都統嗣與瞿騰龍由瓜洲西岸深入攻剿賊傾巢出襲瞿騰龍死之德興阿縱騎陷陣賊衆敗退軍賴以全賞博奇巴圖魯名號七月敗賊三汊河八月賊暗伏地雷誘官軍德興阿聞之派兵自八里鋪且戰且進賊退伏土壘不出復揮軍兩路夾攻斃賊甚衆奪獲大礮地雷捷聞賞御前侍衛五年正月官軍進攻瓜洲賊壘德興阿帶兵由樸樹灣渡河攻剿平毀南岸賊營九月復督兵逼賊濠已革提督陳金綬由東岸策應併力夾攻大破之十一月賊約鎮江匪黨圖旁竄德興阿截擊於虹橋八江口等處敗之六年三月賊由土橋圍攻三汊河大營欽差大臣托明阿兵潰揚州復陷事聞上褫托明阿職命德

興阿爲欽差大臣加都統銜並諭以擇要扼截毋令該逆擾及清淮一帶其由揚州旁竄之路亦卽分投堵剿毋稍疏懈尋賊由凍青堡來撲薛家樓等處德興阿分兵擊敗之進規揚州城賊萬衆迎敵德興阿單騎斬賊目一各軍乘之賊大潰乘勝復揚州時另股賊匪陷江浦浦口德興阿令總兵武慶等攻克之四月大破儀徵竄匪於廟山平三汊河賊巢進偪瓜洲而徽寧賊渡江江浦復陷八月德興阿督水陸官軍環攻瓜洲大破之七年正月擢正白旗蒙古都統四月復檄參領富明阿等敗賊於土橋四里鋪等處水師擊沈賊船陣斬僞將軍陳磊閏五月檄總兵陳國太督戰船攻瓜洲焚其巨艦礮臺陸師會攻大敗之六月復調集儀徵快船親督馬步各軍進攻毀其瞭臺及望樓多處賊勢愈蹙十一月親督兵勇墊道移營更番進偪直抵賊營縱火焚之遂踰城入復瓜洲捷聞諭曰德興阿督師兩載調度有方加恩著賞戴雙眼花翎並賞給騎都尉世職德興阿復乘勝進偪金山盡平新河口龍王廟等處餘匪八年正月攻江浦縣城獲勝四月皖匪大股竄江浦官軍失利浦口大營不守奏入得旨德興阿統師兩載有餘從無挫失此次浦口潰敗雖係兵單賊衆究屬督率無方著拔去雙眼花翎革職留任賊旋陷

江浦天長儀徵攻偪六合遂陷揚州諭曰此次逆賊攻陷浦營德興阿等節節退守尙冀其收合兵勇力圖補救乃至揚城不守重被賊陷實屬調度乖方德興阿著革去騎都尉世職會江南提督張國樑率兵渡江收復揚州德興阿遷延觀望上嚴諭譴之九年以圍攻六合日久無功命革任來京尋賞六品頂戴交科爾沁親王僧格林沁差遣委用十一年賞三品頂戴署密雲副都統同治元年二月調署正白旗漢軍副都統七月授西安右翼副都統閏八月留辦山西防務二年上命督兵過河辦理同朝防剿事宜移駐同朝倉頭一帶五年賞給副都統銜充塔爾巴哈臺參贊大臣旋授正紅旗漢軍副都統仍幫辦新疆北路軍務六年正月丁母憂改爲署理塔爾巴哈臺參贊大臣仍幫辦軍務五月請假回旗穿孝九之西安將軍庫克吉泰等以德興阿母烏里蘇氏事姑盡孝撫孤四十餘年奏請敕部建坊旌表詔如所請尋卒遺疏入諭曰幫辦新疆北路軍務正紅旗漢軍副都統塔爾巴哈臺參贊大臣德興阿於咸豐年間由侍衛出師江南旋督辦江北軍務屢著戰功因事革職同治元年朝廷棄瑕錄用在陝西剿辦回匪復著勞績本年帶兵出關行抵陝境適遇捻匪肆擾疊次督隊接仗力挫兇鋒前因聞訃丁憂

加恩改爲署任並經賞假穿孝暫准回旗方冀長資倚畀克竟全功茲聞在營病故殊深悼惜德興阿著加恩照都統軍營病故例賜卹任內一切處分悉予開復靈柩回旗沿途地方官妥爲照料伊子候補協領富慶候選知州福亮均著百日孝滿後由該旗帶領引見以獎勞勩尋賜卹如例予諡威恪子富慶協領福亮候選知府

瑞昌

瑞昌馬佳氏滿洲正白旗人道光六年由繙譯生員考取繕本筆帖式九年補工部筆帖式二十年陞主事二十一年陞員外郎二十五年陞郎中二十七年充寶源局監督二十九年京察一等授山西太原府遺缺知府尋補蒲州府知府咸豐三年粵匪竄平陽垣曲距蒲州僅百餘里瑞昌籌辦防堵布置嚴密賊不敢犯旋調署太原府知府四年陞冀寧道六年澤州府陽城縣民抗糧毆官聚衆謀叛瑞昌奉檄馳往查辦獲首犯趙連城等正法餘黨悉平巡撫王慶雲上其功賞加鹽運使銜並賞戴花翎十年擢山西按察使十一年正月以捐輸京餉交部從優議敘同治元年六月御史胡壽椿劾瑞昌貪劣命兵部尙書愛仁等前往山西確查

覆奏尋愛仁等奏請將瑞昌暫行革職以便查辦詔如所請八月查明具奏奉旨暫革山西按察使瑞昌雖訊無貪婪實迹惟當防務喫緊之際致招物議不知檢束著開復原官仍交部嚴加議處尋議降四級調用四年賞給二等侍衛授駐藏幫辦大臣行至四川因日疾增劇陳請開缺回旗調理允之十三年二月卒子繼格咸豐二年進士廣州將軍繼崑五品銜兵部主事繼福步軍統領衙門委署主事繼勳戶部委署主事孫錫泰工部筆帖式錫璋二品廕生

周天受

周天受四川新都人由行伍洊陞督標中營千總咸豐元年隨副都統巴清德剿賊廣西保以守備陞用三年隨欽差大臣向榮剿賊江南陞四川順慶營中軍守備保安營都司以打仗奮勇賞沙拉瑪噶依巴圖魯名號並賞戴花翎四年擢川北鎮左營遊擊五年正月向榮令管帶川兵赴徽寧防剿賊由黟縣陷婺源天受率隊攻東門賊大隊突出會浙軍夾擊之賊潰復其城命以參將陞用時江西敗賊越浙嶺入徽陷休寧天受由嚴州馳援戰稍卻天受麾軍策應手斬賊目賊驚逸追蹙之進攻石埭踞賊奪門入斬獲殆盡錄功命加副將銜陞參將後以副將

擢用六年四月天受援太平敗賊於花橋復敗之西溪進規涇縣大敗賊於雙坑寺復其城詔免補參將以副將補用南陵賊竄涇縣之上下坊圖援寧國天受馳剿會婺源賊陷休寧官軍戰不利前江西巡撫張芾檄天受助剿連挫賊鋒擊退撲營之賊旋進師石嶺燬萬安街賊壘賊入城拒守天受會各軍攻之殲其衆再復休寧上以天受疊著戰功命軍機處記名以總兵簡放七年二月陞陝西潼關營副將三月天受敗賊婺源再復縣城閏五月擢福建漳州鎮總兵七月敗賊於曹家灣賊復立卡陵陽鎮八月望日天受令各營作慶節狀夜半出不意縱火攻之盡燬賊卡浙江巡撫晏端書奏保天受威望素著調度有方十月浮梁賊竄安慶祁門踞五里牌天受率軍大敗之直擣其巢斬獲甚衆尋在營聞訃丁母憂詔免其開缺改爲署理八年四月天受援衢州將軍福興令入城防守天受主扼樟樹潭力保浙西完善地會賊竄龍游天受留軍守壘自率千人馳扼湯溪宣平福興令總兵饒廷選城守而自營浮石渡賊窺伺壽昌將從衢州北竄開化賊亦漸內犯遂安告急欽差大臣和春疏陳浙江諸將惟天受尙知機宜能占先著而兵力較單總兵周天培乃天受之胞弟臣嚴飭會商力搃下竄之路會有旨加天受

提督銜督辦浙江防剿事宜先是副將李家萬軍處州銀場爲賊所困天受援之被賊斫斷兩指仍親身殿後馬步相閒獲全軍以退乃嚴守金華府城六月天受偕周天培剿武義數破賊復其城遣遊擊吳再陞軍上交道亦屢敗賊又會同江南軍復永康三品京堂張芾劾天受驕恣縱兵搶掠上以武義永康次第收復尙有微勞從寬先行革去提督銜毋庸總統浙江軍務仍責令帶兵剿賊以觀後效時天受遣部將會江南軍復縉雲自督諸軍復宣平各路賊盡竄處州天受部署江南軍會同溫處鎮道進規府城設伏夾擊克之七月晏端書奏天受帶兵援浙以來並無遷延貽誤被參各節傳聞異詞上念其疊復各城著有勞績仍責令奮勇圖功尋敗楊梅嶺踞賊復龍泉以浙江軍務將次完竣擬卽助剿福建得旨加恩賞還提督銜卽馳赴福建與周天培饒廷選張廷蛟等分路進剿天受聞命卽由龍泉馳援浦城偕周天培破賊龔村進軍關莊又敗之追至松波橋乘勝燬城外賊營七遂復浦城福建賊回竄江西東犯皖南徽州戒嚴張芾請旨敕天受防徽福建巡撫慶端奏留天受軍天受已應張芾調籌攻婺源命俟徽郡軍情稍鬆再回漳州本任九月有旨署理湖南提督會賊竄寧國提督鄧紹良戰歿張芾奏

言天受素著聲威前年復涇縣本年力解南陵圍形勢熟悉寧防各軍援浙時半隸天受部曲地利人和均屬相宜擬檄令總兵江長貴赴婺源防天受馳往寧國防剿請敕天受總統寧防諸軍各鎮將咸聽節制以一事權從之天受屢敗婺源賊斷其接濟身先士卒督軍進戰三復婺源九年二月捷聞下部優敘五月詔以天受督辦寧國軍務天受至賊已陷石埭七都營壘竄入太平之郭村天受令副將榮陞等往援克之其竄撲涇縣萬級嶺西鄉嶺賊天受復遣將敗之九月賊踞查村天受遣參將周天孚截賊章家渡大敗之十一月天受遣榮陞等破石柱坑賊卡連敗之十二月天受以胞弟署湖北提督天培戰歿浦口奉旨優卹陳謝並請卹同時捐軀之堂兄天元天順姪榮升報允十年三月涇縣旌德各軍失利賊竄浙境上責天受未能實力堵剿褫職留任並革勇號閏三月張芾奏寧防將弁大半籍隸湖南皆鄧紹良舊部習氣甚深天受雖力求整頓而轉滋謗譏提督米興朝援浙僭事實此輩誤之前兵部侍郎曾國藩紀律嚴明請敕督辦皖南軍務四月天受率副將吳再升等偕江長貴軍再復涇縣五月服闋詔令在營起復六月文宗顯皇帝三旬慶典以天受父文喜年逾八十賞御書扁額紫檀三鑲玉如

意江紬八絲緞袍褂料時賊二三萬竄撲寧國勢張甚天受激勵飢軍數襲賊壘疊有斬獲而城圍益急會徽州失陷餉道梗絕賊愈麇聚八月官軍敗於廟埠天受督兵出北門大雨如注火器不然守陴兵勇亦因飢潰散城陷天受與賊巷戰力竭死之兩江總督曾國藩上其事諭曰已革湖南提督周天受力守寧國危城七十餘日糧盡援絕誓以死守於城陷時力竭捐軀殊堪憫惻周天受著開復原官照提督例從優議卹並於寧國府建立專祠其胞弟周天培上年在江北殉節周天孚本年在金壇殉節皆係堅城固守力竭不屈一門忠烈大節凜然著於四川省城及本縣建立周天受周天培周天孚三人祠宇以褒忠義而昭激勸尋賜卹如例予諡忠壯賞騎都尉兼一雲騎尉世職襲次完時以恩騎尉世襲罔替同治元年穆宗毅皇帝御極追念死事諸臣功勳卓著者各賜祭一壇天受與焉四年命附祀京師昭忠祠

周天培

周天培四川新都人咸豐元年由行伍隨副都統巴清德剿賊廣西攻克豬仔峽風門坳各賊巢以外委儘先拔補並戴藍翎旋陞四川川北鎮左營千總五年擢

順慶營守備六年二月鎮江逆匪竄擾高資及蔡家窰天培隨欽差大臣向榮進剿焚燬賊壘出力陞保安營都司九月署浙江處州營中軍遊擊時壩西賊壘森立天培奮力攻撲負傷擊賊焚其壘以功賞換花翎十月以金壇解圍賞衛勇巴圖魯名號七年正月攻克東壩賊壘埽平寶堰逆巢以參將儘先陞用並加副將銜三月賊由鄔山一帶來援天培帶兵搶至外濠槍礮齊施斃賊無算五月賊又出尖山橫衝天培等伏兵痛剿賊勢大潰官軍直逼濠牆毀賊營八奪獲賊壘十克復溧水縣城以副將儘先補用並賞總兵銜閏五月陞湖南撫標中軍參將八月扼剿鎮江虎頭山援賊斃六七百人十一月擢貴州定廣協副將旋以攻克瓜洲得旨以總兵交軍機處記名十二月官軍攻克江寧東北賊壘會擣秣陵關天培功爲多八年二月陞雲南鶴麗鎮總兵以克復秣陵關下部優敘四月江寧悍賊突出南門經湖南提督張國樑檄天培鈔襲斃賊二千餘名斬首三百餘級六月賊竄踞浙江武義縣城天培由壽昌督兵援剿連日環攻復其城七月賊竄松陽天培取道宣平追之賊竄閩境復協同漳州鎮總兵周天受等分路進剿賊之踞楊梅嶺也設卡數重天培等追殺三十餘里斃賊無算攻復龍泉縣浙江全境

肅清賞提督銜八月逆匪竄浦城天培由龍泉帶兵赴援營於龔村督兵鏖戰槍斃黃衣馬賊數名乘勝追至松波橋賊逸去復集隊進攻東北兩門九月與周天受親率兵勇戰於龔村追奔三十餘里遂復浦城先是天培與周天受檄副將郭啟舉力攻老佛窰賊卡克之復督隊渡河攻克營頭賊卡先後斃賊三百餘擒一百五十餘得旨遇有提督缺出由軍機處題奏九年二月皖北諸賊與黃池灣泚逆匪會合爲江寧聲援天培手殫馬賊賊卻退時逆匪盤踞江浦並築壘於雙陽蕭家等圩突由包公廟九泐洲竄出蠡擁而前天培與署安徽壽春鎮總兵熊天喜等分投迎剿殲斃執旗賊目數名三月江北逆匪擾及九里山復在蕭家圩築壘天培分隊環攻進克逆寨張國樑等與賊戰於九泐洲突有逆匪撲天培營揮兵斬馘三戰三捷以功擢湖北提督十一月以扼剿浦口竄匪衆寡不敵死之欽差大臣和春以聞諭曰湖北提督周天培由行伍洊膺專閫隨同和春等攻剿金陵逆匪屢摧大敵上年賊竄浙省該員帶兵赴援由金華節節進剿連克永康武義縉雲宣平等處城池迨逆賊竄閩復會同周天受等統兵進剿直抵延平所向皆捷並將浦城建陽等城池克復實屬戰功卓著茲以扼剿浦口竄匪衆寡不敵

力竭陣亡殊堪憫惻周天培著照提督陣亡例從優賜卹以慰忠魂尋賜卹如例贈太子少保銜予諡武壯賞騎都尉兼一雲騎尉世職襲次完時以恩騎尉世襲罔替並於四川省城及本籍與兄天受弟天孚同建專祠同治元年穆宗毅皇帝御極追念死事諸臣各賜祭一壇天培與焉

鮑起豹

鮑起豹安徽六安直隸州人父友信雲南昭通鎮守備剿苗匪陣亡賞雲騎尉世職起豹於嘉慶十七年襲職分發六安營學習期滿引見發原省以守備用道光四年補江蘇蘇松鎮守備六年以緝捕出力下部議敘十一年擢吳淞營遊擊嗣以捕盜勤奮經兩江總督陶澍奏請仍留原任遇有水師參將缺出請補十二年補參將旋陞太湖營副將署蘇松鎮總兵十四年署狼山鎮總兵十五年擢廣東瓊州鎮總兵二十三年以副將張斌巡洋被劫要犯未獲起豹坐失察褫頂戴尋獲盜首九瀧獸等多名開復二十四年以督捕洋盜出力下部議敘二十七年奏請回籍養親允之旋丁母憂三十年服闋授甘肅涼州鎮總兵咸豐元年擢雲南提督尋調湖南提督時粵匪洪秀全倡亂起豹偕提督余萬清籌辦防堵粵匪旋

襲踞宜章縣邊卡起豹督兵剿之獲賊百餘奪回卡座二年四月粵匪攻撲廣西全州起豹由江華移駐永州相機策應賊尋由僻路突竄永州城外毀柳公廟等處民房開礮攻城起豹登陴力禦賊始退五月賊復竄零陵起豹偕永州鎮總兵孫應照擊之大挫賊鋒餘賊竄道州扼水門關要隘湖廣總督程裔采檄起豹率遊擊傅振邦會剿起豹等分路齊進誘賊出巢殲斃無算時賊紮營於水南門及斧子嶺洪家村一帶勢張甚起豹偕赴援之總兵和春等乘賊營未備併力攻敗之六月賊陷永明踞之起豹帶兵追至城下賊卽棄城竄江華縣復追至江華之高腳嶺殺賊多名七月賊陷安仁攸縣竄醴陵直犯長沙省城逼近南門踞妙高峰起豹督兵赴援登陴轟擊賊稍卻連日焚攻賊營賊負固不出旋於妙高峰上開礮攻城起豹等用大礮轟擊斃賊數千人賊乃踞鼇山廟於牆隙開礮起豹等飭四川援兵縋城擊賊殺斃多名生擒悍賊二賊於南門外開竈地道起豹等偵知之破其計火藥炸裂盡殺地道中賊並派遊擊周兆熊等直衝賊隊斃賊三四百名遂偕和春及河北鎮總兵王家琳等直薄牆濠賊伏匿不出上命起豹等亟應出奇制勝將城外賊營痛加剿洗九月賊由妙高峰繞至瀏陽門外教場撲官

軍各營起豹與和春等分投迎擊擒斬甚多賊復於省城上游渡江擾龍迴潭一帶起豹等合力圍攻賊潰渡河踞陽湖村起豹偕提督向榮進攻之適湖湘土匪王萬里聚衆作亂起豹與提督博勒恭武起兵會剿殲斃淨盡回軍長沙於城側密窆地洞用火罐炸礮轟斃悍賊三百餘遂解長沙之圍賊由河西僻路竄逸事聞諭曰此次省城防守功過尙足相抵鮑起豹著加恩免議十一月賊陷岳州上以起豹未能守禦降四級留任十二月進攻岳州城克之三年賊復竄湖北陷武昌起豹帶兵赴岳防賊回竄尋賊由武昌竄至江西之陽邏地方屯泊起豹督帶兵船暨各路礮船齊赴金口賊竄江西九江府岳州撤防先是起豹在廣東瓊州總兵任內剿辦洋匪獲勝頗得紅單船之力適長江賊蹤往來肆擾戶部尙書孫瑞珍奏請雇覓粵東船隻交起豹統帶以資攻剿允之會廣東廣西江西土匪竄擾湖南之永明縣及茶陵州等處起豹均前後剿滅之四年正月以捐助軍餉下部優敘二月賊自湖北南竄復陷岳州下部議處尋命節制全省軍務保衛省城相機迎剿賊由岳州竄赴長沙之靖港銅官及湘陰之樟樹港等處起豹與前任禮部侍郎曾國藩奏請遄調廣東等省兵勇助剿四月賊陷湘潭大兵擊賊於靖

港賊敗退復其城嗣逆匪屢竄上以起豹安坐省城並未督隊迎剿切責之卽褫職八年卒子開源鹽提舉銜府經歷開禧花翎遊擊

王浚

王浚直隸萬全人由行伍於嘉慶二十五年補張家口協外委道光四年陞把總五年擢千總十八年陞廣西提標前營守備二十四年擢湖南常德城守營都司二十七年遷廣東南韶連鎮左營遊擊二十九年陽山英德等縣匪徒聚衆戕官兩廣總督徐廣縉督浚等進剿迅就肅清敍功命以參將卽行陞用三十年補陸路提標中軍參將尋署南雄協副將嗣以剿辦英德一帶匪黨未能得力經徐廣縉奏劾諭曰王浚旣已失利於前又復偷生於後實屬庸懦無能著卽革職枷號兩個月在軍營示衆咸豐元年投效廣西軍營五月金田賊匪由中坪仁義鄧村竄出至古磨黃岱嶺屯聚欽差大臣賽尙阿令浚伏兵於下官村別遣兵誘敵賊至浚率潮勇齊起槍斃僞先鋒三人餘匪潰走七月官兵攻破雙髻山立營界頂是夜賊分三路圍營官軍開礮轟擊賊殊死拒浚等督勇馳至陣斬百餘人賊敗退得旨以守備用二年正月復命以都司補用三月賊以呂公車攻桂林廣西巡

撫鄒鳴鶴率浚等登城力禦焚其車轟斃賊匪多名賞戴花翎七月隨湖南綏靖鎮總兵和春攻剿嘉禾賊匪立將縣城克復捷入得旨遇有遊擊缺出卽行補用七月補湖南鎮算鎮標中營遊擊四年九月以江寧上方橋賊營恃通濟門雨花臺爲援應湖北提督向榮檄浚等督帶精銳直擣雨花臺連毀賊卡六重俘斬數百人旋擢廣東雷州營參將十月江寧賊匪南竄殷巷馬木橋一帶浚馳往截剿賊已夜竄秣陵追及之賊大潰向北關口衝出復伏兵鈔截斬馘百餘餘匪敗竄遂破其柵手刃多名五年九月陞廣東三江口協副將十月賊自朝陽門龍脖子等處各出隊數千人窺我前敵經官兵擊卻賊復以千餘騎由太平門馳應浚等自靈寺山前分隊迎擊大敗之六年三月三汊河賊匪乘雨遠遁官兵追擊石埠橋棲霞各匪亦紛紛夜竄浚統兵接應由觀音門沿江一帶追剿賊皆棄械逃逸三汊河賊壘一律平毀五月太平神策各門賊匪由龍脖子潛出窺伺並在大小水關馮家邊一帶築壘浚等督馬隊兩路包鈔逆匪敗退旋撲仙鶴門營盤浚復擊卻之七月賊撲五里牌浚隨福建漳州鎮總兵張國樑分路攻擊斬賊渠一人斃匪甚衆賊復竄踞寶堰浚帶勇進攻疊有擒斬記名以總兵用七年二月進攻

句容斬黃衣悍賊數名四月分路進圍句容賊於西北兩門各出救援浚擊破之五月賊匪大股出撲浚直前衝突刺悍賊數人落馬立破西南賊壘五座遂克句容以功賞毅勇巴圖魯名號八月鎮江踞匪四出分撲官軍擊敗之西城之賊復攻臺勇兩營經浚等奮力捍禦斃賊三十餘九月陞陝西陝安鎮總兵十一月克鎮江府城賞提督銜八年三月江寧賊匪出擾浚等隨張國樑四面兜殺大獲勝仗四月賊從雨花臺等處突出和春檄浚等更番轟擊擒斬千餘我軍直搗雨花臺逆壘殲匪甚夥九年二月命遇有提督缺出由軍機處題奏會逆匪於江浦縣之雙陽圩蕭家圩築壘修卡浚等五路齊發直薄圩圍賊出巢抗拒復由包公廟九洲洲各出逆黨萬餘盞擁而來官軍併力搶險賊壘木卡一時俱破十一月擢湖北提督十年四月攻剿丹陽賊匪陣亡安徽壽春鎮總兵熊天喜馳援浚軍亦同歿於陣事聞諭曰逆匪攻撲丹陽縣城和春令王浚等於營前五里外分翼進剿賊於大霧中冒官軍旗幟數道並進突至王浚軍前轉戰約一時許王浚中槍落馬熊天喜卽行馳救力竭陣亡湖北提督王浚安徽壽春鎮總兵熊天喜屢著戰功同時殉難殊堪憫惻均著交部議卹以慰忠魂五月幫辦軍務四品京堂許

乃釗奏請將王浚卹典撤銷諭曰王浚播弄威權汝在軍中既有確見何不單銜密奏於大局不無小裨逮軍潰地失人已死而追論於後不知者或被汝愚朕豈能受汝之愚此無他身家之念重耳至王浚惡劣聲名疊敕和春密查伊總以爲可用是以未撤今若照提督例卹典未免過優著飭部改爲參將例議卹以昭平允此朕心自有權宜初不因許乃釗所奏也王浚以一武弁從征十載隨向榮由楚北至江南雖有劣蹟尙能見危受命視僕僕奔走爲何如耶視自命書生偷生海隅又爲何如耶尋部改照參將例議卹賞雲騎尉世職襲次完時以恩騎尉世襲罔替同治五年御史朱鎮奏請將殉難之將軍祥厚等於江寧合建忠義祠如所請行浚與焉

清史列傳 卷五十一

大臣畫一傳檔後編七

饒廷選

饒廷選福建侯官人由行伍洊陞千總道光十五年補建寧左營守備二十五年陞漳州城守營都司二十九年陞左營遊擊咸豐三年四月會匪撲犯漳州伏黨城內縱火陷之廷選會合紳民奮勇追擊斃匪千餘生擒賊首謝厚僞軍師陳金牛獲江蘇上海逆首李咸池僞軍師黃恭閩浙總督宗室有鳳福建巡撫王懿德先後疏奏均報聞十二月署漳州鎮總兵四年正月王懿德遵保堪勝總兵人員奏言廷選實心任事明白安詳並能認真訓練不染軍營惡習上年逆匪倡亂道途梗塞漳州總兵道府不能赴任兵餉兩窮廷選聯絡軍民固守至半年之久更為敏幹可嘉疏入得旨以總兵記名簡放二月授貴州安義鎮總兵五月署福建提督六年九月江西邊錢會匪由南豐新城竄出圍攻廣信時廷選管帶閩兵駐防浙江嚴州兩江總督何桂清檄調迎勦斃賊三千有奇踏平城外各賊壘復與

知府沈葆楨內外夾攻城圍立解何桂清上其功賞西林巴圖魯名號七年調補浙江衢州總兵八年三月逆匪竄撲衢州經官軍擊退復由東北兩路來犯並分股竄入浮石橋廷選分路迎擊痛殲之五月江西瀘溪逆匪由鐵牛關攻陷福建邵武復竄浙江江山等處廷選嚴督攻剿屢獲勝仗並調各路精兵分赴溫處協防六月壽昌等縣失守上以廷選所轄地方連失三城不能進圖規復實屬因循貽誤革職帶罪留營以觀後效七月浙江巡撫晏端書奏言廷選拊循士卒力保衢城迨解圍後江山常山等縣均經廷選督飭文武次第收復衢嚴一律肅清功過尙足相抵得旨開復原官仍以總兵簡用八月授江西南贛鎮總兵十二月閩浙總督王懿德劾廷選奉檄馳赴連城剿匪輒請取道福州省親及飭由沙縣前進仍復藉病遷延疏入命革職留營九年正月官軍復連城龍巖論功開復原官五月補南贛鎮總兵十年五月逆匪竄浙江踞淳安廷選督飭知府彭期舉等分路薄城並偕副將王夢麟合師齊進賊由北門靈溪一路竄遁遂復縣城旋陞浙江提督十月杭州解圍並復餘杭下部從優議敘十一年八月賊陷嚴州廷選由蘭溪往援水陸並進直薄城下與參將羅大春等攻克之九月進規浦江逆匪以

大股鈔襲師潰退保諸暨浙江巡撫王有齡以聞得旨饒廷選統領諸軍紀律不嚴以致潰退下部嚴議尋議革職留營時杭州戒嚴廷選引軍退省賊自海潮寺至鳳凰山列柵實土爲堅壁隔絕內外糧道阻十一月城陷廷選死之同治元年正月閩浙總督慶端奏入諭曰浙江提督饒廷選於杭州失守力竭陣亡交部從優議卹入祀本籍昭忠祠並在殉難地方建立專祠其兄弟饒廷杰饒廷夔力戰陣亡均照例從優議卹饒廷選之妾方氏林氏聞警自盡均交部照例旌表附祀專祠以彰忠烈尋賜卹如例予諡壯果賞騎都尉兼一雲騎尉世職襲次完時以恩騎尉世襲罔替三月兩江總督曾國藩以廷選前在江西保守廣信府城厥功甚偉請於廣信建立專祠九月江西巡撫沈葆楨奏稱廷選與浙江寧紹台道羅澤南先後剿匪廣信功在生民請建祠合祀均允之光緒十五年慈禧端祐康頤昭豫莊誠皇太后歸政憫念亮節孤忠諸臣各賜祭一壇廷選與馬士六年浙江巡撫崧駿以廷選等力保衢郡請與原任衢州府知府吳艾生原任衢州鎮總兵李定太已故前西安縣知縣吳來鴻一併附祀大學士前浙江巡撫左宗棠衢州府城專祠列入祀典允之

劉松山

劉松山湖南湘鄉人以鄉勇隨邑紳王鑫防剿粵匪始戰於湘潭雲橋嗣擣道州橋背街踞賊復擊賊江華三里亭永明栗木街疊解寧遠藍山之圍先後擒賊目謝邦甲楊得金等賊陷東安王鑫率所部往援增募湘勇五百名以松山充哨長隨隊毀草鞵街賊營圍攻三月復其城越境捕逆首胡有祿蹙之邵陽四明山寺殲焉咸豐六年保外委隨克桂陽州郴州躡剿至廣東連州還擊永明江華克之復往連州會擊東陂觀雲霧洞股匪剿洗大東山及陽山西江墟青蓮墟各劇賊俱有功七年正月擢千總賞戴藍翎隨援湖北破通城石南橋賊又破之崇陽洪橋堡追奔數十里克崇陽又戰於白霓橋斬賊目韋再玷等蒲圻賊懼走進剿通山又克之松山斬賊酋八名生擒一名賞加守備銜王鑫援江西委松山領第四旗從剿吉安破水東援賊五壘二巢又遏賊吉水之藤田隨破永豐境內逆壘三十餘進戰於寧都之釣峯廣昌之古夏東山壩追賊南豐遏甘竹之援又剿太平市甘泉墟各股匪均大捷王鑫卒松山隸道員張運蘭部進營峽江阜田賊回竄松山率所部首先橫截之躡追至白坑斃賊七百餘會攻吉安扼吉水三曲灘竄

匪所向皆捷八年三月命以都司留湖南補用是時松山已隨克樂安宜黃埽磁圭墟等賊巢十餘處尋又克南豐破賊新豐墟三十餘營克建昌府六月奏捷陞遊擊賞換花翎七月福建賊竄江西犯新城另股由瀘溪金溪陷安仁松山從運蘭兼程赴援戰於青山鋪躡剿至安仁攀堞而登復之命以參將留湖南補用賊竄福建松山度嶺援順昌將樂賊還竄江西回軍會剿拔景德鎮追賊至浮梁賊反鬪城賊三四千突出助之松山獨當其衝戰良久後隊始集尋復浮梁十月擢副將十年逆首石達開率衆圍湖南寶慶府松山馳救至圍已解廣東股匪犯臨武宜章被擊退踞連州星子司松山由郴州赴境破之獍匪羅加誨與劇賊何觀保李榮激踞連州之禾洞及上下門村分建木城爲犄角松山自江藍廳往會剿由上門村奮銳直入壘毀其壘擒何李二酋及僞都督指揮五十餘人覆羅加誨之巢連境肅清敍功加總兵銜賞志勇巴圖魯名號十一年僞侍王李世賢擾皖南分股陷徽州松山奉調助剿邀擊於楊溪一帶殺賊千餘會攻休寧破馮家嶺進營迪祥湖斬其酋汪懷忠及悍黨百餘夾擊萬安街大破之又毀北門迤東諸壘突有羊棧嶺賊萬餘來援陷黟縣松山等迎剿立復其城追戰於柏莊嶺斬馘

四千又會各軍敗盧村巨股破上溪口賊巢毀石田賊營六座又敗小當援賊擒偽欽天豫及偽將軍等克休寧諸將謀攻徽州拔隊齊進賊夜劫槐塘營衆潰松山列隊月下屹然不少動賊不敢逼潰衆皆歸全師而還賊復入黟縣松山再克之毀樟嶺盧村各卡壘徽州賊棄城遁松山駐守之七月命以總兵記名簡放尋復賞加提督銜偽輔王楊輔清大股圍徽州布壘城外松山四戰四捷會援軍追擊之巖市賊大敗楊逆受傷遁同治元年二月下部優敘尋克旌德松山移守寧國府十月張運蘭病歸欽差大臣協辦大學士兩江總督曾國藩檄松山與總兵易開俊分統其衆逆首黃文金等率衆攻城松山等擊卻之尋破廟埠多壘又會涇縣諸將剿灣灘大坑及黃村北貢里曹村老坑蕎麥灣各賊股時太平逆酋古隆賢踞涇縣茂林潘村石埭逆酋賴文鴻踞丁家渡章家渡壘卡重疊松山等悉數剷除之聞賊襲寧國馳還繕守具設伏敬亭山伺賊大至督所部分三路鼓譟而出賊駭走伏起來擊伏屍塞路蹙餘賊於水濱溺死又無數三年六月大軍克江寧賊匪竄過徽寧境松山迎擊於錢村鋪收降四千人分別遣散十月曾國藩以皖境肅清疏請獎敘賞正一品封典十二月署安徽皖南鎮總兵四年二月授

甘肅肅州鎮總兵四月調補皖南鎮五年曾國藩奉命剿辦捻匪奏派松山總理臨淮營務統領湘軍四月解山東曹縣之圍五月追敗之江蘇銅山境時捻首張總愚牛落紅分擾西華上蔡六月松山追至西華賊分道並出松山力戰踰時敗走追至上蔡之雙廟賊設伏萬金寨旁圖截輜重會總兵李祥和等擊殲之進攻雙廟賊大隊迎敵敗之餘賊遁追及偃師之召陵又破之七月大破賊於南陽新野十二月捷聞下部優敘張總愚大股竄陝西松山自洛陽馳至西安六年正月剿賊魚化鎮二月渡澧水破呂兆集南豐店秦渡鎮花園集是月陞廣東陸路提督賊踞郟縣境松山偕副都統安住等偪賊槐芽鎮進擣銀渠金渠二鎮拔之轉戰扶風岐山間歷乾州興平抵涇陽之竹范村先渡涇以待乘賊半濟擊之斃二千餘追至富平悉破其壘又敗諸流曲鎮旣而灞橋軍失利賊至同州朝邑擾及郃陽松山一捷於晉成堡再捷於姜彥村進攻許家莊小壕奪其堡張總愚復挾大股來拒馬步互二十餘里松山嚴束隊伍與各軍分三路鏖戰歷四時許賊大奔同朝圍解四月諭曰劉松山自入陝以來剿辦回捻屢著戰功此次追賊同朝復能會合各軍大獲全勝保固河防深堪嘉尚著賞給玉柄小刀一把火鏹一箇

大荷包一對小荷包一對以示優異五月賊渡渭犯省城松山疾馳至城南與各軍大戰於山門口木塔寨齊王村陣斬數千級散脅從萬人得戰馬數千陣斃者稱是六月張逆勾結回匪復窺同朝分悍黨踞流曲鎮王寮鎮以阻追師松山病暍念河防喫重力疾馳援拔二鎮遂繞北山急趨朝邑出賊前攔擊賊敗走高陵九月渡涇而東松山據涇浚濠築牆以困之賊鋌走白水入北山十月陷綏德州松山躡其後立攻復之追至河濱賊渡冰橋悉數入山西松山裹糧盡軍士飢疲暫駐東岸候輜重偕諸將趨吉州鄉寧解河津稷山之圍十二月追及於平陽張逆踞柏家莊拒戰不能抗遂奔垣曲入河南濟源尋竄衛輝由內黃入直隸畿輔戒嚴陝甘總督左宗棠統師入衛檄松山等踰太行繞出賊前松山冒雪兼程日行百數十里七年正月由鉅鹿夜越賊屯擊斬其出拒者甚夥疾馳至祁州時賊騎已至保定城下松山迅赴之署直隸總督官文以聞諭曰劉松山由陝豫追至直隸星夜兼程繞越保定尤屬奮勉可嘉著先行交部從優議敘二月偕郭寶昌等軍剿獻縣踞賊破商家林等三屯移剿深州賊聞松山至先竄松山截剿破賈城村瓦口莊追敗之梨園村偵賊屯祁州回軍追剿會援賊至官軍馬隊中斷松

山以步軍力戰賊乃敗走追至博野之南鄧村賊圍郭寶昌營松山揮衆馳突賊大潰窮追至深州擒斬萬計於是張逆全股渡滹沱河而南捷入賞換達桑阿巴圖魯名號三月追賊河南至延津封邱破所踞村莊數十處入直隸長垣賊設伏小寨圖截我輜重松山結方陣環施槍礮賊猛撲五次傷斃甚衆乃卻走尋竄滑縣松山會淮豫各軍痛剿之賊爭渡衛水不得折竄山東延入直隸吳橋四月左宗棠疏言松山戰功卓著早在聖明洞鑒之中其人識量恢宏心地篤實寬而有制嚴而不苟與人共事從無居功之心各統將傾心悅服請充步軍翼長報聞自是至六月松山馳逐直東各州縣偕淮軍將士合力兜剿大小數十戰先後擒斬及窮蹙乞降者不可稱數張總愚投水死西捻平七月左宗棠奏言松山保垂危之秦救不支之晉速衛畿甸以步當馬爲天下先此次捻逆蕩平何嘗非松山之力諭曰提督劉松山上年冬間由陝入晉跟蹤剿捻疊著勤勞本年復會同李鴻章等派出各軍力籌兜剿俾捻逆全股肅清洵屬著有勞績劉松山著賞穿黃馬褂並賞給三等輕車都尉世職時左宗棠還軍陝甘檄松山剋期西進遂率所部還洛陽添募成軍由山西入陝十二月次綏德州分軍攻懷遠之大理川等處回

巢自督諸將攻小理川店子寺周家嶮悉破之搜剿各鎮堡當者輒靡尋破定邊回酋馬萬得馬棘子之衆八年二月北山遊匪誘松山部下之駐綏德者叛踞州城松山馳還抵清澗營勇縛匪首謝永清唐太春等反正遂誅首逆及遊匪叛卒並哨弁等百餘人綏德復松山自請重治得旨加恩免其治罪交部議處尋議革職留任陝省北路土匪各踞堡寨肆掠松山剿撫兼施節節掃蕩未一載降其衆十七萬榆綏延鄜各郡一律肅清八月率師度隴越花馬池進規靈州破李旺堡黑城子等堡寨數百九月靈州復詔嘉松山速赴戎機謀勇兼備開復革職留任處分時敗匪悉遁入馬家納家等莊寨詭詞求撫松山知其詐督軍迅擊賊西遁平大小莊寨三十餘回目馬化澂踞金積堡十一月松山攻之拔附堡各莊寨二十餘賊徒巢以避松山率勇進戰大捷北路悉平九年正月偵回逆千數自由胡家堡竄秦渠南踞石家莊空堡及馬五馬七馬八條三寨松山以其地扼秦渠之要勢所必爭馳抵石家莊賊於西南廢堡已築三壘麾軍三路齊擊奪之賊竄入馬五等寨松山令各營偪寨築壘督攻未下忽馬步援賊二千餘來自東南列隊甚整松山令先剿騎賊騎賊奔步賊猶屹立不動松山督各軍奮擊銳氣百倍賊

向胡家堡敗竄是役也斃悍賊千餘奪善馬百餘匹器械無算遂攻馬五寨薄外
卡一鼓破之外卡悍賊無脫者松山縱火焚寨門策馬督攻益急賊礮發飛子中
左乳墜馬下親兵扶之歸諸將來視叱令整隊速攻毋顧我亂行列官軍遂破馬
五寨松山創甚張目屬諸將曰我受國厚恩未能報卽死毋遽歸我屍當爲厲鬼
助爾等殺賊言訖卒左宗棠奏言松山以勇丁從征洊擢提督剿辦髮捻回匪無
役不從無戰不克自入靈州以來蕩平堡寨五十賊巢九十餘上年七月初師由
花馬池前進時馬化澂潛調西寧馬朵三嗾撤回助逆馬朵三以千五百騎應未
及一月經松山剿敗遁歸自此西寧逆回不敢復至河州逆回馬點鼈前在寧夏
大言於衆密助陝回及松山屢捷目覩軍威不敢復逞故此馬化澂求援於臨
洮謝四及靖遠馬馨子而河回終未與之俱其威震西陲如此治兵嚴不尙苛察
臨財廉不肯苟取其行師禦敵得古人靜如山動如水之義居心仁厚而條理秩
如語及時局艱危輒義形於色不復知有身家性命從征伐十八載僅募勇歸籍
一次家居十餘日耳年三十有七聘婦未娶者二十餘年臣由直隸西旋知其婦
家送女至南陽已兩年餘屬其行抵洛陽於募勇未到之暇剋期完婚適甘肅土

匪蔓延臣飭令督隊入秦松山奉檄卽行婚甫半月觀人於微雖古良將何以過之疏入諭曰劉松山由勇丁轉戰湖南等處十餘省剿平粵捻各巨寇謀勇兼優無愧名將此次西征回匪策馬前行躬冒鋒鏑該逆聞風膽落方冀攻克金積堡掃蕩而前肅清邊圉不料中道陣亡曷勝悼惜劉松山著照提督陣亡例從優議卹加恩予諡入祀京師昭忠祠並於陝甘等省立功地方建立專祠所部陣亡各員查明一併附祀該提督各省戰績並著宣付史館立傳其遺櫬回籍時著沿途地方官妥爲照料以示朝廷軫念忠勤至意尋曾國藩奏言松山初隨王鑫張運蘭轉戰各省其功績多歸於統將故事不甚著咸豐九年官軍破景德鎮各營猛追三十里隊伍散漫將至浮梁縣中有浮橋三道賊因過橋擁擠回頭猛撲城內亦出悍賊數千松山在東橋邊縱橫苦戰力竭賊衝軍賴以全十一年官軍攻徽州分駐民村三更後賊出撲營諸軍驚潰四散松山獨列隊不動月下遮諸將而告之曰請無潰走我第四旗劉松山也衆軍畢歸松山從容殿後而還同治四年臣赴北路辦捻湖南將士多不願隨征獨松山毅然請從士卒或索餉不肯北渡松山立誅數人撫定其衆訓練步卒聯絡民圩廣籌米糧使士卒不因乏食思歸

山東河南一帶官民皆稱老湘營紀律之嚴所至逢迎恐後部下習而安之不以北征爲苦臣於五年冬密保松山忠勇樸實堪倚平寇捻逆入秦臣檄鮑超率霆軍赴援霆軍遷延不至改檄老湘營松山不辭艱苦慷慨入關及再率師入陝行抵綏德州土回兼剿竭六晝夜之力轉戰數百里收降董福祥等十七萬餘人設法安插既定計由北路進兵規取金積堡以陝甘之糧取給山西遠至千數百里妥籌轉運由軍渡至清澗歷安定定邊至花馬池按程設站挑選壯丁分班搬運別夷險均勞逸糧運物足長驅西向回氛已衰蕩平有日不圖大功未竟長城遽摧松山在軍無日不討士卒而訓迪之雖戰罷宵深尤殷殷勸誡不休其平日公忠自失又實足以激發士氣是以守寧國之時疾疫盛行十人五病餉項久虧而有警則一呼齊集弁勇不以爲困渡江剿捻誅罰不用命者弁勇不以爲酷北道崎嶇軍中盛暑運糧與羸驢負重並行弁勇不以爲虐綏德之役哥老會匪一見主將歸來羅拜輸服不聞退有後言其與淮軍及豫皖秦隴諸將相接亦皆推心置腹至性相孚衆情之翕服實爲近今所罕見乞併宣付史館俾名將行實昭著並請於本籍建立專祠奏入詔如所請尋賜卹如例加贈太子少保銜予諡忠壯

賞騎都尉兼一雲騎尉世職襲次完時以恩騎尉世襲罔替十年金積堡平松山
檄尙未回籍左宗棠奏言松山英銳忠勇絕少比倫毅魄忠魂時露靈異上追念
前功命賜祭一壇由左宗棠派員前往致祭以慰忠魂十二年關內肅清命再加
恩賞一等輕車都尉世職光緒十五年慈禧端佑康頤昭豫莊誠皇太后歸政憫
念亮節孤忠諸臣各賜祭一壇松山與焉所遺世職併爲二等子爵嗣子山西按
察使肅兼襲

江忠義

江忠義湖南新寧人咸豐三年由文童帶勇剿賊四年隨江南提督和春進攻廬
州等處賊匪獲勝賞戴藍翎五年丁父憂奏留軍營九月剿賊廬州和春等奏保
以府經歷縣丞選用十月復以克復廬州保陞知縣七年賊陷江西臨江府城逆
首張發紀等負隅抗拒忠義隨道員劉長佑等星夜督軍進薄克復郡城江西巡
撫耆齡奏入命以知府卽選並賞換花翎八年福建逆匪竄擾新城忠義由崇安
馳往合剿累敗之斃賊數千九年四月粵逆石達開瞰楚軍併力寶慶乘虛犯永
州衡州長沙大震忠義連戰破之賊不敢順流下捷入得旨以道員歸部卽選七

月石達開復率死黨二萬餘攻賀家坳大營忠義會同各軍分路進剿生擒僞將軍李定發等四十五人賞額爾德木巴圖魯名號十年賊疊陷東安綏寧分竄新寧以精兵圍武岡忠義檄遊擊徐良塽等由各門齊出自率親兵策應大破之賊復乘夜潛謀登城復分道擊卻之武岡圍解其竄攻新寧之賊爲官軍所敗趨踞東安忠義率所部馳援分三路直薄城下賊襲官軍後壘戰逾時賊奔潰遂復東安時忠義一軍南援江華永明西顧綏寧靖州東防攸縣醴陵屢戰皆捷十二月署湖南巡撫按察使翟誥奏入得旨以道員交軍機處記名請旨簡放並賞加按察使銜十一年八月賞二品頂帶命署貴州巡撫時石達開由粵竄楚仍留大股屯踞東山分竄靖州綏寧並撲會同縣城忠義由洪湖馳援派知府席寶田副將周達武等擊卻之石逆復率衆十餘萬來撲忠義以兵三千斃賊二萬餘人賊復結湖北來鳳股匪擾官軍忠義擊退之克來鳳賊遁入川十二月丁母憂奏言帶兵以來轉戰數省時歷數年前在廬州軍營丁父憂見又丁母憂懇請終制諭曰江忠義瀝陳變服受任禮有未安情詞懇惻不忍盡拂其意惟墨經從戎古有明訓准其開署貴州巡撫之缺在籍終制仍著在湖南本省帶兵剿賊同治元年閏

八月授貴州提督十二月署廣西提督二年皖南髮逆竄入江西湖口都昌一帶適忠義率軍至乘夜薄城壘焚殄無算時兩廣總督毛鴻賓以皖賊勢張奏請飭忠義由江西赴皖署兩廣總督晏端書復請飭忠義會剿廣東高州踞匪先後奉旨准行忠義以廣東兵有餘糧他將力能辦之江西餉絀兵單賊數十萬萬一不支南省全局瓦解乃奏請力援江西統軍直抵湖口偪賊營賊率死黨力拒忠義屢出奇兵鈔擊截其餉道賊大潰江境肅清江西巡撫沈葆楨兩江總督曾國藩先後奏聞賞穿黃馬褂九月賊竄皖南攻青陽忠義督軍進紮墨鋪檄道員席寶田踰嶺攻賊卡復分隊出董家村由後鈔擊副將江忠寬等緣巖而上忠義揮兵直前賊駭奔青陽圍解太平石埭寧國等處踞匪亦次第請降上嘉其功下部優敘旋以積勞成疾就醫江西道卒沈葆楨以遺摺入並奏言忠義年甫三十出師十有二載金創徧體其克復地方安徽則廬州江西則臨江撫州崇仁新城廣西則修仁蓮塘貴州則天柱湖北則來鳳湖南則東安桂陽其餘保全甚多治軍嚴而有恩尤於民生利病刻不去心故所至民懷其德賊避其鋒諭曰署廣西提督江忠義由文員帶兵剿賊轉戰湖北江西安徽等省屢復名城援黔援粵懋著勳

勤本年夏間赴援江西敗賊於湖口青陽江境肅清皖南漸次底定厥功尤偉方冀干城之選禦侮長資茲以積勞傷疾齊發竟於新建縣屬之吳城病故中道殞折未竟其才披覽遺章殊深悼惜江忠義著加恩照總督例賜卹予諡其生平戰績著宣付史館立傳並於江西省城安徽青陽及本籍地方建立專祠准其入城治喪任內一切處分悉予開復應得卹典該衙門察例具奏伊子江孝詒俟及歲時由吏部帶領引見候旨施恩以示篤念蓋臣至意尋賜祭葬贈尙書銜予諡誠恪廕一子入監讀書期滿以知縣用光緒十一年贈太子少保銜十三年賜祭一壇子孝詒刑部主事孝詠知縣

林文察

林文察福建彰化人今隸臺灣縣咸豐八年由軍功隨剿臺灣淡水廳及斗六岡等匪出力獎六品頂翎尋捐銀助餉以遊擊分發福建補用九年閩浙總督王懿德等檄帶臺勇會剿建陽土匪先登陷陣十年九壘山股匪郭萬淙等出掠建寧邵武各鄉汀州龍巖股匪胡熊等擾寧洋永安文察隨軍力剿擒僞軍師等一百八十六人郭逆遁廢集邵武之上山坊文察合軍蹙之遂降胡熊竄踞東坂土寨

文察隨大軍破擒之胡熊伏誅閩浙總督慶端等疏言文察涉險窮追勇冠全軍
迅奏膚功實賴文察之力得旨擢參將換花翎賞固勇巴圖魯名號尋捐助餉錢
五萬串加副將銜十一年正月檄調援浙時粵匪陷江山肆掠大溪灘一帶文察
冒雨搏戰勝之卽督隊攻城毀城外賊壘移營雙塔底及烏木山先擊敗誘戰賊
並盡殺西山援賊攀城而登賊驚奪門出伏發殲焉遂克江山是役文察以孤軍
二千困重圍卒能以少勝多轉敗爲功捷聞以副將儘先補用賞換烏訥思齊巴
圖魯名號四月福建汀州及連城陷文察奉調回閩五月破賊金鷄嶺聲言由亨
子堡攻連城自率小隊伏江防一帶令勇首廖得全赴堡誘敵賊傾巢迎戰連城
賊出助之得全戰且走賊追之不虞伏兵之猝起也駭竄多自踐死者立拔連城
乘勝攻汀州克之慶端上其功命以總兵記名簡放六月沙縣土匪爲亂官軍往
剿失利七月文察馳至再戰平之時粵匪自皖南竄浙江分陷金衢嚴各郡縣衆
數十萬杭州將軍瑞昌疏調文察入浙文察所統臺勇僅存五百餘派員赴臺添
募未能速進十二月杭州陷有旨令文察與前皖南道李元度分道援杭州未幾
杭州賊自去同治元年正月慶端檄文察率所部由處州一路進兼顧處衢適衢

州被圍文察星夜馳援圍解進拔常山方進兵聞訃丁憂慶端以文察有謀勇疏請留營帶兵允之二月杭州復陷龍游遂安壽昌聚賊愈多處州松陽遂昌踞匪徧閩省西路之浦城松溪政和及北路壽寧各州縣文察與參將林文明進軍龍泉署浙江按察使張銓慶出松溪爲文察後路策應四月處州賊分股聚松陽之大港頭文察派隊襲其後別遣兵由雲和之五都夜劫賊營賊棄壘遁碧湖軍還龍泉會民團克遂昌賊併聚松陽其蔓延雲和景寧者復擊走之文察以一軍當三面劇賊慶端恐其失機令步步爲營妥籌戰守文察與總兵曾玉明合軍進規處州郡縣是時兩江總督曾國藩以查辦閩浙總督慶端各款疏稱閩中健將文察爲最克復邵武汀州皆獨力打仗不避艱險上嘉文察勇敢善戰諭慶端妥爲調遣六月松陽賊絡繹於湯溪武義間文察與副將曾元福等三路進剿毀二十餘壘斬馘千餘旣又設伏令曾元福假作民團誘賊出殪三四百人七月補四川建昌鎮總兵時處州賊勢已衰大股屯金華境上命文察規復處州直擣金華聯絡衢郡楚軍聲勢以爲恢復全浙計尋攻松陽七十餘日未下遠道轉運餉不時至文察勉以忠義飢卒皆奮適碧湖賊數千運軍實以濟松陽文察馳扼南坑出

不意擊敗之隨拔附近各壘進攻舊市設左右伏破之乘勝與松陽遂昌民團夜襲松陽復其城閏八月自松陽歷碧湖蘇埠口太坪蘭埠抵處州五戰皆捷與各軍合攻郡城賊堅守礮石雨下文察與總兵秦如虎攻愈急賊窮乘間由東北二門遁追斬無算並克縉雲得旨加提督銜仍下部優敘十一月移軍武義之李村前軍小挫文察馳至賊始退十二月賊分股踞王村徐村嶺下陽街來撲李村文察橫陳其師於賊中賊潰而復至文察戒各營俟賊近濠乃擊如是者十餘次最後乃伺其歸開壁逐之平嶺下陽逆壘王村徐村賊遁入城是月調福建福寧鎮總兵二年二月克武義由是浦江義烏賊悉奔渡江既而紹興及蕭山各匪俱竄徽州浙東肅清文察仍軍武義六月閩浙總督左宗棠以文察廉樸勇敢奏署福建陸路提督八月嘉義不靖左宗棠疏言臺灣一郡遠隔重洋居民多係泉漳及廣東占籍每村輒築土圍栽植栗竹根柢盤固有碉堡之固而無修築之勞槍礮彈丸不能飛入縱火不能延燒以故恃險恃富易肇亂萌文察籍隸臺灣內山素稱能戰請飭酌帶本標得力弁兵數百名渡臺號召舊部並統領各軍刻期攻剿以靖海疆詔如所請尋命署理福建水師提督責令迅速渡臺剿匪十月上以文

察已攜陸路提督印信赴臺命毋庸兼署水師提督十二月抵臺馳赴嘉義偕護理水師提督曾元福議進兵時逆首林懋晟戴萬生等踞彰化及斗六地方南北閒阻上下百餘里皆賊藩籬文察促曾元福進軍石龜溪親督遊擊白瑛等攻斗六偵知彰化賊以分援斗六勢頗張惶即馳告臺灣鎮總兵曾玉明等迅擣彰化克之先是文察甫入臺境宣示朝廷威德諭以從違禍福抵嘉義後派員紳赴各鄉開誠勸導數日間縛獻股匪乞免罪者二百數十莊逆勢瓦解及彰化既復各逆皆趨斗六梟賊陳啞狗等踞大突等莊文察偕曾元福攻拔助逆之三十餘莊直薄斗六土城賊固壘死守以附近之小溪洲鴨母寮等三十餘莊爲聲援文察分軍十隊令參將關鎮國遊擊白瑛許忠標等約期分出以大礮擊之各逆局散勢分不能策應密令軍中揚言彰化賊復起將分兵往剿次日拔隊行比夜偃旗幟伏蔗林其留守之關鎮國等數營皆積薪近舍及晚火起官軍於煙燄中詭作奔竄聲及驚惶潰斃狀斗六賊千餘來犯蔗林伏兵潛出其後曾元福等迎擊於前賊首尾不相顧官軍乘勢突入土城大隊繼進斬馘無數擒僞軍師鍾合和及逆首蔡四正等遂拔斗六戴萬生先期奔彰化與林懋晟煽脅各莊無敢薙髮文

察移師彰化申諭之又運糧賑糶以安民心三年正月復破樵溪口等數十莊擒逆首林傳等二十餘人戮之戴逆竄張厝莊聯日宜山紅毛社等匪巢四十餘負隅抗拒文察檄兵團連毀其五巢諭賊黨擒萬生至誅之而林懃晟踞四塊厝老巢外列層樓內置大礮樹密徑險攻之不下乃四圍築礮臺環擊之猶不下因覓敢死者五人夜潛入賊壘塞其礮門遲明各軍鼓譟進用火攻賊驚竄林懃晟伏誅四月左宗棠奏調文察內渡剿賊五月彰化逸賊復結黨圍縣城文察一戰解之七月臺灣道丁日健劾文察家居五十餘日頓兵不出紮營彰城兵勇騷擾紳民怨恨諭敕左宗棠等確勘八月疏言文察以餘匪復熾諉過於地方官文武意見不合互相攻訐文察回內山至今亦未內渡請先行交部議處十月文察馳抵福州巡撫徐宗幹疏稱文察赴調延緩實因夏秋每多颶暴重洋阻滯見已星赴邵武汀州一帶相機堵剿應請敕部免議從之文察之內渡也僅帶舊勇二百人請增兵於徐宗幹兵未集而江西敗匪竄雲際關徧近閩疆卽日拔隊趨邵武尋漳州陷宗幹檄文察回扼泉州龍巖州境文察以州屬之漳平寧洋與永春大田永安路路可通慮賊乘虛內竄分隊取道安溪赴寧洋宗幹復促文察統領全部

由同安規取漳州於是沿途調募兵勇至十一月駐軍洋洲距漳州三十里賊已西陷武平永定南竄平和雲霄北擾南靖龍巖所在披猖矣文察派遊擊許忠標扼南路以守備林向日率舟師泊湘橋應之遊擊林崇春扼東路已革副將惠壽等駐赤嶺萬松關應之守備黃益龍協守安溪調廈勇赴漳平以禦北竄十二月惠壽營先陷文察退屯玉洲尋出隊響水橋獲小勝立營萬松關賊先出數千人來拒擊走之旋大股數萬至文察督勇奮擊鏖戰五時賊圍愈密寡不敵衆文察躍馬揮刀手刃數賊突圍不能出中槍歿於陣左宗棠疏言文察此次內渡倉猝調集兵將兩不相習前檄令力保泉廈並未敢責以規復漳州旋聞其已進萬松關距漳郡僅二十餘里復檄其深溝固壘勿浪戰求勝俟浙軍到後協力並規乃爲穩著不料其急於趨戰致有此失徐宗幹疏言文察壯年英勇節次在閩浙各處帶兵剿匪出力身先士卒所向有功今寡不敵衆血戰捐軀實堪憫惜諭曰署福建陸路提督林文察前在浙江福建等處帶兵剿匪所向有功此次進攻漳州踞匪該逆率衆來撲官軍奮勇擊退該署提督手刃多賊猝因中槍陣亡實堪憫惻提督銜署福建陸路提督福寧鎮總兵林文察著交部照提督例從優議卹尋

賜卹如例贈太子少保銜予諡剛愍賞騎都尉世職兼一雲騎尉襲次完時以恩騎尉世襲罔替光緒四年漳州紳士呈請建立專祠奉旨允准十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇文察與焉十六年福建臺灣巡撫劉銘傳以文察功在桑梓請於本籍臺灣省城建立專祠由地方官春秋致祭允之子朝棟兵部郎中二品頂帶候選道

高連升

高連升湖南寧鄉人咸豐五年由外委隨浙江寧紹台道羅澤南拔江西義寧州陞把總賞戴藍翎旋因克復湖北通城崇陽蒲圻各城經巡撫胡林翼奏獎以千總補用加守備銜六年以克復咸寧山坡金口偪攻武昌省城屢戰皆捷命以守備儘先補用時廣西遣散苗勇戕官於龍勝連升偕巡檢徐俊集團擊潰復廳城擢都司賞換花翎八年率湘勇援廣西以復雒容等城功擢遊擊又隨大兵復慶遠陞參將九年隨廣西按察使蔣益澧剿柳州踞賊連升渡河築壘賊爭薄之鏖戰數時斃賊甚衆賊復以舟師至陸軍與水師夾擊敗之賊退敘功命以副將補用十年梧州匪徒羅華觀等結潯州艇匪負隅抗拒連升隨蔣益澧會同總兵潘

慶等分路進攻克下邳賊巢並夷莫洞及三堡賊壘賊竄四蔓又克之十一年正月賞尙勇巴圖魯名號時潯州逆首陳開由塔腳田壠來犯連升率隊迎擊殲獲甚衆進薄潯州城陳逆開城欲遁兵勇乘勢攻之克潯州八月捷上得旨遇有兩廣總兵缺出請旨簡放同治元年八月授廣西右江鎮總兵奉檄帶兵赴浙閩八月復壽昌二年正月復金華命以提督記名遇缺題奏八月進攻富陽悍賊萬餘逆戰兵勇亦殊死鬪破賊壘六殺賊數百人會同水陸各軍攻杭州夷賊壘九斃賊二千餘三年駐軍饒頭山以巨礮俯擊鳳山門女牆盡毀賊啟門遁遂克省城餘杭之賊亦引去並復其城三月捷聞賞穿黃馬褂未幾攻餘匪於德清敗之復其城五月攻湖州累戰皆捷焚賊船數十十月署浙江提督四年逆酋李世賢踞福建漳州兼犯漳浦連升隨閩浙總督左宗棠統兵赴閩山海澄石碼進攻斃悍賊數百又遣部將扼劈刀山截賊歸路大敗之生擒悍賊三百餘世賢泅水潛逸連升以功賞換穆特本巴圖魯名號李世賢敗後復於漳州東北築壘圖截官軍後路連升分道攻剿疊獲奇捷復擊烏頭門賊巢連拔十四壘斃賊萬餘生擒三四千復毀東關賊壘十餘賊奔逸將入城連升躡蹤追剿奪門入李逆悉衆死拒

巷戰逾時斃賊數千李逆開西門遁遂復漳州五月左宗棠等請獎賞白玉四喜搬指一白玉翎管一及荷囊燧囊等物賊旋竄平和連升又率軍克其城復迎擊詔安竄匪生擒僞祥王黃隆芸等殲寇略盡閩五月陞廣東陸路提督時髮逆汪海洋竄粵伏匿鎮平據險固守連升偕提督黃少春從分水坳進攻汪逆傾巢分三路出乍戰賊敗去而左右兩路之賊復緣山直下意圖包鈔連升急擊之追至山巔副將李大有等攻其左黃少春攻其右賊勢披靡連升繞賊後伏槍半山叢林中要其歸橫擊之殲寇無算汪逆中創死逆首譚體元代領其衆與賊目胡瞎子等踞城死拒謀攻官軍東路營壘連升飭各營櫛比進紮賊不敢犯十二月總兵方耀敗賊於州西七樹徑提督鮑超又襲破之賊夜啟西門遁連升入城搜剿餘賊復出追及賊於大田大破之斬叛勇歐陽暉及逆目賴速新等譚逆伏誅五年正月賞雲騎尉世職旋命赴陝剿辦回匪六年二月調甘肅提督時回逆麇聚宜君之偏橋密坪鎮連升偕總兵劉端冕分道兜剿由建莊追至鳳凰山後逆衆憑險回拒連升屢戰皆捷七年二月進攻何家莊踞回橫刀先登士卒爭搏戰破逆回萬餘人生擒其酋馬阿渾僞將軍禹方魁等誅之三月董志原踞回鄒阿渾

等復率悍黨五萬餘竄踞宜君之馬蘭鎮並分擾三水三原各處連升率隊圍攻復馬蘭鎮八年以楊店叛勇披猖親往彈壓倉卒被害事聞諭曰甘肅提督高連升自咸豐初從軍在廣西湖南剿辦賊匪嗣復轉戰浙江福建廣東等省疊克城池殄滅李世賢汪海洋巨股卓著戰功迨經左宗棠調赴陝西追剿回捻身先士卒所向有功實屬忠勇性成深資得力乃因查拏叛勇倉卒被害殊堪憫惻著照陣亡例議卹並加恩予諡其從前戰績宣付史館立傳准於廣西浙江福建廣東陝西等省建立專祠以慰忠魂尋賜卹如例予諡勇烈賞騎都尉兼一雲騎尉世職襲次完時以恩騎尉世襲罔替將先後世職併爲三等輕車都尉光緒四年陝甘總督左宗棠請於湖南寧鄉縣原籍建立專祠允之十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇連升與馮子承業襲世職

黃開榜

黃開榜湖北施南人由行伍隨軍轉戰湖北安徽咸豐四年賊由臨清竄江南豐縣開榜隨欽差大臣勝保追剿殲匪略盡殺功以經制外委用五年隨侍郎曾國藩提督塔齊布等水陸大軍攻毀半壁山賊營破田家鎮踞賊並復蘄州廣濟黃

梅等城擢把總賞戴藍翎積功洊陞都司七年襄陽匪徒竄擾郡城開榜隨楚軍攻破之湖廣總督官文上其功得旨賞換花翎時河南捻匪踞正陽關開榜以所部隨勝保剿之疊次獲勝八月六安捻酋李兆受率賊五六千人由馬頭集來援開榜截擊之斃悍賊無算尋隨攻克正陽關勝保奏請獎勵得旨以遊擊陞用先換頂帶九月補直隸密雲城守營都司八年安徽賊匪分屯馬頭城附近各村開榜與記名副都統穆勝阿等分路迎擊有斬級功復率礮船迎擊水路之賊大破之奪賊船二十餘並糧米槍礮甚多未幾賊鈔官軍後路勝保劾開榜恇怯奉旨摘去頂翎以觀後效十一月開榜隨勝保等攻復六安州城捷聞賞加副將銜仍帶原參處分九年正月勝保檄開榜赴三河尖會知府張曜等擣潁上縣屬之南照集賊巢賊知官軍大至望風先遁開榜盡平賊圩搜斬餘匪十數人並招撫被脅之吳家圩等處沙河南岸毗連固始一帶無賊蹤而北岸捻匪復嘯聚數千人欲攻朱家圩開榜以其地逼近三河尖亟同張曜馳回防禦三月勝保以開榜被參後屢立戰功奏請開復頂翎允之六月開榜偕都司黃鳴鐸率水師剿蚌埠長淮衛一帶捻賊接戰七晝夜獲賊船百餘殺賊千人奪旗幟槍礮無算賊掠臨淮

糧漕輸懷遠開榜等調礮船遮擊之焚其舟賊又自上洪搭橋渡淮來犯開榜復破之水卡八月上命勝保親率水陸各軍由臨淮蚌埠進攻懷遠東路擒逆其西南西北兩路調開榜水師及道員苗沛霖練勇分投攻擊十月開榜與知府秦榮等率水師攻破沿路賊卡擊賊壘於臨淮西岸都司楊德昌亦統礮船來會開榜等乘勝直抵懷遠之文昌閣賊腹背受敵官軍乘勢下攻毀賊二壘俘斬千餘人是役開榜功最賞給勳勇巴圖魯名號尋合軍擊退援懷劇賊水師直抵城關舍舟登陸開榜及黃鳴鐸等拔幟先登遂復懷遠得旨以副將卽行陞補並賞加總兵銜十一月補直隸督標後營遊擊十年正月以漕運總督袁甲三檄進規鳳陽鳳陽府縣兩城相距不及三里官軍連營五十有奇掘長濠三道合圍之賊計窮其酋張落刑招諸援賊自南路如雲而至開榜與各軍夾擊大破之追殺四十餘里府城賊目鄧正明等潛詣開榜營乞降述逆首張隆等負固狀開榜卽請袁甲三親赴鳳陽城外示以兵威令總兵張得勝誘擒張落刑促令繳出槍械並縛獻賊目張先等十四人斬之遣散脅從萬餘人而縣城之賊猶懷觀望遂梟張逆懸首壁門悉軍環攻陣斬僞軍師趙玉奇各匪乞降復縛獻賊目常四等十一人開

榜因於兩城外列營七納降衆親籍之誅其兇悍者三百人其餘一律遣散是役也開榜在軍竭二十餘晝夜之力防則無懈可擊戰則無役不捷袁甲三等上其功得旨以總兵記名簡放二月偕總兵田在田等破賊於王家營復清江三月逆首陳玉成衆十餘萬犯太湖金陵城內之賊同時並出勢張甚將軍和春等退守鎮江上以賊勢猖獗清江一路無重兵扼守諭袁甲三等飭開榜嚴密防範四月攻江北逆匪於僧道橋菱塘等處燔其土城木筏降賊薛成良者索餉不遂擁衆入邵伯湖築壘於高郵之王家港約西菱塘橋匪謀東竄開榜及副將劉成元等合軍進攻賊掠舟遁以水師追之毀賊船三百有奇薛逆投水死捷聞賞加提督銜十一月署漕運總督王夢齡奏請以開榜所部防湖水師統歸節制得旨如所請十二月特旨授江西九江鎮總兵會江南提督李世忠連復江浦浦口兩城奏稱其地距九洲僅數里洲四面臨江非水師不能進攻請撥派戰船以資調遣十一年開榜進攻天長疊平賊壘上嘉其調度得宜下部照提督銜總兵給予應得封典同治元年正月命開榜率所部礮船星速駛赴浦口三月餘逆由武家墩竄至山陽之涇河開榜檄副將黃國瑞擊破之賊竄寶應自以礮船破之復登岸

敗賊於八試平橋等處桃源清河山陽寶應境內一律肅清下部優敘會泗洲東
竄捻逆經官軍擊敗逃踞山陽之汝河開榜乘夜攻克之殄賊無算其分竄蔣壩
一帶之賊復與總兵安勇等分路截擊疊挫之於周橋古溝等處又與道員張富
年合攻觀音寺仁和集踞賊破之宿州境內悉平時捻逆擾邳州經黃國瑞等剿
退開榜奉命趨宿邳連河分撥水師遏賊東渡飭黃國瑞率陸軍渡河進剿邳州
何莊一帶斬賊目王春玉自督軍夜攻貓兒窩縱火焚之拔賊柵十有一復得旨
優敘適科爾沁博多勒噶台親王僧格林沁疏劾開榜節稟冒功命署漕運總督
吳棠確查尋覆奏事得白八月吳棠以徐宿逼近捻氛爲四省交界之區軍務最
爲喫重惟開榜堪獨當一面請令接統徐宿軍務並由清淮軍營撥派副將姚廣
武等馬步各隊隸之所有原帶水師仍歸節制其防宿邳之礮船別歸黃國瑞就
近調遣與僧格林沁合詞入奏詔如所請二年二月開榜督所部攻克長城賊圩
及郜家花園生擒賊目朱佃奎等天齊廟童亭謝家灣等圩並就撫因進攻孫疇
踞賊偵知捻酋任縛得欲薙髮潛遁豫設伏要擊大破之任逆伏誅乘勝毀其巢
獲銅礮二百尊槍械無算命軍機處記名遇有提督缺出儘先題奏適髮逆大股

渡江淮揚一帶防務喫緊諭吳棠飭開榜酌帶所部折回高郵以重湖防尋苗沛霖叛踞懷遠開榜等派兵破其黨吳昆田而苗逆練多糧足復結髮捻將乘勢東下命吳棠嚴飭開榜等勤加偵探遏其北竄時髮逆竄踞天長六合一帶五月開榜移軍攻剿屢破賊於六合之新集程家橋等處並派副將龔雲福等以水師扼高郵寶應湖四月賊圍天長大治木筏兼掠民舟將渡湖擾高寶開榜飭都司謝國恩等奪其船毀其木筏賊落水斃者甚衆而天長圍仍不解開榜督各隊先敗賊伍子胥廟繼以礮船攻護城橋賊營通城中運糧水路龔雲福舍舟擊隄上賊參將陳浚家駕礮划由小河口突圍轉戰直入縣城隄上賊亦敗退官軍內外夾擊遂克三汊河逆圩五月天長圍解奏入上深嘉之仍令嚴扼天長湖口各要隘時賊由天長遁江浦浦口開榜以將軍都興阿檄會水師統領梁正源駐沙漫洲備之未幾大軍復江浦浦口開榜挾楚師礮船壘破賊於中關七里洲下關等處毀賊壘三焚其船六十有奇賊紛走墜水死乘勝攻九泖洲拔之九泖洲者與江寧相望髮逆饋餉出入之孔道也既爲官軍所破江寧賊勢由是大衰旋因苗逆竄陷壽州北圍蒙城西伺霍邱勢張甚諭吳棠檄開榜駛赴臨淮會合兵部右侍

郎彭玉麟各軍迅速掃蕩七月苗逆增調悍黨由黑窰上洪兩處包鈔臨淮後路又親率大股二萬餘人陣於黑窰築壘搶渡開榜會總兵曾承堯等攻破七里河賊壘適曾國藩撥軍來援因合剿之是年冬苗逆伏誅蒙霍懷壽皆平三年髮逆攻江陰上諭開榜入江協剿並統帶所部師船往通州一帶沿江駐泊與江防艇師互爲掎角是年六月江寧復四年開榜回九江總兵任十年卒江西巡撫劉坤一以聞諭曰黃開榜前在軍營轉戰湖北湖南江蘇安徽山東直隸等省屢摧巨寇疊克城池戰功卓著抵任後整飭營務躬親校閱亦復無間寒暑茲因勞積日久在任病故殊堪憫惜黃開榜著交部從優議卹並加恩予諡尋賜祭葬予諡剛愍光緒十四年兩江總督曾國荃以開榜輿情感戴請於高郵州捐建專祠以彰蓋績而慰輿情詔如所請

鄭魁士

鄭魁士直隸宣化人道光四年由行伍考拔左營外委八年補獨石口協右營把總十二年陞城守營中軍千總二十八年選補湖南提標中營守備二十九年帶兵赴寶慶剿賊三十年賊首李沅發等就擒擢鎮筵鎮前營都司賞戴藍翎九月

隨湖南提督向榮赴廣西剿匪旋赴潯州府剿捕會匪皆捷賞換花翎咸豐元年二月擢湖南九谿營遊擊五月隨向榮剿賊於永安賊分股來撲魁士率楚勇擊破之二年正月向榮誘賊出巢魁士以短兵衝殺賊大潰乘勝毀平礮臺壘經欽差大臣太學士賽尙阿奏獎命以參將儘先陞用二月追擊竄賊裹創力戰至桂林與諸軍堅守月餘尋追賊越靈川斬擒甚衆賊復擁衆竄湖南境魁士追及之長沙額中槍傷猶力戰殺賊數人命以副將儘先補用並賞沙拉瑪巴圖魯名號十一月隨向榮追賊抵湖北十二月武昌陷魁士晝夜帶隊環攻三年正月城復賊順流而東竄越江西遂偪安徽陷安慶向榮督師追剿魁士以不遵軍令被劾詔革職留營三月帶兵夜襲賊營有功賞還都司翎頂四年正月奉命帶楚兵赴廬州隨江南提督和春擊賊二月賊屢出撲魁士屢敗之得旨開復副將儘先補用十二月命署安徽壽春鎮總兵時廬州賊匪屢爲官軍所挫設防益嚴魁士率諸軍環攻不下因移營駐城南要隘扼賊出入之路且以絕其外援五年二月連戰皆勝毀賊營八三月安慶援賊二千突至城南乘夜築壘魁士冒雨擊卻之旋探江寧亦出賊二三千來援急揮兵夾擊始退城中賊七千餘人恃糧足殊死守

援賊之來亦日衆水陸交警魁士往來接戰無虛日十月乘夜襲攻魁士帶兵潛至城下立雲梯衆軍隨登遂復其城魁士先以南路扼剿有功得旨優敘至是捷入賞加提督銜六年正月賊竄踞三河魁士渡河追剿焚賊巢數處嗣以擒匪屯南屏集帶兵趨宿州殲之二月擒匪分五股竄河南界河南巡撫英桂請旨迅飭魁士帶兵馳赴永城和春等方倚任魁士剿辦皖匪因上疏籲留並檄魁士往來策應會擒匪耿小金等分股竄懷遠魁士追擊敗之因率精銳擊茅塘集劇賊縱火焚其馬隊賊大潰乘勝追殺二十餘里斃賊三千尋馳抵河溜進剿褚澱耿萬金諸股生擒褚澱等四十餘人賊渡河遁復收集散亡由蒙城大肆焚掠魁士設伏奮擊斬馘甚衆焚其軍實賊奔潰墜水死者無算三月賊謀攻懷遠魁士督兵固守出剿疊勝賊憤甚分隊四撲魁士匹馬先登手刃數賊倉卒被圍刀矛雨集中二十餘創遇救乃免和春等奏聞上嘉其忠勇賞穿黃馬褂五月擒匪分竄太和縣境魁士督團防剿賊敗遁嗣因和春授欽差大臣接辦江南軍務命魁士會同安徽巡撫福濟督辦安徽軍務九月授壽春鎮總兵疊克舒城廬江無爲等州縣捷入下部優敘並賜以御用棉袍及翎管搬指荷包又以魁士躬冒鋒鏑中礮

傷甚劇上特詔獎其忠勇賞藥物醫治初魁士檄總兵音德布攻和州至是城復遂進攻桐城分兵規潛山十月桐城出賊萬餘人分五隊來撲魁士率兵迎敵賊敗走入城方追奔忽援賊自練潭至魁士以伏兵擊退之賊勢漸蹙十一月魁士督兵圍城並檄各隊分攻要隘伺賊出隊來犯密令以槍礮側擊復調馬隊三面圍攻斃賊無算時江西賊黨與安慶之賊會合來襲魁士皆派兵擊退之尋奉命會同英桂剿辦捻匪三省官兵歸其節制十二月復潛山七年正月賊陷廬江福濟引兵赴援賊乘虛撲桐城營密約城內悍賊夾攻援師魁士親督兵勇奮擊始退廬江之賊亦分股來撲欲截出援師之前馳往追擊賊奔潰尋派兵由潛山攻克太湖並擊退湖北大股竄匪賊偵潛山空虛撲陷數營二月上以魁士攻剿桐城失利褫翎頂歸福濟節制時桐營兵勇因飢潰圍舒城六安遂淪於賊上命魁士迅圖克復閏五月密疏馳陳江寧賊目石達開潛遁洪逆已成孤立宜乘機規取江寧並請迅飭官文胡林翼曾國藩等於上下游探蹤截捕九月捻匪窺廬州遂踞桃鎮魁士督軍會剿連日獲勝賊退守派河因嚴飭諸軍屯駐要隘十月粵匪由湖北竄回糾合皖省各匪齊撲廬州魁士督隊迎剿斃賊三千人生擒三十

七人賊鋒大挫上命賞還翎頂旋督攻桃鎮派河克之時賊復圍和州魁士急派重兵赴援擊退悍賊力遏全滁北竄之路八年正月諜知捻匪有訂期合竄廬州並犯鳳陽臨淮懷遠之說派兵移守臨淮以扼北路門戶三月奉旨調赴江南軍營協同剿匪十二月授浙江提督督辦寧國軍務九年正月攻克灣沚遂馳赴貴池剿平南岸賊壘四月督南陵官軍攻平章村湖海家山工山坊諸賊壘遂進軍駐灣沚五月命回和春營帶兵剿賊六月諭令駐紮高淳東壩一帶辦理防剿事宜十年五月因傷疾未痊請假調理上以魁士屢次退守並不協同防剿命以總兵降補六月奉旨隨同欽差大臣漕運總督袁甲三剿賊七月補甘肅寧夏鎮總兵十一年三月以病開缺回籍十二月詔令來京聽候簡用同治五年捻匪北竄奉命赴直隸池東一帶督隊協剿六年署直隸提督七年以督辦練軍防剿得力下部優敘八年舊傷疾發奏請回籍允之十二年卒直隸總督李鴻章奏言魁士堅苦剛毅驍勇絕倫馭衆恤兵嚴整寬厚軍興以來無役不從與軍務相爲終始每臨大陣首陷兇鋒出生入死身受重傷先後八九次徧體創痕鱗積大江南北一時名將無不推魁士爲最勦勤卓越懇恩優卹諭曰前任浙江提督鄭魁士由

廣西帶兵轉戰湖南湖北江蘇安徽直隸山東等省宣力行閒疊受重傷勳勞懋著茲因傷發病故軫惜殊深著交部議卹並加恩予諡以彰忠藎尋賜卹如例予諡忠烈光緒十五年慈禧端佑康頤昭豫莊誠皇太后歸政追念功績最著諸臣各賜祭一壇魁士與焉

陳大富

陳大富湖南武陵人由行伍補湖北施南協外委咸豐三年剿捕巴陵土匪出力賞戴藍翎復以屢著戰功洊陞綏靖中營守備六年署常德營中軍都司尋調赴江南隨剿蕪湖鎮江等處粵匪節次獲勝敘功賞換花翎八年隨大軍擊退安徽寧國府屬之黃池灣及南陵涇縣一帶賊匪命以遊擊儘先補用九年正月賊由江西分擾浙江之金華處州等郡經官軍擊退大富在事出力陞參將並加副將銜五月以續保南陵解圍功得旨以副將補用尋以賊竄安徽之婺源等縣總兵江長貴飭令大富等併力攻擊遂毀陵陽賊巢復婺源等城下部優敘十年三月賊由涇縣復竄南陵三路攻城並分撲麒麟橋慈姑橋兩營大富派兵分堵並親赴麒麟橋援應鏖戰月餘殲賊無數尋江長貴與大富軍合攻涇縣踞匪城外赤

灘白華晏公堂各路賊卡綦布大富等一律踏毀直抵城下轟斃守陣賊日賊立潰官軍斬關直入擒斬甚多餘賊奔竄遂復涇縣大富復回破南陵賊圍入城固守奏入命以總兵記名簡放四月補安徽皖南鎮總兵十一年正月賊率大隊復攻南陵大富激勵將士嬰城死守勢已瀕危適提督楊載福統水陸軍至擊賊北門外之魯港大富遂突圍出立毀東西南三面賊卡餘賊悉潰圍遂解時江西賊復竄踞建德縣城並金家村一帶總兵鮑超督兵進攻城將下賊猶死拒大富會水師馳往克之二月賊日僞侍王李世賢由安徽婺源竄踞玉黃港景德鎮等處大富聞警往剿遇賊於雙鳳橋且戰且追賊至李村佯敗遁大富躍馬當先會伏賊猝起身受槍傷血濺馬背猶裹創力戰手刃數賊嗣見大營火起遂下馬北向拜投河死之兩江總督曾國藩奏聞命照總兵例從優議卹尋賜卹如例予諡威肅賞騎都尉兼一雲騎尉世職襲次完時以恩騎尉世襲罔替子昌明襲

熊天喜

熊天喜湖南永綏廳人道光十二年由行伍充永綏協營勇咸豐三年隨欽差大臣和春帶水師剿鎮江賊拔補永順協千總賞戴藍翎四年閏七月粵匪竄擾江

南天喜隨和春在廬州舒城等處剿賊斬擒逾萬得旨以守備儘先補用十月補長沙協右營守備五年二月廬州逆匪於得勝門外至七里站列營天喜越濠先登衆軍繼之立平賊壘和春等上其功以都司儘先補用七月廬州援賊大至天喜等督兵鏖戰至夜分賊始退八月援賊竄柘皋遊擊伊林布等憑河扼守陣亡遂圍總兵吉順營天喜隨和春乘夜疾馳百里抵柘皋督馬隊擊走之敘功賞換花翎十月進攻廬州天喜以首先登城功賞拔勇巴圖魯名號並以遊擊遇缺卽補六年攻破三河賊壘又破賊於姚口擢岳州城守營參將八年署安徽壽春鎮總兵九年二月隨提督張國樑進攻江浦縣城五路並進天喜與提督周天培等陣斬執旗賊目數人毀其壘十年正月隨張國樑進攻江寧上下兩關約賊目秦禮國謝茂廷爲內應天喜越濠攻毀七里洲官塔橋各壘奪獲礮船六隻大礮百餘尊遂克兩關二月江寧賊竄浙江湖州府等處天喜與參將羅熙賢攻復長興縣城毀虹興橋賊營時賊黨分踞安徽廣德州城天喜移駐廣德浪巖橋親率大隊以槍礮連環轟擊遂復廣德州城閏三月隨提督張國樑督師丹陽五里亭月晦賊乘霧冒官軍旗幟力戰城外與國樑同時力竭戰死和春以聞諭曰逆匪攻

丹陽和春令王浚熊天喜於營前五里外分翼進剿賊於大霧中冒官軍旗幟數道並進王浚中槍殞命熊天喜卽行馳救復被包鈔手持短兵殺賊甚厲力竭陣亡安徽壽春鎮總兵熊天喜屢著戰功殊堪憫惻著交部議卹以慰忠魂尋賜卹如例予諡勤勇賞騎都尉世職襲次完時以恩騎尉世襲罔替子心美補用都司孫順熙承襲

楊昌泗

楊昌泗湖南乾州廳人由行伍拔補乾州協千總道光十二年廣東連州徭匪滋事隨戶部尙書禧恩剿撫出力賞曉勇巴圖魯名號十四年五月陞湖南鎮筵營守備九月遷沅州營都司十五年調寶慶協都司十八年擢永州鎮標中營遊擊二十一年陞貴州朗洞營參將二十四年遷直隸大沽協副將二十六年擢甘肅西寧鎮總兵二十七年調廣東高州鎮總兵咸豐元年欽州土匪起竄靈山踞陸路墟昌泗偕提督陶煜文督兵進剿殲數百翼日賊復來犯昌泗督兵卻之復縱火燒墟斬賊二千三月兩廣總督徐廣縉以聞得旨嘉獎並下部優敘十月以剿辦逆匪凌十八何名科兩股調度乖方革職三年四月諭交幫辦軍務理藩院尙

書恩華差遣委用七月署湖廣總督張亮基奏留湖北差遣九月粵匪竄九江直撲田家鎮昌泗偕糧道徐豐玉等督兵堵禦嚴陣以待賊船駛近礮密如雨官軍環牆屹立不爲卻遂沈賊船大敗之十二月湖廣總督吳文鎔奏參昌泗帶兵剿賊擅自回省請發往軍臺效力贖罪四年三月逆匪竄踞漢陽漢口圖撲武昌昌泗奉巡撫青麐檄帶兵擊卻之五月漢口賊船四百餘竄下游磯窩昌泗督兵馳剿賊伏匿不出昌泗奮勇當先壞其土城焚其望樓夷其壘四陣斬執旗悍賊數人賊敗回船乘勝追剿擒斬略盡磯窩一律肅清別賊一由漢口撲塘角一由鸚鵡洲撲鮎魚套昌泗自磯窩回援擊沈賊船無數餘匪敗竄捷上得旨免其發往軍臺仍留湖北以觀後效六月武昌失守昌泗隨青麐收集潰勇繞道長沙前赴荊州防剿七月命赴署湖廣總督楊需軍營以備調遣旋以荊州將軍官文燾帶兵赴監利扼要堵截閏七月昌泗督軍從大江北岸轉戰而下與升用道李孟羣合剿螺山下游兩岸餘匪八月抵漢陽西岸有賊船二千餘由襄河湏口蔡店趨漢口造浮橋將襲我軍昌泗偕涼州副都統魁玉等盡焚其船殲賊二萬九月復有賊船千餘由蔡店順流而下昌泗率兵繞至楊林溝鈔賊後路賊驚潰適水師

戰船霆擊而入大破之尋攻蝦蟆磯焚賊土城合水師進克鸚鵡洲復會各軍攻漢陽將晴川閣大別山下柵壘盡行攻毀擒僞將軍總制等戮之漢口賊之與水師遇也戰未竟昌泗已率兵梯南門入賊大驚遁遂復武昌漢陽湖南提督塔齊布等以聞得旨開復原官十一月楊霈劾昌泗駐兵蘄州不能扼截竄匪請摘去頂帶時楚北潰匪自田家鎮被創後與安徽賊合入黃梅廣濟昌泗隨塔齊布等進攻廣濟復之賊竄黃梅昌泗會各軍四面圍剿殲賊二千乘勝薄城奪門而入遂復黃梅十二月楊霈以昌泗被參後督兵剿賊得力入奏命賞還頂帶旋授陝西延綏鎮總兵五年四月賊竄德安昌泗敗之於長林岡殲匪二百賊竄浙河復追及之六年賊復竄踞漢陽昌泗復攻克之斬級二千敘功賞加提督銜八年十月河南捻逆竄擾杞縣及太康通許所屬朱口崔橋各地方諭令昌泗督同馬步官兵馳往通許呂潭周家口一帶迎擊並繞前會剿毋令分竄十一月因病請開缺允之尋卒十二月事聞諭曰楊昌泗久歷戎行著有勞績茲以帶兵赴豫力疾遄行積勞病故殊堪憫惻著照提督軍營立功後病故例議卹尋賜卹如例予諡剛介廕一子六品頂帶孫秀觀知府秀實主事

程學啟

程學啟安徽桐城人初陷賊中不爲屈咸豐十一年大軍偪安慶學啟自拔來歸道員曾國荃檄充營官七月攻北門三石壘奮勇先登越日復猛攻破之共擒賊千餘八月隨克安慶省城敘功擢遊擊並賞戴花翎旋帶隊克無爲銅陵等州縣得旨以參將遇缺卽選同治元年三月隨福建延建邵道李鴻章援江蘇上海四月剿賊南匯奉賢間會克南橋鎮連毀杭頭新場賊壘五月大股逆匪撲松江府城隨江蘇巡撫李鴻章援剿軍於泗涇逆首陳炳文糾集悍賊突營復分股由營後繞攻滬城勢張甚圍攻學啟所部開字營併力死撲學啟督兵抵禦斃匪無算賊屍枕藉幾與濠平仍死戰不退學啟手然巨礮開門衝殺匪始披靡李鴻章復分兵三路夾攻匪衆大潰城圍立解隨平毀泗涇一帶賊營得旨以副將儘先推補並賞勅勇巴圖魯名號七月李鴻章遣軍攻青浦學啟敗賊於東北門遂復縣城八月賊首譚紹洸攻陷浙江湖州且計竄上海以爲江寧之援屢撲官軍北新涇營李鴻章約學啟會剿學啟至七寶鎮遇賊力戰敗之擒斬三千餘匪時李鴻章亦行抵虹橋賊憑河踞壘李鴻章與學啟合軍進剿踏平賊營數十匪衆奔潰

滬防肅清奏入得旨以總兵記名簡放九月譚逆復糾衆十餘萬圍四江口水陸各營官軍分路進剿賊扼橋布陣學啟揮兵前進擊斷賊隊胸受礮傷裹創疾戰賊衆敗退其先渡河者悉殲之復分三路圍殺是役也殲斃並落水死者以數萬計毀賊營二百餘座奪獲礮械無算立解重圍奏入命遇有總兵缺出儘先題奏並賞加提督銜旋補江西南贛鎮總兵二年三月與統領李鴻章進攻太倉踞匪逆首蔡元滙僞降東南門各出賊數千又於崑山東路出賊數千並賊船八十有奇突撲鴻章營學啟獨扼西門力殲千餘匪賊稍卻復竄撲官軍婁塘營逆首李文熙並以礮船扼河口學啟督水陸諸軍夾擊斬李文熙於陣蔡元滙突圍逸學啟追殲之遂復太倉四月逆首夏天義等仍踞崑山新陽縣城學啟督軍赴剿譚逆糾合蘇城大股來援擊敗之正義鎮者蘇垣達崑山要路也遂偕總兵郭松林分兵擊之斃賊三千名奪石營兩座譚逆敗遁揮軍直抵城下梯而登遂復崑山新陽兩縣捷聞命以提督記名遇缺題奏賞給一品封典六月會洋將戈登取花涇港督副將歐陽利見破夾浦分軍埽九里湖北岸賊壘忽援賊由尹山橋大至擊敗之拔同里鎮賊營復吳江震澤縣城連卻嘉興援賊七月太湖賊匪仍憑湖

結寨爲久抗計學啟督軍扼飛虹橋口先斷浮橋賊不得遁殲之戮其酋徐尙友乘勝追殺潛踞賊於洞庭東山遂督兵恢復蘇城附城賊壘甚堅礮遠不能及八月學啟至永安橋城賊出撲擊敗之旋攻寶帶橋賊壘是橋爲太湖鎖鑰賊死力拒守學啟合水陸軍夾攻克之逆首李秀成率悍賊來援學啟督軍奮擊竟日賊始遁九月破五龍橋賊壘會軍八圻擒賊首陳得勝十月用郎中潘曾瑋策進攻蠡口黃埭學啟躍濠直入連破之斬賊二千生擒其渠萬國鎮復拔觀音廟賊壁四合隊前進盡夷濟墅關十里亭虎邱等處賊營數十直抵閶門連克婁齊葑盤四門外賊壘逆酋李秀成宵遁旋克復蘇州省城先是僞納王郤雲官勢蹙懼因副將鄭國魁密納款學啟單舸誓之洋澄湖旣而李秀成察雲官等戰不力疑之惟慕逆譚紹洸爲死黨屬以守事挈帑賄走越三日紹洸會諸酋誓雲官黨殺之遂據其僞府開齊門降獻紹洸首明日學啟入城降酋自雲官下曰僞比王伍貴文僞康王汪安均僞寧王周文佳僞天將范啟發張大洲汪懷武汪有爲皆歃血然未薙髮乞總兵副將等官署其衆爲二十營劃屯城半學啟佯許密勸李鴻章誅之鴻章謂殺降不祥且慮他城聞風堅守固請乃可明日學啟令諸酋謁鴻章

於其營及宴鴻章託事去俄礮舉營閉健卒百餘挺矛入刺八酋皆死學啟馳入雲官僞府召悍目數百悉誅之盡收賊械遣散其衆蘇城大定時浙地介蘇之平望鎮仍爲賊踞學啟會提督李朝斌擊破其巢斬賊目及悍黨四五千人毀賊船五六百追殺五十餘里蕩平九里橋黎里十一月嘉善守賊降因復縣城三年正月學啟進窺嘉興擊下小西門北門賊營七俘賊目二斃悍賊千奪大礮五十分克秋涇合歡等橋逆壘殲東北門賊殆盡督軍偪城築礮臺轟塌城垣十數丈擊敗盛澤撲營賊二月益繕攻具督勇縛草膝行增築月牆環攻不息十七日復發地雷裂城百丈摧賊礮臺二十餘座連夜支浮橋二道明日遣別將擊走新塍援賊會軍奮攻城頭礮石雨注學啟肉薄登大呼殺入中槍貫腦踣而復起部將劉士奇繼之血戰移時遂復郡城捷入諭曰此次程學啟進攻嘉興日則往來督戰夜則露坐礮臺指揮照料冒死血戰以致身受重傷用能攻拔堅城掃除巨逆其志可嘉其功尤偉著李鴻章傳旨嘉獎令其安心醫治以冀速痊仍著該撫詳查勞績奏請獎敘旋經李鴻章臚列入奏復諭曰總兵程學啟身帶重傷克復郡城實屬出奇制勝謀勇兼長著賞給白玉翎管一支白玉搬指一箇玉柄小刀一把

荷包一對尋卒於軍李鴻章奏稱學啟籍隸安徽桐城遭亂被擄嘗自逃去爲賊追回拘繫不能脫咸豐十一年四月間曾國荃攻安慶學啟密詣曾貞幹營納款曾國荃兄弟見其忠勇志趣異常遂留營飭令帶隊督剿旋克安慶功居多尋偕督師至滬五月則有虹橋之捷八月則有北新涇之捷十月則有四江口之捷皆殺賊萬計先後收復青浦嘉定太倉鎮洋崑山新陽吳江震澤各州縣進逼蘇州蘇州爲羣賊淵藪城大糧多非四萬人不能合圍程學啟以水陸萬人由婁門外跨塘進剿將城東之寶帶橋五龍橋北之蠡口黃埭西之澹關虎邱各處石卡賊壘次第埽平又兩次分隊遠剿嘉興援賊於八坼平望一帶又助剿李逆大股援賊於大橋角望亭一帶又分剿湖州援賊於太湖東山一帶出奇入險賊中怖爲神兵其收復蘇城降酋郜雲官等八人擁衆不下二十萬意圖脅制學啟謂曾在賊營熟知情僞殺數頭目即可解散餘衆遂誅其酋散其黨蘇州大局頃刻卽定其深心遠慮能謀能斷近時武將所罕見中外所共知設天假之年功業詎止於此正月間曾國藩商調該軍赴江寧學啟以進攻嘉興勢難撤回惟身受曾國荃薦拔之知耿耿圖報擬俟嘉興常州克復當馳赴江寧攻殲老巢以酬知遇今年

甫三十五遽因攻克嘉興殞身鋒鏑每念時事多艱將才不易臣誠私心痛之前於揚舍督剿時曾往看視學啟言賊雖潰敗勢尙悍衆請飭諸將慎重兜擊又以不能爲國家驅除殘寇哽咽流涕屬家丁爲穿御賞黃馬褂望闕叩頭並令其營務處知縣韓杰馳來臣營屬專心剿賊語不及私臨絕時大呼心事未了聖恩未報腦漿迸流因傷出缺其攻安慶後兩年之間連復江浙各城十數處並克復蘇州省城爲東南第一戰功茲爲國捐軀可否照提督陣亡例從優賜卹特旨予諡宣付史館立傳並於安慶蘇州嘉興各府建立專祠以彰忠藎疏入諭曰遇缺題奏提督江西南贛鎮總兵程學啟由安慶來歸帶隊攻克皖城上年復隨李鴻章督兵由滬赴蘇所向無敵兩年之間先後克復蘇州省城嘉興府城及江浙各城十數處實爲東南戰功稱最朝廷見其謀勇兼優勳勞卓著疊擢提鎮賞給世職殊恩異數屢錫褒嘉乃於本年攻克嘉興時該提督躬冒矢石首先登城致槍子貫腦絕而復甦屢經降旨詢問病狀方冀安心調治就痊重資任使詎意竟因傷重出缺覽李鴻章所奏其臨絕時猶以不能爲國驅除殘寇爲憾將才難得悼惜殊深程學啟著追贈太子太保銜照提督陣亡例從優賜卹任內一切處分悉予

開復加恩予諡入祀昭忠祠所有戰績及死事情形宣付史館立傳於安慶蘇州嘉興各府城建立專祠靈柩回籍地方官妥爲照料並著李鴻章酌派司道大員前往賜祭一壇伊子程建勳著俟及歲時帶領引見候旨施恩用示眷念勳勞優加褒卹之至意尋賜卹如例予諡忠烈賞騎都尉兼一雲騎尉世職復加恩賞給三等輕車都尉世職旋命歸併以三等男爵世襲光緒十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇學啟與焉子建勳工部員外郎襲男爵

張樹珊

張樹珊安徽合肥人咸豐三年粵逆入皖樹珊與兄樹聲奉檄團練鄉兵擒治土匪淮軍之興自張氏始五年擊賊巢湖以親兵二十八人破賊千擒斬僞尙書五人敘功以外委用尋進攻巢縣破賊營二以把總用六年八月克復來安縣九月隨道員李元華攻克無爲州以千總用十二月隨攻克潛山至太湖軍僅五百人遇賊酋陳玉成衆萬人與戰軍糧火藥皆盡賊屯隄上樹珊率敢死士緣隄下蛇行入賊中大呼殺賊賊驚潰七年敗捻首張落刑於官亭九年從擊賊於霍山復

其城賞戴藍翎十年兩解六安之圍以守備用十一年赴援壽州並克復三河紋功以都司用賞換花翎同治元年三月隨江蘇巡撫李鴻章帶兵至上海因以名名其軍曰樹軍時上海三面皆賊五月賊酋李秀成擁衆來撲樹珊謂賊勢盛宜乘其營未定急擊之遂會諸軍內外夾擊賊敗退李鴻章保奏以都司留於兩江補用七月與諸軍攻克青浦八月李逆遣悍賊數萬撲上海之北新涇圍官軍數重樹珊偕總兵程學啟力戰旬餘擊破之捷聞以遊擊用賊竄回嘉定九月樹珊復合諸軍攻克之賊懼官軍之乘勝進攻也遂以衆十餘萬圍四江口水陸各營阻江以守樹珊謂非偪賊衝築一二營則進戰無地乃率敢死士潛伏賊營旁卽夕營成各軍齊奮連破賊二十餘壘遂解四江口之圍捷入以參將用賞悍勇巴圖魯名號十二月常熟及福山之賊以城降已而福山賊復叛進圍常熟城內降日告急於李鴻章二年正月樹珊與諸軍自上海航海抵福山上游之西洋港港狹軍糧不得入寄泊海中風潮忽作飄入賊巢潮退擱淺恐被賊焚掠樹珊以爲兵法危地則戰乃登岸結營未竟而賊大至樹珊大呼疾戰擣賊中堅右肘中槍流血盈袖不少卻凡先立各營之被圍者盡拔出之二月上海援兵亦至遂解常

熟之圍李鴻章疏稱樹珊由險入深以寡撼衆會合諸軍解此重圍爲蘇軍一大轉局得旨以副將儘先補用常熟卽平太倉崑山亦相繼復五月樹珊由常熟之大河鎮進規江陰無錫時江陰踞賊負嵎久李鴻章檄諸軍分路進攻八月克之樹珊扼南門之衝斷賊去路賊鮮得脫者捷入記名以總兵簡放是月進攻無錫李逆以無錫爲蘇常咽喉勢所必爭糾賊酋陳坤書李世賢等率衆十餘萬分撲我蘇錫交界之大橋角各營樹珊馳往助剿飭所部火賊輪船二礮船十賊死者以萬計遂解大橋角之圍九月李逆復自率賊七八萬至無錫連營數十里樹珊與諸軍夾擊賊大潰會蘇州之賊因李鴻章圍攻急窮蹙乞降李逆乃率其死黨入太湖結常州之賊水陸分進以援無錫時提督劉銘傳專擊外援樹珊與諸軍合圍城賊十一月諸軍奮勇登城遂拔無錫縣捷入記名以提督簡放樹珊尋與兄道員樹聲及劉銘傳諸軍自無錫進攻常州力戰數月破東北面賊營數十座殲擒援賊無算賊猶死守三年三月李鴻章抵常州督諸軍攻益急四月克之樹珊以先登功賞正一品封典十月授廣西右江鎮總兵四年正月統兵駐江蘇鎮江府三月擒首任柱賴汝洸等竄運河東岸擾及海州贛榆漕運總督吳棠奏調

樹珊赴淮徐剿捻適大學士曾國藩奉命督辦剿捻事宜駐徐州以樹珊所部爲親軍九月擒匪竄山東曹濟樹珊往援敗賊於魚臺先是曾國藩奏請於臨淮徐州濟寧周家口設四鎮賊來則戰去則守爲以逸待勞計河南陳州之周家口尤扼要以劉銘傳駐守是年冬諭曾國藩追賊乃以銘傳爲遊擊之師而檄樹珊移駐周家口五年三月擊賊於沙河賊竄撲周家口樹珊回軍夾擊敗之五月敗賊於沙河之東八月以賊騎靡定株守待賊終年不一遇堅請率軍追賊曾國藩乃移駐周家口而以樹珊爲遊擊之師九月至鄆陵聞賊圍許州急兼程前進遂解許圍十月任柱賴汝洸合竄山東境樹珊敗之豐縣南又敗之定陶曹縣十一月回軍周家口時曾國藩回兩江總督任命李鴻章爲欽差大臣督辦剿捻事宜檄樹珊追賊於汝寧賊竄湖北樹珊遂與總兵周盛波入湖北追剿十二月提督郭松林敗績於白口賊燄復張樹珊自黃岡追至棗陽賊又竄擾黃州德安湖北巡撫曾國荃方駐軍德安急檄樹珊往援時援鄂之師踵至皆言賊悍且衆不可輕發樹珊斥之卽率所部疾進至德安擊賊於楊家河東岸任柱敗遁樹珊誓欲擒之率親軍二百人窮追深入至新家牖賊橫走鈔官軍後樹珊力戰陷陣至夜半

馬立積屍中不能行下馬鬪死是夜大霧後隊之被賊衝斷者分據各村各以槍礮拒賊賊退一軍猶全六年正月李鴻章疏陳樹珊自咸豐四年隨臣在皖帶勇血性忠篤治軍精強隨征江南歷克名郡轉戰東豫各省屢獲大捷臨陣勇敢馭下有恩有古名將風詎以倉猝遇賊與周盛波隔河並戰互救不及軍未敗而身亡慟悼曷已請飭部從優議卹奏入諭曰張樹珊忠勇過人疊克名城所向有功此次率兵赴援湖北誓滅此賊以致被賊圍困力竭陣亡曷勝惋惜著照提督陣亡例從優議卹並加恩予諡其廬州本籍及立功地方均著建立專祠所有隨同陣亡之副將劉登朝郭有容都司馬壽文同知銜升用知縣李輝麟都司銜守備黃瀚均著照原銜從優議卹並准其附祀張樹珊專祠以慰忠魂二月曾國藩疏稱張樹珊少負奇氣讀書務通大義因感世變兼習騎射自咸豐四五年閒在籍辦團八年於合肥倡築堡寨羣賊更番來攻悉被創去時髮捻方張苗捻繼煽皖北無尺寸安靜地獨合肥西鄉不充僞官保全無恙樹珊爲之倡也平時帶練助剿解圍克城常爲軍鋒有未盡入奏者同治元年以都司從李鴻章馳赴上海平定三吳進攻福山之役尤人所難時航海之師甫抵岸未及成營而賊衆掩至全

軍被圍樹珊倚坡結陣大呼直下擣賊中堅拔出被圍諸軍身受數傷既克回營解衣就臥袖中乾血片片墜地當苦戰時負痛不自知也四年隨臣北征五年分防周家口紀律嚴明商民感戴逮聞殉難之信紛紛請於周家口爲樹珊建立專祠以酬遺愛奏入允之尋賜卹如例予諡勇烈賞騎都尉兼一雲騎尉世職襲次完時以恩騎尉世襲罔替七年七月捻逆蕩平上追念前勲賜祭一壇八月李鴻章疏言樹珊所部諸軍分歸劉銘傳及其弟樹屏統帶隨同滅捻大功告成籲請敕賜宮銜得旨加贈太子少保銜光緒元年四月安徽巡撫裕祿奏言樹珊忠勇過人轉戰數省疊克名城所向有功本省專祠業經落成懇恩列入祀典由地方官春秋致祭以昭忠藎十一月河南巡撫劉齊銜復以樹珊曾於同治年間帶兵駐紮周家口一帶紀律嚴明疊擊賊氛市井安堵衆情感戴該處建立專祠一律工竣請列入祀典先後均如所請行十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇樹珊與焉子雲達浙江候補道襲世職

李臣典

李臣典湖南邵陽人咸豐六年粵匪擾江西臣典由鄉勇隨優貢曾國荃在江西

萍鄉進兵克安福至固江連戰皆捷遂攻吉安七年隨復吉水峽江等縣並於太和萬安新喻臨江疊次助剿時逆首石達開勢甚猖獗疊擾贛江兩岸衆逾十萬臣典力戰卻之吉安踞匪常挑戰數犯營壘而曾國荃統兵不滿三千賴臣典奮勇賊鋒稍挫八年六月軍於吉安南門外鏖戰多時適曾國荃左腕受傷賊愈集臣典擊走之八月吉安克復追賊至永豐新淦殲斃尤多十月移師駐撫州旋駐建昌九年進剿景德鎮克之遂復浮梁追剿至安徽婺源始還十年正月逆首陳玉成圍攻小池驛勢張甚臣典繞出賊後毀其壘官軍乘之遂獲大勝三月隨曾國荃進剿安慶師次集賢關五月戰於菱湖曾國荃右股中礮傷墜馬臣典翼而出之八月圍安慶十二月陳玉成犯樅陽關臣典等率三營赴援克之遂以舟師塞樅陽河口十一年三月陳玉成等率悍黨十餘萬攻圍前後濠城臣典與諸將且戰且守賊不得逞七月陳玉成等復率衆二十餘萬分三路來援安慶臣典等偵知其死黨併集中路率精銳直擣之斃賊萬餘八月克安慶臣典執旗先登衆皆推爲首功初臣典節經欽差大臣兩江總督曾國藩保奏以遊擊用至是奏捷得旨以參將留於兩江補用並賞給堅勇巴圖魯名號九月曾國荃回楚募勇以

臣典留守安徽省城同治元年二月賊疊陷巢縣等處三月臣典隨曾國荃率兵由林臺渡江以偪巢縣連戰皆克先後收復巢縣含山和州各城經曾國藩保奏請以副將儘先推補官軍自克和州後連復西梁山裕溪口各要隘遂渡江攻克太平府並金柱關東梁山菱湖各處追賊至臧家灣薛鎮又敗之是月進規江寧取丹陽鎮奪秣陵關並埽平六郎橋江寧鎮三汊河大勝關各賊寨五月擢總兵直偪雨花臺匪首洪秀全調蘇杭等處踞賊來援屢敗之六月李秀成等援賊大至衆號六十萬並齎西洋炸礮周濠數十里閒晝夜轟擊時曾國荃頗受重傷官軍多病疫賊氛熾甚密掘地置礮其中圖轟官軍營壘九月礮發李秀成等酋督賊十餘萬分路來攻臣典等率銳卒死戰殲斃無算賊衆始退又屢乘夜潛斫賊營先後毀其壘百餘座十一月賞加提督銜二年四月會副將趙三元攻賊雨花臺僞城拔之五月命記名以提督用七月攻賊於印子山大戰於趙家窪教場斃賊萬計嗣是連克高橋門尙方門方山土山七甕橋孝陵衛解溪龍湖各賊壘復秣陵關十月授河南歸德鎮總兵三年正月隨曾國荃攻克天堡城三月大軍合圍江寧曾國荃飭臣典穴地三十餘處爲潛攻計謀旋洩五月克地堡城占取龍

臆子山臣典偵知城賊米麥足支數月而官軍五萬餘曠日持久恐兵氣懈因率總兵吳宗國等從賊礮極密處復開地道功垂成臣典正在洞口李秀成突出數百人直犯地道大壘別有數百賊僞爲官軍號衣持火器延燒各礮壘官軍幾瀕於危臣典腰受大礮子傷猶能獨扼左路殲斃無算賊不敢偪翼日曾國荃調集四路隊伍從龍臆子山一帶自黎明攻至日中臣典將所開地道封築門口安放引綫率營官各具捨死報國軍令狀訖遂傳令發火頃刻揭開城垣二十餘丈臣典身先士卒直衝倒口而入旣入城與劉連捷等扼太平門殺賊極多遂克江寧奏入上嘉獎賜一等子爵並賞穿黃馬褂戴雙眼花翎七月創增劇昇回雨花臺營次旋卒經曾國藩奏請優卹諭曰一等子爵記名提督河南歸德鎮總兵李臣典隨同浙江巡撫曾國荃轉戰多年戰功卓著屢挫逆首石達開於江西克復吉安繼敗悍賊陳玉成於皖省力拔安慶前後數十戰無不奮勇當先以功洊擢總兵記名提督復隨曾國荃攻剿江寧於官軍攻破雨花臺秣陵關諸要隘疊著奇績本年三月以後江寧合圍賊猶負隅抗拒李臣典設計掘地潛攻身董其役前一日腰受礮傷次日猶復力疾督攻用能轟塌堅城殲除巨寇朝廷論功行賞賜

以一等子爵並賞穿黃馬褂賞戴雙眼花翎方冀寵眷長承深資倚畀乃因受傷過重遽行溘逝眷念盡勞實堪悼惜李臣典著照提督陣亡例從優議卹任內一切處分悉予開復並加恩予諡准於吉安安徽江寧等處建立專祠俟繼嗣有人交部帶領引見歷次戰績卽著宣付史館用示軫念勳臣至意尋賜卹如例予諡忠壯贈太子少保銜賞騎都尉兼一雲騎尉世職襲次完時以恩騎尉世襲罔替五年五月御史朱鎮奏請於江寧建立忠義祠以臣典附祀允之光緒十五年慈禧端佑康頤昭豫莊誠皇太后歸政憫念亮節孤忠諸臣各賜祭一壇臣典與焉嗣子長祿襲

唐殿魁

唐殿魁安徽合肥人咸豐十年以鄉勇奉安徽巡撫翁同書檄率鄉團援壽州力解城圍敍功以把總儘先拔補十一年隨攻六安解圍以千總陞用十月隨攻克合肥縣之三河汛時粵匪連陷江蘇蘇州常州等府松江太倉所屬各縣多失守同治元年正月殿魁隨江蘇巡撫李鴻章渡江進剿紮營上海尋隨提督劉銘傳攻克南匯川沙奉賢金山衛經欽差大臣兩江總督曾國藩保奏以守備儘先補

用並賞戴藍翎閏八月李鴻章以克復南匯等城殿魁尤爲出力保奏以都司儘先補用並賞換花翎二年五月隨攻克江陰之楊舍汛城以遊擊儘先補用並賞振勇巴圖魯名號八月隨攻克江陰縣城以參將儘先補用並賞加副將銜旋因攻克無錫得旨交軍機處記名遇有總兵缺出請旨簡放十一月隨劉銘傳力攻常州劉銘傳時受傷未愈乃檄殿魁偕副將黃桂蘭督兵前往甫至奔牛鎮而常州丹陽賊大至圍殿魁所守石營臨河壁壘皆爲賊毀殿魁堅守二十餘日糧餉火藥皆盡劉銘傳裹創往救殿魁從內夾攻苦戰數日圍始解事聞賞提督銜三年隨李鴻章攻克常州府生擒首逆陳坤書命以提督記名簡放四年擒首賴汝洸占踞張寨殿魁督豫皖各軍攻拔賊壘旋隨劉銘傳渡淮剿捻時烽煙四起士卒皆畏勞苦殿魁日誡其所部曰我輩以布衣受國厚恩一營之費月糜餉數千金當思出力圖報死且不懼豈憚勞耶由是人皆感奮軍威大振五年二月授浙江衢州鎮總兵以曾國藩檄赴湖北克黃陂得旨遇有提督缺出儘先簡放四月擒匪自山東回竄劉銘傳先督兵追至烏官屯殿魁統軍繼進殺賊五百人餘皆奔潰六年正月調廣西右江鎮總兵時擒匪麇聚湖北天門之尹隆河劉銘傳督

率全部進剿副將李錫增深入賊中力戰陣亡殿魁率總兵由履安馳援衝突重圍殺賊無算衆寡不敵遂與履安等同沒於陣事聞諭曰唐殿魁治軍嚴整每戰必先此次力竭捐軀深堪痛惜著照提督陣亡例從優賜卹尋賜卹如例贈太子少保銜賞騎都尉兼一雲騎尉世職襲次完時以恩騎尉世襲罔替七年三月李鴻章奏殿魁忠烈性成自辦鄉團歷著成效及隨臣帶勇赴滬屢克名城臣察其才堪大用爲添募三千人令隨劉銘傳渡淮剿捻馳逐數省身經百戰耐窮忍飢志不稍懈平日耿耿以滅賊爲念諄諄以練兵愛民爲事所到之處軍威整肅與情愛戴自尹隆河陣歿後失此良將銘軍幾不復振其弟唐定魁忠勤勇敢素嫻紀律臣令接統唐殿魁舊部上年贛榆壽春之捷該軍殺賊最多任賴等逆全股就殲固由將士用命亦係唐殿魁平時恩誼所感皆願出死力以償其未竟之志其忠義正直軍士每追念之無不流涕東捻見已肅清該故提督積功最多死事最苦可否懇恩予諡並於江蘇等省及原籍建立專祠其戰功及死事情形並請宣付史館疏入諭曰前記名提督廣西右江鎮總兵唐殿魁在湖北尹隆河剿賊陣亡業經降旨優卹茲據奏稱唐殿魁自咸豐年間倡辦鄉團南禦粵匪北擊苗

匪所向有功同治元年隨李鴻章帶勇赴江蘇剿賊疊復奉賢南匯川沙柘林常熟江陰無錫各城復血戰攻克常州府城又隨同劉銘傳在山東河南安徽湖北剿辦捻匪無戰不捷實爲淮軍諸將之冠唐殿魁著加恩予謚將該故提督戰功及死事情狀宣付史館立傳並准在江蘇湖北及安徽該故員原籍地方建立專祠以彰忠藎而作士氣尋予謚忠壯

石清吉

石清吉直隸沙河人道光二十一年武進士以藍翎侍衛用咸豐元年授湖北鄖陽鎮守備二年粵逆竄擾湖北巡撫常大淳檄清吉防通城三年賊由武昌東竄時黃陂縣金鼓山會匪及崇陽土匪陳江斗亦乘勢焚掠清吉先後隨軍剿平之四年正月粵逆竄擾上巴河總督吳文鎔檄都司周祿偕清吉冒雪馳擊疊敗之六月進剿應城縣屬阜市踞匪賞戴花翎時京山土匪勾結粵逆陷安陸府七月大軍分道進攻清吉帶兵潛伏東門外策應諸軍立復其城得旨以都司卽補八月都司劉富成追賊於京山佛祖山與清吉馳入賊巢陣斬悍賊三百名大破之逸賊由馬溪河竄至孝感之四汊河清吉會各軍馳剿燒賊船數十艘奪器械無

算殲賊七百餘人生擒七十人五年正月賊由江北上竄圍撲省城清吉從按察使胡林翼回援武昌自上游渡至沌口分攻漢陽諸賊賊捲甲入城不敢出七月漢陽踞賊分竄檀樹坳等處清吉帶兵由蔡店赴援疊有擒斬八月調赴德安府城紮營八角廟賊來攻營清吉與參將顏朝斌等奮擊卻之十月克德安府城餘賊竄麥旺菁清吉由天門馳赴仙桃鎮迎剿斬馘甚多尋移襄河南紮營賊鼓譟來撲戰三晝夜而賊去十一月與顏朝斌等進攻漢陽左腰中礮六年正月移營沌口前後數十戰皆奮勇尋補道士汛營都司十一月督馬隊攻漢陽追賊至黃州復其城十二月敗賊於蘄州曹家河連復黃梅廣濟七年正月擊賊於小池口受礮傷落二齒旋敘功以遊擊儘先補用四月移駐黃梅賊率衆來攻力戰卻之六月會剿童子箴賊匪毀其壘尋擢宜昌鎮標水師後營遊擊復以黃梅蘄州毀平賊壘功得旨以參將儘先補用七月賞加副將銜九月檄赴安徽宿松車谷嶺剿賊進攻太湖天仙坳賊巢平之八年四月敗賊於涼亭河八月進軍太湖南門殲賊三千立克縣城九月毀平安慶城外集賢關賊壘數十十一月擊賊於花涼亭鄧家店殲賊數千奪器械無算九年五月補湖北撫標中軍參將七月以攻克

太湖等城功得旨以副將儘先補用十二月擊賊於潛山地靈港毀賊壘二十餘
十年七月進剿桐城縣踞匪毀西門外賊壘二十月擊賊於棋盤嶺平其壘四十
一年正月以會剿援賊功賞加總兵銜三月援賊攻官軍挂車河老營清吉督勇
迎敵殲賊七百人四月剿賊於江家橋麻子嶺平賊壘八五月得旨以總兵記名
簡放八月進攻桐城首先拔去木城麾衆豎雲梯登城立克之敘功賞幹勇巴圖
魯名號同治元年二月進攻廬州府城偪西門爲營連戰皆捷旋復其城欽差大
臣湖廣總督官文等上其功賞加提督銜五月官文及兩江總督曾國藩檄令清
吉統領飛虎等營駐防廬郡二年苗沛霖叛廬州交界土匪崔光贊等煽亂清吉
督勇往剿毀其圩尋擒逆張總愚等竄擾湖北清吉赴孝感小河溪防堵三年四
月擊賊於雲夢縣義堂胡金店斬殺甚多救出難民三千餘人五月擊賊於黃岡
新洲斃匪八百擒長髮賊藍才元等七月攻白杲賊克之九月賊撲關口馬隊營
盤清吉馳馬往援力解其圍賊復糾合髮捻圍之於山山清吉督勇鏖戰手刃數
賊力竭陣亡事聞諭曰提督銜記名總兵湖北提標中軍參將石清吉忠樸勇敢
自咸豐五年帶兵以來在湖北安徽等省疊克名城臨陣奮勇爭先戰功歷著此

次因髮捻竄擾斬水該總兵赴援關口地方奮不顧身衝鋒陷陣身受重傷猶復手刃悍賊多名關口重圍立解該總兵竟以力竭陣亡洵堪憫惻石清吉著交部照提督陣亡例議卹入祀昭忠祠並准於原籍直隸沙河縣及安徽廬州府城湖北德安黃州府城並斬水縣各地方建立專祠以慰忠魂尋賜卹如例予諡威毅賞騎都尉兼一雲騎尉世職襲次完時以恩騎尉世襲罔替嗣以安徽潛山縣及安慶省城西安將軍多隆阿等專祠先後落成巡撫盧士杰等請以清吉附祀均允之子成之同知銜安徽試用知縣兼襲職

余際昌

余際昌湖北穀城人由行伍拔補提標右營外委咸豐元年粵匪竄擾永安州際昌以隨剿受傷陞提標前營把總二年隨攻西礮臺疊次出力賞戴藍翎尋陞左營千總三年隨征湖北武昌踞匪四年擊賊於應山縣之八里坑勝之賞給五品頂戴並換花翎五年正月奉檄赴襄陽襄辦營務處事宜九月官軍攻德安北門際昌身先士卒駭受礮傷旋委署本營守備六年襄陽土匪滋事撲郡城際昌疊次擊退之七年二月補右營守備陞署撫標右營遊擊閏五月以屢次攻剿出力

命以都司儘先陞用先換頂戴八月隨湖北巡撫胡林翼在黃州巴河黃梅廣濟一帶剿賊疊勝八年正月皖匪由太湖竄擾蘄州際昌督隊防皖楚交界之南陽河一帶毀賊壘三十有奇生擒賊目倚天侯並僞官多名賊敗入英山督軍乘勝圍攻復其城大學士湖廣總督官文上其功請免補都司以遊擊儘先補用並加參將銜允之五月賊復由潛山太湖糾集安慶股匪上犯彌陀寺一帶際昌督隊迎擊破之六月命免補遊擊以參將儘先補用並賞加副將銜十年正月由潛山開道繞擊王家牌樓踞賊毀其壘賊潰遂復太湖乘勝夜攻潛山克之命免補參將以副將儘先推補仍留湖北補用十月署督標中軍副將十一月以收復霍山並會剿懷桐功賞加總兵銜十一年三月賊竄黃州際昌以防堵霍山各卡不能堅守致賊竄越命革職留營以觀後效四月檄帶原部親兵防堵省垣八月克黃州九月派辦襄陽防剿事務十二月以所募昌勝中左右前後五營赴河南同治元年委赴屯陳留時大股亳捻麇集杞縣與官軍相持際昌攻圍直入欽差大臣科爾沁博多勒噶台親王僧格林沁諭其勇敢飭帶所部乘勝攻取焦趙二寨均破之奏聞開復原官賞還花翎仍賞給偉勇巴圖魯名號十月進攻汝寧巨捻遂

圍平輿生擒逆首陳汝等經巡撫鄭元善保奏得旨交軍機處記名遇有總兵缺出請旨簡放十二月充右翼長會各軍進剿正陽各逆寨生擒逆首張鳳林二年正月剿匪至湖北麻城一帶命補授河南河北鎮總兵四月復督隊剿賊至方家寨遇賊伏因衆寡不敵身受重傷三十餘處力竭死之事聞諭曰總兵余際昌久歷戎行素稱勇敢自剿匪以來克復平輿等寨戰功疊著實爲軍營不可多得之員茲以追賊遇伏力竭陣亡殊深悼惜河北鎮總兵余際昌著照提督例從優賜卹入祀本籍昭忠祠准其於本籍及死事地方建立專祠並給予該故員曾祖父母祖父母父母一品封典尋賜卹如例予諡威毅贈提督銜賞騎都尉兼一雲騎尉世職襲次完時以恩騎尉世襲罔替孫晉藩襲

譚國泰

譚國泰湖南湘鄉人咸豐五年投效湘副後營得五品軍功七年隨剿粵匪於江西克瑞州並擊退峽江之陰岡嶺援賊八年隨同攻克吉安命以千總補用並賞戴藍翎十年調赴安徽以擊退小池驛援賊及克復太湖潛山等城在事出力得旨以守備歸湖南撫標拔補十一年五月隨同官軍蕩平菱湖兩岸賊壘八月復

隨同攻入安慶省城擒斬悍賊湖廣總督官文上其功命以都司補用並加遊擊銜賞換花翎會逆匪攻陷池州銅陵等城國泰隨同各軍先後復之同治元年三月隨克巢縣含山各城及銅城牯等處要隘敍功以遊擊補用並加參將銜四月隨浙江巡撫曾國荃克太平蕪湖等城並收復金柱關等隘口命以參將補用並加副將銜時巢縣賊踞東關銅城牯官軍水陸並剿國泰親帶勇士數十人毀柵越濠架梯先登賊飛礮雨下不少卻官軍繼之立克東關嗣隨曾國荃攻江寧賊數十萬踞雨花臺國泰合諸軍戰守月餘竟破之得旨以副將仍留兩江補用並賞揆勇巴圖魯名號二年以豐克城隘命以總兵記名遇缺簡放三年隨曾國荃克復江寧外城並攻奪天堡僞城旋偕提督朱南桂等擊賊於獅子山進攻儀鳳門克之命交軍機處記名無論提督總兵缺出儘先題奏並賞給正一品封典嗣赴防江西四年撤伍回湘七年以左骹礮傷陡發卒曾國藩以國泰從征八九年奮勇爭先受傷數處歸里後因傷身故奏請照提督軍營立功後病故例從優議卹尤之尋賜卹如例廕一子六品頂戴

左宗棠

左宗棠湖南湘陰人道光十二年舉人咸豐二年粵匪竄湖南犯長沙先後佐巡撫張亮基駱秉章戎幕洊保同知直隸州知州五年御史宗稷辰奏稱宗棠通權達變疆吏倚重之迹甚微而功甚偉若使獨當一面必不下於胡林翼諸人詔湖南巡撫送部引見六年侍郎曾國藩敍宗棠濟餉功請以郎中分兵部行走並賞戴花翎允之八年駱秉章疏保宗棠運籌得力加四品卿銜湖北巡撫胡林翼亦兩疏薦之十年三月少詹事潘祖蔭復疏薦宗棠謂國家不可一日無湖南湖南不可一日無宗棠疏下曾國藩尋復奏宗棠剛明耐苦曉暢兵機請破格簡用四月詔以四品京堂候補隨國藩襄辦軍務尋粵逆石達開竄四川詔宗棠援蜀曾國藩疏言蜀省形勢險固藍李初起之賊不難辦理江皖軍情緊急宗棠思力精專識量閎遠於軍事確有心得可獨當一面若改令西行則臣頓少一枝勁旅以吳蜀事論之難易輕重不待智者而決宗棠必舍難就易避重就輕請仍敕督勇來皖從之九月宗棠率湘軍五千援江西次景德鎮十月廣東賊竄樂平貴溪宗棠迎戰大捷克德興婺源詔嘉宗棠以新立之軍驟當巨寇十日之內連克二城命以三品京堂候補十一月逆酋黃汝金偪景德鎮宗棠破走之復浮梁賊竄石

門洋鄱建之交也十一年正月會總兵鮑超軍復破走之又敗之黃麥鋪二月逆酋李世賢陷婺源窺樂平宗棠豐收之四月進軍鄱陽而以總兵陳大富守景德鎮鎮復陷賊宗棠回援六戰皆捷世賢遁賞珍物並允國藩之請改幫辦軍務五月授太常寺卿先是宗棠追李世賢竄入浙詔統所部援浙而池州逆酋劉官方再陷建德竄鄱陽祝由街宗棠冒雨馳返景德鎮賊宵遁擊之桃樹鎮復擊之綱樹嶺賊走建德追及三里街再破之復建德六月移軍婺源曾國藩以景德婺源當皖浙之衝鮑超北渡後南岸七百餘里僅宗棠一軍縱橫策應請俟安慶既復再謀援浙允之是月宗棠復破逆酋賴新裕於新建追及白沙關賊走浙浙戒嚴十一月詔宗棠兼程赴浙督辦軍務提鎮以下均歸調遣未幾杭州陷十二月授浙江巡撫時逆酋楊輔清犯徽州宗棠以徽州皖南江西大局所關且爲官軍入浙後路檄知州劉典統九營趨婺源相機迎剿又以金嚴紹寧台五府相繼陷奏言江西入浙之道徧地賊氛非節節攻剿不能深入節節攻剿又恐曠日持久餉竭兵疲先已自困非乘虛蹈瑕誘賊野戰不可以東南大局言之湖北江西一律肅清皖北逆氛漸熄羣賊悉萃江浙如統兵諸臣聲勢聯絡能力保完善之區以

規進取則江西湖北安徽數省生民稍得蘇息錢漕釐稅徵收日廣從此漸偪漸近可作士氣而埽賊氛利戎機而速戡定以浙江見在局勢言之皖南守徽池以攻寧郡廣德浙江守衢州以規嚴州閩軍嚴遏其由浙竄閩以繞犯江西之路然後餉道疏通米糧軍火接濟無誤諸路互相知照一意進剿得尺則尺雖程功迂緩實效可期浙江軍務之壞由歷任督撫始則竭本省之餉濟金陵皖南各軍圖藉其力以爲藩蔽而於練兵選將漫不經心自金陵皖南大局敗壞又復廣收潰卒糜以重餉冀其復振卒之兵增餉紕軍令不行遂渙散決裂而不可復支矣今非就見存兵力嚴爲挑汰束以營制不可非申明賞罰予以實餉不可非另行調募豫爲換補不可然欠餉日久有不能汰遣之患餉需不繼有不能調撥之患經費不敷有不能募補之患名爲節制提鎮實則營官哨長亦且呼應不靈不得其指臂之助而徒受其迫促之擾應請敕部臣行令各省應協浙江之款閩省及各省奉旨撥解援浙軍餉速卽徑解廣信交臣後路糧臺以應急需刻下浙省僅存衢州一城衢州地勢爲江西福建樞紐浙省水路通途宜創立水師爲陸軍助又言孤軍轉戰將少兵單局勢益危人材日乏請敕廣西臬司蔣益澧率所部來助

廣西巡撫劉長佑貴州巡撫江忠義湖北巡撫李續宜四川布政使劉蓉各精選一營兩營來聽調遣上皆從之時賊之竄徽州者自遂安踰嶺蔓延徽衢兩屬逆酋鍾明佳等衆十餘萬偪婺源意在深入江皖腹地阻援浙之師宗棠以婺源地勢居徽州廣信兩郡之中北可掣圖犯徽州之賊南可遏分竄饒州廣信之賊中可截浙江開化遂安之賊地勢在所必爭而官軍僅五千人不敷防剿檄道員王開來趨德婺交界之白沙關自率所部赴婺督剿同治元年正月毀開化張村馬金等處賊巢詔促宗棠自衢規浙宗棠奏言賊偪堅城必取遠勢包圍臣若先入衢城墮賊詭謀將至自困今由婺入浙先剿開化之賊清徽郡後路又飭老湘營由白沙溝進扼華埠保廣信以固衢城二月克遂安三月復奏言浙省大局披離進兵之路最宜詳審自衢州深入則餉道中梗自金華進攻則嚴州之賊由壽昌一帶潛出包鈔今唯緣徽郡道嚴州較爲穩妥有旨褒勉並誡宗棠勿蹈輕進之失時李世賢圍衢州急總兵李定泰嬰城守宗棠抵常山攻招賢關克之衢城糧路以通世賢犯峽口宗棠檄劉典等軍會擊破之石門花園港毀賊壘七賊潰遁衢南石竇街蓮花洋塘一帶楊輔清復犯遂安檄劉典軍由馬金趨昏口自率所

部趨開化輔清遁世賢復犯衢六月宗棠督諸軍自北路援衢破之蓮花洋塘毀賊壘數十餘賊悉遁宗棠奏言浙江賊數雖多皆聽李逆一人指嗾該逆倚金華爲老巢嚴處爲掎角於龍游壽昌蘭谿湯溪等縣分佈賊黨是其趨重金華自應先攻龍壽蘭湯等城撤其藩籬然後分軍嚴處以蹙之上嘉其隨機決策甚合機宜是月世賢率衆數萬兩路攻遂安七月進規龍游閏八月復壽昌十一月檄軍援皖南復祁門績溪旋克嚴州府二年正月復湯溪龍游蘭溪進克金華府旋復武義永康東陽義烏浦江諸暨桐廬諸城仍分軍防皖南二月進攻富陽以規杭州三月授閩浙總督仍兼署浙江巡撫檄軍擊徽祁賊復黟縣四月敗富陽新城援賊水師抵杭州八月復富陽陸師亦抵杭州檄蔣益澧攻之復分軍圍餘杭三年正月復海寧桐鄉二月會江蘇軍克嘉興府旋克杭州省城及餘杭捷聞詔加太子少保銜賞穿黃馬褂三月宗棠進駐省城設賑撫局收難民招舊商勘應修濬工程旋復武康德清石門六月復孝豐七月克湖州府八月全浙肅清檄所部諸軍出境擊江皖竄賊九月諭曰左宗棠自人浙以來克復城隘郡縣數十處肅清全浙厥功甚偉本欲卽加懋賞恐該督以洪幼逆未滅必將固辭一俟餘逆淨

盡卽降恩旨浙江軍務已竣地方應辦善後事宜該督當督飭司道次第辦理時宗棠奏減杭湖嘉三府額賦三之一及紹興寧波兩府浮收之數並免徵被兵各郡縣同治二年漕糧停設杭州北新關又以商鹽疲滯請試行票運條上四事皆如所請行十月諭曰閩浙總督兼署浙江巡撫左宗棠督師入浙恢復浙東各郡進規浙西攻克杭州省城及湖州各州縣肅清全浙並派兵截剿皖南竄賊盪平巨寇卓著勳猷茲當洪福瑱幼逆就擒殲除餘孽東南軍務漸次底定自應渥加懋賞左宗棠著加恩錫封伯爵宗棠疏辭優詔答之尋內閣擬進字樣欽定恪靖時江寧餘賊竄閩宗棠請解撫篆督軍授剿並陳浙江善後事宜得旨嘉賞十一月入閩十二月會粵軍復永定以閩省吏治軍政積習相沿奏調周開錫吳大廷等來閩差委從之四年正月復龍巖二月汀州連城平四月克漳州府及南靖平和漳浦雲霄閩五月復詔安全閩肅清宗棠駐漳州檄所部剿各州縣土匪又遣別將擊江西廣東邊界逸賊六月疏陳鹺務積弊請改行票運釐課並抽戶部議以四可慮難之宗棠逐條疏覆力主初議卒如所請八月閩軍復鎮平逆酋汪海洋等分竄江閩粵之交詔宗棠赴粵節制三省十月海洋陷廣東嘉應州宗棠奏

言髮逆僅一汪海洋而廣東患氣在惠潮嘉三郡海洋回竄土匪散勇多附之請假便宜俾無遺種十一月宗棠進駐大埔十二月督軍圍嘉應斃海洋於陣復州城餘賊悉平五年正月賞戴雙眼花翎五月奏請設立船廠試造輪船略云東南大利在水而不在陸自廣東福建而浙江江南山東直隸盛京以迄東北大海環其三面江河以外萬水朝宗欲固海防非輪船不可無事之時籌轉漕則千里猶在戶庭籌懋遷則百貨萃諸塵肆有事之時籌調發則百粵之旅可集三韓籌轉輸則七省之儲可通一水匪特巡洋緝盜有必設之防用兵出奇有必爭之道也況我國家建都於燕津沽實爲要鎮自海上用兵以來泰西各國火輪兵船直達天津藩籬竟成虛設星馳飄舉無足當之非急造輪船不爲功船廠之地臣以擇定福建羅星塔一帶地方開漕濬渠水清土實先購機器一具鉅細畢備覓雇西洋師匠與之俱來先以機器造機器積微成巨化一爲百機器既備成一具輪機卽成一船成一船卽練一船之兵比及五年成船稍多可以布置沿河各省遙衛津沽由此更添機器觸類旁通凡製造槍礮炸彈鑄鐵治水有益民生日用者均可次第爲之計五年內約費不過三百餘萬兩如辦理得人以後必多獲益得旨

試行八月調陝甘總督九月奏陳閩浙兵制請減兵加餉就餉練兵下部議行十月奏陳臺灣吏事兵事宜早綢繆略言臺灣設郡之始由內地各標營調兵更番戍守三載爲期用意深遠自班戍之制不行有冊無兵戰船無一存者自道標裁撤遇有剿捕事宜文員不得不借重武營一任其虛冒侵欺莫敢究詰吏事則官索陋規民奸械鬪宜復班兵舊章三年更戍仍設道標俾有憑藉申明鎮兵歸道察看之例互相維制移修船之費製船巡洋募練水兵永革鎮道以下陋規別籌辦公津貼生番有心內附宜弛墾荒之令齒於編氓上悉嘉納又奏薦丁憂在籍前江西巡撫沈葆楨接辦船廠事宜詔嘉宗棠於輪船船廠事在必行不以去閩閣置沈毅有爲能見其大尋奏報交卸西征請命前浙江按察使劉典幫辦陝甘軍務十一月請各省協餉由部議撥定實款並允之六年正月奏陳籌辦情形略言臣舊部得力將領除已授實缺外均署要缺鎮將若檄調隨征閩省空虛可慮故搆以同行者僅三千餘人劉典亦僅令選募舊部三千人初意南人用之西北本非所宜祇可多挑營官哨長之才入秦後再將陝甘見存兵勇分別汰留而勻撥膽技稍優弁勇充當親兵護哨編列成營以倡其勇敢之氣庶臣糧可資節省

陝甘飢軍漸有位置以地形論中原爲重關隴爲輕以平賊論剿捻宜急剿回宜緩以用兵次第論欲靖西陲先清腹地然後客軍無內顧之憂餉道免中梗之患謹一面採買口馬練習馬隊俟所調各軍取齊由襄樊出荆子關經商州赴陝沿途遇賊卽擊抵陝後增練馬隊設屯田總局相度秦隴要隘有水草可田牧者開設屯田汰陝西各營疲冗願留屯田者編入冊籍指地屯牧不願留者資遣然後軍制明而內訌可免屯事興而軍食漸裕甘省回多於漢蘭州省會形勢孑然孤立非駐重兵不能守駐重兵則由東分剿各路兵分見單不克挾全力與俱一氣掃蕩將來臣軍入甘應先分兩大枝由東路廓清各路分別剿撫俟大局戡定然後入駐省垣方合機局是故進兵陝西必先清關外之賊進兵甘肅必先清陝西之賊進駐蘭州必先清各路之賊然後餉路常通師行無梗至兵事利銳進止久速則非熟審彼己長短之形飢飽勞逸之勢隨機立斷不能未可臆度而遙決也臣於西北兵事未曾經歷所部均南方健卒捻回伎倆並無聞見若不慎之幾先加以迫切誠恐所事無成伏願皇上假臣便宜寬以歲月臣惟勉竭駑鈍次第規畫以要其成剿捻回均惟事機所在奏入上嘉其洞中窾要授爲欽差大臣督

辦陝甘軍務四月擊鄂擒任柱賴汝洸於隨州樊城與劉典軍兩道入關詔以擒逆張總愚一股屢爲陝軍痛剿逆焰已衰宗棠入關後務與提督劉松山等軍會合夾擊就地殄除時擒逆張總愚竄渭北屢爲官軍所敗宗棠慮其回竄鄂豫檄諸軍營渭上以扼之並檄山西按察使陳湜防河八月擒逆渡涇而東官軍蹙之十月擒逆入北山陷陝西延川綏德回逆同時披猖宗棠自請嚴議坐降二級留任十一月擒逆自宜川渡河而南宗棠督所部入晉請敕劉典暫行督辦陝省剿回事務並以調度無方坐革職留任十二月擒逆竄衛輝宗棠自翼城東趨入直檄劉松山等出賊北轉戰而南七年正月擒逆竄衡永定州坐降二級留任旋以劉松山軍追賊至保定宗棠亦抵獲鹿復得旨獎敘並敕直隸見到各軍均歸宗棠調度尋破賊獻縣深州束鹿博野深澤饒陽肅寧等處二月擒逆渡漳沱復破之封邱滑縣衛輝延津臨清四月擒逆回竄東光吳橋宗棠軍落賊後坐降三級留任閏四月以黃運兩河增漲與欽差大臣李鴻章會籌沿運築牆且防且剿賊不得遁七月蹙之徒駭河張總愚投水死擒逆平詔開復疊次降革處分旋賞太子太保銜照一等軍功議敘宗棠力辭上不許八月入覲賜紫禁城騎馬是日請

敕山西巡撫綏遠城將軍嚴密防河以免罅漏九月請敕戶部每年於洋稅釐金項下劃提陝甘軍餉四百萬兩戶部議行十月抵西安時陝省東北延榆綏所屬土匪游勇與甘回相附西南回匪踞寧州董志原爲老巢北接慶陽南連邠鳳東北達鄜延逆回白彥虎楊文治馬長順禹得彥崔偉馬正和陳林馬正剛馬生彥馮均福鄒阿渾余彥祿等十八頭目號十八營四出剽劫宗棠檄諸軍破之鄜州洛川中部隴州甘泉邠州汧陽宜君三水涇州清澗等處劉松山軍復破土匪十數萬於綏德靖邊降其魁董福祥李雙良張俊綏榆肅清八年二月董志原逆回傾巢出犯大敗之賊棄巢竄靈州慶涇肅清四月奏言宜乘時耕墾擇要興屯然後徐圖進取一軍駐董志原扼秦隴要隘一軍駐秦州通蘭州餉道一軍駐正寧寧州間爲進慶陽之謀一軍駐涇州爲通平固之漸皆主固秦規隴不敢造次上嘉其老成持重仍諭令乘勝進剿尋奏搜捕餘匪陝西肅清宗棠進駐涇州分四路出師北路以提督劉松山出定邊花馬池截寧靈中路一以道員魏光燾等出寧州趨環慶一以提督雷正綰等出華亭規平涼南路以中書吳士邁等出寶雞道秦州而檄提督馬德順等駐靈臺策應南北兩路並以甘餉窘迫請敕各省力

籌協濟遊員署府州縣辦理賑墾撫輯事宜請敕部勿拘成例均從之時陝回竄靈州者散布黑城子及預望同心各堡金積堡回酋馬化澂陽爲求撫仍資以糧米馬械嗾使抗拒官兵五月南路進剿河州竄回疊勝之賊遁歸巢蘭州運道通八月奏言陝甘逆回萃於寧夏所屬平羅靈州中衛一帶其東竄纏金之賊提督張曜擊之沙金托海磴口解阿拉善定遠之圍窮追至廣宗寺復進賀蘭山距寧夏不遠提督宋慶擊退鄂爾多斯及五勝扎薩等旗之賊都統金順行近磴口劉松山抵花馬池北路兵力已厚邊內外漸可肅清南路亦漸有肅清之望中路平涼府屬固原以北陝回畸零小戶赴營求撫者指荒絕地畝隨時安插鹽茶廳民張貴踞莊浪縣丞轄境威戎鎮水洛城等堡聚衆二十八營與鎮原匪首孫百萬句結爲平涼秦州一大患孫百萬就擒張貴謀變益急見派兵直擣賊巢並搜剿踞秦安神峪河另股回逆如能迅速蕆事再分兵剿寧靈河狄逆回甘肅大局可期復振是月道員黃鼎總兵簡敬臨平威戎堡水洛城賊巢張貴及其黨侯得應就擒宗棠檄中路軍掃蕩而北劉松山自花馬池抵靈州檄馬化澂諭甘回毋妄動遂剿陝回於郭家橋一帶毀其巢進據下橋陝回竄吳忠堡馬化澂嗾甘回撲

營索戰松山擊退之陝回大股來犯官軍疊勝馬化澂嗾靈州甘回襲踞州城以松山殺降激變籲總兵胡昌會稟署陝甘總督穆圖善穆圖善與綏遠城將軍定安以聞諭宗棠查明具奏宗棠奏言馬化澂陰賊險很天下共知自就撫後築塞修堡購馬造械與陝回相首尾西寧河狄各回民無不仰其鼻息靈寧一帶漢民幾無遺類失此不圖張駿元昊之患必見諸異日辦賊之法先剿後撫辦回則以撫爲先回所藉以爲亂端者漢與回有異視也非宣布朝廷德意分良匪不分漢回則賊有詞以脅其黨衆將剿不勝剿然一於主撫則必以撫愚我陰集黨衆蠶食漢民又將撫不可撫臣以爲非俟其畏剿之極誠心乞撫未可漫然允之見仍飭各軍前進一切剿撫機宜俟劉松山察酌奏入報聞先是馬化澂遣其黨嗾白彥虎楊文治等竄固原州阻官軍北行雷正綰黃鼎等破走之九月破黑城子李旺堡斃楊文治陝回西竄其預望城同心堡甘回乞撫宗棠遣員安置之劉松山復靈州十數戰皆捷毀無忠堡寨略盡金積堡賊勢愈蹙十月宗棠進駐平涼九年正月西竄陝回崔偉禹得彥等得句結河狄逆回竄禮縣寧遠北趨半角城黑城子等處中路南路諸軍逆擊大破之陳林等竄金積堡劉松山復擊走之馬正

剛竄陝西三水宗棠以未能先事豫防坐降三級留任是月劉松山中礮陣亡請以松山姪道員錦棠加三品卿銜統其軍回逆糧盡四竄二月總兵周紹濂敗之預望城斃馬正和三月陝軍擊竄回馬正剛斃之陝西復清六月南路軍復渭源狄道及牟佛諦堡七月中路軍奪陝口據秦溪馬連三渠之首合圍金積堡十一月克之馬化澁伏誅寧靈肅清捷聞詔開復降三級留任處分賞加一騎都尉世職十二月署寧夏將軍金順會張曜克王疇通貴納家牖諸回寨十年正月安插就撫陝回於華亭之化平川請增設化平川廳通判化平營都司各一員檄諸軍搜捕餘匪運三月糧規河州七月宗棠進駐靜寧肅州撫回復叛檄提督徐占彪軍十二營擊之八月河州軍奪康家巖十月渡洮克三甲集回巢十一年正月河州叛回復乞撫二月請改寧夏府水利同知爲寧靈廳撫民同知駐金積堡增寧武營參將一員五月復河州安置續撫陝回於平涼會寧靜寧隆德安定等處六月搜捕零匪淨盡甘南肅清七月宗棠進駐蘭州八月劉錦棠規西寧疊破白彥虎等十月克之十二年正月克向陽堡回巢二月復大通崔偉禹得彥等就撫安置平涼泰安清水等處前山西按察使陳湜復巴彥戎格西寧逆首馬桂源等伏

誅三月白彥虎竄肅州爲徐占彪所敗狂竄出關四月陳湜復循化撒拉叛回平
六月請陞固原州爲直隸州仍歸平慶涇道管轄增設州判一員駐碯河城並於
下馬關設知縣一員訓導典史各一員同心城設巡檢一員歸新設知縣管轄裁
平涼府鹽茶同知改設知縣一員增設訓導一員改原設照磨爲典史又於打拉
城池增設縣丞一員下馬關改設知縣名平遠鹽茶廳改設知縣名海城俱歸固
原直隸州管轄七月宗棠督軍馳剿肅州賊徐占彪軍亦自甘州轉戰抵肅破其
外城十月克之擒馬文祿等九逆磔於市關內肅清自是甘涼安肅一帶二千餘
里無回族聚處捷聞諭曰陝甘逆回擾亂十有餘年勢極披猖自簡任左宗棠總
督甘陝數年以來不辭艱苦次第剿除此次親臨前敵督飭將士克復堅城關內
一律肅清朕心實深嘉悅自應特沛殊恩用昭懋賞左宗棠著以陝甘總督協辦
大學士該大臣前賞給騎都尉世職著改爲一等輕車都尉世職並著督辦出關
一切事宜十二月奏言由肅州出嘉峪關而西本漢唐師行大道西安玉門敦煌
近遭白逆擾掠一空然使關內之糧足供裹帶車馱駝隻足供周轉出關之兵何
憚不進西安抵哈密計程十一站千里而遙經由戈壁無臺站無水草沙礫縱橫

人馬每多困躓中間僅安西城北四站馬蓮井支帳小憩以備汲飲未可久留過此七站抵哈密爲纏頭回族聚居之所軍興以來音耗闊絕近被白逆竄擾是否有糧採買更無從知臣前在肅與諸軍集議分起次第行走必先將甘涼採買糧料運存肅州又由肅州出關運至玉門然後頭起開拔至玉門又用其私駝轉搬玉門存糧赴安西騰出馱官官車轉運第二起軍糧而後第二起繼進餘軍仿照辦理比到安西州作一停頓又裹糧抵哈密如此層遞銜接人畜之力稍舒士氣常新可免意外之慮至由哈密前進糧運事宜斷非臣力所及自古至今未有運甘涼肅之糧濟哈密以西軍食者金順等至安西州搬齊糧料必面遣人赴哈密詢訪就近堪資採買者若干以定進止如有可設措不須轉搬安西存糧以節勞費張曜進哈密卽藉資其糧時距麥熟之期當亦不遠後此續進之軍相時而動自可不誤師期又奏甘涼肅素稱腴地自諸軍勘定河湟甘涼道路漸清農安耕穫幸獲中稔兩年採買集有成數通計甘涼肅三郡定買市斗軍糧十六萬三千餘石石重三百餘斤給銀四兩以供金張額三軍食用及運糧車馱駝隻算至明年六月新熟尙短糧料市斗二萬餘石擬括額徵本色及各標營季糧陸續填補

涼州至安西千四百餘里路多砂石運轉宜駝臣派弁出口採駝三千暫以官價雇用民車調集各營官贏先後起運通計糧百斤需銀十一兩七錢內外勞費如此若不籌撙節動言用衆恐官軍之餉運不繼精臺之儲侍早空不但後時不能保此不竭之源卽目前出關之師亦憂飢潰自古關塞用師在精不在多承平無事官私充足時尙不能用衆矧禍亂十年人物凋殘財用匱絕之日乎臣在肅時汰疲乏冗雜以求精資遺傷殘成廢弁丁以省累察張曜一軍銳氣方新作爲頭起金順次之額爾慶額又次之宋慶一軍整理需時俟明年秋後繼發並擬於所部整銳足恃諸軍內精選數營屆時慎擇統將率之同行如天之福甘涼安肅明歲豐稔西師飽騰再分起層遞而前如行衽席庶邊塞肅清可操全算上嘉納之十三年正月請甘肅省城添建貢院與陝西分闈鄉試並分設學政二月奏改甘肅茶務略言國家按引收課東南惟鹽西北惟茶鹽可改票茶何不可前擬仿淮鹽之例以票代引官商尙形裹足應改擬商販並招正課照定例徵收雜課並歸釐稅項下徵收商販領票先納正課並添設南櫃招徠湖茶其無票私茶設卡盤驗令補領官票均下部議如所請行七月授大學士仍留陝甘總督任八月授東

閣大學士十一月河州撫回閔殿臣復叛劉錦棠討平之光緒元年三月命以欽差大臣督辦新疆軍務六月宗棠奏陳籌畫情形略云北路歸化包頭至射臺大巴一帶十數站大巴至巴里坤十六站產糧之處甚多雇駝價亦平減北局設於歸化分局設於包頭已運四十餘萬斤至巴里坤每百斤合銀八兩內外寧夏採運雇駝數百由察罕廟試行俄國游歷官稱其國在山諾爾地方距古城不遠產糧甚多由俄代辦起運交送古城每百斤費銀七兩五錢比與訂定年內運交二百萬斤明夏運足三百萬斤南路肅州安西二局存糧趕緊灌運哈密報墾荒地萬九千餘畝獲糧數千石新糧市報漸減轉運亦較易由甘運肅運安西用車馱由安西運哈密運巴里坤用駝隻節設廠局濬水泉刈草薪以利運道派員經畫哈密巴里坤古城屯墾事宜西路旗綠諸營宜劃兵農爲二精壯者束以營制不任戰者散之爲農庶營伍實屯墾增哈密巴里坤古城所駐各大臣就見在存營覈定餉糧如缺額過多准照舊額馬步就地挑募丁壯補數但令保守城隘不必責以戰事上如所請行八月奏以劉錦棠總理行營事務十二月以出關餉竭請借洋款一千萬兩下戶部議行二年二月奏進止機宜略言巴里坤有數路可通

安西不由哈密飭徐占彪駐之張曜扼哈密防吐魯番東犯之賊庶後路可通糧運不匱烏魯木齊踞逆本地土回居多白彥虎帶陝甘逆回踞紅廟子古牧地瑪納斯等處皆與安集延回酋帕夏通自俄羅斯滅霍罕所部安集延獨免同治四年乘回部之變入踞喀什噶爾及各回城於是吐魯番闢展以西土回附之官軍出塞宜先剿北路烏魯木齊之賊而後加兵南路臣年六十有五豈思立功邊城覬望恩施顧事有萬不容已者乾隆中準部既克卽平回部於各城分設軍府然後九關靜謐者百數十年今雖時異世殊不必盡遵舊制而伊犁爲人所據喀什噶爾各城爲安集延所據事平後應如何布置尙費綢繆若此時卽置之不問恐後患環生不免有日蹙百里之患奏入上嘉其公忠體國力任其難所陳賊勢軍情瞭如指掌命隨時相機籌辦奠定西陲爲一勞永逸之舉三月宗棠進駐肅州劉錦棠率所部分道出塞期以閏五月會於古城六月與金順會師阜康克黃田古牧地賊巢乘勝收烏魯木齊迪化州昌吉呼圖壁及瑪納斯北城宗棠檄錦棠布置後路進規南路達坂城張曜道七克騰木徐占彪自木壘河搜捕而進會師闢展以規吐魯番由錦棠定師期九月克瑪納斯南城北路肅清三年三月徐占

彪會張曜軍復關展魯克沁哈拉和卓城會道員羅長祐軍復吐魯番滿漢城劉錦棠復達坂托克遜兩城四月逆酋帕夏阿古柏仰藥自斃子海古拉負屍西竄爲其兄伯克胡里所殺南路肅清宗棠以聞得旨關外軍情順利吐魯番等處收復後南八城門戶洞開自當乘勝底定回疆著該大臣統籌全局六月奏言立國有疆古今通義規模存乎建置而建置因乎形勢必合時通籌乃能權其輕重而建置始得其宜伊古以來中國邊患西北恆劇於東南以大海爲界形格勢禁尙易爲功西北則廣漠無垠專恃兵力爲強弱兵少固啟戎心兵多又耗國用以言防無天險可限戎馬之足以言戰無舟楫可省轉饋之煩非若東南險阻可憑集事較易也周秦至今惟漢唐爲得中策及其衰也舉邊要而捐之國勢以弱往代陳蹟可覆按矣顧祖禹之地理學最稱淹貫其論方輿形勢視列朝建都之地爲重輕我朝定鼎燕京蒙部環衛北方百數十年無烽燧之警不特前代所謂九邊皆成腹地卽由科布多烏里雅蘇台以達張家口亦皆分屯列戍斥堠遙通而後畿甸宴然蓋祖宗朝削平準部兼定回部開新疆立軍府之所貽是故重新疆者所以保蒙古保蒙古者所以衛京師西北臂指相聯形勢完整自無隙可乘若新

疆不固蒙古不安匪特甘陝山西各邊時虞侵軼防不勝防卽直北關山亦將無
晏眠之日而況今之與昔事勢攸殊俄人拓地日廣由西而東萬餘里與我北境
相連僅中段有蒙古爲之遮閔徙薪宜遠曲突宜先尤不可不豫爲綢繆也高宗
平定新疆拓地周二萬里一時帷幄諸臣不能無耗中事西之疑聖意堅定不搖
者推舊戍之瘠土置新定之腴區邊軍仍舊餉不外加疆宇日增鞏固可爲長久
計耳方今北路已復烏魯木齊全境祇伊犁尙未收回南路已復吐魯番全境祇
白彥虎率其餘黨偷息開都河西岸喀什噶爾尙有叛弁逃軍終須兵力此外各
城則去虎口如投慈母之懷自無更抗顏行者新秋採運足供餘糧棲畝鼓行而
西宣布朝廷威德且剿且撫無難挈舊有之疆宇還隸職方如安集延布魯特諸
部落則等諸邱索之外聽其翔泳故區可矣英人爲安集延說者慮俄之蠶食其
地於英有所不利俄人方爭土耳其與英相持我收復舊疆兵以義動設有意外
爭辯在我仗義執言亦決無所撓屈至新疆全境尙稱水草豐饒牲畜充牣者北
路除伊犁外奇台古城濟木薩至烏魯木齊昌吉綏遠等處回亂以來漢回死喪
流亡地皆荒蕪近惟奇台古城濟木薩商民散勇土著民人聚集開墾收穫甚饒

官軍高價收取足供省運餘如經理得人地方當有復元之望南路以吐魯番爲腴區八城惟喀喇沙爾所屬地多磽瘠餘雖廣衍不及北路而磽沃過之官軍已復烏魯木齊吐魯番雖有駐軍之所而所得餘地尙不及三分之一若全境收復經畫得宜軍食可就地採運餉需可就近取資不至如前此之拮据憂煩張皇靡措也竊以爲地不可棄兵不可停而餉事匱絕計非速復腴疆無從著手至省費節勞爲新疆畫久安長治之策紓朝廷西顧之憂則設行省改郡縣其事有不容已者奏入諭督飭將士戮力同心刻期進剿並揆時度勢將如何省費節勞爲新疆計久遠之規與擬改行省設郡縣一併通盤籌畫具奏七月劉錦棠自托克遜進兵九月復喀喇沙爾庫車等城十月復阿克蘇烏什等城十一月復葉爾羌和闐英吉沙爾喀什噶爾等城南路西四城回疆一律肅清四年二月捷聞諭曰左宗棠督辦新疆軍務剿撫兼施定議規北路首復烏魯木齊以扼其總要旋克瑪納斯數道並進恢復吐魯番等城力爭南路然後整隊西行勢如破竹見在南八城一律收復允宜特沛殊恩用酬勞勩左宗棠籌兵籌餉徧歷艱辛卒能謀出萬全膚功迅奏著加恩由一等伯晉爲二等侯尋有旨仍用恪靖字樣三月宗棠疏

辭至再上溫諭勉之十一月逃匿俄境陝回分道寇邊十二月阿克蘇纏回及安吉延逆酋阿里達什復同時謀入卡均剿捕如律五年三月安集延布魯特兩部復入寇劉錦棠破走之十月請以錦棠幫辦新疆軍務六年四月奏新疆善後事宜以修濬河渠建築城堡廣興屯墾清丈地畝釐正賦稅分設義塾更定貨幣數大端爲最要已次第興辦兼推行蠶桑之利上俞之又復陳新疆開設行省事宜略云新疆形勢所在北路則烏魯木齊南路則阿克蘇以其能控制全境地居天山南北之脊居高臨下足以有爲謹擬烏魯木齊爲新疆總督治所阿克蘇爲新疆巡撫治所彼此聲勢連絡互相表裏將軍旗營駐伊犁塔爾巴哈臺設爲都統並統旗綠各營疏入下部分別議行是月以俄人未交還伊犁宗棠督師屯哈密尋詔來京以通政使司通政使劉錦棠代之七年正月入覲命管理兵部事務在軍機大臣上行走並在總理各國事務衙門行走二月奏請教練旗兵興修畿輔水利下所司議行七月因病屢請開缺一再慰留之九月授兩江總督兼辦理通商事務大臣宗棠請回籍省墓並便道查閱長江水師十二月抵任八年三月議導淮入海四月請復淮鹽引地一以費絀一以川鄂兩總督奏格並不果行十

一月請開采銅山縣屬煤鐵覈減稅銀從之九年教匪王覺一等謀爲亂檄將弁擒其酋餘黨以平三月勘收六合朱家山句容赤山湖水利工程時法蘭西擾越南奏籌辦海防機宜並請飭前福建布政使王德榜募勇出關助剿又請緩開龍江西新濟墅各關均如所請十月以病請開缺賞假兩月十年正月以病尙未痊仍請開缺諭曰左宗棠宣力疆圻勞勩懋著朝廷深資倚任屢次陳請開缺均經賞假調理茲復疊據奏稱日疾增劇非靜心調攝斷難見效情辭懇摯不得不勉如所請左宗棠著准其開缺賞假四箇月回籍安心調理尋內閣學士周德潤奏勳臣不宜引退請旨責以大義令其在任調理有詔趕緊醫治一俟稍愈不必拘定日期卽行銷假四月銷假五月到京仍在軍機大臣上行走諭曰左宗棠卓著勳績年逾七旬著加恩毋庸常川入直遇有緊要事件豫備傳問並著管理神機營事務所有應派差使毋庸開列法蘭西擾福建臺灣七月命以欽差大臣督辦福建軍務十月慈禧端佑康頤昭豫莊誠皇太后五旬萬壽恩賞御書扁額並上方珍物是月宗棠抵福州法人方嚴海口之禁宗棠檄軍潛渡臺北擊之十一年三月和議興宗棠密奏要盟宜慎防兵難撤五月和議成以舊疾請開缺詔賞假

一月六月請設海防全政大臣並薦兵部侍郎曾紀澤又奏臺灣孤注大洋爲七省門戶關繫全局請將福建巡撫移駐臺灣以資鎮攝卒如所請行旋因病劇再請開缺諭准交卸差使不必拘定假期回籍安心調理並以宗棠吏治戎機久深閱歷如有所見仍隨時奏聞用備採擇七月卒遺疏入諭曰大學士左宗棠學問優長經濟閱遠秉性廉正洩事忠誠由舉人兵部郎中帶兵剿賊疊著戰功蒙文宗顯皇帝特達之知擢陞卿寺同治年間剿平髮逆回捻各匪懋建勳勞穆宗毅皇帝深資倚任畀以疆寄洊陟兼圻授爲欽差大臣督辦陝甘軍務運籌決勝克奏膚功簡任綸扉優加異數朕御極後特命督師出關肅清邊圉底定回疆厥功尤偉加恩由一等伯晉爲二等侯爵宣召來京管理兵部事務在軍機大臣上行走並在總理各國事務衙門行走竭誠贊畫悉協機宜旋任兩江總督盡心民事裨益地方敷歷中外恪矢公忠洵能始終如一上年命往福建督辦軍務勞瘁不辭前因患病籲懇開缺疊經賞假並准其交卸差使回籍安心調理方冀醫治就痊長承恩眷詎意未及就道遽爾溘逝披閱遺疏良深震悼左宗棠著追贈太傅照大學士例賜卹賞銀三千兩治喪由福建藩庫給發賜祭一壇派古尼音布前

往致祭加恩予謚文襄入祀京師昭忠祠賢良祠並於湖南原籍及立功省分建立專祠其生平政績事實宣付史館任內一切處分悉予開復應得卹典該衙門察例具奏靈柩回籍時著沿途地方官妥爲照料伊子主事左孝寬著賞給郎中附貢生孝勳著賞給主事均俟服闋後分部學習行走廩貢生孝同著賞給舉人准其一體會試其二等侯爵應以何人承襲著楊昌濬迅速查明具奏用示篤念盡臣至意尋聞浙總督楊昌濬甘肅新疆巡撫劉錦棠奏陳宗棠歷年勳績昌濬略云宗棠三試禮部不第遂絕意仕進究心經世之學伏處田里十餘年隱然具公輔之望前兩江總督陶澍前雲貴總督林則徐賀長齡交相推重湖南巡撫駱秉章延佐軍幕適朝命在籍侍郎故大學士曾國藩團練禦寇乃就商意見甚合遂各舉平素知名之士召練鄉勇激以忠義一時民氣奮興所向有功湖南之得爲上游根本湘楚軍之能殺賊者曾國藩主之左宗棠實力成之用兵善於審機堅忍耐勞洞燭先幾戊辰召見面奏西事以五年爲期人或以驕譏之及事定果如所言克一城復一郡卽簡守令以善其後用人因材器使不循資格爲政因時制宜不拘成例外嚴厲而內慈祥所至威惠並行甘省安插回衆十餘萬不聞復

有叛者固措置之得宜亦恩信之久孚也廉不言貧勤不言勞縮欽符十餘稔從未開支公費官中所入以給出力將士及親故之貧者督兩江時年七十餘矣檢校簿書審視軍械事事親裁其言辦洋務要訣不外論語言忠信行篤敬六字以爲物必相反而後能相克西人貪利而尙廉多詐而尙信彼亦人耳未必不可以誠動以理喻也居嘗以漢臣諸葛亮自命觀其宅心澹泊臨事謹慎鞠躬盡瘁以經王事可謂如出一轍錦棠略曰宗棠事無鉅細精粗必從根本做起而要以力行師行萬里沙磧之地雖酷暑嚴寒必居營帳與士卒同甘苦壘旁隙地悉令軍士開墾荒蕪旣闢招戶承種民至如歸城堡橋梁溝渠館舍乘戰事餘暇修治完善蠶織牧畜罔不因勢利導有開必先軍興日久文教寢衰宗棠身在行間講學不輟每克一城招徠撫綏興教勸學俄官索斯諾福斯齊游歷過甘蘭說西教宗棠接見講孟子三必自反之義俄官爲之斂容其能以誠感人如此尋賜祭葬十五年正月慈禧端佑康頤昭豫莊誠皇太后歸政以宗棠前充軍機大臣夙夜在公襄成邦治命賜祭一壇十六年浙江巡撫崧駿疏言咸豐十一年杭城失守外府州縣僅存衢州一城勢甚岌岌宗棠提師入浙首解衢圍始轉危爲安規復各

郡實爲首先立功之地請准於衢州府城由紳民捐建專祠並將原任衢州府知府吳艾生原任衢州鎮總兵陞任浙江提督饒廷選原任衢州鎮總兵李定太已故前西安縣知縣吳來鴻一併附祀列入祀典由地方官春秋致祭允之孫念謙襲候爵通政使司副使

文祥

文祥瓜爾佳氏盛京正紅旗滿洲人道光二十五年進士以主事用分工部二十九年補官咸豐四年陞員外郎五年五月以巡防出力加知府銜賞戴花翎六月驗收海運漕糧敍功加道銜十月陞郎中十一月以襄辦孝靜康慈皇后喪儀賞三品頂戴六年京察一等記名以道府用因親老乞留京供職七年二月授太僕寺少卿十二月擢詹事府詹事八年正月充日講起居注官三月署刑部左侍郎尋遷內閣學士兼禮部侍郎銜四月署鑲黃旗漢軍副都統五月命在軍機大臣上學習行走六月補禮部右侍郎七月充署經筵講官八月署戶部右侍郎兼管錢法堂事務十月恭送仁宗睿皇帝聖容宣宗成皇帝實錄聖訓詣盛京供奉尊藏下部議敍尋賜紫禁城騎馬十二月調吏部右侍郎九年二月授鑲紅旗蒙古

副都統充前引大臣三月充會試知貢舉八月復署戶部右侍郎兼管錢法堂事務十月命在軍機大臣上行走調工部右侍郎兼管錢法堂事務尋調鑲藍旗滿洲副都統十一月調戶部左侍郎兼管三庫事務十年正月上三旬萬壽賞加一級三月署工部右侍郎兼管錢法堂事務充對引大臣五月充朝考閱卷大臣授左翼總兵時英法二國犯順入天津海口欽差大臣科爾沁親王僧格林沁退駐通州七月上降親統六師硃諭適僧格林沁密疏請幸木蘭命王大臣會議文祥以通州地異澶淵人無寇準非萬全之道木蘭又無險可扼我能至彼亦能至與大學士賈楨等力持不可文祥復獨請召對再三籲留退偕軍機大臣吏部左侍郎匡源署吏部右侍郎杜翰具疏極言利害請罷木蘭之議盡撤所調車馬並請上特降諭旨宣示中外八月上幸木蘭留署步軍統領九月圓明園火土匪肆擾命署圓明園八旗包衣三旗印鑰調兵嚴捕仍隨恭親王辦撫局文祥慮事繁難兼顧辭步軍統領允之洋兵退疏請定期回鑾以安人心十月署正藍旗護軍統領通商條約既定上以文祥出入敵營備歷艱險於洋人非分之求侃侃直言折之以理使心服下部優敘十二月偕恭親王等通籌洋務全局奏言洋人之强悍

萌於嘉慶年間迨江寧換約鴟張彌甚至本年直入京城要挾狂悖夷禍之烈極矣論者引歷代夷患爲前車之鑒專意用剿然揆時度勢各國以英爲强悍俄爲叵測而法美從而陰附之竊謂大沽未敗以前其時可剿而亦可撫大沽既敗而後其勢能撫而不能剿至洋人入城戰守一無足恃則剿亦害撫亦害就兩者輕重論之不得不權宜以救目前之急自換約以後洋人退回天津紛紛南駛而所請尙執條約爲據是洋人並不利我土地人民猶可以信義籠絡馴服其性似與前代之事稍異方今捻熾於北髮熾於南餉竭兵疲洋人乘我虛弱而爲其所制如不勝其忿而與之爲讎則有旦夕之變若忘其爲害而全不設備則貽子孫之憂古人有言以和好爲權宜以戰守爲實事洵篤論也今日之勢髮捻交乘心腹之害也俄國壤地相接有蠶食上國之志肘腋之憂也英國志在通商暴虐無人理不爲限制則無以自立肢體之患也故滅髮捻爲先治俄次之治英又次之惟有隱消其鷲疾之氣而未可遽張以撻發之威儻天心悔禍賊匪漸平則以皇上之聖明臣等竭其顛蒙之力必能有所補救若就目前之計按照條約不使稍有侵越外效信睦而隱示羈縻數年間卽偶有要求尙不遽爲大害因擬善後章程

六條一京師總理各國事務衙門以王大臣領之軍機大臣兼領其事選章京滿漢各八人輪直俟軍務定各國事簡仍歸軍機處辦理以符舊制一分設南北口岸大臣牛莊天津登州三口暫設辦理通商大臣駐天津五口欽差大臣舊隸兩江總督新增內江閩廣口岸事益繁曾國藩方在軍仍暫令薛煥署理駐上海吉林黑龍江邊境俄人越界侵占久匿不報令將軍等履勘以聞一天津關稅以三口通商大臣主之牛莊仍歸山海關監督聽通商大臣統轄新立通州口岸應派員專理鎮江九江漢口瓊州潮州臺灣淡水諸口岸由各督撫會上海欽差大臣遴員司其事俄國新議行貨之庫倫喀什噶爾張家口並舊通商之恰克圖塔爾巴哈台等處定約爲烏蘇里綏芬河各所不納稅請下伊犁將軍各大臣監督悉心權課覈實備用並以洋稅扣歸二成請酌給官吏辦公經費一各省辦理外國事件將軍督撫互相知照以免歧誤一廣東上海各擇通外國語言文字者二人來京仿俄羅斯館教習例選八旗子弟年十三四以下者學習兩年後考其勤惰有成者優獎一各海口內外商情並外國新聞紙按月咨報總理各國事務衙門備覈均如所議行復密疏請練八旗兵丁略言制敵在乎自強自強必先練兵比

者撫局雖成而國威未振宜亟圖振興使彼順則可以相安逆則可以有備況髮捻交乘尤宜速圖剿辦內患能除外侮自絕請籌款添置火器營槍礮給八旗丁演習選閒散餘丁別立營伍專習技藝擦槍並請敕僧格林沁舉知兵將弁一人來京督率訓練上韙之遂立神機營文祥又奏言自辦理撫局以來於外省軍情見聞漸少而深維大局憂心如焚竊謂今之患外有四夷內有髮捻兵疲餉竭在在爲難然洋人桀驁竭力撫綏尙不至遽有變局而髮逆蹂躪東南數省僅恃有淮揚一綫之隔捻匪則出沒三省間蔓延徐宿近更擾及山東金鄉魚臺一帶僧格林沁軍有羊山集之挫比雖小勝然匪蹤飄忽直隸一帶空虛僧格林沁兵行後路尙形單薄勝保所部多未經行陣撫局既定而未敢遽撤者一以彈壓土匪一以防東省之匪闖入直境藉此爲僧格林沁後路策應也夫僧格林沁與士卒同甘苦並能調度一切機宜然其勢亦孤立無援勝保勇敢有餘而審慎不足且同爲統兵大臣未肯相下是僧格林沁軍必得良將勁卒贊助援應方無意外之失良將一時難得竊憶前任副都統富明阿西寧鎮總兵成明從軍江北素號得力因養傷回旗如病痊請特旨錄用或發僧格林沁軍營領隊擊賊或留京師訓

練旗兵並請命各統兵大臣選帶隊得力者保奏存記酌量調遣用資禦侮再湖南巡撫駱秉章近因石逆回竄暫緩赴川而川省賊勢益張文武皆不知兵伏思前任雲貴總督張亮基謀略素優以病開缺恐因滇事棘手託詞引退若移之川省或能展其才猷且川省安滇省亦易就理又前任江西九江道沈葆楨湖北候補知縣劉蓉均才堪大用請敕胡林翼察其能任何任奏懇破格錄用土嘉納焉十一年二月授右翼前鋒統領三月署鑲黃旗滿洲都統尋充總理各國事務大臣七月充崇文門副監督文宗顯皇帝升遐穆宗毅皇帝御極文祥請解樞務命仍在軍機大臣上行走十月偕王大臣等奏請兩宮皇太后垂簾聽政並議章程禮節尋充實錄館副總裁十二月充經筵講官管理神機營事務同治元年正月遷都察院左都御史正白旗蒙古都統二月管理國子監事務三月署工部尙書管理火藥局命恭理喪儀四月充總管內務府大臣五月署鑲白旗滿洲都統六月署兵部尙書充拔貢朝考閱卷大臣七月管理嚮導處事務閏八月授工部尙書兼署兵部尙書九月恭送文宗顯皇帝孝德顯皇后梓宮奉移山陵禮成賞加三級二年四月充朝考閱卷大臣十二月管理理藩院事務初江蘇浙江省城克

復上屢欲加恩樞臣均再三辭上重違其意三年六月江寧復首逆就殄七月捷至諭樞臣同心輔治宜予優獎文祥仍固辭上鑒其誠賞太子太保銜姪凱肇員外郎尋署正黃旗漢軍都統十月充閱兵大臣四年三月署戶部尙書四月辭總管內務府大臣允之六月調鑲白旗滿洲都統八月馬賊入直隸喜峰口竄遵化薊州命文祥統神機營兵馳赴東陵防護並督諸軍追剿賊竄灤陽經鐵門關遁乃留兵屯遵化遷安邊隘因疏陳地方叅賊釀患請除積弊清盜源又奏言馬賊巢穴多在口外如奉天之昌圖廳八面城熱河之八溝哈達等處五方雜處回民爲多出則搶掠歸而聚博入冬彌甚宜懸重賞購限綫伏口外偵聽調兵掩捕庶淨絕根株一勞永逸旋回京九月上謁東陵命留京辦事文宗顯皇帝孝德顯皇后梓宮永遠奉安定陵禮成賞加二級子熙聯員外郎十月以督率神機營操練有方下部議敘尋以老母多病請回旗迎養賞假三月頒賜內府人澆六兩俾齋歸因令統神機營出關剿馬賊時賊分擾關外伏莽應之勢甚熾文祥行至山海關以所部兵力單增調直隸步隊五百洋槍隊一千並請敕東三盟蒙古王公等由北夾擊十一月賊入朝陽縣軍夜進抵錦州賊東竄敗之北井子十二月諜知

賊劫奉天獄約期攻城兼程馳至賊退踞城東南肆掠並圍撫順檄總兵劉景芳率騎夜擊破之賊悉出邊於是吉林告警文祥遣軍赴援五年正月解長春廳圍追賊及於昌圖朝陽坡二月軍分三路進賊悉衆抗士勇爭奮十數戰皆大捷擒斬賊目王洪義等馘三千餘級擒三百餘名尋調吏部尙書四月賊首馬俊子勢蹙乞降磔之解其黨留兵餉授將軍都興阿俾清餘孽遂請蠲奉天地丁銀米停鋪捐五月回京仍管理火藥局充崇文門監督十二月文宗顯皇帝實錄聖訓慶成賞文綺鞍馬加三級子熙治員外郎六年八月署翰林院掌院學士九月文祥五十生辰御書宣猷篤祐扁額福壽字並諸珍物賜之七年三月充會試副考官閏四月署神機營印鑰七月以捻逆平加軍功二級十一月纂修剿平粵捻方略充總裁八年因病三疏請假十月上遣御醫診視給人養八兩十一月請開缺予假二月十二月丁母憂回旗穿孝上嘉文祥母教子有方賜祭一壇治喪銀二千兩九年四月百日服滿因病乞假予兩月並給人養五兩六月續假一月會天津民教滋事文祥力疾回京九月以病未痊請開緊要差使得旨毋庸管理藩院國子監嚮導處並開對引大臣閱兵大臣十年以吏部尙書協辦大學士十一年

四月稽察欽奉上諭事件處六月授大學士管理工部事務充武英殿總裁七月授體仁閣大學士八月方略告成賞加二級九月大婚禮成加恩在紫禁城內乘二人肩輿十二月充文淵閣領閣事十二年以明年慈禧端佑康頤皇太后四旬萬壽並上親政後初屆元旦特恩優敘十三年因病請開缺賞假凡六次六月日本窺臺灣文祥強出籌戰守因上疏曰方今時事可慮者甚多而以圖自強禦外患爲亟當和議之成無人不爲自強之言十餘年來迄無成效其故由於鄙棄洋務者託空言而無實際狃於和局者又相安無事而恐啟猜嫌卽或悉心講求防務復阻於財賦不足而莫可施展今變端已形事機益迫若再不措意一旦大敵當前將何所恃伏願敕下戶部內務府寬籌餉需裁減浮用停不急之工作謀至急之海防俾部臣疆臣皆得專力圖維至自強之道首在虛懷納諫以求政治之得失勿以將順之言爲可喜勿以直遂之言爲可憎皇上憂勤惕厲斯內外臣工振刷精神不敢蹈玩泄之積習否則狃以爲安不思變計恐中外解體人心動搖其患有不可勝言者矣上嘉納之日本事平偕恭親王等策海防六事一練兵二簡器三造船四籌餉五用人六持久請敕中外大臣僉議如所請行文祥復疏言

臺灣一事以備虛力細將就完結心殊鬱憤更不能不思患豫防前月總理各國事務衙門奏籌海防遠謀持久尙待從容會議而目前尤以防日本爲尤亟日本與閩浙一葦可杭倭人習慣食言難保必無後患且彼國近以改舊制失人心叛藩亂民一或崩潰則我濱海各口岌岌堪虞明季之倭患可鑒矣今臺灣一役彼理曲而勉就範圍儻他日強詞尋隙別啟釁端或陰與西洋各國合謀雖欲委曲遷就勢亦不能夫日本東洋一小國耳略習西洋兵法購二鐵甲船竟公然爲中國難而沿海疆臣僉以倉卒無備不便決裂若不及今亟求整頓一旦變生必更棘手請敕沈葆楨等悉心籌商酌留在臺兵勇布置全臺事宜以善其後南北洋通商大臣迅速籌款購鐵甲船水礮臺及軍械勿以倭兵已退稍涉鬆懈允之十二月授武英殿大學士光緒元年三月復請開缺諭開鑲白旗滿洲都統毋庸管理工部神機營以大學士在軍機大臣總理各國事務衙門行走俟病痊入直九月上躬送穆宗毅皇帝孝哲毅皇后梓宮暫安山陵文祥留京辦事諭日午散直毋庸直宿並佩正黃旗滿洲都統印鑰文祥在軍機大臣任五屆京察均下部議敘十二月復以病請解樞務上不許疊予假調理二年五月卒遺疏入諭曰大學

士文祥清正持躬精詳謀國忠純亮直誠懇公明由部曹荷文宗顯皇帝特達之知洊陞卿貳並令在軍機大臣上行走復蒙皇太后穆宗毅皇帝重加倚畀同治四年奉天馬賊肆擾特派帶兵出關剿捕地方賴以廓清旋經簡任綸扉深資輔弼於國計民生利病所關及辦理中外交涉事件無不盡心籌畫實爲股肱心膂之臣祇以積勞成疾屢請開缺朝廷寬予假期曾遣御醫診視賞給人瀋俾得安心調理並於召見軍機大臣時疊次垂詢方冀克享遐齡長承恩眷茲聞溘逝震悼良深著賞給陀羅經被派郡王銜貝勒載澂帶領侍衛十員卽日前往奠醊加恩予諡晉贈太傅照大學士例賜卹入祀賢良祠賞銀三千兩由廣儲司給發賞給騎都尉世職卽令伊子熙治於百日孝滿後承襲任內一切處分悉予開復應得卹典該衙門察例具奏靈柩回旗時沿途地方官妥爲照料到旗後著崇實前往賜祭一壇用示篤念蓋臣至意尋賜祭葬予諡文忠十五年正月慈禧端佑康頤昭豫莊誠皇太后歸政以文祥前充軍機大臣夙夜在公襄成郅治命賜祭一壇子熙治員外郎襲世職

清史列傳卷五十一終

清史列傳 卷五十二

大臣畫一傳檔後編八

賽尙阿

賽尙阿阿魯特氏蒙古正藍旗人嘉慶二十一年繙譯舉人道光三年由理藩院學習筆帖式充軍機章京五年補官七年陞主事八年上命軍機大臣將滿漢章京編列等第賽尙阿名列一等得旨照軍功例優敘九年擢員外郎十年遷郎中十一年二月京察一等記名以道府用三月陞內閣侍讀學士七月吉林將軍福克精阿以剋扣兵餉私役官兵爲佐領永奎所控齊齊哈爾副都統碩德疏劾之上命賽尙阿偕將軍富俊前往查辦尋查明福克精阿被控各款屬實奏請革職從之十月賞頭等侍衛充哈密辦事大臣十一月擢內閣學士兼禮部侍郎銜十二年五月丁父憂命回旗守制旋留京當差閏五月充國史館蒙古總校十二月充右翼監督十三年四月遷理藩院右侍郎五月授鑲白旗蒙古副都統十月署鑲紅旗蒙古副都統十一月署刑部左侍郎十二月山海關協領六十一等捏詞

呈控副都統孟魁信任防禦德慶各款命偕盛京將軍寶興馳往查辦尋鞫實六十一等坐誣告奪職遣戍十四年正月調工部右侍郎兼管錢法堂事務仍兼署刑部左侍郎二月充國史館副總裁六月御史曾望顏奏參署廣州府知府金蘭原辦災虛飾命偕都察院左都御史昇寅前往查辦尋查明金蘭原聽信紳士之言派捐鋪租雖無抑勒而省城鋪戶非比佛山殷實一律照派以致不洽輿情應請嚴議並密訪雷州府知府王玉璋暨湖南攸縣知縣葉起鵬等劣蹟分別疏劾俱如所請行十五年三月察哈爾總管倭什洪額以副都統蘇勒通阿揀選不公臚款呈控上命偕都察院左都御史恩銘覆查得實論如律四月充繙譯會試蒙古考官六月充稽察京通十七倉大臣七月命在軍機大臣上學習行走九月以驍騎校海靈阿箭不中的賽尙阿原保堪充守備部議降二級調用恩予留任十六年七月署稽察會同四譯館大臣十一月調戶部右侍郎兼管錢法堂事務尋以查辦廣東案內於糧差詐贓未能審實下部議奪俸十七年七月授察哈爾都統十八年二月疏陳官馬出青章程七條下部議行八月署理藩院尙書兼正白旗漢軍都統十月充稽察內七倉大臣十一月賜紫禁城騎馬署鑲黃旗蒙古都

統充崇文門副監督調鑲黃旗漢軍都統十二月充經筵講官補理藩院尙書十九年二月充左翼查城大臣四月署刑部尙書十一月兼署鑲藍旗漢軍都統二十年以裁撤哲布尊丹巴呼圖克圖旗繖未經奏明降二品頂戴又以失察司員惠麟得賊降三品頂戴四月充繙譯會試正考官五月調鑲藍旗漢軍都統賞還二品頂戴六月署鑲紅旗漢軍都統八月署兵部尙書十月兼署刑部尙書十二月充國史館副總裁命監修東陵二十一年正月命在軍機大臣上行走時英人入寇詔赴天津及山海關一帶查辦礮臺二月疏言查閱寧河北塘及豐潤灤州樂亭昌黎撫寧臨榆各州縣海口形勢或增築礮臺或添設土壘或停辦甃石或拆去舊臺經督同文武各員相度機宜虛衷商定至安設沙墩土壘於礮臺前築壩空濠旣足禦礮攔潮兼可伏兵陷賊惟各兵槍礮技未精熟尙宜勤加訓練又言秦皇島各口地勢險要須相度地勢辦理澄海樓等處應設臺安礮見在滿洲綠營礮位不敷分布請酌撥運送以資防守均如所議行四月軍機大臣內務府會奏籌議生息銀兩於圓明園添設兵額四百名命賽尙阿偕都察院左都御史恩柱督率訓練尋調工部尙書管理理藩院事務十月命偕御前大臣僧格林沁

等赴天津一帶查閱海口諭曰見在天津各海口所鑄大礮訥爾經額諒早演試所奏設立標桿開礮取準是否確有把握著僧格林沁等於查閱海口之便就近將新鑄大礮抽查於空曠處所試演能擊遠近若干里並用廢船裝載柴葦各件其高低仿照外船尺寸從上流放下引至標桿之處我兵觀準用礮轟擊果否發無不中抑或微有參差如能演試純熟實有把握軍心自固著該大臣等卽與訥爾經額會商妥辦又以山東巡撫托渾布奏言海豐縣大沽河一道近口海灘十餘里有攔沙橫阻諭賽尙阿等履勘具奏尋奏言大沽海口天險可恃業於橫沙內布置各礮臺聲勢聯絡兵丁技藝純熟惟防兵稍單擬將西沽新城駐紮兵勇調歸大隊以厚兵力至施放大礮尤須運用靈捷方能致遠摧堅已於兵中擇技藝最精者分撥礮臺施放大礮其次分撥土埕施放小礮按期演習疏入得旨嘉獎賞皮馬褂尋諭曰前據哈耶阿富僧德先後具奏山海關防堵情形見在僧格林沁等計已到關著詳細履勘所辦是否周妥十一月偕僧格林沁覆奏請於祁口河等處分設重兵並以直東接壤之通海河一道河口較寬難保外船不從此竄入且恐飾作商船混迹窺伺僅駐兵數百安礮數尊未能得力請募練鄉勇於

沿河添設馬撥如所議行旋事竣回京命管理戶部三庫事務二十二年英人擾江蘇海口特頒欽差大臣關防命賽尙阿赴天津防堵尋欽差大臣耆英奏英人有約地會商之語上以其情叵測全不可恃戒耆英等不可前往會晤並諭賽尙阿儻外船北駛卽相機剿辦慎勿稍存游移之見又以江蘇巡撫牛鑑奏有外船四十餘隻北駛命賽尙阿訥爾經額加意慎防無稍疏懈諭曰天津爲畿輔重地關繫緊要賽尙阿到津後自能與訥爾經額和衷商推期於共濟惟講求固須盡善而責成不可不專所有軍營一切調度訥爾經額應與賽尙阿公同商酌而責成則專在訥爾經額馬隊一切布置賽尙阿亦應與訥爾經額公同商酌而責成則專在賽尙阿不可推諉亦不可將就上復以英軍登岸必用車載礮天津海口一帶泥淖不能行車其海岸可以行車之處應如何防範堵截命賽尙阿訥爾經額會同察看妥辦六月揚威將軍奕經奏外船北駛英人到處暗遣漢奸布謠探信導引接濟諭賽尙阿等設法嚴查以杜混迹旋奏沿海泥淖無可行車其大沽迪南迪北並北塘北岸等處與豐潤之李八廠各撥兵分駐有差諭曰自海豐至山海關道里綿長豈處處盡屬泥淖儻英軍用小船裝載礮車從偏僻地面陸續

上岸亦未可定斷不可以泥淖難行礮車笨重遽信謂無從登陸稍涉大意又諭曰昨因耆英等奏英人出有僞示有直達京師講話之謠因思天津沿海均有攔江沙大船不能駛進其兵輪舳板等船乘潮皆可攏岸設使英軍主使漢奸假扮商漁混入探道或邀截商漁船隻脅誘使用必應嚴行防範著賽尙阿訥爾經額設法籌防會商議奏尋奏言察哈爾官兵已埽數到齊擬撥大沽北塘五百名其一千五百名仍在新城一帶遊牧以資休養該處距各海口不遠一經調遣呼吸相通令巴清德移紮新城安設馬撥五十餘處晝夜傳籤足資守望又添馬隊會哨稽察益密至沿海實皆泥淖如果乘間上岸有傳籤會哨兵丁可期兜剿夾攻其吉林黑龍江兵前奏分駐李八廠等處尙未周密擬酌撥二百名在適中之洋河地方屯紮牛鑑所奏英人欲用馬車運礮肆擾天津早經訥爾經額挖掘陷坑不至任其馳驅並沿海十處及北塘池南鹽溝等處均設法埋伏矣時御史蘇廷魁等奏請嚴禁天津貨船出入以免漏洩軍情兼以英軍慣用炸礮宜以散隊進攻下賽尙阿等議如所請行諭曰陸路與彼軍接仗當以大小礮位爲先繼以擡礮擡槍又繼以鳥槍至短兵相接必先能禦其火槍爲要欲禦其火槍我兵各執

兩層夾以牛皮之藤牌用水浸透一手執鈎連槍蠶擁前進有藤牌以敵其槍箭復以鈎連鈎取敵人足脛令其顛仆繼以刀矛手奮勇砍扎似能得力著仿照前說認真演試練習七月英人就撫賽尙阿撤防回京充崇文門正監督十月上閱武槍隊整齊以賽尙阿督率有方賞戴花翎尋調正黃旗滿洲都統十二月奏整飭稅務嚴禁繞越並請於順義縣扼要地方設立稅局下部議行二十四年會同刑部覆按通州民婦康王氏勒索親姑獄知爲坊官徇供誣認鞠實疏再上卒白其冤並請將指揮袁繼厚等訊辦如律尋調戶部尙書偕刑部左侍郎周祖培詣江南查看江防善後事宜七月授閱兵大臣二十六年九月署吏部尙書十一月管理戶部三庫事務二十八年正月充經筵講官署步軍統領十一月署鑲藍旗滿洲都統三十年二月署鑲白旗漢軍都統充實錄館總裁兼充蒙古副總裁七月授步軍統領十月以戶部尙書協辦大學士咸豐元年正月擢大學士管理戶部事務二月授文華殿大學士三月粵匪肆擾命賽尙阿爲欽差大臣馳赴湖南防堵並敕戶部暨廣儲司各撥銀一百萬兩充軍需五月奏調湖南在籍知縣江忠源把總董荆山赴營差委允之廣西欽差大臣李星沅因病回籍上命賽尙阿

馳赴接辦尋疏言象州之匪甲於各股數雖鉅萬而裹脅之良民烏合之遊手居半象州得力則各股自成破竹之勢見在兵力不爲不厚糧餉不爲不充而尤以紳勇團練爲要務已酌擬激勵鄉團解散脅從十二條商之新任撫臣鄒鳴鶴斟酌辦理至堅壁清野於今日實爲切中業經遵旨寄知該督撫認真照辦並刊布告示所有脅從之人均予網開一面儻有殺賊來降者仍加優賞六月授內大臣尋陳汰兵勇明紀律購間諜散脅從斷接濟各條奏入賜黃馬褂荷包燧臺諭曰該大臣等到粵之始卽能通籌全局條理秩然深慰朕念賽尙阿旋檄提督向榮等攻賊於中坪村敗之七月疏陳粵匪實在情形略曰粵西股匪甚多馮雲山洪秀全凌十八等俱天主教兇狠尤甚馮雲山由金田而東鄉由東鄉而廟旺由廟旺而中坪屢次奏牘但言衆蹙思竄其實從容來去官兵壁上環觀有無可如何之勢見擬先用全力攻剿馮雲山等最悍大股一經得力則分兵剿辦方免顧此失彼之虞省垣存兵無多奸匪徧地通信四門戒嚴計惟暫駐省城居中調遣分派巴清德達洪阿帶兵進剿呼應較爲靈便上嘉其調度合宜時逆匪竄桂平之新圩向榮督兵屢破之賽尙阿復飭副將烏蘭泰潛渡江設伏斃賊無算得旨嘉

獎八月賽尙阿以賊踞紫荆山以新墟雙髻隘爲門戶檄達洪阿烏蘭泰等攻雙髻拔之燬其巢捷聞賜御用荷包搬指小刀燧囊閏八月烏蘭泰向榮等疊破賊於莫村古林社等處賽尙阿疏言新墟一帶地勢竹木茂密溝塍極多一時未能攻入見聞該匪拆屋造船冀由石觜渡江南竄飭烏蘭泰嚴爲堵截石觜大黃江一帶處處設伏該匪斷難飛越見在日日進攻若能直搗巢穴固可指日蕩平否則偏使竄出官軍前伏後追尤易爲力並以軍需浩繁請飭部速籌接濟允之旋官兵進剿賊由新墟焚巢而逸官軍遇雨失利時烏蘭泰一軍尾賊後鵬化團練扼之於平南巴清德等復遏其浮江東下之路賊不得逞遂竄永安州陷其城上責賽尙阿調度失宜下部議褫職加恩降四級留任諭曰此時賊匪困守孤城正可併力攻剿聚而殲旃其水陸各軍均著嚴防痛剿無令逃逸儻未能擒獲首逆以致匪燄日長該大臣等其能當此重咎耶尋賽尙阿令烏蘭泰等設伏接應疊獲大捷千總張國樑計誘匪首顏品瑤斬之賽尙阿奏張國樑投誠以來效命行閒屢能殺賊此次用閒出奇厥功尤偉請加優獎從之九月奏烏蘭泰攻拔水竇賊壘諭令乘勢進攻勿留餘孽尋又諭曰見在逆匪竄踞永安正如釜底遊魂暫

儉視息賽尙阿出省親督各路官兵環攻會剿自不難剋日蕩平當此賊勢窮蹙士氣奮揚之際統兵大員等自當多方激勵嚴明賞罰遇有保舉參劾尤須覈實平允庶人人知奮知感迅奏膚功十二月充國史館總裁時官兵環攻永安向榮烏蘭泰等截剿疊勝而州城未復諭曰見在南北兩路移營進逼疊獲勝仗蕞爾孤城自不難指日攻克朕於賽尙阿出京時頒給軍營備賞各件又特賜御用遏必隆刀期於信賞必罰以振軍威而作士氣當此各兵合剿賊匪窮蹙之時尤當號令嚴明俾我將士併力爭先庶克一鼓殲擒膚功迅奏賽尙阿見駐陽朔統率諸軍晝夜籌辦與朕同此焦勞著再傳旨諭知在事文武員弁務各齊心協力奮勉圖功斷不得日久生懈即將前頒賞件傳旨賞給以示褒榮其有臨陣退縮不能用命或守禦不嚴致賊竄逸者該大臣卽用朕所賜遏必隆刀立正典刑以肅軍紀二年正月奏親赴永安督戰兵心鼓舞連獲大勝請速籌撥軍餉允之二月破那勒賊剿擒逆黨顏三等南太一路肅清三月復永安擒逆首洪大全檻送京師而烏蘭泰等以銳進失機總兵長瑞陣歿賽尙阿下部議奪職加恩降四級留任諭曰見在賊勢渙散省垣重地自應嚴加防守該大臣見帶兵勇分路截擊著

鄒鳴鶴激勵團練紳民隨地堵剿毋令竄逸時賊已竄徧桂林賽尙阿進駐陽朔檄向榮閒道繞賊前星馳進省烏蘭泰軍由荔浦尾追爲內外夾攻之計烏蘭泰追賊至將軍橋猝被礮傷軍退至六塘因疏言桂林北門倚山爲固恐爲賊踞則城守益危已咨兩湖撥湘兵一千星速來援又以省垣被賊攻擾逆礮方張城大兵單必痛加剿洗方能解圍見擬謀定後戰以保萬全四月以賊情叵測鏖戰兩旬未能挫其兇鋒且賊不獲逞於省垣恐由平樂梧州北竄軍務日久未能蒞事自請治罪諭曰賽尙阿自督辦廣西軍務以來先曾調度得力自賊匪竄入永安數月未能攻克及至突圍北竄又誤軍機實難辭咎昨已降旨令其戴罪以觀後效若徒以請罪塞責於事何濟見飭令徐廣縉揀帶精兵馳赴廣西會辦軍務賽尙阿惟當激發天良力圖補救勿徒事虛文自劾爲也尋貴州鎮遠鎮總兵秦定三等破賊於花園里燬楊家牌等處賊巢賊由水路來犯復焚其船賊宵遁省城圍解賊陷興安全州賽尙阿進駐省城飭四川川北鎮總兵劉長清前任湖南提督余萬清帶兵追擊上命與楚省文武合力攻剿尋艇匪擾蒼梧藤縣一帶檄左江道楊彤如及張國樑夾擊破之五月進攻全州劉長清敗賊於飛鸞橋江忠源

敗賊於塔山七里橋等處斬偽西王蕭朝貴賊棄船遁湖南綏靖鎮總兵和春帶兵進剿賊已竄入湖南之水西橋旋陷道州余萬清聞賊先遁上以湖南軍務緊要命賽尙阿扼要駐紮會同湖廣總督程裔采相機調度賽尙阿抵衡州督諸軍移營進攻破賊於五里亭賊仍踞城抗拒賽尙阿分遣官兵四面進逼和春駐道州城北聯絡東面聲勢劉長清等各帶重兵分扼西南疏入上嘉其布置尙妥六月逆匪詐稱潮勇陷江華縣城旋竄陷永明適秦定三等大破賊於桃花井五里亭龍安橋等處道州復永明江華之匪亦棄城逸賽尙阿飭諸軍赴嘉禾藍山扼剿而賊已入嘉禾和春等督軍追剿賊棄城遁陷桂陽州諸軍急追之賊復棄桂陽陷郴州上以賽尙阿調度乖方下部議革職留任八月逆匪踞郴州分竄攸縣醴陵各土匪蠢起響應逆氛日熾賽尙阿飭各路堵截賊已直逼長沙前湖北巡撫羅繞典以聞諭曰逆匪自竄踞郴州以後膽敢繞越衡郡直撲省垣該大臣等果能迎擊何至今其肆行衝突即使該匪冒險突入亦應發兵迅速救援將見在攻剿情形詳悉奏聞何以半月以來並無章奏賽尙阿著摘去頂戴拔去花翎尋奏見派和春等赴援長沙疊敗大股賊匪軍民商旅賴以鎮定命與羅繞典等協

同剿辦迅解省圍尋諭曰自廣西軍興以來將及兩載因大學士賽尙阿人尙樸誠能任艱苦特命爲欽差大臣前往督剿又慮其秉性慈柔特賜遏必隆刀冀其隨時振勵以肅軍威上年大軍圍賊於新墟紫荆山等處初猶屢次獲勝迨賊竄踞永安蕞爾一城圍攻半載有餘迄無成效轉致損將折兵任賊鴟張圍撲桂林省城旋又竄掠興安攻陷全州繼復任賊竄入楚境連陷數城見又分股圍撲長沙省城賽尙阿身爲統帥調度乖方總由號令不嚴賞罰失當以致勞師糜餉日久無功實屬辜恩大負委任賽尙阿著革職拏問解交刑部治罪尋官軍復永興逆匪自郴州竄出經大軍迎截圍撲長沙之賊亦屢經大軍攻剿殲賊無算賽尙阿奏聞上以賽尙阿業經獲罪命署湖廣總督徐廣縉迅速赴省與羅繞典等合力攻剿十二月賽尙阿到京命大學士裕誠等公同訊問並傳諭詢其因何辦理太輒抑或被人欺朦賽尙阿伏地流涕自言不忍殺人並無人敢欺朦實係辜負聖恩求從重治罪三年二月籍其家三月軍機大臣會同刑部擬罪斬監候詔如所議並褫其子鑾儀衛冠軍使崇緒禮部主事崇熙工部主事崇綺吏部員外郎崇絢職五月上念軍務緊急賽尙阿反置身事外命發往直隸交訥爾經額差委

尋命留京隨同僧格林沁等辦理巡防事務五年僧格林沁等以賽尙阿當差愧奮奏請免罪命發往軍臺效力贖罪尋釋回交署察哈爾都統穆隆阿差委六年三月命操練察哈爾蒙古官兵十一月諭令回京十年賞五品頂戴交僧格林沁差委旋留京總統左翼巡城事宜八月賞侍郎銜十一年二月授正紅旗蒙古副都統三月署正紅旗滿洲都統五月因病奏請開缺允之光緒元年卒子崇緒原任鑾儀衛冠軍使崇熙伊犁領隊大臣同治四年殉難賞騎都尉兼一雲騎尉世職崇綺同治四年一甲一名進士三等承恩公前吏部尙書同治十一年奉旨擡入滿洲鑲黃旗崇絢廣東雷瓊道崇綱駐藏幫辦大臣崇凱崇勛均理藩院郎中崇霈候選通判孫霖康直隸候補知縣克昌襲騎都尉兼一雲騎尉世職太僕寺候補主事葆初襲三等承恩公委散秩大臣

英桂

英桂赫舍哩氏滿洲正藍旗人原隸包衣道光元年繙譯舉人考取內閣中書四年充軍機章京七年因回疆底定軍機獎敘遇有中書缺出卽補八年正月補官二月充方略館收掌官十一月陞侍讀十二年充國史館提調官十四年二月京

察一等記名以道府用十月授山東青州府知府十六年兼護登萊青道十八年因前護道篆失察濰縣教匪馬剛滋事降一級調用仍留山東以同知差遣二十年補萊州府同知旋署青州府知府二十一年丁母憂回旗二十二年三月百日孝滿回原衙門行走十月奉旨外用二十五年授四川敘州府知府二十六年陞山東登萊青道二十七年御史王東槐奏參山東地方官玩縱盜賊查辦得實下部議革英桂職上加恩改爲革職留任二十九年署兗沂曹濟道因搶護黃河險工下部議敘三十年因殲獲洋盜出力賞戴花翎咸豐二年四月擢山西按察使尋署布政使十月調山東按察使三年三月總辦兗州糧臺八月署布政使九月超擢河南巡撫時粵匪竄擾湖北河南戒嚴英桂馳抵南陽籌防因疏言南陽接壤荆襄須擇要防禦臣原調兵勇一時未能會齊先派南陽總兵柏山調集弁兵千名赴新野駐紮並嚴催原調兵勇剋期趕到分布唐縣鄧州兩路報聞十一月請裁布政使衙門都事一缺下部議行四年正月粵匪由直隸獨流敗竄河間英桂奏請帶兵赴河北嚴防嗣偵知湖北賊船千餘集漢口安徽六安州爲賊竄踞均與豫省毗連仍請暫駐汝寧督防南路諭曰汝能隨機應變不致拘泥甚是楚

省尤關緊要著迅速探聽武昌信息馳奏三月因湖北德安應山相繼失守英桂飭柏山帶兵馳往堵剿並飭臬司林揚祖帶勇前赴歸德會同已革兩廣總督徐廣縉兩江總督牛鑑互爲應援又以兵力不敷請敕西安將軍舒倫保赴歸德防守五月奏劾柏山欺朦巧飾請革職均從之十二月以捐輸軍餉下部優敘五年正月密縣土匪張大鼈等滋事英桂派員擒斬之四月因河南應運漕糧逾限未到復因協甘兵餉欠解過多下部議處五月奏擒匪攻陷息縣光山兩城旋即收復並擒獲捻首易添富等伏莽肅清優詔嘉獎七月因蘭陽汎黃水漫口自請議處得旨寬免旋籌銀五萬兩派員分路撫恤災民十月復奉旨發內帑銀三萬兩交英桂體察情形妥爲籌辦先是衛輝府屬有聯莊會匪藉團練爲名聚衆抗官至是奏言已將首犯拏獲餘匪斂迹究其致亂之由緣有教職汎弁從中庇護挾制印官以致刁徒積惡日甚請將教職左鵬程等分別革職撤任尋奉諭日前因河南正額錢穀之外有河工加價一款甚爲民累降旨加恩蠲免茲據英桂奏河北三府自解散聯莊會除暴安良閭閻樂業交納錢糧亦日有起色可見小民具有天良如果各州縣勤恤民隱原不難革薄從忠見在抗糧首惡各犯業經按律

懲治著該撫督飭所屬曉諭愚民所有從前被脅之人既悔罪安分概行免究如
尙有愍不畏法陽奉陰違者亦不得不嚴行查辦或有不肖官吏浮收勒派罔恤
民艱並著該撫嚴參懲處時擒首張落刑竄踞雒河集一帶上命英桂馳赴歸德
督辦三省軍務所有江蘇安徽兵勇及湖南提督武隆額一軍悉歸節制六年二
月張落刑竄至歸德府之穀熟集英桂飭總兵邱聯恩等迎擊敗之殺賊無算未
幾官兵敗於蔡道口東賊偪府城英桂自請嚴議上加恩改爲交部議處尋命已
革都察院左副都御史袁甲三會同英桂剿辦時賊分股回竄皖境歸德之圍暫
解旋又以大股來犯官軍合力破之毀其壘斃擒首蘇添幅僞軍師劉鼇並殲張
落刑之姪張海捷聞得旨嘉獎八月賊復踞雒河分竄渦河英桂督軍擊敗之時
上以英桂督辦三省剿匪事宜未能躬履行閒出境調度以致匪蹤回竄日久無
功下部議革職命暫行留任七年賊踞三河尖官軍連戰皆捷追至潁上復大敗
之八年正月拏獲教匪首逆陳汰安並其黨王庭貞等寘之法三月因病請假回
省八月調補山西巡撫十年正月因前在河南巡撫任欠解京餉爲數甚鉅降二
級留任八月外人犯順京師戒嚴英桂帶兵入衛十月回任十一月因戶部奏參

山西等省欠解京餉延不報解降三品頂戴仍下部議處十二月丁父憂賞假百日回京穿孝十一年二月山西欠餉解清賞還二品頂戴四月假滿回任十一月疏言晉省蒲解絳潞澤遼平七府州與豫秦接壤之處其間山口錯雜河岸紛歧每遇鄰氛告警倉卒徵調輾轉需時及賊蹤遠去又須撤令歸營往返馳驅疲於奔命而州縣供應之費亦屬不貲莫若裁腹地之有餘補沿邊之不足爲一勞永逸之計共擬添專營三處專汛五處改汛爲營兩處酌裁大同鎮馬步守兵三千名太原鎮西路各營六百名所設將弁卽在大同太原兩鎮事簡營分移裁添改統歸太原鎮考覈報聞同治元年三月因山西應解京餉協餉均能無誤下部優敘時甘肅回匪攻陷惠安堡逼近寧夏花馬池英桂因疏言晉省自設防以來頻年徵調致大同鎮標兵僅餘二千餘名該鎮回民居多際此陝甘逆回滋擾北則口外各廳東則河保一帶均虞煽惑請旨飭令副都統德楞額移師山右駐紮大同以備不虞從之十一月上命荊州將軍多隆阿督辦陝西軍務時欽差大臣勝保革職拏問多隆阿代領其衆多所裁撤其部將宋景詩復叛英桂疏言勝保舊部雖多烏合降衆亦有久經戰陣之士多隆阿謂日久無功難期得力因而撤遣

然操之未免過急計到營旬日遣歸七起深恐各勇窮無所歸乘機爲亂不獨宋景詩一隊爲可慮也前讀諭旨勝保將士如能隨同立功仍准一體保奏見西安營中尙有勝保舊部尤須妥爲布置臣與多隆阿函劄往來意見並無不合惟察其辦事果勇有餘精細似尙未足請飭湖廣總督官文擇明幹穩練素與多隆阿意氣相投大員二人參贊陝西軍務以期同心協力迅奏膚功報聞二年十月擢福州將軍十二月入覲賜紫禁城騎馬三年正月因前在山西倡捐京倉米價銀兩下部優敘二月諭曰英桂係貝子載容包衣人見經補放福州將軍著加恩擢入正藍旗滿洲四月復以前在巡撫任內審轉太谷縣民婦員杜氏謀產誣節一案失實部議降一級調用上加恩改爲降四級留任六月抵將軍任五年正月以捐備兵精下部優敘八月兼署閩浙總督六年六月遵旨酌撥福州駐防官兵移往杭州十二月復兼署閩浙總督七年實授閩浙總督兼理福州將軍印務八年兼署福建巡撫九年三月復兼署福建巡撫先是天津通商大臣崇厚咨稱天津見立機器總局製造軍火需用硫磺令商人盧璧山前赴臺灣採買英桂奏言查淡水廳之芝蘭堡金色里等處磺山地處屯社內則偏近生番外則沿海口岸處

處可通經委員查勘並採訪輿論僉謂窒礙良多且見在臺地情形更非昔比一經弛禁於軍火未必有濟轉恐別啟隱憂請照舊封禁得旨俞允五月英桂七十七生辰御書建節延祺扁額及文綺等件賜之九月會同總理船政大臣沈葆楨奏請酌保水師人才以資訓練又疏言水師之強弱以船礮爲宗船礮之巧拙以算學爲本西洋船礮日新月異愈出愈奇實則由釐毫絲忽積算而來算精一分則巧逾十倍我聖祖仁皇帝天資聰明機務餘閒旁及象數當時儒臣梅文鼎等親承聖訓類能與西人上下其議論知中華之心思材力必不遜美於西洋也擬請特開算學一科使家有其書人自爲學疏入部議未行十年入覲授內大臣十一年四月兼鑲紅旗漢軍都統六月授兵部尙書七月管理理藩院事務十二月充經筵講官十二年三月命承修普陀峪萬年吉地工程八月署正白旗漢軍都統十三年三月兼署正紅旗蒙古都統六月兼署刑部尙書七月充崇文門正監督總管內務府大臣八月調吏部尙書兼步軍統領九月充覆覈朝審大臣十一月兼署兵部尙書十二月奉皇太后懿旨恭理穆宗毅皇帝喪儀調正紅旗滿洲都統光緒元年正月以吏部尙書協辦大學士二月充實錄館總裁三月管理戶部

三庫事務九月管理文淵閣事務二年署正黃旗滿洲都統三年二月署鑲白旗漢軍都統授體仁閣大學士四月充繙譯會試正考官四年正月因病奏請開缺賞假兩箇月假滿因病仍未痊復請開缺命以大學士致仕賞食全俸十一月因鄉舉重逢賞加太子少保銜准預己卯科鄉試鹿鳴筵宴疊奉恩賞神糕暨葛紗等件五年卒遺疏入諭曰致仕大學士英桂恪慎持躬老成練達受先朝知遇之隆由中書歷膺外任洊陟封圻督辦三省軍務朕御極後晉擢綸扉敷歷中外懋著勤勞前因微疴賞假調理嗣因固請開缺准予致仕並賞食全俸茲聞溘逝悼惜殊深著賞給陀羅經被派員勒載治帶領侍衛十員卽日前往奠醊加恩晉贈太子太保銜照大學士例賜卹入祀賢良祠任內一切處分悉予開復應得卹典該衙門察例具奏伊孫恩釗著以員外郎用曾孫鑿惠著以主事用以示篤念耆臣至意尋賜祭葬予諡文勤十一月穆宗毅皇帝實錄聖訓慶成賜祭一壇子多齡候選道崇齡禮部郎中孫恩濟兵部候補員外郎恩通戶部候補員外郎恩培員外郎恩釗恩賞員外郎曾孫鑿惠恩賞主事文惠廕生

單懋謙

單懋謙湖北襄陽人道光十二年進士改翰林院庶吉士十三年四月散館授編修七月大考二等賞文綺十五年三月充會試同考官六月充江南鄉試副考官十六年記名以御史用十七年七月命在南書房行走十二月充文淵閣校理十八年充會試同考官十九年二月大考二等奉旨以贊善陞用四月授國子監司業二十年三月充會試同考官六月遷詹事府司經局洗馬八月提督廣東學政旋授翰林院侍講二十一年三月擢詹事府右春坊右庶子均留學政任十一月因病開缺回籍二十四年丁父憂二十七年服闋請終母養咸豐二年丁母憂三年粵匪竄擾湖北奉旨在籍督辦團練事宜六年五月服闋回京八月命仍在南書房行走十月復補右庶子十二月仍充文淵閣校理七年三月提督江西學政閏五月擢翰林院侍講學士十二月遷詹事府少詹事八年八月奉旨仍留江西學政任九月擢內閣學士兼禮部侍郎銜十一年遷工部右侍郎兼管錢法堂事務均留學政任先是言官奏參江西巡撫毓科布政使慶廉聲名平常恐誤大局上命懋謙查明具奏旋奏言毓科前歷各任未曾辦理軍務應變之才本非所長適當賊匪肆擾之時處處須援須剿而省防尤重本境兵勇不敷調遣輾轉遷延

援剿難資得力以致辦理未能悉合機宜見雖全境肅清而善後急宜妥辦兼之籌備浙防接濟皖餉大局攸關恐未能措理裕如至原摺所參新任藩司慶廉前任浙江運司藩司及河南巡撫任內各款江西距浙江河南俱遠無從訪查該藩司見未到江西任亦無事蹟可考未敢妄陳疏入報聞尋任滿回京充實錄館副總裁同治元年八月署戶部左侍郎兼管三庫事務二年正月調吏部左侍郎二月遷都察院左都御史三月充會試副考官十月賜紫禁城騎馬三年五月命同大學士瑞常等進講治平寶鑑六月署禮部尙書七月遷工部尙書尋兼署戶部尙書四年二月命偕盛京刑部侍郎志和會同將軍工部修理太廟正殿昭陵圍城等工七月工竣時奉天馬賊猖獗上以將軍玉明府尹德椿覆奏含混諭令懋謙就近查辦得實玉明德椿均下部議處九月回京奏言盛京馬賊難防請飭籌兵餉出邊會剿以弭盜源復奏請飭諭盛京將軍奉天府兼尹府尹通飭所屬各州縣查勘市鎮鄉村應修堡寨之處勸諭居民作速修築並將龔景瀚所著堅壁清野議擇錄數條刊發各州縣令其遵照團練守禦之法量爲辦理疏入均得旨議行十二月充經筵講官五年三月偕都察院左副都御史宗室鍾岱赴天津查

收海運米六月差竣下部優敘八月充覆覈朝審大臣十二月以恭修文宗顯皇帝實錄聖訓慶成賞加三級旋復下部議敘以業經渥荷恩施奏請停免從之六年四月管理戶部三庫事務八月充順天鄉試副考官七年二月署都察院左都御史三月調吏部尙書閏四月命教習庶吉士八月署禮部尙書十月充武會試正考官八年三月署工部尙書十一月命偕工部左侍郎恩承承修永陵河道工程九年十一月署刑部尙書十二月因前修永陵河道工程未能堅實諭令與恩承另行賠修十年正月因病籲請開缺賞假調理四月管理國子監事務十一年六月以吏部尙書協辦大學士八月授文淵閣大學士管理兵部事務十二月充文淵閣領閣事十二年二月上謁東陵命懋謙留京辦事閏六月復因病懇請開缺仍賞假調理十三年二月上謁西陵仍命留京辦事四月因病久未痊復籲懇開缺回籍調理允之前後充直省鄉試覆試閱卷大臣武殿試讀卷官殿試讀卷官直省鄉試磨勘試卷大臣朝考閱卷大臣考試漢廕生閱卷大臣各一次考試試差閱卷大臣會試覆試閱卷大臣各二次光緒五年卒遺疏入諭曰致仕大學士單懋謙學問優長持躬端謹由翰林洊擢卿貳晉贊綸扉克盡厥職前因患病

奏請開缺回籍調理茲聞溘逝悼惜殊深著加恩追贈太子太保銜照大學士例賜卹任內一切處分悉予開復應得卹典該衙門察例具奏伊子郎中單大經著以知府選用伊孫單啟藩著賞給舉人准其一體會試用示篤念耆臣至意尋賜祭葬予諡文恪

沈桂芬

沈桂芬順天宛平人祖籍江蘇道光二十七年進士改翰林院庶吉士三十年散館授編修咸豐元年充浙江鄉試副考官二年五月大考一等擢庶子尋補詹事府右春坊右庶子七月署日講起居注官八月提督陝甘學政三年陞翰林院侍講學士五年五月轉侍讀學士十二月任滿回京署文淵閣直閣事六年三月充日講起居注官九月遷詹事府少詹事七年三月稽察右翼宗學內閣協同批本八月陞內閣學士兼禮部侍郎銜八年丁父憂十一年服闋三月補原官六月充廣東鄉試正考官十月陞禮部左侍郎同治元年調戶部左侍郎兼管三庫事務二年二月充實錄館副總裁三月充會試副考官十月署山西巡撫三年正月率屬倡捐京倉米石有旨獎敘七月補山西巡撫九月上籌費移屯疏畧言京師旗

民生齒繁庶不農不商除仰食錢糧外無生生之策以今日安插旗人上策無如移屯邊方中策則聽往各省其聽往各省之法無論馬甲養育閑散願赴各廳州縣謀生者照商籍軍籍例編爲旗籍戶婚田土命盜案件地方官主之生子隨時呈報年終督撫彙咨部旗並許以旗籍應文武童鄉會試綠營戰守馬糧及各營將弁准一體考拔降革休致官弁及舉貢生監與各省駐防願徙者均聽之至移屯邊方之法請簡派大員爲屯田大臣於奉天吉林及獨石口外之紅城子開平張家口外之興和新平等處昔年富俊孫嘉淦所勘定舊地步計可開若干頃造建房屋城堡添製農具牛種軍裝器械酌立成規宅中駐紮旗戶願移屯者戶部發治裝銀三十兩沿途官給車馬到屯後每戶給房四間農具牛種皆備三時務農一時講武刑罰教養屯田大臣主之十年陞科徵收之糧運於口內而積銀於屯所卽以屯糧所糶爲次年京旗移屯及屯所各項之用由是旗人一遷徙之勞永可豐衣足食而旗民恤矣軍興以後調遣旗兵不聞得力若移屯口外耕牧營生加以訓練可復國初驍健之風十數年後環邊之地綿亙不絕北懾強鄰南衛京師而邊防實矣軍務旣竣八旗兵餉應循照舊章加發八成竊謂蘇八旗一時

之窮困其惠小貽八旗無窮之贍養其利長當未減之時而忽議減其勢逆而難行迨已減之後而量爲增其勢順而易節請於定復八成兵餉之年暫給六成酌留二成歲可省銀百餘萬兩治裝銀與房屋種具每戶以八十兩計之歲可移屯數千戶俟屯田升科後京旗兵餉仍復八成之舊則目前經費無庸另籌日後正供永無不足而國用紓矣疏入詔所司會議諭曰旗人聽往各省之法道光年間曾經籌辦有案見在量爲推廣以裕生計所籌尙屬周妥卽著八旗都統逐節出示曉諭俾衆咸知沈桂芬摺內所稱籌費移屯一節見在該處情形如何有無可關地畝著各該將軍都統督撫等認真籌畫務須變通盡利因時制宜不准畏難苟安一奏塞責俟查勘確實卽行迅速具奏四年正月上以桂芬籌解甘肅軍餉無誤師行下部優敘是時洋藥弛禁民間栽種罌粟趨利若鶩漸占沃壤晉省山多地少民食本已不敷至是米糧更缺市價日踊桂芬刊發條約飭屬嚴禁二月疏陳見辦情形上覽之並敕各直省督撫通行所屬一律嚴禁著爲令四月疏陳練兵事宜略言晉省大同太原兩鎮及省標兩營額設馬步兵丁二萬一千五百餘名徵調防堵均不得力當此西陲多事宜整軍經武裁弱募強臣標添設精兵

千名已明定章程遴委文員會同營員分練合操行之半年孱弱漸除隨將左右兩營額設各兵隨同操演每日應練各兵人給練費二分技藝嫻熟者酌增劣者責革又從太原鎮標暨平陽營存城兵丁練起裁募賞罰一如省章蒲潞兩協亦陸續舉辦如有成效再擬推廣北路六月又疏言大同殺虎兩處要區營伍尤宜整頓見委員前往將大同鎮標及殺虎協見存各兵會同營員按日簡校訓練總期精益求精咸成節制可用之師以固邊圉均報聞是月以母疾疏請解任省親得旨賞假二月旋丁母憂六年服闋補禮部右侍郎充經筵講官七年三月命在軍機大臣上行走遷戶部左侍郎兼管三庫事務七月調吏部左侍郎十月賜紫禁城騎馬十一月充方略館總裁八年六月陞都察院左都御史十月命在總理各國事務衙門大臣上行走九年遷兵部尚書十一年六月充國史館總裁九月穆宗毅皇帝大婚禮成加太子少保銜十二年以桂芬勤勞素著賞御書勤宣贊畫扁額十三年四月管理國子監事務十一月奉慈安端裕康慶皇太后慈禧端佑康頤皇太后懿旨皇帝天花之喜沈桂芬著賞戴雙眼花翎十二月穆宗毅皇帝龍馭上賓桂芬自請撤銷翎枝允之光緒元年命桂芬以兵部尚書協辦大學

士先是國子監額設肄業生四十名戶部例發銀六千兩屢次折減膏火僅存其名桂芬奏請加額二十名其例發銀兩請仍按庫平發給從之二年充玉牒館總裁三年五月充教習庶吉士九月充實錄館總裁四年二月回疆肅清捷入上以軍機王大臣同心翊贊共矢公忠交部優敘四月編修何金壽奏雨澤愆期請訓責樞臣諭交部嚴加議處桂芬坐革職特旨改爲革職留任五月充翰林院掌院學士五年正月考績有旨褒獎開復革職留任處分三月恭題穆宗毅皇帝孝哲毅皇后神主賞加太子太保銜五月疏言國子監衙門每年領戶部銀六千兩爲各生膏火獎賞及津貼官學生用度此外春秋丁祭及辦公各費尙需一千八百餘兩向賴京外收捐貢監照費爲津貼今年大捐旣停照費僅存涓滴無裨於用而部庫支絀勢難請益查江海各關監督均有捐解京師願學堂義塾粥廠銀兩之案見經函商各監督酌籌監費共集有二千四百兩之數擬照願學堂成案每年各關批解總理各國事務衙門彙收國子監於六月十二月兩次各支領銀九百兩所餘六百兩由總理各國事務衙門另款存儲監中遇有要需再行撙節動用似於造士辦公均有裨益報聞桂芬自卿貳泮躋揆席疊荷恩賞御書福壽龍

虎字貂褂紉緞荷包十一次充會試覆試閱卷大臣六次鄉試覆試閱卷大臣七次殿試讀卷官拔貢覆試閱卷大臣各二次進士朝考庶吉士散館閱卷大臣各三次考試漢教習漢廕生漢御史閱卷大臣武會試較射武會試覆試大臣各一次六年十二月以疾請假尋卒遺疏入諭曰協辦大學士兵部尙書沈桂芬清慎忠勤老成端恪由翰林洊陞卿貳外任封疆同治年間入參樞務擢任正卿朕御極後重加倚任晉協綸扉辦理一切事宜均能殫心竭力勞瘁不辭前因偶患微疴賞假調理遽聞溘逝震悼殊深著賞給陀羅經被派貝勒載漪帶領侍衛十員卽日前往奠醊加恩晉贈太子太傅照大學士例賜卹入祀賢良祠任內一切處分悉予開復賞銀二千兩治喪由廣儲司發給應得卹典該衙門察例具奏靈柩回原籍時著沿途地方官妥爲照料伊子沈文燾著賞給舉人准其一體會試伊孫沈錫珪著賞給郎中俟及歲時帶領引見以示篤念蓋臣之至意尋賜祭葬予謚文定十五年正月慈禧端佑康頤昭豫莊誠皇太后歸政以桂芬前充軍機大臣夙夜在公襄成邦治命賜祭一壇子文炘同治三年舉人文燾恩賞舉人孫錫珪郎中

全慶

全慶葉赫納喇氏滿洲正白旗人父那清安兵部尙書全慶嘉慶二十四年舉人道光元年二品廕生以文職用分光祿寺旋以迴避改兵部主事二年復改大理寺寺丞三年五月仍回兵部九年成進士改翰林院庶吉士十二年四月散館授編修七月陞詹事府右春坊右中允十二月充文淵閣校理十三年正月陞翰林院侍講七月大考二等第四名擢侍讀學士充日講起居注官十四年十月丁父憂十七年正月服滿九月補詹事府少詹事十九年二月陞詹事四月授大理寺卿五月因出班任意遲早部議革職得旨改降二級調用六月丁母憂二十一年服滿賞頭等待衛充古城領隊大臣二十二年四月署烏魯木齊領隊大臣十二月大清一統志成全慶前充纂修得旨議敘二十三年三月調喀喇沙爾辦事大臣十月命勘驗裁屯安戶墾地開渠事宜二十四年事竣得旨交部優敘並著來京當差會伊犁大臣布彥泰疏留全慶暫緩回京會同前任兩廣總督林則徐查勘回疆各城地畝從之二十五年五月上聞和爾罕有荒地可開水利充裕命於行抵葉爾羌時將和爾罕荒地情形確切查明是否可以開墾並應否賞給無業

回戶承種交糧之處妥議具奏尋奏言和爾罕地本膏腴宜將西北之哈拉木扎什水渠並東南之和色熱瓦特大渠接引到地便可耕種惟中隔大小沙梁恐有阻滯滲漏先經葉爾羌參贊大臣宗室奕經等挑挖通流今詣進水處所勘得龍口吸溜甚緊勢若建瓴又詣各處沙梁測量水勢雖緩急稍殊皆不至有所壅滯若再施工挑辦並於沙梁衝要處砌護塊石攔釘排椿則沙土自不至坍塌入渠而渠道亦愈刷愈深良田足資灌溉又查葉爾羌爲回疆重鎮尤以巴爾楚克一處爲阨要道光十二年奏准大開屯田廣招民戶而未種之地極多並無回莊夾雜如目下有民可招應先盡巴爾楚克安插以成巨鎮而固藩籬若和爾罕祇係偏隅即使設法招民亦恐徒形單薄且與回莊錯雜更恐難以相安請給回戶承種納糧詔如所請先是全慶疏陳喀喇沙爾環城荒地及庫爾勒北山根等處可墾田一萬數千畝交署喀喇沙爾辦事大臣宗室常清履勘興辦上以開渠引水招徠戶口各事宜必應詳慎辦理諭常清暫停籌辦仍俟全慶各城事竣會同林則徐詳加覆勘妥議具奏至是全慶既還喀喇沙爾與林則徐疏言庫爾勒距喀喇沙爾二百餘里查環城一帶所用之水應於前年開濬北大渠南岸接挖中渠

一道引入新墾地內又於地內分挖支渠兩道其庫爾勒北山根地畝須用開都河之水該河南岸山根舊有龍口一處爲回莊引水之渠今新墾民田未便仍用回渠之水應展寬龍口加工修築並別挖大渠一道卽與回渠並排再於新墾之地分挖支渠四道地尾別挖退水渠一道查喀喇沙爾歷年所收房地租稅並承買紬緞價值均係普爾錢文除搭放鹽菜外每年約有餘錢三百餘串見在積存普爾錢四千四百八十四串五百四十七文此項錢文本與正項錢糧有閒且每年搭放外均有盈餘所有此次挑挖渠工加寬龍口一切經費於此項錢內撙節支用至招徠民戶事宜先經檄委章京常壽速赴烏魯木齊等處認真招致並將殷實戶頭帶至喀喇沙爾其已約定之戶先行設法搬移未約定者分投勸諭復令改屯案內各戶頭廣爲開導並令此次認種戶民招朋引類攜挈偕來許以加倍獎賞民情似尙踴躍事機順利報聞六月命赴伊拉里克履勘開墾地畝尋疏言伊拉里克係在吐魯番所轄托克遜軍臺之西該處曠地一區形勢平坦土脈腴潤土人謂之板土戈壁卽此次所墾之官荒也再行而西爲沙石戈壁約二百餘里始至山口出泉處有大阿拉渾兩水匯成一河從前渠道未開水無收束一

至沙石戈壁任其散漫潛入沙中而東邊之板土戈壁水流不到轉成一片荒灘此次辦理開墾始將極西之水導引而東即在沙石戈壁內鑿成大渠復於板土戈壁多挖支渠以資灌溉而龍口之束水石壩與下游之洩水長渠一切鉅工均經辦竣啟壩放水溜勢暢行此詳細覆勘之情形也又查伊拉里克西南北三面俱係大山沿山一帶留爲蒙古出入經由之路本不開墾其北山之麓有漢兵卡倫一座今所墾地均在滿卡以南及附近東西兩面除鹹灘外所有實在可種之地以人壽年豐四字按其地勢區形勻配編號每號各設正戶長一名副戶長二名鄉約四名公擇誠實農民充當承領凡該號內錢糧水利等事責成經理此丈地分田之情形也又查吐魯番爲新疆南北兩路適中樞紐必應安置內地戶民耕種方爲妥協據各工員分股招集由吐魯番同知取具保結造冊呈送前來每戶領地五十畝此內有父子兄弟分名承領兩三戶者俱係力能耕作之人卽不妨聽其兼領分散執照給地試種惟科則宜先擬定應照各城徵收銀課從其較多之數爲畝徵銀一分五釐計十一萬一千畝每年共應徵銀八千三百餘兩除抵吐魯番採買經費卽於新賦款內動支毋庸別行請撥外尙有盈餘銀兩抵充

經費以減調撥之數此招民安戶之情形也竊思農田以水利爲首務此次所開大渠地勢約分三大段自龍口至黑山頭一段係由西南折向東北以順向來水勢自屬得宜而黑山頭至攔河壩一段北高南下水勢偏趨於南攔河壩至分水坪一段南高北低水又偏趨於北詢之士人據稱未開渠以前水南北漫開不能一氣東注者皆由地形互有高低今有大渠以資容納卽遇大汛水有所歸但地底係碎石夾沙而水性又橫衝側激若兩岸衝刷恐渠身難免淤平是歲修保護之功斷不可少謹酌定經久章程四條一渠道應備歲修也查大小阿拉渾之水夏令漲發處處皆須防護且南北高低不一見就低處加築攔水長壩以免旁洩一交夏汛仍須加倍應通諭戶民每五十畝出夫一名輪流修治隨時疏導大汛時尤當分段承值不使衝激爲患則涓滴皆可到地樂利無窮一卡井應准酌開也查吐魯番境內地畝多係掘井取泉以資澆灌名曰卡井每隔丈餘淘挖一口連環導引水由井內通流其利甚溥其法頗奇洵爲關內關外所僅見此次墾地不無高阜之田難令渠水逆流而上應聽該戶民於鹽鹼空閒之處自行出夫挖井冬春山水微時可補不足一戶民旣衆應責成戶長約束稽查也此次所招農

民雖已取具保結良莠究難盡知異日戶逃賦歛亦難必其無見已公舉正副長鄉約諸人應卽責令切實稽查形迹可疑者報官究除其或拖延應徵銀賦亦惟該戶長等是問各承種戶民或此退彼承戶長赴官呈明換給承糧執照不准私相授受尤不准將地轉給回民耕種致滋混雜一山內蒙古仍分別界址以免交涉也查喀喇沙爾蒙古游牧在山之西伊拉里克引水灌田在山之東本不相涉道光二十一年曾經奏定章程寬留該蒙古貿易牲畜行走道路並禁止戶民進山偷掘樹株淘挖泉源此次籌議開墾亦應出示諭禁戶民不許進山該蒙古亦不得舍舊由之山路越行新開墾地致肇爭端均如所議行於是庫車阿克蘇烏什葉爾羌和闐喀什噶爾伊拉里克喀喇沙爾凡墾地六十八萬九千七百十八畝七月擢內閣學士兼禮部侍郎銜十一月回京二十六年二月授正紅旗漢軍副都統三月兼正紅旗護軍統領閏五月充廣東鄉試正考官八月提督廣東學政十二月陞刑部右侍郎二十八年轉左侍郎均留學政任三十年正月回京七月充寶錄館副總裁九月調正藍旗滿洲副都統兼署正紅旗滿洲都統正藍旗護軍統領咸豐元年正月兼署鑲藍旗漢軍統領七月兼署吏部左侍郎八月兼

署戶部左侍郎兼管三庫事務調正藍旗護軍統領十月充右翼監督二年正月復署戶部左侍郎兼管三庫事務旋調吏部右侍郎充冊封朝鮮王妃正使四月管理國子監事務七月授戶部左侍郎兼管三庫事務九月兼署鑲白旗護軍統領左翼總兵三年正月兼署正黃旗滿洲副都統五月署倉場侍郎四年三月查驗北新倉米石五月以天津紳民捐輸米石未能踴躍疏請准繳銀錢兌換鈔票卽以換鈔銀錢採買米石從之閏七月補倉場侍郎以捐輸軍餉下部優敘十月擢工部尙書管理國子監事務十一月授正紅旗漢軍都統兼署戶部尙書五年正月充經筵講官二月兼署正紅旗滿洲都統尋命往天津驗收海運米石六月事竣賞戴花翎十一月賜紫禁城騎馬充崇文門副監督十二月復兼署戶部尙書六年充會試副考官七年調兵部尙書陝甘總督覺羅樂斌奏官兵調赴安徽軍營遇有缺額請就近募補事下所司會議全慶等疏陳五弊並言營中劣弁恃募補之曾否足額難以稽考往往空缺不補但於支銷錢糧時虛開名數希圖冒銷是由原省調派不過曠日持久之虞而就近募兵直有營伍空虛之患上謹之八年五月管理宗人府銀庫事務七月承修萬年吉地工程八月兼署戶部尙書

九年五月充教習庶吉士時英人挾兵北犯請取道天津進京換約尋入大沽口攻我礮臺科爾沁親王僧格林沁擊走之全慶方在天津驗收海運米石疏陳英人驕譎請大伸天討待其窮蹙然後議撫畧言英人以憑陵上國稱雄海外一旦見中國戰勝羣夷必將瓦解勢不能不極力抗衡以僥倖於一轉其局設朝廷亟布懷柔之德則彼且益生狂悖之心我以為感之以誠彼反謂示之以弱而撫局愈不可就今聞其戰敗以來不進不退其心叵測或觀我動靜以相機施其毒心或逞彼兇鋒以走舸呼其死黨竊恐別有舉動斷不肯從此就撫而去所過慮者我之精銳盡聚於大沽旁無應援後無擁護雙港之旅已調於前營津門之備但資於土練北塘一帶又頗空虛應請斷自聖衷速簡重臣發勁旅以嚴近畿各海口之備以大僧格林沁等之援令廣東義勇擣香港以牽其援兵登州水師合旅順以截其歸路然後國威可振撫局可成上溫諭答之八月兼署刑部尙書十二月調吏部尙書十年三月充會試副考官五月授內大臣充翰林院掌院學士十二月充文淵閣領閣事十一年六月授總管內務府大臣十月調鑲紅旗滿洲都統同治元年二月御史任兆堅奏請昭雪大學士柏葑戊午科場之案劾全慶附

和定讞諭曰此案雖由載垣擅作威福深刻定罪非全慶一人之意惟以承審大員定案時不能悉心覈議輒附和成讞若僅照徇隱例降二級調用實屬輕縱全慶著加恩免其革職照議降四級調用以示薄懲四月授大理寺卿八月擢內閣學士兼禮部侍郎銜十月復賜紫禁城騎馬十一月授鑲黃旗蒙古副都統十二月充文淵閣直閣事二年正月充會試知貢舉調鑲白旗滿洲副都統十月陞工部右侍郎兼管錢法堂事務十二月遷都察院左都御史充經筵講官三年授正白旗漢軍都統兼署鑲黃旗蒙古副都統四年五月兼署鑲白旗滿洲都統充教習庶吉士六月兼署吏部尙書鑲黃旗漢軍都統八月署正黃旗漢軍都統九月以定陵工程告竣得旨全慶著交部從優議敘伊子一品廕生麟祥並著賞給郎中俟及歲時分部學習行走十一月兼署工部尙書五年二月兼署吏部尙書四月安徽巡撫喬松年奏赴京具控者除本身見被管押及年老篤疾與婦人准用抱告餘俱令本人赴京呈訴全慶遵旨議覆畧言若其人真有冤抑原審官任性偏斷本人又值疾病等事卽別無伸訴之路而地方官無所忌憚益將草率從事以累愚民旣無以達民之情又似乎防民之口更非政體所宜至誣告越訴等項

例禁綦嚴各省於審明定案時原可照例治罪則良民不至含冤棍徒亦知所儆
刁詐之弊不禁自絕正不必明示規條阻其控告從之七月管理戶部三庫事務
九月兼署刑部尙書十二月授禮部尙書再署刑部尙書六年正月充玉牒館副
總裁三月兼署正藍旗滿洲都統八月兼署工部尙書七年三月兼署吏部尙書
四月兼署鑲藍旗漢軍都統閏四月兼署正黃旗滿洲都統八年兼署吏部尙書
十年二月調刑部尙書三月兼署都察院左都御史十一年五月充翰林院掌院
學士六月命以刑部尙書協辦大學士十二年八月充順天鄉試正考官十二月
以舉人徐景春試卷磨勘斥革降二級調用光緒元年補內閣學士兼禮部侍郎
銜二年授正紅旗漢軍副都統尋授禮部右侍郎三年正月遷都察院左都御史
二月授正藍旗漢軍都統四月署鑲紅旗滿洲都統五月充教習庶吉士七月充
崇文門正監督十一月兼署禮部尙書四年三月擢刑部尙書五月命以刑部尙
書協辦大學士九月以明年己卯科全慶鄉舉重逢諭曰協辦大學士刑部尙書
全慶歷事四朝洵襄揆席品學醇粹懋著勤勞見在年近八袞重遇鹿鳴洵爲熙
朝盛事著加恩賞加太子少保銜准重赴鹿鳴筵宴以示優眷十二月充經筵講

官調工部尙書五年上恭謁東陵命留京辦事六年十一月授體仁閣大學士管理工部事務十二月全慶八十生辰御書扁額福壽字及文綺等件賜之尋充文淵閣領閣事七年正月管理戶部三庫事務六月因病疏請開缺賞假調理八月復請開缺命以大學士致仕賞食全俸全慶自道光三十年以來充鄉試覆試閱卷大臣十次會試覆試閱卷大臣四次殿試讀卷官五次進士朝考閱卷大臣三次大考翰詹閱卷大臣拔貢朝考閱卷大臣武會試校射大臣武殿試讀卷官考試試差閱卷大臣各二次武會試覆試大臣庶吉士散館考試漢教習漢膾錄漢廕生漢御史孝廉方正國子監學正學錄閱卷大臣覆勘鄉會試試卷大臣各一次八年四月卒遺疏入諭曰致仕大學士全慶學問優長老成恪慎由道光年間翰林受先朝知遇之恩洊陟正卿協贊綸扉朕御極後擢授大學士歷管部旗事務疊司文柄宣力有年克盡厥職前以重遇鹿鳴筵宴賞加太子少保銜嗣因患病奏請開缺准予致仕賞食全俸方期克享遐齡長承恩眷茲聞溘逝軫悼殊深著賞給陀羅經被派輔國公載濂帶領侍衛十員卽日前往奠醊加恩晉贈太子太保銜照大學士例賜卹入祀賢良祠任內一切處分悉予開復應得卹典該衙

門察例具奏伊子吏部郎中麟祥著賞加四品銜用示篤念耆臣至意尋賜祭葬予諡文恪子麟祥四品銜吏部郎中

宗室載齡

宗室載齡鑲藍旗人父奕果不入八分輔國公載齡道光二十一年進士改翰林院庶吉士二十四年四月散館授檢討七月陞詹事府司經局洗馬十二月充文淵閣校理二十七年三月充會試同考官五月大考三等降編修尋陞侍講七月充日講起居注官二十八年正月命在批本處行走二月轉侍讀七月陞侍講學士二十九年四月轉侍讀學士九月遷詹事府少詹事十一月陞詹事三十年四月擢內閣學士兼禮部侍郎銜十二月充文淵閣直閣事咸豐元年充前引大臣二年正月稽察中書科事務三月充會試副考官六月署工部右侍郎兼管錢法堂事務時定郡王載銓繪息肩圖題詠甚多七月御史袁甲三劾之上以載齡詩用師生稱謂顯違例禁降二級調用九月補光祿寺卿三年正月充會試知貢舉四月擢都察院左副都御史稽察東四旗覺羅學事務九月署理藩院左侍郎旋擢工部左侍郎充右翼監督十月授正紅旗蒙古副都統十一月兼署正紅旗滿

洲副都統十二月調鑲紅旗滿洲副都統充八旗值年大臣稽察壇廟大臣四年正月調工部右侍郎兼管錢法堂事務並兼署理藩院右侍郎時粵匪北竄踞河間阜城一帶命載齡督防固安黃村等處官兵統歸調遣載齡奏調帶兵官多爾濟那木凱所部察哈爾及山西官兵駐涿洲與健銳營翼長雙禧合力防守並以副都統烏爾棍泰駐軍良鄉爲涿州後路聲援從之三月賊陷山東臨清州載齡疏請親往設防雄縣諭曰固安地屬阨要載齡駐此居中調度各路官兵聲勢可以聯絡無庸移營他處雄縣防堵緊要卽著該侍郎派委得力員弁帶兵前往駐紮此時阜城餘匪尙未殄滅臨清見又失守逆猷鴟張時思竄逸京外東西各營守備萬分喫緊載齡總統諸營務宜熟籌緩急嚴飭各路帶兵大員實力防範斷不可稍有疏虞尋欽差大臣勝保克臨清餘匪南竄四月阜城餘匪突竄連鎮僧格林沁督師追之賊窮蹙五月以賊已遠遁疏請酌撤防兵節糜費如所議行七月回京會四川總督裕瑞被劾命載齡往按之十一月奏結因疏陳山西陝西四川捐輸款項侵蝕濫銷諸弊請敕各督撫嚴查參辦並條上章程五則下部議行時黔匪逼近蜀境上以載齡在川命嚴飭地方勸諭鄉團以助聲勢尋偕成都將

軍樂斌飭提督萬福赴防瀘州臬司曹澍鍾重慶鎮阜陞督防綦江賊屢撲隘口均擊走之十二月命署陝西巡撫尋調刑部右侍郎仍留署任五年三月疏言前撫臣王慶雲請將發遣新疆官犯准其捐輸改發內地此不過爲一時經費起見恐情節稍輕可改內地者無多則捐數何裨於國計而此端一開行險徼倖之徒將肆意妄爲絕無忌憚幸免者自謂彌縫之巧發覺者亦恃可以改戍而不恐所得小而所失大請卽停止以儆官邪上韙之旋兼署陝西提督四月調戶部左侍郎兼管三庫事務仍署陝西巡撫五月敍固安防堵功賞戴花翎八月詔回京十一月授泰寧鎮總兵兼總管內務府大臣七年請賞還守護陵寢兵役半米下所司議行八年因病請開缺回旗調理允之十年病痊十一年四月署禮部右侍郎十月授刑部右侍郎管理光祿寺事務署正藍旗漢軍副都統十一月調吏部左侍郎十二月充經筵講官同治元年正月授鑲黃旗漢軍副都統二月調正紅旗滿洲副都統八月充順天鄉試監臨擢都察院左都御史九月管理健銳營事務十月賜紫禁城騎馬充稽察官三倉大臣二年四月疏劾科道之不職者得旨罷黜嗣內閣侍讀學士鍾佩賢劾齡具疏未與同官公商會銜於甄別屬員體制

未協請下部議處尋議降二級留任九月授正紅旗漢軍都統十二月擢兵部尙書管理戶部三庫事務三年五月命直講治平寶鑑八月兼署吏部尙書四年二月命往天津查驗漕米五月回京得旨優敘七年兼署鑲紅旗漢軍都統九年正月丁父憂五月襲父爵十年充教習庶吉士十一年調戶部尙書十三年兼署刑部尙書光緒二年充武英殿總裁三年正月調吏部尙書協辦大學士二月授內大臣三月署翰林院掌院學士四年三月充實錄館蒙古總裁調正紅旗滿洲都統五月擢大學士管理工部事務六月授體仁閣大學士七月充崇文門正監督十二月充文淵閣領閣事五年三月恭題穆宗毅皇帝孝哲毅皇后神主賞太子少保銜十一月穆宗毅皇帝實錄聖訓慶成賞加二級六年因病屢請開缺一再慰留之九月病仍未痊復懇開缺詔以大學士致仕加恩賞食全俸載齡自任卿貳後凡充順天及各直省鄉試覆試閱卷大臣四次新進士及拔貢生朝考閱卷大臣各二次會試覆試閱卷大臣武殿試讀卷官考試試差閱卷大臣大考翰詹閱卷大臣各一次九年十一月卒遺疏入諭曰致仕大學士載齡持躬恪謹練達老成由道光年間翰林受先朝知遇之恩洊陟正卿朕御極後簡任綸扉歷管

部旗事務宣力有年克盡厥職前因患病奏請開缺准予致仕賞食全俸方期克享遐齡長承恩眷茲聞溘逝軫惜殊深著賞給陀羅經被派輔國公載濂帶領侍衛十員卽日前往奠醊加恩贈太子太保銜照大學士例賜卹入祀賢良祠任內一切處分悉予開復應得卹典該衙門察例具奏用示篤念耆臣至意尋賜祭葬予諡文恪子溥元襲不入八分輔國公

宗室靈桂

宗室靈桂正藍旗人道光十八年二甲一名進士改翰林院庶吉士二十年四月散館授編修六月遷國子監司業二十三年四月擢翰林院侍講學士充日講起居注官十二月轉侍讀學士二十四年正月充文淵閣直閣事二月充隨圍大臣六月授光祿寺卿九月稽察宗學十二月授通政使司通政使二十六年二月署正紅旗滿洲副都統六月授都察院左副都御史七月充順天鄉試監臨十二月上御門聽政靈桂侍班遲誤罰俸二年二十七年正月充會試知貢舉四月擢盛京兵部侍郎九月以鳳凰城邊柵與舊制圖柵里數不符偕盛京將軍奕湘往勘定界尋疏言鳳凰城池南地近海濱爲邊門極南之區南有窟窿山北有長子山

東有光土山西有柞木山四山之中半爲陷甸半爲熟田查舊存印冊所載窟窿山至長子山南山觜子二十五里指甸子爲邊今由長子山直量至窟窿山計十五里許由長子山斜量向柞木山轉至窟窿山計十七里許復由長子山斜量向光土山轉至窟窿山計十八里許均與二十五里之數不符或係當年約畧註載未曾按里行繩自未便拘執應卽該處地勢斟酌其宜若長子山直至窟窿山爲界則中間陷甸原係泥水低窪可寬可狹不無形勢變遷以致基址無憑取直若以長子山斜至柞木山池東轉至窟窿山爲界則該處尙有升科之地數千餘畝居民一百餘戶查其屋宇樹株俱非近時物與其仍以甸子爲邊易於牽混未若以就近之光土山西陂下爲邊界則形勢昭然且與鳳凰邊門一帶指山爲邊界者亦相符合如此酌定庶界限一清而邊禁可期嚴肅上謹之二十八年二月充威遠堡查邊大臣並管理威遠堡等六關口事務七月兼署盛京刑部侍郎十二月調工部右侍郎兼管錢法堂事務二十九年正月授正紅旗蒙古副都統三月兼署刑部左侍郎充正白旗族長七月充順天鄉試監臨八月充順天鄉試副考官三十年二月恭辦昌西陵工程四月轉左侍郎七月授總管內務府大臣管理

暢春園咸豐元年正月充前引大臣管理火藥局事務四月充盤查戶部三庫大臣署清漪園印鑰七月諭曰靈桂自簡任總管內務府大臣以來察其言動頗覺高興見直恭辦昌西陵工程輪應住班因病未往本日銷假召見據奏稱伊闔家患病伊母近因初喪幼孫殊深軫悼並稱奴才至工次查看懇恩俟八月初間仍同魏元烺回京我皇上以孝治天下諒無不允准之理其母病愈否自問於心可知已屬怠惰偷安意存要挾我宗室從未有似伊無出息者又奏稱阿靈阿病尙未痊吉倫泰有赴陵差使可否令吉倫泰就近照料其意欲令吉倫泰就近住班尤屬膽大妄言居心詐僞靈桂惟知眷戀妻孥全不以公事爲重卽此一節已應立予罷斥第念伊歷練未深姑示薄懲靈桂著毋庸辦理陵工並革去工部左侍郎總管內務府大臣仍留正紅旗蒙古副都統令伊痛改前非盡除委靡之習仍可再邀恩眷也二年二月兼署鑲白旗護軍統領十二月以捐備軍餉得旨交軍機處存記三年十月兼署正藍旗漢軍副都統授內閣學士兼禮部侍郎銜兼署正白旗護軍統領調鑲藍旗滿洲副都統十一月署戶部右侍郎兼管錢法堂事務因續捐餉銀得旨獎勵十二月充文淵閣直閣事四年正月會陳籌款採銅加

鑄議畧言寶泉局鼓鑄需銅三十餘萬斤上年因局銅短絀奏准將歷年積存鉛三百五十萬餘斤令鑪匠在局煎鍊計可得清銅十二萬斤杵銅四十八萬斤又局存低銅一百萬斤可鍊得淨銅五六十萬斤又天字庫創獲盈餘八成銅十二萬九千餘斤低銅四萬九千餘斤黃字庫盤獲盈餘碎銅六萬五千斤十成銅一萬斤共創獲局庫銅二十五萬四千餘斤請一併歸入正項統計煎鍊所獲並盤出盈餘銅斤共一百萬餘斤約敷三四月鼓鑄之用惟煎鍊尙需時日而銅運難期接濟擬於卯錢正額外設法籌款採銅加鑄卽新創獲局庫餘銅撥出十萬斤配搭局存鉛錫發給四廠六十鑪仍按正月分卯錢分兩以五萬銅鑄當五十大錢以五萬銅鑄當十大錢共抵制錢五萬餘串除去銅鉛錫價本及工料錢外可多制錢一萬五千餘串所有應餘銅本擬請陸續歸款此時無庸全扣多得錢文亦請無庸解部按照市價分別成色在局收買商銅仍將局存鉛錫按成配搭分發各鑪自二月起再照新章分兩一律鼓鑄鑄出之錢除扣還鉛錫價本外餘盡數買銅周而復始如所請行六月兼署正黃旗漢軍副都統七月署戶部左侍郎兼管三庫事務五年二月兼署正白旗護軍統領七月補進文職六班十一月稽

察中書科事務七年閏五月署刑部左侍郎十月調理藩院右侍郎十二月兼署工部右侍郎兼管錢法堂事務八年五月充稽察壇廟大臣補進武職六班六月調刑部左侍郎八月充崇文門副監督十一月察哈爾牛羊羣委固山達翰克濟爾噶勒等呈控總管副總管更改舊章把持營私牽涉歷任都統家人並京城通事書吏人等得贓各款副都統慶昫提訊供詞前後不符請交部訊辦上命靈桂馳驛前往察哈爾確勘旋訊得總管扎克都爾副總管格呢瑪給副都統家人銀兩屬實均論如律九年三月復署工部右侍郎兼管錢法堂事務五月以誤戴無纓冠入紫禁城革職留任尋賞三品頂戴八月充順天鄉試副考官十一月因刑部承審司員於革商馬錫祿等欠繳官項奏明嚴追之案辦理草率未能先事查出奪俸二年十年三月上三旬慶辰賞還二品頂戴尋以濫保郎中慶綱京察一等降二級調用得旨改降二級留任尋署工部右侍郎兼管錢法堂事務復因會勘秋審失入降一級留任是月充會試知貢舉閏三月以題名錄呈進遲誤下部議處十一年兼署鑲藍旗護軍統領同治元年八月署管理戶部三庫事務十一月充左翼監督二年三月兼署都察院左都御史補進武職六班八月兼署戶部

左侍郎兼管三庫事務正白旗蒙古副都統十二月充實錄館副總裁三年四月兼署鑲白旗護軍統領七月以江寧克復賞加一級復兼署戶部左侍郎兼管三庫事務八月兼署鑲黃旗護軍統領十月兼署鑲白旗蒙古副都統十一月充稽察內七倉大臣四年閏五月員外郎喀呢音布呈控陵寢司員冒領工項並該管大臣及司員等勒索書吏錢文等款命靈桂按其事尋訊明書吏魏成泰侵蝕官項貝子載華奉恩輔國公恩弼泰寧鎮總兵麟翔及司官定昌等索賄皆實治罪降革有差先是熱河都統麒慶劾已革台吉伯和濟雅私放護衛念誦黑經勒派馬匹請旨將公銜撤銷並飭理藩院議罪至是伯和濟雅叔祖母胡氏呈控麒慶聽受請託被罪冤抑八月命靈桂往鞫之伯和濟雅翻控皆虛論如律十一月充國史館副總裁五年八月兼署戶部左侍郎兼管三庫事務十二月授正藍旗蒙古都統嗣以文宗顯皇帝實錄聖訓慶成賞加三級旋擢都察院左都御史六年正月充專操大臣二月充管理新舊營房大臣三月署工部尙書十月賜紫禁城騎馬七年二月兼署鑲白旗蒙古都統八月署禮部尙書八年八月兼署鑲藍旗漢軍都統十二月充經筵講官九年正月署兵部尙書八月署刑部尙書十年正

月充崇文門正監督二月授理藩院尙書十一年六月兼署禮部尙書七月調禮部尙書十二年兼署鑲白旗蒙古都統十三年四月兼署鑲白旗滿洲都統十月充八旗值年大臣十二月奉皇太后懿旨恭理穆宗毅皇帝喪儀光緒元年二月兼署刑部尙書充實錄館總裁九月穆宗毅皇帝孝哲毅皇后梓宮奉移山陵饗殿禮成賞加三級二年閏五月兼署鑲藍旗漢軍都統七月兼署鑲紅旗滿洲都統九月兼署正黃旗蒙古都統充玉牒館副總裁三年正月兼署戶部尙書二月兼署正黃旗蒙古都統七月兼署鑲藍旗漢軍都統四年正月兼署正紅旗滿洲都統三月管理理藩院事務五月調吏部尙書八月兼署鑲紅旗蒙古都統十月兼署禮部尙書十一月兼署正紅旗滿洲都統五年三月穆宗毅皇帝孝哲毅皇后梓宮永遠奉安禮成賞加二級七月充崇文門正監督九月充繙譯鄉試正考官十一月以恭修穆宗毅皇帝實錄聖訓慶成賞加太子少保銜六年九月管理光祿寺事務十一月命以吏部尙書協辦大學士十二月補進內大臣班七年三月命恭理孝貞顯皇后喪儀六月兼署正藍旗漢軍都統閏七月充覆覈朝審大臣九月稽察欽奉上諭事件處嗣以孝貞顯皇后梓宮永遠奉安隨入地宮賞加

二級尋管理戶部三庫事務十月擢大學士十一月授體仁閣大學士十二月充文淵閣領閣事九年充武英殿總裁十年三月充翰林院掌院學士教習庶吉士五月管理吏部事務八月充覆覈朝審大臣十月授武英殿大學士靈桂自道光二十八年以來充順天及各直省鄉試覆試閱卷大臣九次會試閱卷大臣拔貢生朝考閱卷大臣考試漢廕生閱卷大臣各三次進士朝考閱卷大臣考試試差閱卷大臣考試漢御史閱卷大臣各二次殿試讀卷官繙譯會試覆試外省繙譯鄉試並覆試閱卷大臣考國子監學正學錄閱卷大臣各一次十一年卒遺疏入諭曰大學士靈桂老成端恪學問優長受先朝知遇之隆由翰林洊陟正卿懋司文柄朕御極後復加委任擢晉綸扉兼理部旗事務宣力有年克勤厥職前以微疴給假調理方冀即日就痊長資倚畀遽聞溘逝悼惜殊深著賞給陀羅經被派輔國公載濂帶領侍衛十員即日前往奠醊加恩贈太保照大學士例賜卹入祀賢良祠任內一切處分悉予開復應得卹典該衙門察例具奏伊子孚會著俟服闋後以六部員外郎即補用示篤念耆臣至意尋賜祭葬予諡文恭子孚會工部員外郎

文煜

文煜費莫氏滿洲正藍旗人由官學生於道光四年考取庫使七年充國史館收掌官十三年補太常寺庫使十八年調光祿寺庫使十九年補筆帖式因承辦蒙古王公表傳等書告成議敘以小京官陞用二十二年大清一統志書成以主事遇缺卽補二十三年京察一等記名以理事同知通判用尋選補泰陵承辦事務衙門主事二十四年調刑部主事二十七年陞員外郎二十九年三月陞郎中三十年六月京察覆帶引見奉旨記名以道府用九月授直隸霸昌道咸豐二年擢四川按察使三年倡捐軍餉賞戴花翎旋陞江寧布政使四年欽差大臣琦善歿於揚州營次所部練勇及江北糧臺事務上命文煜接辦五年二月粵匪由瓜洲東竄沙頭港文煜遣勇擊退賊復由沙頭港對岸紮簿競渡文煜督所部協同艇師堵禦開礮轟擊賊大潰竄回瓜洲尋以沙頭距瓜洲東十四里爲裏下河門戶賊屢圖窺伺而沿江十餘里地面空廓因修築土城礮臺爲堵擊計復疏請添募練勇以資守禦上嘉之旣而瓜洲賊竄踞揚州圖竄裏下河文煜督飭將弁晝夜嚴防三月賊於萬福橋西岸大肆焚掠文煜督軍殊死戰斬悍賊數人又斬馬步

賊百餘人賊勢大挫七年調補江蘇布政使命辦理江南軍營糧臺時糧臺支應冒濫文煜力求撙節悉按成例給發各營不遵者疏劾之八年二月提督和春劾文煜辦事拘泥命來京另候簡用六月補直隸布政使九年五月英人犯順泊船大沽海口科爾沁親王僧格林沁督勇截剿英軍少卻上以駕馭外夷未有不歸於議撫者命文煜隨同直隸總督恆福迅往北塘設法辦理八月擢山東巡撫十月皖省捻匪竄圍山東曹縣別股由定陶擾安陵距曹州府城四十里文煜以皖捻屢窺東境其不敢深入者徒以曹單未破懼我師襲斷歸路今既由曹縣竄安陵實欲牽制我師以便伺隙爲進攻之計曹縣不守則寇入門庭不但曹郡危卽東昌濟寧及直隸大名順德皆罹其害爰檄曹州鎮總兵郝上庠會合曹縣兵勇內外夾擊捻衆大潰安陵捻匪亦爲兵勇擊退十年二月捻匪又竄擾單縣分股撲嶧縣之得勝牖文煜遣將擊走之山東肅清時風聞英人欲擾登州文煜親往履勘擇要分布尋英法兩國輪船占踞煙臺文煜疏言敵營牛馬車輛皆陸路所用者如由水路赴天津當從煙臺放舟至大山南之祈口其處爲走天津捷徑如由登萊青武四府陸行計程千數百里山險徑雜中有大清河間阻如伏軍要隘

待之誘使深入不難制勝但恐敵情狡詐未必棄舟行險耳聞彼有探聞利津至天津陸路遠近之說者或由利津登陸查利津口門內地皆斥鹵草木不生數十里寂無村落平日行旅猶不便之敵情雖獲豈能冒險而來惟既問及路程自宜豫爲防備且利津與海豐近海豐與直隸鹽山慶雲等縣接壤應派兵專駐利津擇要扼守濰縣所屬之韓亭東距登萊西距青武尤關要害臣卽駐此以便居中策應上皆避之尋煙臺洋船北駛踞直隸北塘莊分撲新河軍糧城唐兒沽大沽一帶而山東捻匪復圍濟寧州城文煜分軍捍衛通州仍率衆馳剿捻匪濟寧解嚴十二月以欠解京餉有旨降爲三品頂帶十一年正月賞二品頂戴署理直隸總督時白蓮教首張繼善等謀逆連陷曲周清河及山東之陽穀莘縣等城文煜會同兵部侍郎勝保馳往攻剿疊勝之擒張繼善餘衆悉散事聞有詔嘉獎十月授直隸總督同治元年疏請豁免直屬積欠旗租略云官地租息原與民地錢糧略有區別特是認種旗地之佃多係承種糧地之人今地糧積欠豁免九年以前而旗租積欠豁免七年以前相形似覺向隅請依民糧成案一律豁免得旨議行初山東降衆張錫珠等肆擾直隸南宮冀州及新河威縣棗強束鹿等處文煜

督剿不力至是被參命革職發往軍臺效力二年七月科爾沁親王僧格林沁奏調來營差委旋捐輸京倉米石賞給四品頂戴十二月授鑲黃旗蒙古副都統三年命前赴甘肅慶陽軍營督辦糧臺尋因病疏請開缺回旗調理七年二月病痊六月授正藍旗漢軍都統七月擢福州將軍十年兼署閩浙總督十一年入覲賜紫禁城騎馬十二年回任十三年日本國兵船窺伺臺灣文煜會同閩浙總督李鶴年總理船政大臣沈葆楨疏陳籌辦臺灣防務光緒三年三月入覲命留京供職五月授內大臣四年二月補鑲白旗漢軍都統五月授都察院左都御史十二月擢刑部尙書五年兼署兵部尙書充經筵講官六年七月充崇文門正監督九月調正紅旗滿洲都統七年命以刑部尙書協辦大學士九年授總管內務府大臣十年三月命稽察欽奉上諭事件處閏五月授武英殿大學士並管理工部事務八月因病開缺調理十月卒遺疏入諭曰致仕大學士文煜恪慎持躬老成練達受先朝知遇由道員洊擢封圻朕御極後復加委任晉陟綸扉歷管部旗事務宣力有年克勤厥職前因患病准予開缺調理方冀克享遐齡長承恩眷茲聞溘逝軫惜殊深著賞給陀羅經被派載津帶領侍衛十員卽日前往奠醊加恩追贈

太子少保銜照大學士例賜卹任內一切處分悉予開復應得卹典該衙門察例具奏用示篤念耆臣至意尋賜祭葬予諡文達嗣兩江總督曾國荃江蘇巡撫崧駿疏言文煜前以孤軍當賊力扼兇鋒保全襄下河十數州縣生靈厥功甚偉請於揚郡立功地方建立專祠允之子志顏前理藩院左侍郎志鑑花翎工部候補員外郎志忠花翎戶部候補員外郎志增志森志泰志洽均筆帖式

寶璽

寶璽索綽絡氏滿洲鑲白旗人道光十八年進士以主事用分禮部二十三年補官二十六年充玉牒館纂修二十七年擢詹事府右春坊右中允二十八年轉左春坊左中允二十九年京察一等九月陞翰林院侍講三十年六月充實錄館纂修十二月陞侍講學士咸豐二年七月轉侍讀學士十二月寶璽以粵匪竄楚疏請敕鄰楚省分各督撫查照嘉慶年間剿辦川楚教匪成案力行堅壁清野之法上韙之四年六月充日講起居注官命往三音諾顏賜奠十二月授內閣學士兼禮部侍郎銜充文淵閣直閣事五年充順天鄉試監臨十一月補禮部右侍郎六年充會試知貢舉五月授正紅旗蒙古副都統十一月宣宗成皇帝實錄聖訓慶

成賞加二級十二月調正紅旗滿洲副都統七年調戶部右侍郎兼管錢法堂事務八年三月寶泉局鑪棚不戒於火下部議處寶鋆奏請另購民房改地設鑪以節經費從之八月充浙江鄉試正考官十一月浙江巡撫監臨官胡興仁奏請於廣額內加中官卷一名部議胡興仁違例奏請將寶鋆及副考官馬佩瑤一併鐫級留任時已榜發寶鋆專摺奏聞奉批諭加中官卷無論有無私人總覺有意見好不料寶鋆素以果敢自命者亦如是瞻徇此次部議亦屬過輕朕本欲將汝等降調因思馬佩瑤職分較小未免向隅故酌量從寬非謂成事不說也九年充順天鄉試監臨尋以濫保撤任旗員坐降二級調用上加恩改爲降四級留任十年正月命往天津驗收海運米石二月奏請嚴定章程豫杜轉運流弊三月命赴通州查米寶鋆偕倉場侍郎廉兆綸奏請嚴治偷米船戶罪又劾監督貽誤車輛交部議處均詔如所請五月授總管內務府大臣九月署管理戶部三庫事務尋以英人內犯寶鋆專管之三山被掠奉詔切責撤去巡防降爲五品頂戴一切差使暫停開缺十一月諭曰此次辦理巡防寶鋆當喫緊之際尙在任事著加恩賞還二品頂戴十一年三月管理戶部三庫事務兼署正白旗漢軍都統復兼署左翼

前鋒統領七月授鑲紅旗護軍統領十月命在軍機大臣上行走賜紫禁城騎馬
尋充實錄館副總裁總理各國事務衙門大臣十一月調鑲黃旗護軍統領十二
月命偕恭親王總司稽察定陵欽工及應行各事宜同治元年正月調左翼前鋒
統領京察屆期詔嘉寶鑿實力勸勤和衷共濟下部議敘尋轉戶部左侍郎兼管
三庫事務兼署戶部右侍郎兼管錢法堂事務二月擢戶部尚書兼署正白旗滿
洲都統七月充崇文門副監督九月兼署兵部尚書二年正月調鑲藍旗滿洲都
統八月管理戶部三庫事務是月奏劾壽莊和碩公主府首領太監張玉蒼出言
無狀得旨太監倚勢作威陵辱大臣殊出情理之外若不嚴懲流弊何所底止張
玉蒼著革去首領太監交慎刑司嚴行審訊按律治罪十二月充實錄館總裁三
年五月治平寶鑑書成奉慈安皇太后慈禧皇太后懿旨命大學士瑞常等每日
輪班進講寶鑿與焉七月以江南江寧府城克復粵匪蕩平賞加太子少保銜並
賞戴花翎十月兼署刑部尚書四年三月充會試副考官尋命佩帶總管內務府
印鑰四月兼署翰林院掌院學士寶鑿以軍機處事務煩重籲懇開總管內務府
大臣缺允之九月文宗顯皇帝孝德顯皇后梓宮永遠奉安定陵以工程堅固下

部議敍子八品筆帖式景灃恩賞員外郎十二月文宗顯皇帝實錄聖訓慶成得旨賞加二級姪景曾恩賞舉人六年五月職員楊廷熙呈由都察院轉奏請撤同文館語涉總理各國事務衙門恭親王偕寶璽等奏請將楊廷熙所奏十條派大臣覈議並請暫開總理各國事務衙門差使聽候查辦上不許諭曰此係爲楊廷熙摺內有專擅挾持等語當此時事多艱該王大臣等當不避嫌怨力任其難豈可顧惜浮言稍涉推諉六月旱兼管順天府府尹萬青藜府尹胡肇智直隸總督劉長佑奏陳籌議備荒事宜疏下戶部議奏寶璽等覆奏畧言從古救荒之策縷析條分或先事豫圖或事後補救不俟勘報則災分難知稍事因循則民命已殆要在隨事體察情形認真辦理查原奏所稱飭屬開常義二倉出借口糧暨由鄰封協撥並令官紳酌設粥廠各節自爲先事豫圖最關緊要所請截撥通倉漕米十萬石並請撥給倉存豫東粟米十萬石係先事救荒之用又請由部庫撥銀數十萬兩並係事後普賑之用除先行籌備銀二十萬兩一俟議定章程奏報到日卽行撥給外其所請糧米粟米見在京倉支絀兵糈缺乏原不應再議撥給惟救荒急於星火兼尹等爲民請命何敢稍事拘泥擬請於本屆江浙海運漕糧頭批

內撥給稷粳米十萬石山東河運漕糧頭批內撥給粟米十萬石統由兼尹等委員赴津領取天津道專司分撥其順屬撥米若干直屬撥米若干由兼尹等自行酌撥臣部不爲遙制總之救荒議賑民命攸關近在畿輔籌辦尤爲緊要當此倉庫支絀之際旣不惜撥銀撥米以拯窮黎兼尹等職膺疆寄宜如何竭力殫心實事求是其涿州東安定興三州縣應卽勘定災分趕緊籌賑至未據報災分各州縣如大興宛平良鄉等處務卽分別查看毋得因循誤事並卽由兼尹府尹總督等將順屬直屬賑濟事宜分別迅速奏報上慰宸廑毋庸往返函商會奏轉多周折詔如所議十二月充經筵講官七年七月以直東捻匪一律肅清詔嘉寶鋆等贊理機務昕夕慎勤賞加軍功二級是月疏上補救漕倉積弊章程畧言近日漕糧以海運爲大宗由津轉運進倉程途僅數百里而弊端指不勝屈入倉以後百弊叢生尤屬積重難返臣等詳稽成案體察事情一切固有之例或須量加損益或須切實聲明謹酌擬章程十條奏明辦理復查漕倉事務至繁且雜需員之處固多需役之處尤多立法宜詳而節目不可煩瑣用罰宜當而文義不可拘牽屬吏之考成宜嚴而必予以奮興之路兵役之稽察必密而尤貴有體恤之方本此

意以立章程當局者果能實力奉行於漕務必有益報聞十一月充方畧館總裁十年六月充國史館總裁七月充崇文門正監督十一年六月調吏部尙書授閱兵大臣九月穆宗毅皇帝大婚禮成賞加太子太保銜十二年京察屆期優敘如前八月兼署刑部尙書十二月授翰林院掌院學士十三年三月命以吏部尙書協辦大學士五月充教習庶吉士八月調兵部尙書十一月奉慈安端裕康慶皇太后慈禧端佑康頤皇太后懿旨皇帝天花之喜寶鑿著賞戴雙眼花翎十二月穆宗毅皇帝龍馭上賓寶鑿自請撤銷翎枝允之尋授體仁閣大學士管理吏部事務光緒元年二月充文淵閣領閣事實錄館監修總裁三年二月授武英殿大學士三月充會試正考官四年二月以回疆肅清詔優敘尋編修何金壽奏請遇災修省訓責樞臣諭曰前因近畿等省被災甚廣雨澤愆期業經降旨悔過省愆以冀感格天心速沛甘澍茲據何金壽奏稱見在朕躬冲幼兩宮皇太后聽政權衡雖出自上翊贊則在樞臣請責之以忘私忘家認真改過等語此次饑饉薦臻瘡痍滿目天降奇災皆由政令闕失所致軍機大臣贊畫樞要實有獻替之責若謂災諉諸天過諉諸上諒必有所不敢惟當此災廣且久朝廷宵旰焦勞無時

或釋而該王大臣目擊時艱毫無補救咎實難辭寶璽等著交該衙門嚴加議處尋議革職有旨加恩改革職留任十二月詔開去國史館總裁及閱兵大臣五年正月京察屆期詔嘉寶璽等同心翊贊共矢公忠加恩開復革職留任處分三月以敬題穆宗毅皇帝孝哲毅皇后神主賞太子太傅銜十一月穆宗毅皇帝實錄聖訓慶成諭曰監修總裁大學士寶璽在館四年始終其事著加恩伊子工部候補員外郎景灃以本部郎中卽補伊姪候補郎中景星賞給舉人准其一體會試六年五月充翰林院教習庶吉士十月命管理神機營事務七年六月詹事府左春坊左庶子陳寶琛以星變疏劾寶璽畏難巧卸瞻徇情面諭曰大學士寶璽在軍機大臣上行走有年襄辦諸事尙無過失陳寶琛謂其畏難巧卸瞻徇情面亦不能確有所指惟既有此奏自必平時與王大臣等商議諸事未能和衷共濟致啟人言該大學士受恩深重精力尙健自當恪矢公忠勉圖報稱不得稍涉懈怠軍機大臣均有獻替之責務宜殫精竭慮力戒因循積習共濟艱難用副委任九月孝貞顯皇后梓宮永遠奉安禮成得旨寶璽之子景灃著以五品京堂候補九年充教習庶吉士十年三月慈禧端佑康頤昭豫莊誠皇太后懿旨見值國家元

氣未充時艱猶鉅政虞叢脞民未救安內外事務必須得人而理而軍機處實爲
內外用人行政之樞紐恭親王奕訢等始尙小心匡弼繼則委蛇保榮近年爵祿
日崇因循日甚每於朝廷振作求治之意謬執成見不肯實力奉行屢經言者論
列或目爲壅蔽或劾其委靡或云箠篋不飭或謂昧於知人若仍不改圖專務姑
息何以仰副列聖之偉烈貽謀將來皇帝親政又安能諸臻上理寶璽入直最久
責備宜嚴姑念年老茲特錄其前勞全其末路著原品休致朝廷於該大臣之居
心行事默察已久知其竟難振作誠恐貽誤愈深則獲咎愈重是以曲示矜全從
輕予譴初不因尋常一眚之微小臣一疏之劾也十二年十月慈禧端佑康頤昭
豫莊誠皇太后懿旨原品休致大學士寶璽著加恩以大學士致仕賞食半俸寶
璽自咸豐五年以來充順天及各直省舉人覆試閱卷大臣貢士覆試閱卷大臣
殿試讀卷官進士朝考閱卷大臣庶吉士散館閱卷大臣考試試差閱卷大臣考
試漢廕生閱卷大臣考試漢教習閱卷大臣拔貢朝考閱卷大臣凡二十一次十
七年八月卒遺疏入諭曰致仕大學士寶璽忠清亮直練達老成由部曹轉列詞
垣洵陟卿貳渥荷穆宗毅皇帝知遇之隆命爲軍機大臣內務府大臣在總理各

國事務衙門行走晉擢正卿超登揆席簡任綸扉總理部旗事務補授閱兵大臣充翰林院掌院學士朕御極後深資倚畀賞加太子太傅銜欽奉懿旨管理神機營事務服官三十餘年夙夜宣勤靖共匪懈嗣以大學士致仕賞食半俸方冀克享期頤長承恩眷茲聞溘逝悼惜殊深著賞給陀羅經被派員勒載灑帶領侍衛十員卽日前往奠醑晉贈太保照大學士例賜卹加恩予諡入祀賢良祠任內一切處分悉予開復應得卹典該衙門察例具奏伊子光祿寺少卿景灃著以四品京堂候補伊孫蔭桓著賞給舉人准其一體會試用示篤念盡臣至意尋賜祭葬予諡文靖

崇綸

崇綸許氏內務府漢軍正白旗人道光三年由武舉考取筆帖式五年補官十四年陞委署主事十五年補堂主事十六年遷員外郎二十一年充殺虎口監督二十二年轉銀庫員外郎二十六年二月京察一等記名以道府用六月陞郎中二十七年充江寧織造二十八年授長蘆鹽政咸豐二年以捐備廣西軍需賞戴花翎旋補圓明園郎中三年二月授兩淮鹽運使五月復以捐備軍餉賞加布政使

銜四年八月英美二國兵船馳抵天津上命崇綸前赴保定聽候直隸總督桂良差委並諭桂良迅飭崇綸赴津會同長蘆鹽政文謙等妥籌商辦英使進口語多要挾崇綸等正言斥駁洋船遂起旋出口旋奉諭將天津辦理情形詳細咨明廣東江蘇督撫十二月擢內閣學士兼禮部侍郎銜五年正月進文職六班五月授正紅旗漢軍副都統六月署戶部左侍郎兼管三庫事務九月管理鐵錢局事務十月命管理戶部官銀錢號事務六年十一月賜紫禁城騎馬十二月陞工部左侍郎七年正月管理火藥局事務二月署戶部三庫事務三月調倉場侍郎命往天津查驗兌收海運漕糧八年二月洋船到津突入天津內河據我礮臺上令崇綸督率團練實力防守六月和議成洋船退出海口命崇綸驗收海運到京漕米八月以運通剝船有使水虧短等弊奏請改定新章上責其非是不准行十二月以通濟庫款虧欠銀兩下部察議九年以官錢鋪商人虧空牽涉籍其家解任待訊十年經恭親王等以崇綸曾辦理換約事宜出力奏請開復侍郎賞還家產九之十一年二月署倉場侍郎三月充幫辦總理各國事務衙門大臣十月實授倉場侍郎十一月調工部左侍郎署鑲黃旗滿洲副都統管理圓明園八旗內務府

包衣三旗事務十二月充右翼監督管理神機營事務同治元年七月調戶部右侍郎兼管錢法堂事務八月署左翼總兵閏八月授正紅旗蒙古副都統仍兼署鑲黃旗滿洲副都統九月署右翼總兵兼鑲藍旗漢軍副都統十月補左翼總兵兼署理藩院右侍郎調鑲黃旗滿洲副都統十二月充管理溝渠河道大臣二年署吏部左侍郎三年八月署禮部左侍郎九月署右翼前鋒統領十一月稽察內七倉事務四年三月署鑲紅旗護軍統領四月授總管內務府大臣閏五月以巡捕五營官兵疲玩命飭立限半年力加整頓五年二月充紫禁城值年大臣十二月遵查官錢分兩輕重覆奏略云見在採買銅斤成色低雜原帶有鉛不能另搭鉛斤鎔化時銅未化勻鉛已飛灰按見在每鑪發銅二千九百十六斤照額鑄當十錢一百四十五串六百五十六文除耗損鉛斤不計外按銅數覈算每文分兩只有三錢之數至鼓鑄時鎔銅倒入沙匣每枝上中下三路下路因用力下注分兩較重中路次之上路又次之驗錢時或按串徵收或按十枚覈收此所以按枚比較閒有參差及輪廓未能一律也六年二月署武英殿印鑰四月轉左侍郎兼管三庫事務七月充崇文門副監督七年六月擢理藩院尙書署鑲紅旗蒙古副

都統七月授正藍旗漢軍都統九月充武會試監射大臣十年二月調工部尙書
充紫禁城值年大臣三月管理火藥局事務九月崇綸八十生辰上賜眉梨錫羨
扁額一方壽佛一尊玉如意一柄及福壽字文綺荷囊等件十二月充經筵講官
十一年四月管理戶部三庫事務七月佩帶總管內務府印鑰十二年二月以隨
扈皇太后恭謁東陵車輛不齊車甲管束不嚴下部議處四月署造辦處印鑰八
月署鑲白旗滿洲都統十一月管理精捷營事務十三年四月署鑲黃旗滿洲都
統七月以革員李光昭具呈報效木植欺朦入奏部議革職上加恩改爲革職留
任八月充紫禁城值年大臣九月兼署吏部尙書十二月充管理雍和宮清漪園
大臣歷任得旨下部議敘四次穆宗毅皇帝兩次謁陵均命留京辦事並理藩院
鑲紅旗蒙古都統鑲藍旗滿洲都統鑲黃旗滿洲都統各印鑰光緒元年卒諭曰
工部尙書崇綸老成勤慎由內務府司員洊擢京卿陞授尙書旋補總管內務府
大臣宣力有年克盡厥職前因患病疊次給假方期調理就痊長資倚畀茲聞溘
逝悼惜殊深著加恩追贈太子少保銜賞給陀羅經被派員勒載漪帶領侍衛十
員卽日前往奠醴照尙書例賜卹並著賞銀五百兩由廣儲司給發經理喪事任

內一切處分悉予開復應得卹典該衙門察例具奏伊孫候補郎中錫麟著以內務府郎中卽補用示篤念耆臣至意尋賜祭葬予諡勤恪子壽昌兵部右侍郎孫錫麟花翎二品頂帶內務府郎中

魁齡

魁齡瓜爾佳氏滿洲正紅旗人咸豐二年進士以主事用分工部五年補官七年陞員外郎八年陞郎中同治元年二月京察一等記名以道府用十月隨同襄辦文宗顯皇帝喪儀禮成得旨專以道員用並賞戴花翎十二月授廣東惠潮嘉道二年二月調直隸通永道五月奉旨開缺以四品京堂候補交定陵工程處差委八月補內閣侍讀學士十二月陞鴻臚寺卿三年轉大理寺少卿四年二月遷詹事府詹事充日講起居注官五月陞內閣學士兼禮部侍郎銜九月署鑲紅旗蒙古副都統以文宗顯皇帝孝德顯皇后梓宮永遠奉安定陵禮成賞加頭品頂帶十二月充文淵閣直閣事五年五月陞理藩院右侍郎十二月調工部右侍郎兼管錢法堂事務六年授鑲黃旗蒙古副都統轉左侍郎尋以承辦香山櫻桃溝等處工程草率下部議處七年六月調戶部左侍郎兼管三庫事務八月署右翼前

鋒統領十一月署熱河都統八年十一月兼署刑部左侍郎充對引大臣九年六月以驗收江浙漕糧完竣下部議敘九月兼署吏部左侍郎十年調吏部左侍郎十一年四月命稽察會同四譯館事務六月授總管內務府大臣七月以失察內務府銀庫司員於咨行戶部請領銀兩彙內未經該堂官商定輒加入欠撥銀兩字樣下部察議八月充管理溝渠河道大臣九月穆宗毅皇帝大婚禮成賞加三級十二年二月上恭謁東陵以隨扈車輛不齊下部議處三月隨醇親王辦理普陀峪萬年吉地工程七月承修景陵等處工程十月賜紫禁城騎馬十三年三月充會試副考官七月承修昭西陵等處工程十一月遷都察院左都御史尋奉慈安端裕康慶皇太后慈禧端佑康頤皇太后懿旨皇帝天花之喜魁齡著賞戴雙眼花翎旋承修裕陵工程十二月穆宗毅皇帝龍馭上賓魁齡自請撤銷翎枝允之尋授鑲紅旗漢軍都統光緒元年二月命恭理孝哲毅皇后喪儀復奉懿旨派隨醇親王辦理惠陵工程七月充崇文門正監督八月兼署工部尙書九月授工部尙書管理工部火藥局內務府造辦處旋以穆宗毅皇帝孝哲毅皇后梓宮奉移山陵饗殿禮成賞加三級二年正月兼署吏部尙書八月充順天鄉試正考官

十一月奉旨偕工部右侍郎宜振承修孝陵大牌樓工程魁齡等以需費浩繁請仿照萬年吉地暨惠陵工程奏撥專款成案酌減二成按八成實銀給發並請發款採買架木均如所請十二月充經筵講官三年正月充文淵閣提舉閣事調戶部尙書充稽察內七倉大臣歷充考驗軍政閱看馬步射考試漢軍中書直隸鄉試覆試閱卷大臣殿試讀卷官拔貢優貢朝考閱卷大臣管理內務府印鑰中正殿武英殿精捷營御藥房御膳房太醫院武備院樂部各事務四年五月因病開缺十一月卒遺疏入諭曰前任戶部尙書魁齡老成練達辦事勤慎由卿貳泮陞工部尙書調補戶部尙書並補授總管內務府大臣宣力有年克稱厥職前因患病准予開缺方冀調理就痊長承恩眷茲聞溘逝軫惜殊深加恩賞給陀羅經被派員勒載激帶領侍衛十員前往奠醊照尙書例賜卹並著賞銀五百兩由廣儲司給發經理喪事任內一切處分悉予開復應得卹典該衙門察例具奏伊子福緒著賞給主事俟及歲時分部學習行走用示篤念耆臣至意尋賜祭葬予諡端恪五年三月以穆宗毅皇帝孝哲毅皇后梓宮永遠奉安惠陵禮成賞其子福緒員外郎六月以魁齡前承辦普陀峪萬年吉地工程妥協賜祭一壇子福緒員外

郎

崇實

崇實完顏氏滿洲鑲黃旗人父麟慶南河河道總督崇實道光三十年進士改翰林院庶吉士咸豐二年四月散館授編修六月陞詹事府左贊善七月充文淵閣校理以捐備軍餉賞戴花翎十月奏辦院事三年二月充日講起居注官疏請整頓京師營制如所請行三月陞侍講學士四月以續捐軍餉賞加詹事府詹事銜八月奏言國家財賦漕鹽其大端也今湖南江西江南疊被兵燹萬一江西之賊由廣信入浙江又加以大水漲溢來年漕米從何而出大江不靖商船阻隔來年鹽務從何辦起可慮者一直隸爲天下根本與山西毗連其各要隘更宜加倍防堵疆臣延緩粉飾習以爲常稍有疏失貽誤非輕可慮者二陝西據天下形勝而東北與晉爲唇齒今逆匪肆擾山西儻渡河勾結刀匪擾及關中則西阻甘肅南連巴蜀燎原之勢撲滅無期可慮者三山東爲直隸屏藩與淮徐接壤捻匪教匪雜處其間豐沛滕沂一帶連年河患嘍飢號寒者不絕於途乘間搶掠者相屬於道非有卓識偉望之臣綏定而鎮撫之此等無業窮民豈能束手待斃可慮者四

夫多一日兵則多一日餉奕經慧成等成師以出已數月矣而未見一賊米糧支放糜費無窮與其置之無用之地何如借爲進剿之資揆諸今日內外情形卽令賊匪已平而瘡痍之省凋敝之郡已壞之河道重整之鹽漕鄉勇遣散之難師旅歸伍之費駕馭稍失其宜後患卽多不測矧賊勢方張而頓兵曠日萬一遷延既久兵餉不繼更將何以應之可慮者五爲今日計北軍果振聲威南氛不難殄滅惟見在西路之賊飄忽靡常乘虛卽竄雖有勝保等竭力追剿而難於兜擊尤在各鄰省大吏不分畛域合力進剿迅殄西竄之賊卽可併力以靖江南惟求我皇上舉祖宗以來軍法踴躍用命者雖微弁不惜重賞以作士氣欺罔味良者雖大臣刻卽顯戮以服人心所謂戰勝於朝廷也疏入留中次日崇實入直上御養心殿西臺召見垂詢家世溫諭久之十二月遷通政使司通政使因各省州縣失守兼轄之上司各官處分部議過遲請明示賞罰速定去留以專職守上韙之又疏陳變通鈔法下部議行四年二月擢內閣學士兼禮部侍郎銜四月授鑲藍旗蒙古副都統五月署戶部左侍郎兼管三庫事務七月以四川學政何紹基奏參總督裕瑞收受陋規並於鄭懷江謀逆一案辦理錯誤命偕工部右侍郎宗室載齡

馳往查辦尋查明覆奏禔裕瑞職時黔匪滋事命辦理川省防剿事宜五年四月補工部右侍郎兼管錢法堂事務七月因家人涉訟向刑部堂官辯論下部議處降三級調用又以迴奏失實再降一級調用八年補太僕寺少卿九年三月遷詹事府詹事充日講起居注官十月擢內閣學士兼禮部侍郎銜旋授駐藏辦事大臣途次奉旨馳赴四川查辦事件十年正月補鑲黃旗漢軍副都統七月查明給事中李培祐奏參四川總督曾望顏並知府翁祖烈訐告望顏各款據實入奏上褫望顏暨祖烈職崇實旋署理四川總督滇匪李短搭藍大順等竄擾川省提督占泰擁兵冒功賊勢愈熾崇實疏劾其罪並請特簡重臣總督軍務嚴明賞罰以勵軍心詔撤占泰任交崇實嚴訊命湖南巡撫駱秉章督辦四川軍務時藍逆竄踞崇慶州之元通場省城戒嚴崇實檄軍克之藍逆又竄牛腹渡與李逆合崇實遣兵兩路夾擊賊分其黨竄仁壽青神眉州各境提督郭相忠等連戰殲之近省肅清並飭官軍會合黔兵剿平貴州土匪邊境以安十一年二月馬邊土匪何老長暨彭縣匪徒朱二九等先後倡亂均剿平之六月攻克牛腹渡賊巢崇實因粵匪滇匪紛竄川疆亟須厚積兵力疏言四川據東南上游爲西北關鍵滇匪雖屢

經痛剿而裹脅甚易未能遽滅本省營務廢弛已久雖極力整頓無如歷任日淺難期驟效駱秉章威望素著川楚各軍聞而奮興近因湖北江西賊氛未靖駱秉章移援蜀諸軍分往助剿自率所部千人駐紮重慶不卽馳赴上游誠恐軍心漸懈賊膽日張竊計江西有左宗棠一軍足能制敵劉嶽昭所部已赴下游兵力更厚自可保全駱秉章宜督率所部馳赴川省上游相機兜剿數月間定可蕩事彼時再遣得勝之師規畫東南蜀疆既靖餉項易籌不獨於鄂皖各省均有裨益卽京餉亦可源源接濟事機所在遲速輕重一轉移間所關匪細又疏言自滇匪擾蜀皇上特簡駱秉章率師督辦自維才識多有不逮百計圖維豫儲款項以待楚師之至並屢籲天恩請畀駱秉章重權自駱秉章抵順慶以後所有各營徵調無不先事咨商不自專主臣與駱秉章素未謀面而同肩鉅任卽不得稍有異同成都將軍福濟未入川境於川省兵單餉絀情形概未深悉見據咨催餉銀數萬巨款難籌轉疑臣故爲掣肘川北剿匪機宜已統歸駱秉章調度若福濟頡頏其間以督兵大臣自任號令紛歧不惟軍心無所適從將士之狡猾者轉得觀望其間互相推諉趨利就便患不勝言是福濟不必以進剿川北爲急惟宜扼要駐紮嚴

防陝南以期有備無患臣亦惟開誠相待力顧大局凡有裨益於軍務者不敢立異矯同凡無益於軍務者亦不敢勉強附和奏入上授駱秉章四川總督督辦軍務授崇實成都將軍接辦川陝防堵事宜時藍逆竄擾綿州衆十餘萬崇實與秉章合兵進剿連破賊營數十綿州圍解適回匪入川陷會理圖結滇匪遣軍擊敗之同治元年正月殲藍逆於丹棱五月以貴州官民擅殺教民御史華祝三疏參署巡撫田興恕各款命崇實派員前往確查尋查實論如律十月諭嗣後關涉教民事件責成崇實妥辦因言近來各國教士無論有無官爵輒與各省大吏抗衡地方大吏以和約內有厚待保護字樣遂不與之較論尊卑凡以屬在遠人自當仰體皇上懷柔之至意至中國從習彼教本係齊民竟亦自居顯貴遂至道路側目誹謗橫生滋事之由多係乎此請飭總理各國事務衙門悉心會議分別中外習教等威以昭定制庶爭端永息而物議亦平上韙之四年八月兼署總督十一月克松潘廳城殲匪首歐里哇等餘黨悉平十二月平瞻對逆匪時雲貴兩省賊勢猖獗圖竄川疆崇實分兵嚴防各隘並遣軍越境助剿疊克綏陽鎮雄各城五年九月以參革人員每於開復後仍發原省有礙官常疏請飭部明定章程以示

限制從之十二月又兼署總督六年以京師開設同文館疏言天文算法學有專門請飭各省選舉以備錄用不必專取正途人員入館肄習報聞七年分遣知府唐炯道員蹇閻總兵劉鶴齡諸軍敗黔賊於水源溝降其衆數萬斃苗首僞張王閏四月進克偏刀水賊巢時越嶲逆匪踞普雄山築城抗拒夷酋勒烏立茲煽惑羣夷攻城擄掠崇實飭提督周達武攻克普雄石城斃賊無算乘勝連毀夷堡生擒勒烏立茲餘黨就撫旋遣唐炯等剿貴州甕安賊擒僞王何雙福斬逆首王超凡於陣拔其城八月川師攻尙大坪克之擒逆首劉儀順秦崽崽賊無脫者捷入優詔褒勉以調度有方下部優敘十一月檄道員唐炯進剿貴州叛苗克麻哈城十二月復黃平又遣周達武等剿平竹黑大木桿叛夷八年四月復貴州清平六月攻克雲南尋甸降回酋馬天順九年八月飭道員鄧錡等軍進夷苗匪各礮寨九月會滇軍攻克永北廳城九年命赴貴州查辦事件十年六月入覲授鑲白旗蒙古都統九月充武會試監射大臣十一年賜紫禁城騎馬十二年四月署理熱河都統十月熱河東邊匪徒滋事崇實飭官軍剿平之十二月回京補刑部尙書充經筵講官十三年三月充會試副考官先後以雲南貴州肅清論功優敘五月

以羅文峪防禦訥勒和善控山海關協領和盛阿素壞營務各款命崇實前往查辦鞠實論如律光緒元年正月命偕內閣學士宗室岐元查辦奉天事件旋署盛京將軍疏劾府尹恭鏗等各款褫職遞籍遣戍有差六月查明吉林將軍奕榕等被參各款請分別治罪復疏言奉省各廳州縣向分滿漢請補惟調署不拘此例以致歷年任意紛吏臣與岐元等悉心會商與其遷就委署不如量才委用請嗣後各廳州縣缺仿照熱河之例不拘滿漢一律請補州縣各官均加理事同知通判銜以便旗民事件統歸經理下部議行先是逆匪宗三好等勾結巨匪高希珍盤踞大東溝等處築寨抗拒崇實飭官軍水陸進攻埽穴擒渠復遣兵平定廟兒溝通溝等處邊外肅清七月以奉省積弊太深具疏言興利不難難於除弊弊之習於下者易除而弊之倡於上者難除故整飭官常必由大吏始伏查奉省將軍之設迄於地方各員國初至今屢有增易在朝廷因時制宜原無歷久不變之法惟是陪都重地根本所關若使建置規模下同各省殊不足以重維繫而示尊崇目下習染所趨未便再拘成格惟有仍存五部之名以隆體制兼仿督撫之例以一事權救弊補偏大綱已立然後籌經費以資辦公則賄賂之風可息專責任以

防推諉則盜賊之源可清謹將見擬章程條分縷晰陳之一事權宜變通也奉省積弊由於旗民不和而推其本原實緣大吏之先存意見將軍於地方各官向不兼轄遇有會辦公件呼應往往不靈溯其建置之初原與五部隱相兼攝故至今公牘半多會銜厥後將軍威望漸輕而五部權力遂重其中兼尹歸於戶部與將軍更易抗衡旗民兩途各不相下雖有會稟等於虛文夫將軍鎮守地方如何慎重卽朝廷飭議所在無不首專責成今則畛域各分何以統持全局且旣督辦軍務於兵刑糧餉皆當並籌而將軍向仿京員印信亦存公署每辦一事經手多人往復兼鈐斷難機密擬請旨將盛京將軍一缺改爲管理兵刑兩部兼管奉天府府尹事務卽仿各省總督體例加兵部尙書銜另頒總督奉天旗民地方軍務關防一顆並加兼理糧餉字樣以便管帶金銀庫印鑰且可稽覈戶部出入其餘公事悉仍其舊如此則旗民文武全歸統轄機密重件亦易防閑卽糧餉兵刑悉有總理之責而三陵內務府原係本職所司惟永陵離省較遠今旣添設副都統則責有專歸其餘各部事務皆令與將軍和衷商辦此維持通省之苦衷實挈領提綱之先務也一府尹事權宜變通也察吏安民府尹最重本與兼尹相助爲理惟

兼尹關屬戶部而旗民交涉之獄又須由刑部會辦定案近年民多於旗輟輟最
甚府尹雖設有讞局審斷每不得自專往往一事而上制於戶部之兼尹旁牽於
刑部之會訊稽留往復清理良難各州縣申詳此等案情亦遂紛而無主甚至包
苴爭納徑竇互開多一兼管衙門卽多一需索地步此弊之在上者也健訟成風
意存拖累原告方控於府尹被告又控於刑部而部中司員復不遵守定章任意
收呈隨處提案問官亦有偏袒胥吏因而作奸審結無期互傳不到其中命盜重
案竟使待質囹圄多至一二十年微論瘐死紛紛無從呼訴而挾仇索賄被害尤
深至於會驗屍傷每以索費久稽動輒數月此弊之在民者也擬請旨將奉天府
府尹一缺加二品銜以右副都御史行巡撫事旗民各務悉歸專理便與將軍相
承一氣不致兩歧通省紀綱斯爲樞紐一五部事機宜變通也奉天及吉林兩省
餉需匯於戶部其任非輕不宜再兼府尹反增枝節而三陵典禮大內工程禮工
兩部各有專司皆於民間無涉至將軍雖管理兵刑而該部堂官責無旁貸五部
侍郎應仍其舊無須移動俾免紛更夫刑部之弊前已略陳相應請旨申明定例
亦如京中刑部體制嗣後惟旗民交涉罪在犯徒以上者方准該部按律定擬其

餘一概不得干預該司官等如再有違例收呈提案及相驗逾限等事徑由將軍指名嚴參以杜侵官而紓民困至兵部僅管驛丁事原簡易惟文書任意私鈔漏洩太多一言未上而通國皆知一令未頒而浮議先起甚且機密釘封往往破損此外尋常公牘積壓遺失不可勝言竊思陳奏機宜軍尹兩處多於各部今以將軍管理即可一律整齊更擬請旨將地方通同州縣各員兼理驛務所有向設驛丁准其會同兵部所派之驛站監督隨時稽察沿途逐站皆得其人文報攸關亟宜並議一奉天府治中一缺宜變通也奉省大吏太多而下僚大少未免足輕首重是以政令不齊查兼尹府尹以次少承上啟下之員爲之關捩僅有承德縣知縣聯屬之際太覺不倫治中究係京員外官勢不相洽而通省清查虧空督辦案情須有專司方資表率擬於奉省中添設首道一缺名曰奉天驛巡道闔省驛站及新設捕盜營之同通州縣悉隸其下俾得稽巡惟增修衙署招募胥役繁費殊多猝無所出擬即將治中一缺加一道銜兼行首道事務另頒奉天驛巡道關防一顆餘仍其舊事權既不參差體制較爲完備查治中本係漢缺向歸捐選嗣後應將正途出身人員改爲請旨簡放以昭鄭重一旗民地方各官宜變通也旗民

交涉之案各州縣必與城守尉等官會同辦理查其列銜之處稟將軍則尉縣並書稟府尹則有縣無尉同一公牘任意紛歧遂至守尉目中幾無府尹營私挾詐何所不爲且於地方尤有數弊旗界同居非親卽友官中公事但論私情其弊一會辦各異未能和衷彼此留難案久懸擱其弊二命盜重件遇有旗人則借強宗爲護身之符託本管爲說情之地抗拒容隱不服查拏其弊三捕盜不力州縣官處分綦嚴而城守尉佐領等官尤有專責乃盡委罪於驍騎校及領催微末諸員指名搪塞劫掠橫行致無忌憚其弊四上分其肥下受其毒曲直無從申理州縣亦遂因循是以前次請照熱河定例將地方通同以下全加理事等銜片奏在案今更擬請旨嗣後奉省地方一切案件無論旗民專歸同通州縣等官管理其旗界大小各員祇准經理旗租緝捕盜賊此外不得絲毫干預其緝捕處自城守尉以至佐領必與州縣等官一律輕重不得以屬弁隨時塞責而本地旗民尤須再申定例不許做本界武職如此劃清限制自無包庇牽掣之虞矣至各處城守尉本係宗室專缺官階同於府道責任亦遂不輕嗣後請旨簡放時擬擇宗室中諳練政事之員方能稱職如其才力不勝應由將軍隨時甄別方不至貽誤地方其

餘民界各官陞途太隘雖有京察計典奉省均屬具文是以吏治毫無振作擬併請將奉省道府同通州縣由吏部推廣陞途力加鼓勵庶幾有所激勸百廢可興是根本儲才之急務也一各大吏養廉宜變通也奉省賄賂公行已非一日原情而論出於貪黷者猶少迫於窮困者實多查將軍養廉雖名八成而官票每兩折銀祇以二錢五分入算此外一成停止一成實折計廉額二千兩實數僅五百餘金推之府尹府丞又當四成遞折實數不過二百餘金矣借此從公萬難敷衍不得已設爲名目取給下僚有節壽之賀儀有月費之攤款自兼尹刑部迄於府尹府丞凡涉詞訟之官地方無不餽送變本加厲習爲故常甚至民間訛傳委缺必酬到任必謝而營求囑託又無論矣卽有潔清自好之員迫於時勢亦姑擇受一二不敢矯異鳴高夫上官旣資於下僚下僚必斂於百姓追呼措克激成事端是以官習爲不廉而極之於縱役分贓民亦習爲不廉而極之於殺人放火典章罔顧教化不興此漏規相沿實奉省第一之大弊也竊思興廉不難道宜善養若以竭蹶辦公之力復有衣食內顧之憂不惟阨塞人材亦覺有傷政體擬請旨嗣後奉省各大吏養廉與其遞折但立虛名不如另減歸於實濟將軍旣照總督例卽

以至少省分計之養廉當一萬八千金府尹既照巡撫例養廉至少當一萬二千金然值此時艱必須力求撙節因覈各處用度將軍養廉至少非實銀八千兩不可府尹養廉至少非實銀六千兩不可而府尹內有幕脩外有役食六千之數仍慮難敷查各地方官向有攤派之款細加分別凡涉私規悉行汰去尙留公用三四千金卽令其匯解府尹衙門以補公用之不足府丞既兼學政亦係外官今既裁撤陋規其養廉非實銀二千亦難有濟以上各款可否卽由海關道徵收盈餘及新增盈餘兩項下按年支解作正開銷並懇天恩格外俯恤所有奉省督撫學政養廉均給實銀外餘各副都統五部養廉俸原額本少皆准八成實放不必疊爲折扣而將軍兼轄事繁支用尤鉅雖議養廉八千仍恐不敷所用另有津貼公費之籌亦知國用未充可減則減豈容別生枝節徒事虛糜惟關外情形迥殊各省旣欲力除積弊便當籌及通盤況乎宅鎬留豐自古不嫌優異力培根本分所當然外省養廉豈容並論在帑項所支無幾而大局所全已多苟且補苴何敢遷就自經此次議定章程後凡奉省向來各大吏一切全分半分陋規概行禁革若蹈前轍立予嚴懲在小民可稍免苛求而墨吏亦無所藉口清源正本莫切於斯

一倉差規費宜變通也奉省各旗草豆由折色以至實徵最不畫一數則任意增減田則任人歸併宗室未完之款或償取於平民富紳應納之糧反強派之貧戶浮收包攬百弊叢生而正供之外尙有盈餘謂之倉差規費每年收租例由將軍專派督催協領一員由部分派正副監督司官二員其奉派之員每納規費於本管上司始而每人不過三四千金繼則五六千金近來增至八九千金本屬私供遂無定數往往承辦各員借貸墊賠致招物議甚或藉此訛索其患仍受於民見將旗租草豆章程改爲一律無論宗室平民上中下戶酌一適中之數按畝交收以此貧民同聲感戴所不便者惟包糧之土棍及不法之豪強耳如此力加覈減仍有盈餘約在一萬五六千金竊思此項雖非正供尙於地方無礙必欲概行裁撤未免竭澤而漁與其任作私規茫無限制不如改充公費免再株求惟五部向係輪派司員計必遞推三年始受規費一次任有久暫事亦不均擬於盈餘中先提一萬金作爲五部侍郎公費每歲各分二千以資貼補而派員督辦仍循舊章餘數千金卽充軍署公費所取有定較覺光明旣化私而爲官卽非損下而益上或亦因利乘便之一端也疏入命軍機大臣九卿會議議上諭曰奉天爲陪京重

地從前積弊已深此次變通章程崇實等務宜實力奉行所有陋規悉數革除地方文武各員並著該署將軍等隨時稽察覈實勸懲其餘未盡事宜仍隨時酌度奏明辦理先是奉省宗室覺羅各項旗人往往窩庇賊匪緝捕官弁懼誣不敢搜拏以致賊匪愈熾至是崇實疏請嚴懲窩主尤之又先後拏獲盜匪郭振戴發等均實諸法二年五月查明署將軍穆圖善等被參各款請分別議處閏五月特參蒙古賓圖郡王袒庇盜匪密勒僧格一犯業經拏獲供認在熱河朝陽縣劫獄戕兵等情不諱而猶在賓圖王旗台吉充當副關差使該王尙敢移文咨取聲稱官兵騷擾蒙古地面妄拏無辜顛倒是非意存挾制其平日之袒護包庇不問可知且所獲犯阿來桂程廣學等數十案無不在該王旗當差陽託巡緝之名肆行劫掠之事是直以該王爲護符貽害地方莫此爲甚應請將該王下部議處尤之又請裁奉省日捐均如所請行旋以變通吏治前奏有未盡事宜復請詳定章程下部議行時匪首林方耿舉等肆擾西北邊境哈拉套改等處築壘負嵎崇實遣提督左寶貴統兵進攻前後七十餘戰擒首要各犯七十餘名十月因病請假並疏言奉省全局辦理年餘雖具有規模尙須妥爲區畫計自東溝以至通溝綿亙千

有餘里歷年旗民錯處墾種日多剿之不易驅之不能因時制宜祇有就地陞科設官分治之一法擬添設三廳州縣劃界分疆以資治理改練旗綠各軍設汛分防酌定營制當此諸務蝟集思慮稍有未周辦理卽虞遺漏疏上賞假兩月尋以病勢日增懇請開缺是月卒遺疏入諭曰署盛京將軍刑部尙書崇實老成練達才識俱優受先朝知遇之隆由翰林漸躋卿貳旋由駐藏大臣陞授成都將軍署理四川總督穆宗毅皇帝優加倚畀內擢正卿簡任部旗事務勤慎恪恭克盡厥職上年命往奉天查辦事件卽令署理盛京將軍剿辦馬賊整飭吏治均能盡心籌畫悉協機宜昨因患病奏請開缺寬予假期方冀調養就痊長承恩眷茲聞溘逝悼惜殊深著加恩追贈太子少保銜照尙書例賜卹任內一切處分悉予開復應得卹典該衙門察例具奏其靈柩回旗時沿途地方官妥爲照料並准入城治喪伊孫景賢著賞給舉人准其一體會試用示眷念盡臣至意尋賜祭葬予諡文勤十二月署盛京將軍宗室岐元等奏奉省紳民呈稱崇實功德在民請與原任將軍都興阿大學士文祥共建一祠以褒忠藎允之三年崇實靈柩到京命貝勒載澂帶領侍衛十員前往奠醊子嵩申刑部尙書

毛昶熙

毛昶熙河南武陟人父樹棠戶部右侍郎昶熙道光二十五年進士改翰林院庶吉士三十年散館授檢討咸豐五年六月充實錄館協修十月記名以御史用六年三月充會試同考官六月補江南道監察御史七月疏陳軍務吏治急宜整頓畧言粵匪滋擾以來沿江郡縣疊遭荼毒晉豫兩省上年聯莊抗官致煩兵力直隸亦有聚衆劫獄事宜令各督撫嗣後鄰省有警各簡精銳出境會剿不得專言防堵江南踞匪逼近丹陽窺伺蘇常蘇常產米之區海運所資又爲閩浙門戶宜令湖北安徽江西乘時進擊規復城池彼分兵來援則丹陽之賊自弱官軍必可獲勝不援則上游以次肅清合兵東下聚殲之機在此時矣夫平已熾之寇在用兵而弭未萌之患在飭吏吏治日壞多由捐復太易其囊橐充裕者皆素日朘削於閭閻其稱貸多方者亦異日取償於百姓竊思歷年籌餉例所收捐復一項有裨於捐務者甚小而有害於吏治者甚大宜令部臣分別妥議除情有可原者仍准加成捐復儻情節較重不得接近日辦過成案濫行奏請夫劣員不可寬容而賢員亦宜特擢見值需人孔亟與其求未經試驗之才不如用已著賢能之吏年

來各省州縣中或堅守城池或認真團練或安輯難民或嚴捕土匪各該上司隨時請獎無不恩施立沛但才有大小不能強同賞功止論見在之勳用人必求異日之效宜令各督撫於已著成效之員察其才可大用出具切實考語專摺保舉以備簡用原保大臣視所舉當否並予功過庶真才日出軍務地方皆收得人之效也奏入上採行之尋掌山西道監察御史七年六月劾步軍統領聯順徇私廢法上解聯順任十二月授工科給事中八年八月充順天鄉試內簾監試官九月授順天府府丞九年以順天科場案降三級留任十年五月賞加都察院左副都御史銜督辦河南團練比至疏陳豫省全局布置情形籌畫經費酌定條規十二則添築堡寨以扼要隘講求險要以便堵禦慎擇首事以資統率分選團丁以備訓練攤捐練費以備公用互爲救援以資聯絡申明號令以一衆志嚴定約束以禁頑暴公賞罰以示勸懲嚴奸宄以防內應旌忠義以作民氣而終之以實力奉行上嘉予之七月疏陳調練兵勇百姓苦累宜令裁撤八月又言捻匪竄擾陳州等處民勇毫不得力亟宜改辦鄉團撫臣堅執成見不肯遵旨辦理恐誤大局至撫臣謂抽丁調防百姓所出不過抵正供十之二三以商邱一縣論約計已七萬

兩而該縣地丁不及五萬豈得謂民力可支樂於從事上乃敕巡撫慶廉全裁民勇勸以和衷商辦毋得偏執己見十月命昶熙督辦剿匪事宜時軍駐歸德亳州擒匪犯鹿邑撥練勇擊走之其大股分路肆掠官軍九戰皆捷賊遁另股竄西北者檄副將成景等馳剿於寧陵十一年正月疏言逆捻近日出竄騎輒逾萬官軍馬隊過單步隊無以制賊且皖豫交界無險阻兵法平原曠野利騎戰今豫境團練修築寨堡辦有成效應每寨責令寨長保選壯丁一名馬一匹投效來營按馬勇發給口糧事竣各回原寨歸陳兩屬約可得馬隊三四百名上嘉其妥協命推廣設法務期多多益善俾成大隊嗣另股竄捻西偏省城圍通許昶熙撥軍援之立解城圍以未能豫爲堵禦自請議處坐降三級留任二月賊陷唐縣劾成景等褫職又言內患外侮同時並起軍令不一將士無所適從非與撫臣會合一處不足專事權而一號令於是上命巡撫嚴樹森督辦河南剿匪事宜昶熙副之仍督辦團練三月克唐縣署光州知州張席珍敗捻首趙幟良等於臨河集遊擊王天保敗陳大溘等於汝陽之萬家圩均擒斬無算五月以誤用逃犯李占標招募滋事上責昶熙任用非人下部議降三級調用暫免開缺時大河以南各府州縣團

練一律報齊因疏陳濠寨碉樓礮臺練勇之數操演徵調章程及會同官軍堵剿屢勝報聞七月飭所部討叛練苗沛霖勝之睢州杞縣息縣新蔡鹿邑永城西平各團練亦疊獲擒首拔堡寨八月嚴樹森疏稱昶熙簡練士卒督率將弁先後數十戰悉合機宜克復被踞各圩屢獲大捷請將兩次處分悉予開復從之十月陞順天府府尹仍留河南督辦團練時亳東大股逆捻撲歸德昶熙督鄉團助兵截擊斬馘甚多賊遁去十一月授太僕寺卿十二月擢內閣學士兼禮部侍郎銜仍督辦河南團練先是昶熙以文宗顯皇帝升遐籲請叩謁梓宮兼得面陳機要上念中州防剿喫重未允其請命以軍事密疏入告尋又敕昶熙會同嚴樹森刻期合各軍會擣毫捻老巢至是疏上制捻要策畧言年來剿捻未得要領者其誤有二一在專言防堵穎徐歸陳平原千里無險可扼該逆出巢往往數路同發而一路又分多股官軍分堵則兵單力絀合堵則遏一路而各路竄遏一股而各股竄猶之院無牆垣奈何尙襲守門遏盜之說乎一在無成算而輕戰賊之出竄衆數倍於我馬則十倍過之我無必勝之術僥倖一戰如上年野豬岡之敗良將勁兵大半陷沒賊燄愈張見雖遠招近募訓練講求借將於楚招勇於湘不遺餘力然

而元氣未復也至於會合各路兵力直擣老巢實爲平賊要著皖捻雖以張落刑爲盟主而劉狗蘇天才姜太林王懷義宋喜沅諸大股各統其衆陳宋穎壽淮徐方數百里無處非賊巢各路統兵大員卽能次第埽除勢難刻期淨盡若繞過小捻各巢徑擣大捻老巢舍近攻遠恐遠賊堅守堡寨於前近賊斷我餉道於後不出十日官軍自潰此會擣老巢之舉恐難以刻期集事也然捻匪與粵匪情形不同粵匪蠶屯蟻聚其勢合捻匪散處各圩其勢分其出竄也必先裝旗糾約各圩匪目及外股捻首議定人馬之數約期會齊然後分竄常十餘日始得出也其竄山東者每會於保安山龍山等處竄汴梁者在小柰集大寺集等處竄陳州者在南十字河張信溜等處地皆偏近亳州是亳州者賊之吭也計莫若擇重臣素有威望者統步隊二三十萬東三省馬隊數千駐屯亳州城內用伍員多方誤楚之法分所部爲數起此歸彼出此出彼歸循環衝突於各捻賊圩之間遇邊馬則殲之遇輜重則焚之使毫捻各股大匪無從勾結卽本股諸圩亦聲息不通惴惴焉日防官兵之至自不能裝旗出竄四出打糧俟其飢困然後以重兵次第圍剿賊無外援必易得手大股旣平小股膽落兼用招撫立可解散不必盡煩兵力矣夫防

賊於既出之後何如遏賊於未出之先剿賊於既聚之餘何如蹙賊於難聚之勢而又無勞師襲遠之危輕進損威之失所謂不戰而屈人之兵者是也查見在統兵大員威望素著爲各捻畏懼者無如科爾沁親王僧格林沁上年甫屯濟寧亳東捻匪已多薙髮潛逃者今趙浩然數萬之衆已爲僧格林沁殲盡果乘此統軍進駐亳城必能制賊死命其山東本省土匪有勝保駐兵濮范距曹單甚近自可就近剿辦以專責成至徐宿土著本少大捻其由該處竄擾山東者亦亳捻居多亳捻勢蹙可以無虞卽間有零星土匪可責成田在田吳棠與勝保前後扼截以固北路如僧營屯亳臣所部雖止五千尙稱驍勁亦當策勵各營會合剿截至亳營軍餉無論直東各省所解悉由歸德經過臣必派隊隨時護送不令少有阻滯以誤軍機又附片言今日大計以衛畿輔固根本爲第一要務然豫東者畿輔之門戶也亳州者豫東之賊源也亳州之賊不除則豫東之匪難絕卽畿輔之地不安重兵駐豫未必能兼顧東省駐東亦未能兼顧豫防惟亳爲各捻匯處之區卽北方扼要之地扼亳州正所以靖豫東靖豫東正所以衛畿輔拔本塞源較隨處補苴大有把握且蒙亳百姓皆有天良祇以偏處賊巢距官軍太遠呼訴無門不

得不苟全性命非盡甘心爲逆也況其間良民堡寨與賊圩錯處雖受荼毒不肯從逆者今尙不少若官軍聲勢一振剿撫兼施不但忠義良民同心殺賊卽附賊堡寨亦羣相就撫輔助官兵彼久經兵革之地人習戰爭附賊則爲悍賊反正卽爲勁兵奪賊燄而益軍威計無便於此者前勝保袁甲三剿捻累獲大勝皆由屯駐亳州扼其要害並賴關保德楞額馬隊之力是以所向有功前事不遠可以印證奏入上覽之時粵捻各逆合擾安徽潁州命昶熙妥籌歸陳邊防並撥所部出境會剿昶熙兵僅五千且無馬隊力殊不及同治元年正月疏陳捻氛環偪豫境苗黨兇燄日張請調前湖北宜昌鎮總兵李續燾等募精壯六千來豫以厚兵力如所請行上又敕西安將軍托明阿選西安馬隊一千赴河南聽候調遣二月毫捻劉大老淵等糾集大股疾趨豫境昶熙先期進省與巡撫鄭元善會商軍務聞警馳還至杞縣賊已圍杞上以昶熙軍在歸德未能豫籌堵遏任賊闖入詔切責之會僧格林沁軍自山東來敗賊於許岡昶熙貽書請入助城守以其遠來飢疲厚饋糗芻兵氣愈振隨飭部將與僧營合力堵剿克所占民圩斬馘逾萬餘逆由通許遁昶熙豫檄各路團勇助剿截殺無算捷聞有旨令昶熙速還歸德扼賊歸

路三月回軍宋郡時金樓教匪楊玉驄與五雙樓池南各賊寨唇齒相結屢攻未下四月會同僧營合剿乃拔王家樓五月克金樓圩盡殲其衆七月補禮部右侍郎仍命督團剿賊歸僧格林沁節制閏八月轉左侍郎時歸德屬境肅清而另股西竄逆捻受創於陝西商南縣境折奔內鄉鄧州偪近南陽鄭元善統兵出省昶熙回駐省城布置防禦十月督兵汝寧剿陳大濬等股匪尋各兵團克正陽次第收復各寨圩二年正月誅逆首張瀛林張幅林四月克邢集及尙店賊巢陳大濬竄入湖北境汝寧陳州各屬踞賊大半殲除五月調吏部右侍郎六月克張岡寨七月毫捻爲陳州各營扼擊四竄歸德又戒嚴督總兵趙鴻舉等馳往防剿遊擊呂振河敗賊於商邱虞城進拔亳州廬廟昶熙屯鹿邑旣而盡平毫北匪寨十一月諭曰毛昶熙所部勇丁原以助兵力之不足此時兵力足敷應用著卽散遣歸農該侍郎卽回京供職適陳大濬勾結苗逆餘黨羣趨汝南陷正陽信陽新蔡息縣各民寨昶熙方拔隊南征乃命俟匪股剿除再行回京三年正月轉左侍郎二月進屯息縣凡八閱月巨捻趙愾良徐文田等十餘名次第伏誅盡復所踞各寨十一月僧格林沁敗陳大濬及巨捻張總愚於光山賊西竄偪南陽昶熙馳商僧

格林沁調張曜一軍回駐唐縣飭知府湯聘珍等營馳扼苑南四年二月賊自西平潛犯汝郡昶熙扼守郡城賊退仍率所部還歸德四月僧格林沁追擒於山東曹州遇伏被害詔以昶熙未能督兵截剿令賊遠颺遺害鄰疆致重臣戰歿下部嚴議尋議降三級調用加恩改革職留任命回京供職五年九月兼署戶部左侍郎兼管三庫事務十二月充經筵講官六年充順天武鄉試正考官尋調戶部左侍郎兼管三庫事務兼署吏部左侍郎七年正月充國史館副總裁三月陞都察院左都御史兼署工部尙書七月疏陳軍務漸平宜益思寅畏因條上四事略言功成而喜者常人之同情功成而懼者聖主之深慮古昔帝王躬享承平猶且兢兢業業不自暇逸況今日巨寇甫平兵革未息滇黔秦隴烽火驚心皖豫直東瘡痍滿目戡亂安民一一尙煩宸慮敬肆之機間不容髮萬一大捷之餘偶忘乾惕則患機之萌恐有伏於今日者臣職司獻納謹陳管見一勤聖學皇上春秋鼎盛典學日新薄海內外共切瞻仰但恐親師講學爲時無多還宮之後左右近習或以功業日盛間進諛詞意氣漸盈懋修或懈昔宋莊獻太后臨朝仁宗聽內侍之言欲觀先朝寶玩莊獻太后爲言祖宗創業之艱詞氣嚴厲左右皆爲汗下臣亦

伏願皇太后於皇上還宮之餘殷殷以時事艱難宜遵祖宗成憲遜志尙學勤加啟迪俾與經史師傅之言互爲感發至於近侍之人尤宜擇年紀老成稍有識見者服事起居將見養正之功日臻堅定一崇儉節今寇亂雖漸次蕩平而流離之民尙未歸農荒蕪之田尙未盡墾非力加撙節不足以廣儲積而備緩急臣前管三庫事務見內務府借撥部庫銀兩逐年加增與道光咸豐年間不符曾經奏請撙節在案竊恐中原底定踵事增華財源未開財流不節度支告匱爲患匪輕伏願皇太后皇上崇尙節儉爲天下先一切不急之務可罷則罷之可緩則緩之庶國用可充而風俗亦漸轉移矣一飭吏治髮捻之禍雖由奸民倡亂實由不肖州縣習氣太深任用胥差魚肉百姓正供之外百計誅求私派私罰自營囊橐以致民氣不伸釀成巨患用兵以來此風尤甚卽如釐金一項原爲接濟餉需而奉行不善百弊叢生一縣之中重疊抽收一卡之中多人勒索病商病民莫此爲甚其餘弊政不可枚舉推原其故總由封疆大吏以地方多事喜用精明強幹之員而不求愷悌循良之吏不知所用俗吏惟欲見長於上司其武健嚴酷也似乎有才其聚斂權算也似乎盡職而斯民元氣剝削愈甚其弊遂至於此今東南初定畿

輔甫清兵燹遺黎不堪再擾應令各省督撫慎選良吏撫綏斯民休養生息以復富庶之舊一固根本陝西回逆土匪麕聚於北山一帶見聞大軍克捷得勝之師必將整旆西征萬一窮而思竄俟大兵雲集之後或由晉省撲河或由草地北擾宣大畿輔又形喫緊將就近派兵耶則直隸兵力本單恐難得力將調回各軍耶則往而復返又成尾追之勢此不可不熟慮者也爲今之計莫如揀派久經行陣武職之大員自率所部駐紮近京一帶以壯聲威直隸提督劉銘傳謀勇兼優威望久著其所部勇丁亦皆素嫻紀律應令該提督迅回本任並帶所部萬人留直駐守並令將直隸綠營兵丁實力訓練悉成勁旅庶陝匪膽寒不敢萌北擾之念而征西諸將亦可專意進剿疏入上嘉其剴切敷陳有裨治道優詔答之十月賜紫禁城騎馬八年六月補工部尙書十月命在總理各國事務衙門行走九年五月天津民教構釁六月命偕直隸總督曾國藩議其事七月命暫署三口通商大臣八月回京請裁三口通商大臣改歸直隸總督兼理詔從之十年正月兼署吏部尙書三月充會試副考官十一年調補吏部尙書十二年二月上謁東陵命留京辦事八月兼署都察院左都御史九月管理戶部三庫事務十三年三月兼署

禮部尙書四月充翰林院掌院學士署教習庶吉士十月恭逢慈禧端佑康頤皇太后四旬萬壽賜昶熙母姜氏御書扁額玉如意大卷綉緞光緒元年二月充實錄館總裁八月充順天鄉試正考官九月上啟鑾躬送穆宗毅皇帝孝哲毅皇后梓宮命留京辦事二年充署戶部尙書三年三月充會試副考官五月兼署禮部尙書九月充武英殿總裁四年三月復兼署禮部尙書五月丁母憂五年穆宗毅皇帝實錄聖訓慶成賞加二級六年服滿命仍在總理各國事務衙門行走七年充翰林院掌院學士八年正月補兵部尙書昶熙自同治四年以來充順天及直省鄉試覆試閱卷大臣六次優貢生拔貢生朝考閱卷大臣進士朝考閱卷大臣各三次會試覆試閱卷大臣殿試讀卷考官考試試差閱卷大臣考試漢御史閱卷大臣各二次考試漢中書漢教習漢廕生孝廉方正閱卷大臣各一次二月卒遺疏入諭曰兵部尙書毛昶熙學問優長老成練達由翰林御史洊陟京卿督辦河南團練剿匪事宜旋擢尙書充翰林院掌院學士在總理各國事務衙門行走宣力有年均能恪盡厥職前因患病賞假方冀調理就痊長資倚畀茲聞溘逝悼惜殊深著加恩追贈太子少保銜賞給陀羅經被派員勒載漪帶領侍衛十員卽日

前往奠醑照尙書例賜卹任內一切處分悉予開復應得卹典該衙門察例具奏
伊子毛繩恩著賞給員外郎伊孫毛慈望著賞給舉人俟服闋後准其一體會試
其靈柩回籍時著沿途地方官妥爲照料用示篤念耆臣至意尋賜祭葬予諡文
達子繩武侯選知府繩恩候選員外郎孫慈望光緒十五年進士工部主事

清史列傳卷五十二終

清史列傳 卷五十三

大臣畫一傳檔後編九

景廉

景廉顏扎氏滿洲正黃旗人父彥德綏遠城將軍景廉咸豐二年進士改翰林院庶吉士三年四月散館授編修九月陞侍講充國史館協修文淵閣校理四年五月充日講起居注官十二月陞侍講學士充文淵閣直閣事五年正月充咸安宮總裁四月擢內閣學士兼禮部侍郎銜五月充福建鄉試正考官六年六月授鑲白旗蒙古副都統十月充玉牒館副總裁七年正月陞工部右侍郎兼管錢法堂事務三月管理火藥局事務十一月命賜奠朝鮮八年六月轉鑲紅旗滿洲副都統七月充順天鄉試監臨九月兼署正藍旗滿洲副都統九年二月轉刑部右侍郎三月兼署吏部右侍郎十月授伊犁參贊大臣十一年六月命往阿克蘇查訊辦事大臣綿性等參款十二月鞫實以聞又案葉爾羌參贊大臣英蘊苛斂擅殺事同治元年三月奏結並言嗣後回疆命盜重案宜一體按律定擬候旨施行不

得依回子經典隨時處決上聽之四月調葉爾羌參贊大臣十二月疏陳徵收稅務情形酌量裁減詳立章程諭曰葉爾羌等城係邊疆要地英蘊等前在該處辦理各事諸多未善景廉務當隨時查察將弊端加意釐剔力求整頓三年三月因病疏請開缺調理上賞假一月嗣以拜摺後擅自交卸起程進口詔切責之令速回本任景廉行抵歸化城經將軍德勒克多爾濟代奏請假復賞假一月十月又以景廉病勢日深代懇開缺回旗諭曰景廉身膺邊寄職守攸關何得擅自起程且新疆見當多事之秋防剿均關緊要該大臣藉病推諉徑行離任謂非規避取巧其誰信之著卽革職發往都興阿軍營聽候差委四年以統兵防剿有功得旨以四品京堂補用並賞戴花翎五年賞頭等侍衛充哈密幫辦大臣六年督總兵張玉春副將范如松等軍駐甘州疏請敕撥餉銀製辦軍械得旨命剋期出關七年正月至玉門時肅州回匪竄安西州三四道溝檄張玉春擊走之景廉以哈密兵燹之餘戶口凋零商賈裹足軍食所仰惟安西敦煌玉門三州縣而肅逆窺伺久脫有失則哈密成孤注新疆門戶愈危疏請暫留後路布置防守輓運允之遂撥營先赴哈密塔爾納沁城屯防閏四月軍次安西五月張玉春迎擊回逆於車

鞭轂壩追至小宛皆捷時哈密兩爲賊所陷漢城久圯官舍民廬皆盡不可守景廉乃駐軍蔡巴什湖一帶開屯田五千畝於塔爾納沁城收集哈密飢卒以營官孔才領之命安西敦煌玉門農民各築寨堡禦賊以安秋穫於要路築空心墩臺賊至則舉禾稼之露積者畜牧之在野者悉納其中七月肅逆犯敦煌爲辦事大臣文麟所敗復回竄景廉令副將蔣富山邀擊於南乾溝張玉春設伏三水梁皆大捷逐北四十餘里有旨嘉獎八月肅逆竄十工廢堡張玉春等擊殲之時關外三州縣惟敦煌少完善出產較豐官軍養命之源亦逆匪垂涎之地景廉自督隊鎮撫之留張玉春統兩營駐安西督催轉運八年四月疏陳安敦玉三州縣捐輸軍糧分設糧臺轉運章程報聞六月西寧河州回匪出關擾玉門赤金堡安西黑河橋布隆吉爾景廉親督馬步赴援賊驚遁七月抵哈密任仍令張玉春守安西八月烏魯木齊吐魯番回酋妥得璘蘇化保等糾漢回萬餘人圖犯哈密營於沙棗泉先遣騎二千竄三堡孔才蔣富山張忻敗賊於二堡統領魏忠義趙萬海設伏草湖要西奔之賊亦大敗之九年奇台南山民團勇日馬進福張著龍口山民團勇日鄧生玉迪化石梯子山民團勇日徐學功等繞道至哈密投效景廉等給

銀令製農器各屯田其鄉立爲定西鎮西營十年四月烏魯木齊逆酋馬仲詭詞乞降帕夏亦願效順經提督成祿招撫之上以馬仲帕夏情形叵測命文麟景廉等嚴密防維不可稍涉大意致爲所給尋疏言馬仲反覆帕夏詭譎撫局斷不足恃且帕夏已赴南路恐將添調回兵意圖東犯惟有督飭各營嚴密防範以免疏虞時俄羅斯國以兵克我伊犁言將赴烏魯木齊並圖收復七月上命署將軍榮全馳赴伊犁妥籌布置詔景廉酌帶兵勇規復烏魯木齊先事圖功勿落後著又敕戶部迅撥有著之款接濟榮全景廉所部餉需九月疏言烏魯木齊爲逆回老巢阜康亦爲賊踞勢成掎角又有南路踞吐魯番之安集延與烏回旋離旋合緩之則蠻觸交爭急之則輔車相救竊以爲進攻烏城必須兵威壯盛臣所部靖邊馬步六營除駐安西三營外哈密止有馬步三營臣刻卽檄調張玉春帶後路三營馳赴哈密由巴里坤西進仍咨會巴里坤鎮總兵何瑄選綠營精兵三百名並調牧廠官馬隨同進攻統計兵勇三千餘名哈密烏魯木齊十餘站處處通吐魯番大兵西進沿途分兵守隘免致擾我後路腹背受敵則此三千餘衆分守尙形單薄進攻堅城恐難得力尤須重兵屯奇古扼賊要害方可爲規復烏城之計至

於奇古戶勇業隸文麟威儀營交孔才管帶人數多寡及分紮何處臣未深悉聞其人獷悍難制孔才係濟木薩人地方情形熟悉今爲該營統領臣商同文麟令孔才馳赴西路調齊鎮西路定西各營會集奇古一帶訓練聽調師行糧隨尤關緊要哈密軍糧支絀兵勇肘見踵決邊塞霜雪已降轉瞬嚴寒若不發給餉銀稍置衣履凍斃逃潰在所不免西征糧臺准撥銀十萬兩關內甘涼道梗一時斷難解到懇敕戶部續撥銀十萬兩迅解察哈爾由臣派員迎提尙恐緩不濟急先行派員赴烏里雅蘇臺科布多各借撥銀二萬兩並烏梁海等處購買健駝牛羊利轉運而資口食至巴里坤戶民稀少種田無幾復鮮蓋藏奇古一帶山內縱有戶民耕種收穫恐亦不多能否採買糧石供支大軍見擬派員分赴查看前任布倫托海幫辦大臣錫綸曾隨任烏魯木齊古城數年情形熟悉前在奇古帶兵極爲奮勇請敕赴營相助爲理奏入詔如所請授景廉烏魯木齊都統錫綸哈密幫辦大臣尋以關內外賊勢交訌道路梗阻運送軍餉恐有疏失請將四川湖北陝西月餉解至察哈爾轉解軍營又言大兵進駐奇古糧匱可憂屯田斷不可緩擬採買糧千餘石以備屯田至烏魯木齊戶民流寓敦煌者甚多見令願回原籍者准

隨營西進官給牛具籽種俾資生業其精壯揀選入營邊人夙耐勤勞訓練卽成勁旅亦寓兵於農之計報聞十月督軍至巴里坤十一年正月令營官金永清帶右營駐古城經理屯田以濟木薩池南大河口一路山勢險峻通迪化吐魯番爲賊往來孔道調軍駐之又令提督張玉春會同孔才辦理防剿屯墾改徐學功等團勇五營爲振武中左右前後營與靖邊馬步六營均張玉春統之定西中左右三營及定西親軍馬隊孔才統之四月疏陳兵糧不足請由口北歸綏兩道運解粟米以資軍食從之五月張玉春所部西路委員桂洪元等違令輕進至古牧地安集延襲之營官馬興業沈廷秀唐漢雲等陣亡景廉飭靖邊左營馳赴古城助守劾張玉春輕率任性摘去頂翎責令立功自效九月疏言烏城賊勢孔熾必兩路夾擊庶易得手今西路僅趙興體等團勇三營分地駐紮無大員統率人心不免渙散榮全遠在塔城雖屢奉諭旨令派兵會合沙山子民團進攻瑪納斯無如兵力甚單一時不能前進聞布倫托海聚集難民甚多半由棍噶扎拉參營中遣撤久經戰陣若有大員督帶既可夾擊烏垣且杜俄人東犯之路錫綸曾任布倫托海幫辦大臣駐科布多二年有餘西路地勢人情最熟擬令馳赴布倫托海查

看情形招募民勇且屯且戰遙爲東路聲援上以所籌尙妥如所請行十一月疏言大兵西進異常艱苦各統領撫綏得宜應示激勸民團徐學功等屢挫賊氛尤宜設法鼓勵請於烏魯木齊提屬各營缺乏虛懸者權令營中勞績員弁暫行署理稍資鼓舞允之十二月疏報孔才滋泥泉之捷上勗以激勵將士迅圖進取十二年正月穆宗毅皇帝親政景廉條上六事崇聖學開言路慎選牧令簡練軍食禁種罌粟以重農事宣講聖諭廣訓以杜異端上留覽焉四月軍次古城六月陝回白彥虎糾西寧賊萬餘出關擾敦煌圖西竄古城孤軍四面受敵近無援應上允景廉之請詔前任烏里雅蘇臺將軍金順兼程赴古城助之時瑪納斯回酋安得璘病死古牧地回目馬明爲安集延所虜二城回衆皆投安集延安夷遂擾南山窺沙山子營總依勒和布率騎往偕徐學功擊之連捷於沙棗園七月白彥虎破馬蓮井營堡掠塔爾沁城圍哈密官軍失利遂分擾巴里坤景廉令黑龍江副都統吉爾洪額巴里坤領隊大臣沙克都林扎布援之八月解哈密圍又敗賊於南湖賊西遁十月賊竄唐朝渠徐學功以計斬首逆石瀧塔十一月白彥虎等入瑪納斯擾濟木薩臺路景廉令孔才赴三臺追剿並以古城戒嚴請敕金順速

進署伊犁將軍榮全副都統孝順率所部與錫綸會合進剿上悉從之又諭曰兵機旦夕異宜辦理尤貴迅速若俟請旨飭行往返稽遲恐致貽誤嗣後景廉於就近各軍如有應行調撥之處卽由該都統調遣以期便捷尋因病疏請開缺得旨賞假一月十三年三月病甚復請開缺諭曰景廉久居邊塞爲國宣勞見在駐紮古城防務正當喫緊且金順等隊計已陸續出關尤須聲勢聯絡力圖進取以靖邊陲景廉熟悉情形未便遽易生手仍當顧全大局力疾從公勉爲其難以副委任著再賞假兩箇月在營調理遇有緊急事件仍當悉心經理毋誤戎機四月上以俄人久踞伊犁意圖侵越命陝甘總督左宗棠催令出關各軍迅速西進會同景廉籌商進剿迅將各城踞賊次第蕩平期與榮全聲勢聯絡景廉覆疏言規復烏垣宜分路進兵臣與金順由古牧地進取爲一路提督張曜由天山南直取吐魯番爲一路約期並舉使回逆與安集延不能互援奇正相生或無難擒渠壻穴第兵事旦夕千變如機有可乘自當激勵兵勇隨時進剿斷不敢謬執前見致失事機惟帶兵各大員權均勢敵不相統屬往往各存己見唐九節度之師潰於相州其時名將郭子儀李光弼皆在軍中而莫救其敗者則號令不專之故也前肅

州之久圍不克亦由於此可否請旨簡派知兵重臣作爲統帥使各路軍營均歸節制則事權一而呼應靈庶幾易於戡事六月白彥虎糾回酋馬燕飛等犯濟木薩景廉令統領興祿金永清倪敬修督隊往援屢戰皆捷賊遁回巢尋復出擾綏來檄徐學功等殲之於綏來三道河白噶達二工呼圖里克茂茂槽等處逆酋余小虎聚糧甘溝亦攻破之陣斬回酋拜林金尙保焚其糧七月授欽差大臣督辦新疆軍務九月疏陳軍務機宜及需糧需餉情形一宜分路進兵也回逆分踞烏垣各城相爲掎角陝回助虐逆燄更張復與吐魯番之安集延狼狽爲奸情尤叵測聞該逆終日操練兵馬屯積糧草將來官軍進剿必將極力抗拒彼此互援及勢蹙情急則勾結安集延由南山繞路乘虛侵犯古濟巴哈牽綴我師是以臣前奏請會同金順由古城進兵直取古牧地張曜由天山南直取吐魯番添派大員赴沙山會合沙克都林扎布錫綸等直取瑪納斯同時並舉使各城踞逆自顧不遑不能互相救應而又酌留兵勇防守古城以固根本爲巴哈兩城屏蔽且有張曜一軍進攻南路更可無內顧之憂至西湖爲回逆西竄之路兵力較單請敕涼州副都統額爾慶額率所部會孝順福珠哩等合力防剿亦可進逼瑪納斯又烏

魯木齊南有喀喇巴爾噶遜城爲通吐魯番大路若官軍先拔此城使安夷回逆隔絕不通實拊背搃吭之奇計特該處有纏回踞守必兵力稍厚始能分撥前往臣軍除營紮西路振武八營外馬步隊僅三十餘營無論由古城進兵三臺阜康等處均須節節紮營以通糧路將來克一城守一城不敷分布且所部隨征多年病故傷亡就地無從募補自應由關內添募當此糧餉支絀之時諸多掣肘容臣隨時斟酌辦理刻下祇有就見在兵力俟金順到營妥籌進剿以期無誤戎機一軍糧宜由關內轉運也關外哈密巴哩坤奇台古城濟木薩等處幅員狹小半皆戈壁產糧本屬無多兵燹之後斷難供支大軍口食伏查乾隆中平定新疆所有口糧均由關內採買關外各城安設糧臺節節遞運陝甘督臣總司其事以故呼應較靈可否援照成案請敕陝甘督臣總司後路糧臺分派委員在甘涼一帶廣爲採買源源接濟仍委司道大員駐紮肅州督催轉運由關內至哈密可用車輓運哈密西至古城山路崎嶇須用駝隻聞左宗棠前曾辦就車駝各數千爲將來運糧之需既有此項車駝分撥關內外糧臺轉運似尙不難如不敷用或雇覓商駝戶車一半運送官糧一半准令攜帶私貨免其納稅則衆情踴躍且借以招徠

商賈流通百貨糧運無阻不第見駐各營得以果腹卽添募兵勇亦足資飽騰矣一軍餉宜籌鉅款也臣前因餉需十分支絀奏請由部酌撥有著之款准部咨稱前撥專餉每月八萬兩並新疆月餉內應分一半餉銀均係有著之款已請旨敕催各省督撫按月解交軍營應用乃各省督撫於新疆軍餉不啻如秦人視越人之肥瘠漠不關心委員分往催提每次僅撥銀一二萬或數千兩而長途跋涉及至解到爲期已近一年杯水車薪緩不濟急計自十二年三月迄今一年有餘四川等省籌撥專款僅解到銀十一萬餘兩不過十分之一積欠至百餘萬之多古城諸物騰貴迥殊內地且沙磧早寒兵勇衣履齋鹽之需萬不可少望餉實同望歲臣縱極力拊循空言無補衆情缺望情勢岌岌可危懇恩敕下戶部先撥部銀六十萬兩以濟急需仍嚴催各省將欠餉埽數撥解以後月清月款毋得蒂欠俾免停兵待餉一宜速籌運腳也進兵在卽軍火口糧均宜隨時轉運若能迅克古牧地則因糧於賊固屬甚善儻稍羈時日頓兵堅城之下則轉輸必須豫籌妥協但以臣營論往返運送須駝二千餘隻見僅存三百餘委員赴烏里雅蘇臺庫倫採買均以缺乏無可購辦查蒙古素產駝隻縱差役紛繁各營時復採辦而蒙古

王公殷富者多斷不致如此窘迫誠恐辦理不善或致疑慮觀望請敕理藩院轉管轄內外盟蒙古將軍大臣傳知蒙古王公轉飭各愛曼隨時出售不准委員稍有抑勒則數千駝隻不難猝辦又言奇台古城濟木薩等處地土雖不甚廣尙堪種植若能盡力耕作軍食未始無裨奈戶口流亡殆盡近年設法招徠數百戶而餘田尙多荒蕪軍營設立官屯自屬善政惟征兵與駐防不同平時操練遇警出隊力難兼顧且耕牛農具籌畫維艱以故每年官屯僅能撥種三四百石以後大兵雲集但使本地多籌一分口食卽內地節省一分轉運將來辦理善後亦以招墾爲第一急務無如西路流民子遺無幾安敦玉地方疊遭蹂躪百姓亦多逃亡莫由招集查雍正三年曾由甘肅所屬州縣遷移戶民二千四百餘戶於敦煌以故該縣承平時較安玉兩城人煙倍形稠密可否仿照成案由甘肅各州縣遷移百姓一千戶分居奇古等處以實邊地由官發給盤費牛具籽種於明春到古則耕作尙不致後時第關內戶民能否遷移不敢遙度請敕陝甘督臣酌奪情形妥籌辦理光緒元年三月授正白旗漢軍都統命兵勇糧餉移交金順接管回京供職九月授都察院左都御史十月賜紫禁城騎馬二年正月兼署步軍統領二月

兼署正白旗蒙古都統工部尙書三月命在軍機大臣上學習行走五月充教習庶吉士七月充崇文門副監督復署工部尙書十月兼署正紅旗滿洲都統命在總理各國事務衙門行走三年正月命在軍機大臣上行走遷工部尙書管理火藥局事務二月兼署正藍旗蒙古都統四月充繙譯會試副考官十二月兼署鑲紅旗漢軍都統四年二月回疆肅清上以軍機大臣贊襄軍務夙夜宣勤下部優敘是歲畿輔旱上降旨悔過省愆切責軍機大臣等日擊時艱毫無補救交該衙門嚴加議處尋議革職得旨改爲革職留任三月署戶部尙書充管理新舊營房大臣五月調戶部尙書七月管理三庫事務八月兼署工部尙書十二月充國史館總裁五年正月京察上以景廉等同心翊贊共矢公忠開復革職留任處分二月兼署吏部尙書三月穆宗毅皇帝孝哲毅皇后梓宮永遠奉安惠陵景廉隨入地宮賞加二級六年三月充會試正考官十二月充經筵講官七年四月充前引大臣七月穆宗毅皇帝本紀告成下部議敘十二月賜服帶膝貂褂八年正月京察有旨交部議敘八月御史洪良品劾景廉及戶部侍郎王文韶於雲南報銷一案受賄鉅萬上命惇親王尙書翁同龢飭傳洪良品詳加訊問務得確據尋洪良

品供稱得自風聞無憑指實有旨派尙書麟書潘祖蔭澈底根究嗣復命惇親王尙書閻敬銘潘祖蔭張之萬麟書翁同龢侍郎薛允升會同查辦九年五月惇親王等訊明覆奏諭曰此案牽涉景廉王文韶一節見經訊明實無關說饋送及分用此款情事惟在見軍務已平該省軍需報銷與年例報銷仍前併案辦理該尙書等未經查出實屬疏忽且於司員孫家穆等並保列一等之員外郎福趾得贓均無覺察亦難辭咎景廉著交部議處尋降二級調用命仍在軍機大臣總理各國事務大臣上行走七月授內閣學士兼禮部侍郎銜九月遷吏部左侍郎十一月擢兵部尙書十二月充經筵講官十年三月諭曰欽奉慈禧端佑康頤昭豫莊誠皇太后懿旨見值國家元氣未充時艱猶鉅政虞叢脞民未救安內外事務必須得人而理而軍機處實爲內外用人行政之樞紐恭親王奕訢等始尙小心匡弼繼則委蛇保榮近年爵祿日崇因循日甚每於朝廷振作求治之意謬執成見不肯實力奉行屢經言者論列或曰爲壅蔽或劾其委靡或謂簞簞不飭或謂昧於知人本朝家法綦嚴若謂其如前代之竊權亂政不惟居心所不敢亦實法律所不容祇以上數端貽誤已非淺鮮兵部尙書景廉祇能循分供職經濟非其所

長著開去一切差使降二級調用十一年四月復授內閣學士兼禮部侍郎銜八月署鑲藍旗蒙古副都統景廉自躋卿貳以來充進士朝考閱卷大臣二次順天鄉試覆試閱卷大臣繙譯鄉試覆試閱卷大臣會試覆試閱卷大臣殿試讀卷官庶吉士散館閱卷大臣各一次尋卒十五年正月慈禧端佑康頤昭豫莊誠皇太后歸政以景廉前充軍機大臣夙夜在公襄成郅治命賜祭一壇子治麟光緒三年進士國子監司業

錫珍

錫珍額爾德特氏蒙古鑲黃旗人曾祖和瑛刑部尙書祖壁昌兩江總督錫珍由三品廕生同治七年進士改翰林院庶吉士十年散官授編修十一年二月陞侍講六月奏辦院事充文淵閣校理十二年四月轉侍讀六月陞侍講學士充日講起居注官十三年正月充咸安宮總裁十二月轉侍讀學士光緒元年四月大考翰詹列二等賞江紬袍料七月充山東鄉試正考官二年五月轉詹事府少詹事十二月陞詹事三年遷通政使司通政使四年遷都察院左副都御史五年正月坐京察保列一等之御史被劾降一級留任旋陞理藩院右侍郎二月調工部右

侍郎兼管錢法堂事務七月授正黃旗漢軍副都統八月兼署兵部右侍郎十一月調刑部右侍郎十二月管理右翼幼官學事務六年三月兼署吏部左侍郎八月兼署鑲白旗漢軍副都統九月兼署工部右侍郎十二月調戶部右侍郎兼管錢法堂事務七年二月署正白旗護軍統領三月調鑲紅旗滿洲副都統十月調吏部右侍郎坐戶部侍郎任內失察正紅旗章京冒領卹賞降二級留任旋即抵銷八年正月兼署兵部右侍郎四月調鑲黃旗滿洲副都統五月署戶部右侍郎兼管錢法堂事務錫珍以八旗學校廢弛疏請整頓略云圖治首在用人而作人必自學校祖宗深思指臂之難廣設八旗官學加意訓迪使之共底於成二百餘年人材輩出降至今日百不逮一竊維八旗生齒之繁與朝廷振拔之亟非減於昔而今不如昔者其故有二一曰學校不修八旗官學建自國初選學生設教習給膏火予陞階訓課精嚴法良意美今則奉行故事百弊叢生各旗學舍傾圮殆盡教習僅備員額不聞授受生徒其挑選學生強半假冒國家造士美意幾等於告朔餼羊一也一曰仕途太廣八旗仕進之途本寬於漢員數倍寬則循歷階資計日可待卽如捐納筆帖式入資無多何難措辦往往年未及冠卽出當差從此

束書不觀而異日之保送御史洊列京察內則京堂外則道府率由此出二也夫
前言往行非書無以傳不學則立身何所式文物典章非書無以識不學則掌故
何由知卽簿書彙案爲服官所必需不學則何以解於心而出於手一旦治煩理
劇京堂則恃有書吏外官則恃有幕友彼方日坐堂皇自謂可收羣策羣力之助
不知官聲之壞弊端之叢盡出於書吏幕友之手臣恐學日廢教日衰異時更有
求如今日而不可得者苟非盡除積弊力戒因循不能獲真才而收實效今欲實
事求是莫先於修復學舍慎選教習甄別學生然後取舊時之規模斟酌損益實
力奉行使教者真教學者真學爲清源正本之始基再於旗員筮仕之初明定章
程嚴加考覈除由考試得官外其餘但就文職皆令考於官學務須文理清通方
許服官否則仍令學習數年再請面試庶弊漸除才漸出吏治可期蒸蒸日上查
八旗官學向歸國子監管理從前之廢弛未必不因耳目難周不能兼顧今議重
修事同創始凡興工籌款用人定章諸大端斷非監臣所能獨任請於在京之進
士出身滿漢大員簡派每旗一人爲管學專員將一切整頓規模會同吏部國子
監堂官悉心妥議奏明舉辦斯培養人材之初基亦卽澄敍官方之切務疏入上

達之六月署倉場侍郎九年三月兼署刑部右侍郎四月保薦己革侍郎宗室寶廷才尙有爲請棄瑕錄用湖北荆宜施道于蔭霖請改用京秩使朝夕獻納克盡所長上以所請非是傳旨申飭六月轉左侍郎九月調倉場侍郎十年五月陞都察院左都御史閏五月充總理各國事務衙門大臣八月遷刑部尙書授鑲白旗漢軍都統管理戶部三庫事務九月管理左翼幼官學事務十一年三月命往天津與法國使臣換約六月以臺灣道劉璈被劾命馳赴福建會同巡撫衛榮光查辦得實論如律十二年正月調鑲白旗滿洲都統二月調吏部尙書三月充會試正考官七月充崇文門正監督八月以錫珍四十生辰賜銅佛如意文綺珍玩十月充會典館副總裁十三年二月丁母憂五月百日孝滿十二月充經筵講官十四年兼署鑲紅旗蒙古都統十五年二月議覆御史屠仁守處分嚴旨詰責下都察院議革職加恩改爲革職留任尋以覃恩開復三月兼署鑲黃旗漢軍都統錫珍自陞任侍郎後歷充殿試讀卷官二次朝考閱卷大臣一次鄉會試覆試閱卷大臣四次庶吉士散館閱卷大臣二次拔貢朝考閱卷大臣一次六月因病乞假八月陳請開缺再賞假一月九月卒遺疏入諭曰吏部尙書錫珍持躬端謹學問

優長由翰林洊陟卿貳豐掌文衡補授刑部尙書調任吏部尙書派充總理各國事務衙門大臣克勤厥職前因患病疊次賞假該尙書年力正強方冀調理就痊長資倚畀茲聞溘逝軫惜殊深加恩著賞給陀羅經被派奉恩輔國公載澤帶領侍衛十員卽日前往奠醊照尙書例賜卹並著賞銀五百兩由廣儲司給發經理喪事任內一切處分悉與開復應得卹典該衙門察例具奏伊子仲燊著以員外郎用以示篤念盡臣至意尋賜祭葬子仲燊恩賞員外郎

宗室奎潤

宗室奎潤正藍旗人和碩豫通親王裔孫同治二年進士改翰林院庶吉士四年散館授編修五年二月陞詹事府左春坊左中允五月大考三等降編修九月仍補詹事府左春坊左中允六年九月遷翰林院侍講十一月充日講起居注官九年三月轉侍讀閏十月陞侍講學士十二年轉侍讀學士十三年擢詹事府詹事光緒元年二月遷大理寺卿六月充浙江鄉試正考官十二月授都察院左副都御史四年五月擢禮部左侍郎十一月授鑲白旗蒙古副都統十二月充經筵講官五年五月調兵部左侍郎八月兼署吏部右侍郎十一月兼署戶部左侍郎兼

管三庫事務六年正月充會試知貢舉十月遷吏部右侍郎十一月調正白旗滿洲副都統七年二月兼署正紅旗護軍統領十月轉左侍郎八年兼署鑲黃旗護軍統領九年三月兼署戶部右侍郎兼管錢法堂事務四月充左翼監督六月以戶部司員書吏收受雲南報銷津貼銀兩事覺坐失察降二級調用十月補內閣學士兼禮部侍郎銜十一月授吏部右侍郎十年三月轉左侍郎時法蘭西搆毀越南奎潤密疏以敵人窺伺藩封宜伸撻伐並請整頓天津防務八月擢都察院左都御史十一年八月充順天鄉試副考官十二年正月授鑲黃旗漢軍都統以漢軍礮營廢弛疏請每月會同槍牌兩營合操以資精熟並請給礮手津貼銀兩以策勵之又言武成永固礮位年久未演擬於每年小雪後各旗出運二尊在盧溝河灘演練仍歸各旗專操大臣督率以符定制上韙之悉得施行九月兼署鑲黃旗蒙古都統會畿輔水災偕同官會奏乞撥米石令五城平糶從之十三年二月授禮部尙書三月充會典館副總裁四月兼署正白旗滿洲都統旋補進領侍衛內大臣班十四年二月兼署鑲黃旗蒙古都統九月禮部於皇上下大婚告祭典禮日期繕寫錯誤懿旨切責下部議堂司各官處分奎潤坐降四級留任尋充大

婚禮納采正使奉迎皇后副使時北洋通商大臣直隸總督李鴻章議於天津開辦鐵路以達通州奎潤與九卿講官等二十三人奏言津通將辦鐵路躡定地段民間廬墓遷徙生業漸失人情惶懼竊聞津通百姓赴訴於直隸總督者不下二三百起該督以奏定之事不肯據情入告上年大沽等處開辦鐵路民間紛紛遷墓其無主之墳不辨族姓不分男女合爲叢冢且多暴露行路靡不酸心然此猶海濱寥闊之區非若津通一帶居民輻輳也恭讀聖祖仁皇帝巡視河工臨溜淮套諭曰所立標杆多有在墳墓上者若依標杆開河不獨壞民田廬甚至毀民墳冢朕惟恐一夫不獲其所時存已飢已溺之心何忍發此無數枯骨我皇太后皇上以聖祖之心爲心若親見民間遷墓哀慟情形必將立予宸斷特恐中外臣工不以實情入告耳自輪船通行江海舟車已多失業見在津通之民以車爲生者約一萬人以船爲生者約三萬人以行店負販爲生者約二萬人鐵路若行之後此輩作何安置將使埠頭運貨則一隅之地所需人力無多將使分運鄉村則偏僻之區所用車輛有幾弱者轉於溝壑强者散於四方似此慘苦情形亦豈聖明之本願列聖家法事事鑒前明之失前明因兵餉不給裁減驛卒而若輩飢寒失

業起而爲盜我列祖列宗引爲鑒誠莫不以固結民心培養民命爲根本要圖今鐵路一成津通失業之民飢寒切身雖累朝之深仁厚澤久洽人心然民情良莠不一咸豐十年英人犯順卽募潮勇以爲先驅此足爲前車之鑒若輦下居民鋌而走險尤可深慮夫此舟車失業之窮民皆國家安分守法之赤子也拊循之不懈奈何反絕小民衣食之源使不得遂其生哉且中國自強之道與外洋異外洋以商務爲國本中國以民生爲國本外洋之自強在經商中國之自強在愛民外洋民數少故用機器而猶召募華工以補人力之不足中國民數繁故不用機器窮民猶以謀生無路而多出洋之人中外情形不同灼然可見伏願皇太后皇上祇承上天好生之大德仰體列聖經邦之本計俯念下民生計之艱難遠鑒前代廢興之往事將津通鐵路停止以順民心而迓天眷至於中外建言之人多以鐵路爲請未嘗非深爲邊患力圖自強之意其所陳說調兵調餉運貨運煤諸利臣等參之衆論言其利者實罕言其弊者實多竊謂事關國本民心即使利多弊少亦當停止況此事利壅於下怨歸於上從古未有爭什一之利而叢怨於民以爲自強者也疏入命北洋大臣議覆十五年正月皇上下大婚禮成詔開復處分八月

兼署理藩院尙書會祈年殿災奎潤兼管太常寺事坐疏於防護下部察議以降
二級准抵銷例請得旨改降一級留任旋署鑲白旗滿洲都統十月賜紫禁城騎
馬奎潤自光緒二年以來貢士殿試進士朝考拔貢優貢朝考庶吉士散館舉人
貢士覆試及考試試差漢御史廕生孝廉方正先後充讀卷官閱卷大臣凡十有
八次十六年卒遺疏入諭曰禮部尙書奎潤練達勤慎學問優長由翰林洊陟卿
貳疊掌文衡旋經補授尙書宣力有年克稱厥職前因患病賞假調理茲聞溘逝
軫惜殊深加恩賞給陀羅經被派貝勒載澍帶領侍衛十員卽日前往奠醊照尙
書例賜卹並著賞銀五百兩由廣儲司給發經理喪事任內一切處分悉予開復
應得卹典該衙門察例具奏伊子筆帖式寶銘著俟服闋後以員外郎補用用示
篤念蓋臣至意尋賜祭葬子寶銘進士理藩院員外郎

袁保恆

袁保恆河南項城人父甲三漕運總督自有傳保恆道光三十年進士改翰林院
庶吉士咸豐二年散館授編修三年請假送親回籍尋赴安徽隨甲三行營剿賊
五年上允甲三請留保恆於軍六年擒匪張落刑竄踞潁上甲三統豫軍防潁州

府城保恆督隊斃賊甚衆七年欽差大臣勝保奏言保恆隨甲三軍解亳州圍拔白龍王廟寺兒集雉河集賊壘奮不顧身所向克捷甲三引嫌未爲請獎本年進攻三圩保恆在礮臺晝夜督戰不少卻實爲始終奮勇請予鼓勵得旨賞侍講銜花翎八年十月安徽懷遠捻匪李大濤糾衆圖北犯壘爲官軍所創竄孫家寨官軍馬隊由銅山追賊南下保恆率步兵由潘家屯楊莊一路會剿擒斬數十奪其輜重十一月統宿營兵勇取道永城迎剿捻酋孫葵心劉狗等賊旋自陳州撲周家口北岸保恆督馬隊馳至鹿邑與大軍會追賊八晝夜及於太和大破之河南肅清賞伊勒圖巴圖魯名號上批答甲三疏有汝子奮勇衝鋒甚屬可嘉之諭九年正月隨甲三奉召回京七月充文淵閣校理八月充順天鄉試同考官甲三以漕運總督再出視師十年三月命保恆仍赴軍營聽差遣六月督馬步隊會西路師偪攻定遠累捷幫辦軍務穆騰阿移文甲三欲上其功甲三婉辭不可乃疏言世受國恩捐糜難報衝鋒冒鎬皆分所當爲且臣子年力富強必使盤根錯節藉增試力方克成有用才不敢與將士爭爵賞之榮也上諭甲三嗣後該員著有功績亦應實敘不必引嫌十一年九月叛練苗沛霖圍壽州其黨張士端等踞懷遠

築壘渦河口以阻官軍保恆統精銳五千人攻之破其壘十月邀擊懷遠叛練擒斬頗多十二月會攻定遠克之命遇翰詹應陞缺出開列在前同治元年五月擢翰林院侍講八月轉侍讀閏八月遷詹事府右春坊右庶子時甲三病篤得請解職詔安徽巡撫李續宜領其軍保恆仍留營尋丁繼母憂歸二年四月河南巡撫張之萬調保恆赴汝寧軍上可其奏既因陳州接壤安徽賊氛尙熾命甲三督飭保恆聯絡團練防剿七月甲三卒上悼惜賜卹有加詔保恆服闋後以翰林院侍講學士卽補時皖北初平保恆以江淮之民輕死好亂宜有以善其後策久安也疏宜次第舉行者八條一僧格林沁不宜輕離皖北待伏莽淨盡人心大定然後撤防一皖民不知畏官宜慎選守令假以事權僧格林沁總其成而不侵其官使得自行其威信一皖北地勢遼闊宜增置城治使官民日近政教易施奸慝易詰一江淮之民讀書明理者少平日以重然諾輕生死爲義宜廣設義學以化獷悍之習革鬪狠之風一淮南北自粵捻各賊蹂躪之後逆產絕產縱橫千餘里有主之田不及半宜查勘歸官募民屯墾方五百里可得田二十餘萬頃每頃養八口之家出屯兵一名可得強兵二十餘萬設屯衛之官綜理而訓練之以資鎮守備

徵調不費一餉而坐收富強之效萬世之利中原之福也一宜整頓兩淮鹽務以濟兵勇糧餉爲屯田經費一近日勇多兵少兵糧輕而勇糧重兵有定額勇無定額宜裁勇增兵一勇之費可養二兵卽兵額倍平時猶較養勇爲省將領滑輒則盡拔帶勇之得力者破格而補營官老弱不齊則盡拔練勇精壯者隨時而補額兵況事定後兵可歸伍而勇難遣散此尤不可不深慮而豫爲之地也一河南歸德鎮距省會及徐州鎮皆三百餘里而距壽春鎮獨遠壽春距南陽鎮尤遠非所以資控制也宜於臨淮添設一鎮而移壽春鎮於潁霍以控淮河上游使稍近南陽再移歸德鎮於蒙亳之間以制其要害更設提督統轄之使毋分畛域時江蘇巡撫李鴻章借外兵克復蘇州省城保恆因奏言外人貪而無親垂涎財賦之區欲坐收其利非眞能敵愾效順也請密飭諸臣籌處置之法嚴夷夏之防又密陳提督李世忠驕恣難制請寄諭僧格林沁曾國藩等謀裁抑之三年保恆以前所條屯田議未卽行再疏力言興屯不可緩請躬詣京師與廷臣而議上以不候督撫覆奏輒以未見施行爲詞責其自信過深不諳體制下部議處四年正月部議降一級以鴻臚寺少卿候補尋服闋先是前任順天府府尹蔣琦齡上中興十二

策稱保恆嫻武備十一月戶部尙書羅惇衍疏論人材亦以保恆在軍久武事諳練請擢用七年正月擒匪竄畿輔四月詔責湖廣總督李鴻章等滅賊保恆以皖豫各軍半甲三舊部習同甘苦自請效力戎行以竟父志得旨發往李鴻章軍營差遣委用六月大軍敗賊於商河賊首張總愚率衆東走保恆帶小隊出德平義渡口擒騎賊數十諸軍畢會偪賊於徒駭河盡殲其衆擒匪平捷入上以保恆冒暑督隊追念甲三功嘉保恆能勉承父志開復降調處分仍以翰林院侍講學士補用並予三品銜八月命赴陝甘總督左宗棠軍營聽候委用九月補官八年命筦西征糧臺得專摺奏事十一年五月擢詹事府少詹事十月遷詹事十二年請假省親旋因肅州克復賞頭品頂戴十三年二月陞內閣學士兼禮部侍郎銜八月大軍出關詔左宗棠督轉餉以保恆爲幫辦進駐肅州九月擢戶部左侍郎兼管三庫事務十月慈禧端佑康頤皇太后四旬萬壽賜保恆祖母郭氏扁額如意文綺光緒元年三月奉召回京八月兼署吏部右侍郎二年四月調刑部左侍郎九月充順天武鄉試正考官十二月疏言臺灣僻處海澨物產豐饒民番偪處非專駐大臣鎮以兵威孚以德意舉民風吏治營制鄉團事事整頓未易爲功若以

福建巡撫半歲駐臺恐閩中全省之政務道里懸隔而轉就拋荒臺灣甫定之規模去住無常而終爲具文請改福建巡撫爲臺灣巡撫駐臺灣而以總督辦福建全省事各專責成疏入下部議行三年五月請假歸葬祖母郭氏八月回京是歲河南旱飢人相食上以賑荒遲延褫巡撫李慶翱職命河東河道總督李鶴年權代之十一月遣保恆幫辦賑務保恆因奏河南被災至廣需款至急擬借各直省存公閒款及富商銀錢俟歲稔開徵提還下部議既至疏陳沿途流民狀四年正月偕李鶴年奏請截留江安漕糧九萬餘石不許請借直隸平糶餘米三萬石許之又請借用江蘇義倉積穀及臺灣捐修鐵路洋銀五十萬圓下部議奏保恆復疏言賑款遲到一日卽多斃無數窮黎乞特詔允所請並自陳籌措無方請治罪謝災民報聞尋以戶部議覆保恆借款疏飭河南布政司權歲徵出入除河工兵餉及京餉協餉能劃若干還借項保恆偕鶴年疏言豫省田賦歲收僅二百餘萬兩撥解京協各餉在常年已不支今蒙特恩蠲緩除本省外款所餘無幾非停解京協各餉十年不足補因災少入之正供清因賑多出之借項但各餉旣難久停而又無指定可望之的款則歸還不能豫必恐疆臣躊躇而不敢輕諾富商

亦觀望而不能勉從數百萬生靈何能以空言果其枵腹救荒如救焚拯溺失今不救將有不勝救不及救者當此財力艱難求無礙全局又於還款能見信者惟有緩禁川鹽行楚加抽鹽釐備抵賑需爲兩全之計時川淮鹽商爭行銷楚岸疆吏相持不能決川鹽本輕運便獲利三倍於淮保恆故請重取川釐俾資本過淮商爲漸復淮鹽之地疏入下戶部速議保恆自至河南通飭各屬查災籌恤委員履勘收成被害分數詳查逃亡戶口取結造冊飭民間公舉紳耆辦賑刊發章程二十二則以飢民過衆就孔道添設粥廠復以書抵鄰省督撫請戒所屬收養豫民流入境者因東南境得雪頒補種春麥法勸殷戶出種以貸復遣員四出導民開土井行區田春久不雨步禱各祠廟累月四月得雨將俶裝周歷災區疾作三日卒鶴年上其狀諭曰刑部左侍郎袁保恆由翰林洊擢卿貳前在江蘇安徽等省隨剿擒匪疊著戰功嗣赴陝西辦理轉運事宜俱臻妥協此次派往河南幫辦賑務尤能任怨任勞悉心經畫遽聞溘逝軫惜殊深著加恩照侍郎例從優賜卹任內一切處分悉予開復應得卹典該衙門察例具奏伊子袁世勳俟服闋後由吏部帶領引見尋賜祭葬予諡文誠九月河南巡撫涂宗瀛奏言豫省去歲奇災

司庫馨慙如洗故刑部左侍郎袁保恆奉命抵豫屏絕供張服食麤糲籌款釐弊
昕夕焦勞凡有可騰挪之法無微不搜凡有可利濟之事無艱弗任臣嘗見其奏
牘暨與各省乞貸書不啻聲淚俱下維時各屬流民就食省關各廠日十數萬保
恆創立規制全活無算復以時巡視各粥廠雜處吏胥閒拊循指示不憚穢惡不
避風雨諸弊以絕而身則況瘁矣當其未病嘗自爲文告神願以身代民歿卒之
日婦孺皆爲流涕盡瘁王事宜隆報饗請於河南省城建祠令地方官春秋致祭
又言保恆世濟忠勤前與從兄保慶同辦歸陳團練地方賴其捍禦請附祀陳州
府甲三祠均從之尋允安徽巡撫裕祿請以保恆附祀甲三臨淮祠子世勳員外
郎

雷以誠

雷以誠湖北咸寧人道光三年進士以主事用分刑部十五年管提牢廳十八年
補官十九年刑部侍郎黃爵滋奉旨查辦直隸豐潤縣知縣許瀚事尋查辦浙閩
事件又讞福建廈門積案以誠皆從行二十一年陞員外郎記名御史是年四月
陞郎中八月補山東道監察御史二十五年擢禮科給事中轉兵科掌印給事中

先後條陳錢法河工夷務又戶部庫丁侵盜一案查庫大臣及其子孫因賠繳而監追者多以誠疏言既曰罰賠究與實犯真贓有別得旨恩釋二十七年擢內閣侍讀學士轉太常寺少卿二十九年六月遷大理寺少卿八月授奉天府府丞兼提督學政咸豐元年詔求直言以誠疏言舉賢任能宜覈名實不宜尙圓巧二年復授太常寺少卿時粵賊蔓延以誠疏陳剿賊之策略曰粵匪今陷湖南岳州又薄湖北武昌督軍諸臣奉嚴旨詰責徐廣縉等自不能辭其咎而棄城遠遁之提督博勒恭武尤宜急正軍法軍興以來賊至不擊賊退不追進不能戰退不能守所以然者非盡城不堅兵不衆也將無恥退之心士無敢鬪之志耳使軍令嚴明將士皆知退不免死進可獲生亦誰不勉圖敵愾之功而甘受僨軍之戮乎晉文於顛頡漢高於丁公前事可師惟宸斷決然行之賊起自山僻平陽之戰非其所長所慮尤在沿江一帶風聞僞示有定都金陵之語江南富庶賊所覬覦風帆便利一日千里若襲取江寧僞行仁義要結民心內收鹽梟外結島寇則漕運不通將成割據之勢今兩江督臣陸建瀛尙駐工次臣愚以爲宜令回省加意修飭武備賊窺武昌省城向榮徐廣縉等計先後抵省自可無虞惟省城下游百八十里

與黃州府對江爲武昌縣實自古用兵之地沿江如江夏之青山黃州之陽邏三江口武昌之樊口大冶之道士泐蘄州之州城廣濟之田家鎮皆爲要地俱宜固守而陽邏江面較狹田家鎮尤寬不過十丈磯險水急實吳楚門戶誠恐賊潛師東下又蹈岳州覆轍則東南數省無不震動矣應請嚴飭督兵大臣策其萬全至聖諭因岳州失守嚴禁以要隘爲辭先期出城自係專爲守土之臣而言至帶兵之員亦有必應分布要隘爲犄角者恐諸臣或有誤會以守城爲辭棄險不守致失事機仍請明切宣示無論戰守總以無失機宜爲斷再湖北省城陸路如江夏屬之士橋武昌屬之葛店華容等處亦應一律嚴防又疏言臣奏防堵陽邏道士泐等要隘誠以岳州失守賊趨武昌省城故不得不豫截其竄入江南之路此爲天下大局計未暇爲湖北省城計也聞賊猝至漢口鎮商賈貨財皆爲所得武昌糧少兵單雖有向榮遣將帶兵二千由水路趨到合計省兵不過五千儻攻之不克則守之愈難茲賊退出岳州全力圍攻武昌乃徐廣縉等擁兵數萬不援武昌復欲由澧州退保襄陽此其瞻玩欺罔如見肺腑今復奉旨令徐廣縉琦善陸建瀛等各帶兵會剿仰見廟謨勝算洞燭幾先特用兵將及三年所以不能竣事致

賊猖獗者皆由軍令不嚴賞罰不協兵畏賊而不畏將將亦無所忌憚徒有拳問之名未申失律之法若非及早大明賞罰破除積習恐復見存畛域仍託防守之名終無進剿之效臣愚以爲防者地方之責如徐廣縉向榮出剿則湖南之防責之羅繞典張亮基鮑起豹琦善出剿則河南之防責之藩司鄭敦謹陸建瀛出剿則江南之防責之將軍祥厚藩司祁宿藻仍各令隨時準備策應荊州爲入蜀門戶見琦善調往陝甘請敕另選將帶兵三千從襄江而下一同會剿則湖北之圍可解卽有餘氛守土防兵無難殄滅祈嚴飭各大員信賞必罰無得以練兵待餉爲詞徘徊貽誤也臣又聞此賊專以誘脅爲能所以得行其計者皆由帶兵大員進剿不速如賽尙阿之圍永安遲至半年徐廣縉之抵湖南遲至兩月俾賊得從容煽惑每一舉動無不在其計中湖南之役徐廣縉未能先據岳州門戶而羅繞典張亮基等但以固守長沙爲詞向榮獨帶屬兵與賊相持賊中稱爲向蠻子不敢偪視羅繞典所以守城得力者向榮進擊牽制之力爲多且岳州失守向榮卽遣將由小路直趨武昌省城是其智勇已在徐廣縉之上而羅繞典反謂其不應救援北路不知是何設心凡自楚來者無不以向榮爲安危所繫特事權不屬未

免有所牽制是在皇上鼓勵而駕馭之自當建立奇勳轉敗爲功矣上從之以誠又各直省文風日盛請准各州縣捐輸軍餉酌加學額下部議行三年命會同南河河道總督楊以增巡查黃河口岸未行陞都察院左副都御史以誠途中疏請撫卹山東在平東平東阿汶上等州縣飢民又疏請繕治墩臺城池行次江蘇之清河疏撤山東巡撫防河兵抵南河請裁各渡口冗費酌留四口派兵巡守均如所請行時粵匪踞揚州以誠駐清江疏陳防河不如防江因至淮安並高郵州寶應縣巡查團練五月以倡捐軍餉下部議敘尋陞刑部右侍郎奉詔幫辦軍務與都統銜琦善直隸提督陳金綬督兵規復揚州六月疏言自到仙女廟勘得其地爲裏下河第一門戶李墅河十里甸董家溝杭家集都天廟等處又爲仙女廟門戶李墅河尤爲扼要當委己革湖南桂陽州知州陳錫麟帶勇防堵其餘各要隘亦分別駐紮並令聯絡鄉團互爲應援臣復行抵泰州該處實爲裏下河第二門戶署兩淮泰壩監掣同知吳雲先已招集水陸壯勇數百並該處紳董自行團練民勇不下萬餘人足資保衛臣自應以攻取揚城爲首務而裏下河各州縣未便置之不顧且用兵之道必先能守而後能戰臣所以節節布置爲防賊奔竄地

步正兵法先爲不可勝以待敵可勝之意又疏言軍餉支絀奉諭照籌餉例酌減二成就近在營給發實收赴部換照而民間不知徑赴軍營每多恐縮應請於泰州設立總局其高寶各州縣亦擬別設一局且通泰一帶行用多係錢文應照市價酌中每銀一兩作一千六百文俾歸覈實詔下部速議行以誠以施家橋爲瓜洲與揚城孔道派將帶勇數百守橋北之褚家壩瓜洲江口之錢家灣李墅河嚴家橋等處均撥兵防守上獎其周妥是月揚州踞賊開城門來攻以誠等分剿獲勝並焚浦口賊船七月瓜洲賊犯三汊河擊卻之以誠遣將施火箭燒城內賊屋賊縋城由浮橋渡至東岸復遣將擊敗之毀浮橋三八月疏陳籌辦團練情形尋偕琦善會攻揚州小有斬獲不能下十月以誠等議增礮臺臨城下擊並乘賊操演擊之賊敗守益固有旨以安徽危急飭調總兵瞿騰龍往援復命向榮派員渡江助攻揚州以誠疏曰安徽廬州卽古之合肥米糧豐裕居長淮之中逆賊得之則攻剿更難得手矧其北竄尤可慮也皇上眷念茲土急欲調兵往援誠爲斬關奪隘之計臣曾與琦善再四面商終因兵力難分恐致顧彼失此茲奉嚴旨屢下何敢自惜身命不思仰紓宸廑特賊占踞揚城專恃瓜洲之賊水陸接濟故糧足

而勢強自瞿騰龍駐兵三汊河以來非但糧不能繼亦且黨無由增若調移他處則是讓賊以接應之機安徽與江寧毗連向榮如能撥兵與其繞道至揚不如就近赴皖臣營陸續添勇已至四千八百名琦善所帶之兵三千五百餘名陳金綬兵二千九百名又瞿騰龍之兵二千九百名皆因地面遼闊合之見多而分之見少四面環擊尙冀協力同心況臨陣易將兵家所忌若再游移不定坐失事機臣等之罪益重矣時上先已允琦善請瞿騰龍得不調十一月轉刑部左侍郎賊陷儀徵初偕以誠防揚州東路者有閩浙總督慧成一軍至是合疏言江寧賊謀由瓜洲接濟揚州先向西路攻陷儀徵近逼三汊河以下運河西岸晉康查文經兩次殺賊千餘念及存營兵單潛師夜間回營越日四面環攻破徐凝門賊築土城斃賊千餘衛守備李金鼇等由西路入參將蘇勒芳阿等由東路入將木寨內賊聚殲殆盡並斬偽總制數人是月賊棄揚州遁以誠慧成歸併兵勇駐灣頭六牖等處未幾賊援麇至鄉勇潰散琦善劾以誠帶勇無方上責琦善曰琦善統領全軍攻剿揚州賊匪餉竭兵疲鄉勇等本係烏合之衆與兵丁有閒當雷以誠初到之時不能不募勇協剿且屢次帶勇人員亦有斬獲全在該大臣等申明紀律用

其銳氣以助兵力之不逮乃任令日久玩生紛紛潰散琦善平日漫無稽察直待事機已誤以諉過之辭奏請查辦並經嚴旨並硃諭斥責該大臣置若罔聞至此情形支絀罪將焉歸又諭曰琦善圍攻揚城幾及一載屢奏城內賊勢窮蹙乃並不乘機進取且與雷以誠慧成等各懷意見各不相顧以致賊援大至鄉勇潰散該大臣等坐失事機實堪痛恨十二月諭曰前據琦善奏賊援揚州東路鄉勇潰散又據慧成雷以誠奏賊匪大股沖突練勇爲賊鈔襲邵伯灣頭喫緊當經諭令琦善等分路扼守乃因東面勇潰致令瓜洲賊與揚州聯爲一氣棄城逃走雷以誠慧成均在揚州東路防剿督率無方均難辭咎著革職帶罪自効嗣琦善請移灣頭大營以誠與慧成疏陳不可琦善又劾以誠奏報諱飾且部勇搶掠所築礮臺無礮無兵諭曰閱該大臣等所奏仍各挾私意諉過於人試思琦善統領全軍各路統兵大員均歸節制東路勇潰雷以誠慧成固屬咎無可辭琦善又豈能坐觀成敗徒以一參了事雷以誠所築礮臺礮位無人收管殊堪痛恨見在瓜洲賊船千餘隻尙未開行揚州雖已退出難保不乘閒復圖北竄著琦善卽飭雷以誠扼守萬福橋灣頭一帶要隘嗣以誠因賊勢漸成流寇請行堅壁清野法借慧成

上疏曰逆匪鷓張毒流數省到處殘破堵禦無方皆由民心不定賊遂得以披猖也臣以誠奉命幫辦軍務兼保東路募勇有限而防處甚多實屬不敷調撥當委幹員前赴裏下河各州縣勸令團練先後聯絡民勇得十餘萬人猶慮防範維艱因思古人建寨築礮堅壁清野實爲防禦流寇第一妙法臣按江南地勢初無峻嶺崇山多年溝塍汶港設險爲難惟有以土爲堡以石爲砦倣倣按戶抽丁之法爲深溝高壘之謀伏查揚城北達清淮則灣頭邵伯首當其衝東去下河則六橋仙鎮實扼其要他如黃泥溝沙河橋等處所以防內賊之竄宦家橋李墅河等處尤時虞外寇之乘臣等派員親爲區畫先於黃泥溝沙河橋一帶官爲興辦就舊溝小港因寬加深卽以窆土加築爲砦環城而南計長三十餘里砦百十餘座外復圍以鹿角陷坑散布蒺藜多雇民夫守砦以濟兵勇之不足儻遇有警一砦鳴鑼砦砦皆應俾各營得以準備豫防其邵伯仙女鎮宦家橋李墅河各處亦經臣勸諭地方紳董興辦處處設險以守爲戰故前日揚城之賊雖窮極思竄並不敢犯東北兩路其明效概可見矣然此特暫爲保守東北一面之計耳臣等以爲賊情剽滑流寇勢成竊恐徵調往剿兵未至而賊亦逃士卒罷於奔命餉需隔於道路

將以救北而南路空虛將以征西而東隅危困此必不及之勢也若乘此各處團練之時令其一體照辦或依險爲礮或平地築堡或挖斷其總要之路爲釣橋以便起除或寬深其舊有之溝作壁壘以資捍禦集牛豕於欄檻勿令匪窺藏菽粟於廩倉勿供匪食計地立長比鄰聯藩來卽轟擊去不窮追則民日飽而賊日飢民日強而賊日弱所有裏下河各州縣見已變通辦理恐日久懈生應請敕下督撫責成各該州縣永遠奉行至如安徽河南山東湖廣等處高山崇阜土厚林深舉行較易伏乞命各直省一體照辦庶幾民心固賊勢孤亦轉危爲安之一道也諭曰堅壁清野原爲良法凡賊匪逼近地方自應相度地勢隨時辦理所有黃泥溝沙河橋等處雷以誠擬派員築堡建礮以爲守禦之計自係應辦之事著琦善體察情形妥爲辦理其後胡林翼行之湖北卒以平賊四年三月以誠疏請裁減練勇又因餉需窮迫乞準古者抑末之法試行捐釐助餉奉旨雷以誠奏捐釐章程於勸諭捐輸之中設法變通以冀衆擎易舉據稱裏下河一帶辦有成效其餘各州縣著怡良許乃釗楊以增各就江南北地方妥速商酌籌辦自是各省捐釐助餉之議起七月揚州府東鄉土匪董文瀾等藉霸租爲名斂錢糾衆以誠遣卒

擒誅之是月諭以誠赴安徽和春福濟軍未行而琦善故旋奉寄諭瓜洲逆匪尙在負隅該逆知琦善病故勢必乘隙窺伺托明阿抵揚尙需時日雷以誠著留揚州會同陳金綬將防剿事宜妥爲辦理八月瓜洲鎮江賊復犯揚州以誠偕陳金綬擊敗之既又率黨三千分東西譟而前以誠設二伏待賊陳金綬親身督戰遣副將鞠殿華等從東岸迎擊敗之四里鋪斬首六百級西岸副都統都興阿同時敗賊三岔河上以爲有功賞三品頂戴旋授江蘇布政使仍留揚州幫辦軍務九月赴焦山督礮船與陸軍會剿賊造木筏攻八卦洲官軍以柴船裝火藥夜燒賊筏焚溺無算以誠又破賊虹橋三汊河等處十月南京賊復造巨筏中藏大船上立木城載礮東下官軍躡擊至儀徵沙漫洲奪之並獲米粟軍械甚夥時瓜洲賊堅壁不出以誠督師船先攻北固山破其土城乘勝追至金山大敗之其運河口賊船來援者亦擊沈焉疏入上嘉之十一月以誠敗賊雙橋五年正月瓜洲鎮江逆黨復犯儀徵以誠等督兵擊走之二月督上下游水師進攻鎮江北門及甘露寺觀音門燕子磯等處賊船斬馘無算與督辦揚州軍務江寧將軍托明阿合疏劾藩司文煜濫保有文煜專摺保舉人員臣等不敢妄參末議等語上責其失大

臣進言之體均交部議處四月偕陳金綬各敗賊天觀橋十月督軍夜攻瓜洲賊營焚燬賊船斷賊接應得旨嘉獎六年三月瓜洲賊竄犯運河官軍敗績揚州復陷托明阿自請治罪上切責以誠及陳金綬駐兵東岸當賊撲三汊河營盤並不派兵接應見在退在何處亦未與托明阿會合惟怯無能厥咎維均與托明阿均先革職命正白旗漢軍副都統德興阿少詹事翁同書查明參辦揚州克復以誠與陳金綬疏言係二人會同陝西提督鄧紹良軍攻復上以所奏情節不符命德興阿翁同書一併查奏四月德興阿翁同書具狀覆陳諭曰陳金綬雷以誠以幫辦大員於瓜洲賊匪出撲並不實力督率致令兵勇潰散迨收復揚城後復敢捏稱助剿辜恩味良殊深痛恨雷以誠著卽拏問交德興阿嚴行審訊請旨定奪尋德興阿翁同書覆奏揚州失利越圍毀營陣亡員弁至數百名之多實因變起倉卒並非不戰而潰托明阿馭軍稍失於寬此次西岸失事其咎尤重而當賊衆師潰之餘猶能轉戰旬日牽制賊勢該逆不敢北竄並不久踞揚城實由於此其殫誠補過人所共見陳金綬已經病故請勿庸議雷以誠任事過急矜才使氣言動輕躁實不能免馴至兵勇不睦怨謗叢生雖失事由於西岸而東路亦不能守

其咎維均及退守沙頭之後不卽督勇進攻尤爲失計於收復揚城一事不應憑勇日稟報之詞縱無冒功之心殊非覈實之道至其以褊急招怨物議紛紜多有過其實者八月遣戍新疆九年在伊犁戍所聞揚州復失呈由將軍扎拉芬代奏曰戍員前在揚州軍營獲罪蒙恩發往新疆效力贖罪感戴難名頃聞揚州復陷戍員竊計揚城遭賊焚掠殆盡賊必不久踞所有商賈皆集仙女廟鎮邵伯次之該鎮糧食囤積賊可以飽恐無賴匪徒遣撤各勇勾結煽惑引導前驅漸且擾及泰州各屬若到南通州卽將踞爲賊巢偪近海墻地方饒富揚帆可直達杭州又與蘇州最近誠慮倉卒蘇杭有急難於海運則京倉大有關係戍員前所以駐營萬福橋攔截東路練勇籌餉聯絡民團者正爲此也江寧圍攻金陵之兵並藉以固守蘇常門戶如果蘇杭有賊則我師之圍攻金陵者腹背受敵矣近聞安徽河南漸靖宜飭令勝保直下揚州跟蹤進剿賊以北地苦寒不便赤足麥多稻少飲食不宜此時尙不至北竄所慮者直隸山東邪教根株未盡海氛未息防微杜漸未可晏安也戍員年已六十有五豈復妄圖進取顧維受恩深重且在江北幫辦軍務垂及四年一有所聞不禁愴懷是以妄陳末議疏入報聞九月釋回十月賞

四品頂戴授陝西按察使十年正月擢陝西布政使五月陞光祿寺卿十二月兼署刑部右侍郎同治元年京察有旨休致光緒五年賞還原銜重赴鹿鳴筵宴八年賞頭品頂戴重赴恩榮筵宴十年卒子衡拔貢生候選直隸州知州孫宗慶貢生候選訓導

薛煥

薛煥四川興文人道光二十四年舉人報捐知縣二十九年選授江蘇金山縣知縣會新陽水災檄署新陽縣視賑事訖乃赴本任咸豐元年四月以漕船兌開遲延褫職留任尋以趨兌無誤有旨開復八月以疏防盜案復褫職嗣於限內獲犯復原官仍留江蘇補用三年報捐知府指省江蘇四年正月巡撫許乃釗檄帶川勇千五百人剿粵匪於上海三月賊劫上海北營煥隨布政使吉爾杭阿堵禦甚嚴賊不能入兩江總督怡良等上其功得旨記名遇有江蘇知府缺出開單請簡是月授松江府知府適奉賢民抗糧勢將爲變煥馳至逮治一二人餘皆帖服五年調蘇州府知府嗣以官軍克上海煥截擊餘匪出力六年正月賞戴花翎旋捐鹽運使銜時廣東潮州等處莠民以投充壯勇爲名散處蘇州城外持械爲盜士

民苦之八月煥偵知匪蹤集閩門外擯于地方相聚飲博密約營弁紳士率兵分路掩擊擒首從一百九十餘人誅之境内以安事聞命以道員記名遇缺請旨簡放七年五月擢蘇松糧儲道六月調蘇松太道八年遷按察使未履任適英吉利美利堅兩國船自廣東駛至上海欲求通商又約同法蘭西船由上海駛赴天津煥訶知彼等蹤跡先後稟經兩江總督何桂清等飛章入告九年三月御史蔣志章疏保煥有膽略任上海道時洋人畏服請特召來京交科爾沁親王僧格林沁相時委用未幾洋船爲僧格林沁擊敗六月入覲八月以辦理上海善後事竣下部議敘十一月擢江寧布政使十年二月賞加巡撫銜幫辦海口通商事宜三月粵匪竄逼常州煥復馳回常州防堵閏三月調江蘇布政使旋署欽差大臣關防辦理五口通商事宜又署兩江總督五月陞江蘇巡撫仍署兩江總督時粵匪連陷蘇常太倉各州府縣六月復陷松江府青浦縣煥下部議處旋檄候補道張景渠等會民團克松江得旨嘉獎先是嘉定縣踞匪棄城去至是復失平望鎮爲江浙要道亦旣克又陷金壇縣被圍急煥與總兵馮子材援之嘉定距上海六十餘里中間南翔真茹二鎮爲陸路衝要賊築牆於南翔西南兩路招集土匪圖竄上

海煥飭知縣劉郇膏集團分布真茹及江橋鎮又調兵分屯羅店月浦固寶山門戶並檄蘇州府知府吳雲等環攻青浦署常州府知府周沐潤規復江陰水師各船扼守江南防賊北渡太倉州毗連嘉定飭遊擊富安等守之適青浦官軍失利松江復陷七月賊犯上海環攻七晝夜煥與上海道吳煦等分門固守賊解圍去隨飭參將陳汝霖復松江南翔鎮踞匪經野雞墩民團殲除殆盡乘勝進攻嘉定青浦疏人賞頭品頂戴又劾馮子材遷延誤軍事坐革職暫留軍營聽候查辦是月命辦理廣州福州廈門寧波上海及內江三口潮州瓊州臺灣淡水各口通商事務十二月疏請按照通商稅則令外商自運米赴津官爲採買按時定價不必豫給價銀採辦下所司議行十一年正月以捐輸軍餉下部優敘三月浙江賊氛大熾擾及松江邊境嘉定青浦游匪復出肆擾煥與提督曾秉忠一面堵禦嘉定青浦之賊派兵扼守金山並收集浙省潰兵協堵金山衛城一帶五月曾秉忠等剿賊金山勝之六月青浦踞賊出撲大營檄參將李恆嵩設伏抵禦擒馘甚多七月疏請設立籌餉總局以候補鹽運使金安清總辦南北兩臺籌餉事務並請將貽誤軍需之福建司道議處皆從之九月御史楊榮緒等劾煥貪劣各款上命兩

江總督曾國藩查奏尋奏言薛煥任蘇州府頗著循聲上海道任內辦理關稅及外國事宜亦臻妥協泊擢巡撫駐師上海每月糜餉二十餘萬不能專辦一路之賊江蘇所存地方惟鎮江揚州尙據形勝未嘗親至兩郡又不能多濟餉項以聯聲援上年奏請禁用廣勇而所信任之曾秉忠馮日坤等所部半係廣勇曾秉忠之勇劫掠洋船馮日坤之勇在金山圍殺紳團多人自蘇常失陷人民萃於上海人浮於事每有差委率由營求而得或並於無可差委之中曲謀位置之法上海既繁盛蘇州之書籍字畫自賊中販鬻而出者煥設書畫局購買名蹟諭旨所詢株守上海一籌莫展官吏奔競娛情古玩與臣所聞大略相同至摺內所稱辦理通商以來廣通賄賂等語風聞薛煥九年由臬司進京途次有失銀之案在京有餽遺之情此外別無所聞至薛煥偷安一隅物議繁滋蘇省財賦之區賊氛正熾恐不能勝此重任報聞是冬賊陷奉賢南匯川沙偪近寶山及吳淞口煥與曾秉忠所部四萬人分防要隘難當大敵咨請曾國藩派委副將滕嗣林赴湖南募精銳萬餘嗣林僅以七百人歸曾國藩奏派道員曾國荃赴滬助剿未能速至煥竭蹶布置而自浙江杭嘉湖相繼失陷後逆氛愈不可制兩省紳士多僦居上海羣

請暫借英法兩國駐滬外兵助剿適賊自奉賢等處直犯上海英法文武協力抵禦同治元年正月煥具疏以聞有旨嘉獎賊犯松江美國人華爾及其副總領白齊文率隊迎擊敗之二月隨同官軍剿平天馬山辰山高橋蕭塘等處賊壘煥又檄李恆嵩會同外兵解泗涇圍三月華爾會英法俄三國兵攻破王家寺賊營上海西路肅清是月上命道員李鴻章署江蘇巡撫煥以頭品頂戴充辦理通商事務大臣先是有言煥增兵糜餉及借兵外國爲非者四月煥疏言自咸豐十年上海解圍之後日與司道計議欲保城池先在扼防要隘是以爲松江而設塘橋泗涇廣富林諸營爲上海而設七寶真茹野雞墩諸營爲寶山而環城設營年來大小數百戰而賊不能直薄城下者未嘗不賴堵截之師此增兵之萬不容已者也自蘇浙有借兵助剿之說遂謂洋人爲可恃不知洋人之向背視我之強弱爲轉移兵力不厚則爲彼所輕有欲借其力而不能者至管帶兵勇實乏將材惟有於獎勵之中時示警戒之意使其努力自強以冀外國之兵樂爲相助抑臣更有總總過計者華爾本吳煦等雇募教習兵勇若練成勁旅歸我調遣何嘗不善乃自五戰五勝以來隱然有不受羈勒之意且每戰必求重賞谿壑亦未易盈吳煦等

猶以爲長城可倚竊謂駕馭外國之人似應操縱在我惟有默爲裁制以化其桀
驁之氣庶可得其用而不受其害是月授全權大臣辦理比利時國通商事務十
二月命煥來京另候簡用二年四月署禮部左侍郎在總理各國通商事務衙門
行走五月授工部右侍郎兼管錢法堂事務三年署都察院左副都御史通政使
司通政使王拯劾煥貪邪各款略言煥任江蘇巡撫時經人疊次糾參以外任之
不勝又豈朝班之可玷臣亦知總理衙門事務非該員所能爲政朝廷不得已而
以該員廁於其間俾與各國虛與委蛇第以該員委瑣齷齪儼然高位未免爲中
國恥辱甚或啟外邦輕侮之心就令人材難得或有微長固當酌量裁抑以示區
別四月煥劾王拯吸食洋煙諭曰國家廣開言路整飭官常惟期內外臣工奉公
守法屏除私見若爲大員則平日束身立行益當謹飭自愛不受人以指摘之端
至被參人員尤宜知止謗自修之義痛自愧厲豈可意圖報復訐人陰私本年三
月間通政使司通政使王拯曾以僉壬濫列請將侍郎薛煥量加裁抑至薛煥巡
撫任內被參各款前此業經曾國藩查明覆奏尙無實據惟辦理通商事務頗爲
熟悉而此次王拯摺內亦未能指實款迹是以將摺留中暫緩查辦乃本月初九

日薛煥奏參王拯吸食鴉片煙請加懲處等語薛煥被人參劾不能捫心自反輒將王拯吸食鴉片煙列入彈章顯係意存報復有爲而爲非因公論列者可比此風斷不可長薛煥著實降五級調用以爲逞私攻訐者戒並著仍在總理各國事務衙門行走以觀後效尋以內閣侍讀學士補用五年五月請假回籍省親十二月籲請終養七年丁父憂九年丁母憂十一年服闋光緒元年命偕湖廣總督李瀚章赴滇查辦洋人馬嘉理被戕一案尋劾辦理不善之騰越廳同知吳啓亮等以弭釁端允之事竣回籍六年卒

黃鈺

黃鈺安徽休寧人咸豐三年進士改翰林院庶吉士六年散館授編修八年七月命在南書房行走十月丁父憂十一年服闋命仍在南書房行走同治元年充署日講起居注官並充實錄館總纂旋署提調二年提督山西學政三年正月倡捐京倉米價銀一千兩下部優敘八月以文宗顯皇帝實錄全書過半賞加五品銜四年因病開缺五年四月病痊銷假五月大考二等得旨著記名遇缺題奏並賞緞匹六年四月命仍在南書房行走五月陞國子監司業七年三月充會試同考

官五月授翰林院侍講八年十月轉侍讀十二月充文淵閣校理九年四月復充署日講起居注官八月充順天鄉試同考官十月陞詹事府右春坊右庶子十年二月轉左庶子三月陞國子監祭酒十月擢詹事府少詹事十一年四月陞詹事充日講起居注官九月陞內閣學士兼禮部侍郎銜十二月充文淵閣直閣事十三年正月陞刑部左侍郎九月充武殿試讀卷官光緒元年四月充考試試差閱卷大臣大考翰詹閱卷大臣二年二月充補行大考翰詹閱卷大臣四月以病久未痊疏請開缺允之七年卒遺疏入諭曰前任刑部左侍郎黃鈺由翰林入直南書房洊陞卿貳供職勤慎前因病開缺回籍茲聞溘逝軫惜殊深著加恩照侍郎例賜卹任內一切處分悉予開復應得卹典著該衙門察例具奏尋賜祭葬

張家驥

張家驥浙江鄞縣人同治元年進士改翰林院庶吉士二年散館授編修三年充國史館協修五年大考二等記名遇缺題奏並賞文綺六年提督山東學政旋調任山西學政八年丁父憂十一年服闋來京供職十三年八月陞侍講九月命在南書房行走尋充功臣館纂修光緒元年二月轉侍讀充文淵閣校理八月充順

天鄉試同考官十一月充日講起居注官二年二月京察一等記名以道府用八月署國子監祭酒五年二月京察一等復記名旋奉懿旨任毓慶宮學習行走四月陞翰林院侍講學士十一月轉侍讀學士十二月擢詹事府少詹事尋署都察院左副都御史八年三月遷詹事四月陞內閣學士兼禮部侍郎銜十一月署戶部左侍郎兼管三庫事務旋命稽察中書科事務十二月充經筵講官九年二月充直省舉人覆試閱卷大臣四月充殿試讀卷官朝考閱卷大臣六月授工部右侍郎兼管錢法堂事務九月充武會試正考官十年三月調吏部右侍郎十月恭逢慈禧端佑康頤昭豫莊誠皇太后五旬萬壽慶典奉懿旨賞給御書扁額一方尋賜紫禁城騎馬十一年十一月因病請開缺命賞假調理毋庸開缺是月卒遺疏入諭曰吏部右侍郎張家驥品端學粹謹慎安詳由翰林洊躋卿貳疊掌文衡在南書房行走自入直毓慶宮以來朝夕納誨深資啟沃前因患病懇請開缺賞假調理遽聞溘逝悼惜殊深著賞給陀羅經被派員勒載漪帶領侍衛十員卽日前往奠醊加恩賞銀二千兩經理喪事由廣儲司給發照侍郎例賜卹任內一切處分悉予開復應得卹典該衙門察例具奏伊子張有培著賞給舉人准其一體

會試張有垞張有埏張有垣均著俟及歲時由吏部帶領引見以示恩眷尋賜祭葬

胡家玉

胡家玉江西新建人道光二十一年一甲三名進士授翰林院編修二十三年提督貴州學政二十七年散館以主事用分刑部咸豐二年補官三年請假省親旋丁母憂時粵匪方張省垣設局勸捐礮船經費家玉在事出力五年巡撫陳啟邁疏請獎敘以員外郎用六年服闋七年閏五月充軍機章京八月丁父憂八年巡撫耆齡以家玉勸捐出力請以郎中用允之十年服闋十一年三月補員外郎五月充湖南鄉試副考官嗣因湖南停止鄉試命馳驛回京八月充順天鄉試同考官九月陞郎中同治元年以方略館辦理冊檔出力加四品銜二年九月俸滿截取引見命開缺以四五品京堂候補十一月授鴻臚寺少卿三年以黃河北徙疏請撥固本京餉築隄束水保衛農田詔下所司覈議以內地未靖庫帑不足寢之三月陞通政使司副使四月擢光祿寺卿五月充四川鄉試正考官七月陞太常寺卿九月以江寧克復賞戴花翎尋奉密諭偕副考官給事中張晉祺馳赴湖南

查辦巡撫惲世臨陞任巡撫毛鴻賓被參各事十月陞大理寺卿四年正月偕張晉祺覆奏查辦情形惲世臨等降級有差四月回京仍充軍機章京五年三月擢都察院左副都御史命在軍機大臣上學習行走七月陞兵部左侍郎八月會議直隸添練六軍事家玉以直隸練軍多年不效請練京旗兵萬五千人因密疏具陳略曰直隸總督請設七軍辦理三年迄無成效豈改爲六軍遂成勁旅即使加餉添操漸有起色而挑兵十數標勢渙而情散駐兵六七處屯分而力單是有拱衛之名而無其實與其練京外之兵以輔京師何如練京內之兵以實京師京內旗綠各營額兵十五萬有奇自漕運不通錢糧折減疲困日甚設有緩急何以禦之擬仿神機營法挑選驍騎營護軍營巡捕營兵各五千共一萬五千人分作三軍以一千人爲洋槍隊一千人爲馬隊三千人爲步隊名曰神武營擇城外空閒地而訓練之與神機營互相策應疏上格不行九月湖北巡撫曾國荃疏劾湖廣總督官文有餽送家玉程儀銀兩一款欽派尙書綿森侍郎譚廷襄查辦家玉以不知遠嫌下部議處得旨革職留任毋庸在軍機大臣上學習行走六年十月命會同大學士賈楨管理五城練勇局務十一月捐賑米四百石詔寬免革職留任

處分十二月兼署刑部左侍郎七年河決滎澤家玉疏請濬雲梯關入海故道擬令直隸等省留防勇營分段挑掘使舊河一律深通然後引上游決口之水掣流東行尋以役大費鉅不果行九年兼署吏部右侍郎十年五月調補吏部左侍郎九月兼署兵部右侍郎充稽查京通十七倉大臣十月賜紫禁城騎馬十二月家玉以時局艱難宜籌輓救條陳四事略曰自古言理財者不外開源節流而論節流於今日則莫大於覈勇數汰勇營苟且補苴非開源而似開源又莫要於一捐納謹釐稅咸豐年間粵匪鴟張徵兵募勇需餉甚鉅於是就地抽釐勇自外募餉自外籌部臣皆不暇過問今髮捻蕩平難保營官哨官不虛張勇數以少報多花名既不可憑報銷從何稽覈應令造冊報部嚴懲抗違至各省留防之勇多者數萬最少數亦近萬誠部庫一大漏卮請飭各督撫體察情形陸續裁汰籌餉事例不得已而爲之自黔捐皖捐減價出售較戶部捐銅局約少一半陝捐甘捐復踵行之然收雖減成而報部仍未嘗稍減每百萬約短收三四十萬勢必由報銷局多列款目浮開用費以彌縫之殊非核實辦公之道請飭下軍務省分督撫將勸捐員弁迅速撤回統歸藩司收捐上兌每月將捐數報部聽候部撥釐金病民甚

於加賦商賈操奇計贏抽一分釐金卽增一分市價名爲徵商實則取之於民軍務未平勢難驟議停止惟有請旨飭下各督撫罷苛細之徵輕漏報之罰毋藉善後之名而營不急之務以上四者皆理財急務而最要關鍵尤在嚴覈營勇戶部周知天下勇數然後綜計天下地丁錢糧漕折關稅洋稅歲入若干萬捐款釐金約計又若干萬除提充部庫外各路征勇各省防勇各藩庫留支歲出共若干萬通盤計數不足則請將各處征勇防勇大加裁汰總期歲入之數有餘於歲出之數而後已疏入上聽其言十一年八月授都察院左都御史十二月充經筵講官十二年四月疏請裁江西省地丁加徵銀兩先是九年十月家玉奏江西錢糧新章於定例每兩徵銀一兩隨徵耗銀一錢外加徵銀四錢以江西額徵銀一百八十餘萬每兩加四錢計之每年實浮收七十餘萬金有違永不加賦成憲請敕江西巡撫飭屬停止至是應詔陳言復申前請諭曰各省地丁錢糧均有定額如該左都御史所奏是該省州縣於正額之外違例加徵民間受害何可勝言亟應速爲禁止著劉坤一嚴飭所屬州縣恪遵定例不准絲毫浮收如查有私立捐款公費名目額外加徵卽著嚴行參辦五月疏請酌覈保舉疏通正途詔下部議行七

月江西巡撫劉坤一覆奏請仍加徵丁漕分成提解司道兩庫以抵捐攤之款分給道府州縣以抵漕規節壽禮月費各陋規有旨著照所議辦理仍隨時認真稽察儻有絲毫浮收卽行從嚴參辦家玉反覆較論引據祖訓部章瀝陳其弊得旨交部妥議尋議照舊收錢每兩著加二百文允之八月充順天鄉試副考官十月劉坤一奏江西漕丁改章家玉曾致書信干預又本籍有未完錢糧命交部議處並令劉坤一據實具奏部議家玉書信雖爲公事起見究屬不合坐降二級留任十二月以舉人徐景春試卷磨勘斥革降二級調用嗣劉坤一覆奏家玉及弟姪田畝歷年應完錢糧實有未經被災辦緩仍未完納者會給事中邊寶泉疏言家玉累次未完漕糧劉坤一豈漫無覺察何以事歷多年概置不問家玉既有干預原籍諸事之信何以不立時奏聞迨家玉奏陳江西加徵違制互相牴牾始藉端報復係屬挾私攻訐於是家玉及劉坤一均下部議處請分別革職革任得旨胡家玉著加恩改爲降五級調用旋允部議以五品京堂候補光緒五年九月補通政使司參議十二月以海防緊要疏陳管見一北洋宜設外洋水師北洋大臣駐紮天津爲京師切近屏藩天津向無水師大沽葛沽有礮臺而無戰艦株守一隅

畢竟可慮擬請添設外洋水師提督一員總兵二員挑選輪船十餘隻分配弁兵二三千往來於南北兩洋令其熟習海濤沙綫展輪停輪裝礮放礮諸法有戰船有戰將有戰兵較之口舌爭勝奚啻倍蓰如慮軍餉支絀擬請移緩就急於天津水勇淮軍兩項內選謀勇兼備之將年力精壯之勇以成北洋水師一軍卽以南省歲饋之餉贍之無慮餉需不繼一南洋宜設外洋水師江南海口上達數省防務亦不可鬆內河雖有水師而快蟹艇船非槳不行非風不駛捕盜尙虞不足安能禦侮海氛方熾擬請移緩就急改長江水師提督瓜州岳州兩總兵爲外洋水師提鎮南洋洋面較寬所用輪船應較北洋多三四隻所配水軍亦應多撥千百人一切弁兵書識卽於該提鎮所管營汛內挑選一轉移間於海防甚有裨益一福建船廠宜造鐵甲輪船洋人製造軍械愈出愈奇今復有鐵甲輪船礮子不能轟入橫行海上所向無前是造鐵甲船爲今日當務之急福建船廠已造成鐵脅船矣而鐵脅終不及鐵甲請飭船政大臣嗣後專造鐵甲輪船逐年增添分撥南北洋水師配駕以壯軍威而備攻剿疏入上聽之未幾議設海軍焉六年六月疏請疏濬江西全省河道又奏河南糟糧宜徵本色均下所司議行七月因病陳請

開缺允之家玉自陞任侍郎充舉人覆試閱卷大臣五次考試孝廉方正進士覆試朝考拔貢朝考庶吉士散館考試試差考試漢廩生閱卷大臣各一次先後恩賞福字如意荷包文綺珍玩宮扇四次十二年卒子濟清戶部主事翰清候選知縣毓清候選知州相清分省補用知縣湘林進士翰林院編修孫承弼舉人內閣中書綱舉人

吳棠

吳棠安徽盱眙人道光十五年舉人二十四年大挑一等以知縣用分南河二十年補江蘇桃源縣知縣咸豐元年調清河縣知縣二年山東捻匪竄邳州棠時署知州帶勇擊破之高唐溝三年三月以豐工出力經江南河道總督楊以增奏保以同知直隸州知州陞用六月丁母憂時粵逆陷揚州將由高寶北竄命開缺治喪百日後仍留署清河知縣四年太常寺少卿王茂蔭疏薦人材稱棠捕盜認真士民稱頌上命楊以增察看以增稱棠實心任事始終不懈得旨免補知縣以同知直隸州卽補並賞戴花翎六年丁父憂仍留江蘇省辦事七年敘剿辦棚匪功以知府留江蘇補用又以剿捕徐宿捻匪出力命俟補缺後以道員陞用八年

擊退臨淮捻匪復六安來安等城特旨免補知府以道員遇缺卽補十年捻逆東擾邳銅宿遷棠會合太原鎮總兵田在田等軍攻毀賊壘尋補淮徐道命幫辦江北團練事宜棠與田在田督各軍疊破賊十一年以籌餉勸捐賞加按察使銜時沂州蘭山賊由臺莊回竄徐州東路之賊亦回竄欄杆山等處棠飭副將胡元昌等夾擊敗之另股由奶奶山潰竄棠派兵堵剿連獲大捷復派兵追擊匪首劉平於侯孟山破其寨皖匪趙克元等擾濰口一帶民圩復結蒙亳捻匪數萬圍宿州總兵張得勝等赴援爲賊所困棠督軍馳援解其圍尋擢江寧布政使兼署漕運總督督辦江北糧臺並命統轄江北鎮道以下文武各官同治元年徐州捻逆竄沈陽趨阜寧山陽棠派總兵龔耀倫等會鄉團疊勝之餘匪潰擾淮關復擊卻之逆首李成等圍安東棠檄軍進擊圍乃解二月提督李世忠等軍攻克浦六進軍九洑洲請撥礮船駐守上命吳棠會同江寧將軍都興阿酌撥兵船駐浦口以資堵剿旋漁溝捻匪竄踞衆興集睢寧捻首魏坤等擾高資意圖糾合東竄棠分軍命剿皆敗之復飭軍夾擊鹽河賊陣斬無算時淮揚海道缺裁撤棠遵議將淮揚道所轄揚屬地方事務歸兩淮運使管理其河務及淮海兩屬公事統歸徐州道

兼轄下部議行尋衆興敗匪遁泗州棠慮其回竄督飭淮安縣屬築圩扼之擊擒酋李加英等於宿遷斬髮匪王鳳等並奏言竄捻不下數萬清淮防兵及所調各軍無多衆寡已屬不敵且礮船利於水而不利於陸步隊宜於扼守而不宜於野戰請調撥科爾沁親王僧格林沁所統馬隊赴淮援應允之四月擒酋韓老萬糾黨至桃源棠派副將黃國瑞等敗之於新河隄復檄總兵黃開榜龔耀倫水陸截剿賊潰遁時田在田被劾上命偕僧格林沁按款詳查尋得實覆奏禡田在田職六月清江南北兩岸圩工竣棠繪圖以進諭曰清江扼南北之衝其地向無城郭實不足以資戰守經吳棠相度地勢築建圩牆挑成濠塹僅四閱月鉅工告成足見該署督辦事認真甚屬可嘉七月棠復署漕運總督派兵進剿曹八集擒擒首李麻子誅之復派遊擊張祖雲等剿洞裏莊等處踞賊斬匪首何中元賊目王春玉等擊走邳州竄捻並飭總兵黃開榜等進剿貓兒窩以南股匪焚賊柵副將姚廣武等又追敗之宿遷運河以南肅清閏八月江陰等處賊圖北竄江防戒嚴棠檄水陸各軍嚴江防以遏之時江蘇安徽山東河南四省邊界捻匪蔓延此剿彼竄徐州府爲四省交衝光祿寺卿潘祖蔭請設四界鎮道以專責成棠遵旨議覆

略言捻匪起於蒙亳擾及江皖東豫出沒之區四通八達即使四界添設鎮道仍不過兼顧一隅徒更舊章無裨全局須俟大兵剿辦地方肅清再議隨地制宜上從之七月棠派參將吳鳳柱等赴邳州擊退山東幅匪又派都司趙元宗等殲捻首卜黑小股匪於半截樓十二月蘭山幅匪麇聚郟城縣之徐家圩棠檄黃國瑞督兵兜擊擒匪首劉曾孫良並捻逆李友輝田虎等又密飭黃開榜等夜襲鍾陽集克之捻首夏廣興等悉就擒先是御史丁紹周奏陳江北釐捐積弊諭吳棠照部定章程嚴禁擾累二年正月復經將軍富明阿疏劾上以吳棠辦理遲延嚴飭之棠尋奏參委員嚴邈等請摘去頂戴並奏言軍興以來費用繁鉅抽釐助餉實萬不得已之舉惟查各釐卡均設於水陸要隘商賈往來之區離縣治遠近不一地方官公事殷繁斷不能躬親駐局勢必委之胥吏家丁蠹蝕侵漁流弊滋甚其釐捐設立處所陸路固有繞越之處水路亦多港汊必須擇要分卡以杜旁趨均係明定章程一處收捐一處驗放並無一局一卡而徵至數次者捐項既難多裁惟嚴飭各局抽釐委員廉謹者留貪冒者去務期釐剔錮習以資實用均如所請行時幅匪盤踞長城棠令黃國瑞督軍進攻敗援賊趙開元蘇克功等乘夜火攻

賊壘賊驚潰斬賊日數十名擒匪首劉兆清等戮之遂克長城捷入得旨嘉獎棠復飭黃開榜潘順等水路並進連克孫疇一帶賊壘三月實授漕運總督檄黃國瑞等進剿山東幅匪孫化青陣斬之旋擒斬逆酋孫化祥擊退大股援賊遂克中村及費縣境之轉箇山蘭山之黃牛山各賊寨陣斬匪首邱兆林於洛等沂州肅清尋疏陳淮揚鎮營制事宜十條下部議行四月遵旨覆陳沿江畝捐並辦理圩工疏言畝捐一項卽在糧臺收款之例局外未悉底蘊以爲到處有捐捐名不一但見進款之鉅而不知出款之多但見徵收之繁似覺漫無稽考而不知各分各款均已隨時達部以致視爲利藪上達宸聰第待哺方殷未能因噎廢食見飭隨時接續造報以備稽覈而釋羣疑至市河十字河係山陽鹽城兩縣所轄淤墊日甚該縣官紳稟請挑土築圩公議按畝捐貲出夫其中受災之區貧乏各戶均免派夫並無派捐徇脅情事疏入報聞時髮逆圍天長棠檄黃開榜擊退之五月檄黃國瑞等攻山東教匪於白蓮池斬逆首劉雙印劉錦春毀其巢而練總苗沛霖復糾衆叛棠檄總兵姚廣武擊退之六月苗逆陷壽州窺蒙城棠復飭姚廣武黃開榜水陸等軍攻懷遠以掣賊勢八月逆匪築壘於宋家灘官軍礮船爲所困棠

以苗逆猖獗由未能四面制賊疏言欲拯臨淮之急必須一軍由宿蒙直擣懷遠北路則苗逆急於回顧臨淮要地或可保全且將來削平苗逆之策尤必數道進兵方可制賊死命十月苗逆攻蒙城棠派兵進剿斬逆首劉報櫃等五人蒙城圍解十一月密陳皖北隱患略言淮北鹽務疲敝悉由李世忠把持盤剝所致其勇隊在懷壽一帶盤踞六年之久焚掠之慘甚於盜賊苗平而淮北粗安李存而淮南仍困請早爲辦理上是之命僧格林沁等會商籌辦三年以剿辦清淮徐宿各匪功賞頭品頂戴仍交部議敘尋署江蘇巡撫偕兩江總督曾國藩等疏言見在江省又安一切應規復舊制請仍設淮揚道員缺下部議行四年二月調署兩廣總督棠奏賊股竄擾江境鹽阜沭陽一帶防務最要請收回署兩江總督成命專辦清淮防剿上嘉其體國公忠不避難就易仍暫留漕運總督任五月擒匪北竄河南巡撫吳昌壽奏請添兵渡河嚴防北岸命棠檄催水師迅赴濟寧策應棠奏江湖水師不便入黃請就黃河船隻添置礮位配以濱黃兵弁熟悉地形者入黃駕駛庶於軍事有濟如所請行初棠議採辦米石試行河運八月米船全數抵通下部議敘旋署兩江總督時逆首張總愚竄擾河南許汝南陽圍陳州上以賊匪

裹脅數萬非數省兵力四面兜剿不可命棠飭清淮防兵會合兜剿尋奏清河存留兵勇七千餘人先因捻逆竄擾徐州睢宿桃源相距甚近路路需防儻步隊調出擊賊一時有警卽難回顧今於無可抽撥之中派出參將吳鳳柱等馬隊赴徐隨同曾國藩所部會剿遊擊唐高憑等各帶步勇分紮宿邳扼守運河兩岸又檄漕河標兵防守清桃以顧東路嗣官軍擊賊獲勝賊西趨歸德遂檄吳鳳柱馬隊回駐宿遷並飭水路各軍隨時豫防諭曰吳棠於清淮情形最熟著嚴飭防軍視賊所向迎頭截擊時黃國瑞歸宗復姓陳氏十二月棠奏國瑞患病瘋狂請褫職押送回籍飭令地方官管束從之仍以國瑞戰功疊著命該管官隨時派員妥視五年七月江北湖河盛漲清水潭池南隄決下部議處八月調補閩浙總督六年十一月以兩廣總督瑞麟疏劾廣東巡撫蔣益澧署藩司郭祥瑞等朋比各款棠奉命赴廣東會同將軍慶春覆查得實益澧等下部嚴議十二月調四川總督七年十一月檄道員唐炯率川兵剿貴州龍井苗匪復麻哈州城攻白沙關打鐵坡賊寨皆破之又飭道員張文玉等軍克黃平州城十二月派提督周達武等敗賊於婁落赤碧磯等處大小夷部詣營求撫遂克西昌八年正月周達武等屢勝於

咩牛壩苗匪次第投誠建南肅清捷聞得旨嘉獎四月唐炯等攻拔觀音山玉麟山苗寨復清平縣城六月飭道員劉嶽曙等攻七星橋賊壘克之斬逆首馬天啟回酋馬天順等乞降古城羊街等百餘村寨均就撫尋甸全境肅清先是雲貴總督劉嶽昭疏劾棠眷屬抵川時役夫三千餘名僕從需索門包屬員致送規禮荒謬貪污物議沸騰等款諭令兩江總督李鴻章馳往確查十月李鴻章覆奏以上各款均無其事並言川省官場習氣頗尙鑽營吳棠履任後遇事整頓以致貪官猾吏造言騰謗應毋庸議諭曰川省吏治防務均關緊要吳棠務當振刷精神力籌整頓勿稍瞻顧至劉嶽昭所參各節並未詳查虛實輒以傳聞無據之詞率行入奏實屬不合著嚴行申飭復以御史張沅等奏參道員鍾峻等包攬招搖棠任用之幕友彭汝宗係奉旨飭令回籍之員經李鴻章查實奏入棠坐失察下部議處九年十月棠飭總兵劉寶國等會滇軍攻回匪斬逆首劉應貴於陣擒僞大將軍李亨賓等誅之克永北廳城十年署成都將軍捐建書院令八旗子弟學習清文十一年二月奏川省地方遼闊戶口繁多上年夏旱秋潦收成歉薄糧價驟昂饑民嗷嗷待哺請於釐金捐輸項下撥銀二十萬兩以資賑濟從之七月貴州下

游肅清逆首李宰腐及其黨歐保降等皆伏誅得旨嘉獎十二年雲南肅清十三年三月貴州軍務事竣棠以協濟餉需先後下部優敘六月灌縣山匪作亂棠檄提督李有恆等馳往督剿斬匪首余其澗等川西平八月奏言民生之休戚視吏治爲轉移欲收其效於臨民之後尤宜正其身於筮仕之初見因部章新班遇缺兩項人員遇有缺出即可超補是以川省需次人員多方設措相率報捐紛至沓來爲他省所未見該員等家非素封捐項均由重利借貸而來其中卽有可用之才私債纍纍索逋者日向追呼欲望其履潔懷清豈易得乎一經到任夙累旣重心有所分官債雖清民生必困舉劾之權雖操之疆吏第此等驟膺民社之員鮮諳治體卽隨時撤換另委賢員而地方受累已深故考察人才必視其進身之始而講求吏治尤當慎於序補之先請敕部另議變通章程將報捐發川之新班遇缺先及新班遇缺兩項州縣人員暫行停止俾試用甄別年滿歷練較久人員得有序補之期實於地方吏治有益疏下部議十一月以病奏請開缺得旨賞假兩月光緒元年七月飭提督李有恆等剿紮永廳股匪克其巢復以雷波廳蠻匪作亂派提督胡國珍等剿平之十二月復疏請開缺允之二年卒遺疏入諭曰前任

四川總督吳棠老成練達辦事勤能由大挑知縣洊擢監司循聲卓著嗣在漕運總督任內帶兵剿賊保衛地方歷任閩浙四川總督克盡厥職上年冬間因患病准予開缺俾得安心調理茲聞溘逝軫惜良深吳棠著加恩照總督例賜卹任內一切處分悉予開復應得卹典該衙門察例具奏伊子廕生吳炳和著賞給舉人准其一體會試用示篤念盡臣至意尋賜祭葬予諡勤惠三年漕運總督文彬奏言棠以大挑知縣分發南河歷任清河桃源邳州等處諮訪利病訓誨愚蒙循循然如父兄之詔子弟不事操切而民自化及其誅鋤強暴則又執法極嚴不稍姑息一時治行稱最輿論翕然咸豐三年粵寇陷金陵竄揚州淮浦震驚土匪蠢動棠時在清河縣任地無城郭手無兵柄徒以忠義號召士民創設團練不數月間會者數萬人聲威大振伏莽潛消乃騰檄遠近相爲固守聲言大兵百餘萬指日卽到以安人心賊遂徘徊瓜揚不敢前進文宗顯皇帝降旨垂詢有知縣吳棠團練鄉勇深得民心之諭尋丁母憂去職百姓流涕相送途爲之塞起復後歷任徐州府道擒匪以蒙亳爲老巢出入必經徐宿一歲數至所過成墟棠約各屬士民堅壁清野隨地築圩遷人民輜重於內遴壯丁守之田禾垂熟則以隊伍遊徼於

外俾農民收穫入圩不爲賊有徐民始知生聚之樂棠以道員兼司兵餉精心擘畫一錢一粟分散必均士卒感其至誠雖不獲飽而戰則必力故所向有功嘗剿賊汴塘與卒伍同臥起者數月致患溼疾終身不瘳咸豐十一年奉命署漕運總督衙署向在淮城清江又甫經兵燹民物彫殘人皆視爲危地棠以該處爲南北咽喉關係甚重受篆次日卽率師駐之捻匪屢次驟攻均經擊敗棠於運河兩岸建城以爲縣治人有所恃流亡漸復其時粵寇未平捻氛尤熾深慮合併爲患棠扼守要衝頻年苦戰內保裏下河完善之區外靖徐淮海三府州之地前督臣曾國藩得以專力圖南不爲捻匪牽制棠實有贊助之功同治四年購米雇船創行試運江北河運漕糧遂從此始清江舊有書院爲賊所燬棠於軍旅之暇籌款興復俾諸生講學其中資以膏火人知向學文教日興綜計棠筮仕以來自州縣以至漕督未離江北地方與淮徐士民患難相共十有餘載衆情依戀宜申報饗仰懇將棠事蹟宣付史館並於清淮徐州各建專祠以彰忠藎而慰輿情尤之子炳和恩賞舉人直隸候補道

沈葆楨

沈葆楨福建侯官人原籍浙江道光二十七年進士改翰林院庶吉士三十年散館授編修咸豐元年充武英殿纂修二年五月大考二等八月充順天鄉試同考官三年記名以御史用四年五月補江南道監察御史十二月記名以知府用五年六月掌貴州道監察御史十二月授江西九江府知府六年六月調署廣信時粵逆楊輔清連陷貴溪弋陽偪攻廣信城兵聞警先潰葆楨籌餉河口急馳歸誓死守城賊不得逞適總兵饒廷選來援七戰皆捷圍乃解九月工部右侍郎江西學政廉兆綸督辦軍務兵部右侍郎曾國藩先後疏稱葆楨力守空城定志誓死從容設措悉合機宜得旨嘉獎命以道員儘先補用七年擢廣饒九南道八年三月沙溪賊回竄廣信擊走之八月曾國藩請以葆楨兼筦糧臺九年三月剿平弋陽土匪六月賞加按察使銜九月請開缺回籍養親巡撫耆齡奏入詔可十年六月授吉南贛寧道七月復申前請仍許之十一年四月命偕地方官辦理本籍團練十月上以葆楨前在廣信府任規畫有方輿情愛戴敕迅赴曾國藩軍營聽候委用復敕曾藩國查看才具如能勝重任不必拘守常格迅速保奏十二月擢江西巡撫諭曰前任江西吉南贛寧道沈葆楨朕久聞其德望冠時才堪應變雖係

回籍養親之員第賊匪一日未平則臣子一日不得自安況移孝作忠古有明訓朕以該撫家有老親因擇江西毗連省分授以疆寄風土不殊迎養亦近且係該撫曾經仕宦之區將來懋建殊勳尤足光榮門戶以承親歡該撫讀書明理經朕如此體恤如此委任諒不至再有瀆請見在江西辦理善後正需才德兼備之員著卽赴任葆楨奉詔感泣疏言前在廣信以有饒廷選七戰皆捷轉危爲安後在廣饒九南道任以兩江督臣曾國藩密籌援應俾措危機凡此因人成事藉免愆尤乃蒙溫諭有加無已且以烏烏之私上勞眷注臣何人斯恩遇至此臣今許國以身義無旁顧又何敢因晨昏之戀負高厚之恩得旨覽奏具見悃忱忠孝性成可嘉之至同治元年二月命兼辦廣信糧臺三月疏言衢州被圍玉山接濟之米石軍火皆爲賊阻其股匪游弋圖乘左宗棠東下窺伺信防斷我後路必廣信衢州一帶先無意外之虞再由金嚴規取杭州方無糧絕援阻之患又言廣郡地方逆匪垂涎已久急宜未雨綢繆擬仿堅壁清野法令士民憑險築寨卽倡捐擇要興修均報聞時賊欲由江山圖犯廣信葆楨以左宗棠後路關繫匪輕請令曾國藩調兵豫防請馳至廣信嚴籌布置七月上練兵五便疏又請增募勇丁以資戰

守詔皆加勉十一月皖逆西趨豫章命葆楨飭各軍分紮緊要併力防剿曾國藩左宗棠撥兵援應二年三月檄官軍截擊休寧竄匪勝之時徽州三面皆賊葆楨調軍分駐休寧祁門四月破逆首黃文金於小路口賊竄建德潛糾黨合攻祁門復偕湘軍大破之尋又偕浙軍克黟縣毀曹門林河浮橋焚其巢六月上以江南各軍分道進攻賊勢窮蹙必竄江西敕葆楨督飭將士務殲醜類以圖規復金陵七月賊由太平石埭建德擾江西葆楨自請議處詔寬免之旋督軍進剿賊遁江境肅清復以敗匪入湘境飭參將韓進春馳至贛州擊之九月因病請假十月御史華祝三疏言風聞葆楨以協餉用人與曾國藩意見不合恐礙大局諭曰曾國藩辦理東南軍務需餉孔亟沈葆楨值地方凋敝或致協餉未能如數至用人一項沈葆楨以地方大吏甄劾不得不嚴而曾國藩因軍營需才菲葑無棄亦恐耳目難周惟天下事往往因小嫌而誤大局不可不思曾國藩沈葆楨皆賢能卓著公忠體國之臣如果各懷意見安望共濟艱難此後沈葆楨於曾國藩軍營協餉苟可設法必當竭力籌措並著該撫卽行銷假任事曾國藩於沈葆楨曾經甄劾而來投效者亦當留意汰斥勿開倖進之門彼此函商共歸一是以古人廉頗藺

相如寇恂賈復爲法同心共事無貽朝廷南顧之憂葆楨尋以西路有警力疾視事疏陳布置情形得旨西路布置甚爲周密具見以國事爲重忠盡可嘉所稱隨時參酌以民力補兵數之闕以吏治爲軍政之根洵能洞中窾要著卽振刷精神力圖整頓務令治效蒸蒸日上三年二月賊分股內竄一由玉山趨廣信一由開化窺婺源聞婺源有備遂由白沙關犯德興官軍分路馳擊斬馘六千有奇餘匪遁回玉山旋竄弋陽貴溪南境葆楨自請嚴議上加恩寬免命實力剿辦毋使蔓延三月疏言曾國藩前請將江西通省釐金均撥皖餉今事勢與前不同請仍歸本省藉固軍心上以皖軍關繫全局詔江西分提一半餘仍接濟國藩軍時竄踞南豐之賊築壘死守別股擾及新城官軍累戰皆捷又一股分陷金谿圖犯建昌葆楨檄各營分道躡剿四月克新城進圖南豐上念南豐久未下以提督楊岳斌督辦皖南江西軍務前浙江按察使劉典佐之命葆楨俟該提督到後會商剿辦機宜五月賊突犯撫州擊走之又疊陷宜黃崇仁蔓延豐城新淦夾江各縣救葆楨妥籌防剿毋令偪近省垣六月逆首汪海洋陳炳文踞陳坊湖坊及火田畝一帶葆楨飭總兵王開琳先攻湖坊賊逸入火田畝迅擊之斃悍逆無數毀賊壘八

總兵孫昌國敗賊於張家橋道員王德榜等平貴溪盛洞源及小港逆壘七月破崇仁賊卡時浙省肅清逆首黃文金擁洪秀泉子福瑱奔竄昌化績溪黃文英亦竄涇縣祁門欲假道徽池擾江西爲入粵計敕葆楨實力防堵毋令一賊入境又以南韶一帶賊氛甚熾諭飭寧贛防兵越境會剿九月葆楨飭席寶田以精毅軍追福瑱疾趨五晝夜至石城大破之擒洪仁珩洪仁政黃文英等搜獲福瑱於石城荒谷中皆伏誅十月捷聞諭曰沈葆楨自簡任江西巡撫籌辦防剿深合機宜江皖賊匪屢竄江西均能次第掃蕩並生擒首逆殄除巨酋著加恩賞給一等輕車都尉世職並賞給頭品頂戴十一月葆楨推功諸將拜疏籲辭諭曰朝廷論功行賞一秉至公沈葆楨於賊竄江西後督率兵勇先後肅清戡亂之功深堪嘉賞至該省兵勇不敷調遣雖曾國藩左宗棠撥軍援助究由該撫開誠布公聯爲一氣始能將士用命迅奏膚功且江西省吏治民風日有起色皆由該撫實力實心克盡厥職尤宜殊恩特沛以獎勵勤所請著毋庸議嗣以父母衰病懇請歸養上以江西軍務初平一切善後事宜未便遽易生手優詔留之賞葆楨父母人養六兩時福建漳龍各屬賊勢鴟張敕撥勁旅助剿有力保桑梓卽所以上慰椿萱之

諭葆楨卽分飭諸將扼要嚴防四年二月以親疾請假歸省許之尋疏稱邊防喫緊暫緩回閩諭嘉其實能視國如家三月丁母憂得旨賞假百日俟假滿改爲署理江西巡撫卽行赴任葆楨籲懇終制有旨俯從嗣閩浙總督左宗棠創舉船政六年調督陝甘疏稱船政非葆楨無可屬者於是命總理福建船政八月疏陳船隲及學堂採料募勇情形略言馬尾一區上抵省垣南臺水程四十里下抵五虎門海口水程八十里奇自五虎門而上黃埔壺江雙龜金牌館頭亭頭閩安皆形勢之區而金牌爲最要自閩安而上洋嶼羅星塔烏龍江林浦皆形勢之區而羅星塔爲最要馬尾地隸閩縣踞羅星塔之上流三江交匯中間港汊旁通長樂福清連江等縣重山環抱層層鎖鑰當候潮盛漲海門以上島嶼皆浮潮歸而後洲堵礁沙縈迴畢露所以數十年來外國輪船夾板常泊海口非土人及久住河岸之洋人引港不能自達省城道光末年大吏籌備海防但載石鑿舟以塞林浦上流竟割重重天險而棄之至今海濱土人猶共以爲非策也船隲在馬尾山麓地曰中岐但就一方地勢而言大江在前池南而下羣峯西拱狀若匡牀中間坳處舊本邨田去年購買歸官始圈爲船隲窪者平之低者壘之慮田土之積弱難

勝也沿隄密釘木椿以固之慮海潮溪汛之不時驟至也沿隄各增五尺以防之隄外三面環以深濠既藉通運載之船亦可瀉積淤之水隄內濱江者爲船槽若鐵廠輪廠機器廠斲木棧房皆參列其後隄外之東池北爲臣及辦事各員紳公所外列外國匠房三十間其左爲法國學堂又左爲英國學堂江濟則煤廠在焉山麓則中國匠房在焉循麓再上山之左肋可以眺遠飭前駐楚軍五百人因地築壘不特可攬船廠全局沿江上下數十里風帆沙鳥如在目前稍下則監督日意格所居也在臣公所右者有外國醫生寓樓匠首寓樓其與日意格山樓對峙者則副監督德克碑之屋也一切土木計日課工屈指可數此船隄內外之大概情形也船政根本在於學堂因就馬尾甄別法學藝童隨及英學藝童既因其勤惰分別陞降復定章程每日常課外令讀聖諭廣訓孝經兼習論策以明義理其續招人局者擇其文理明通尤擇其資質純厚者以待敘補以中國之心思通外國之技巧可也以外國之習氣變中國之性情不可也且浮澆險薄之子必無持久之功他日於天文算學等事安能精益求精益求密謹始慎微之方所以不能不講也採辦一節似易實難官場習氣以浮冒搪塞爲能船政之興尤視爲利

藪用商賈有時擾累之弊甚於官司用官司有時侵漁之端甚於商賈馴至劣幕奸胥交通市儈鬼蜮叢生是以民間置貨尙有精良一屬公家便多質鼎又聞向來外國船材煤炭多運自緬甸暹羅見雖遣員先於近處採幹搜覈他日恐仍不免取材荒裔重洋遼遠更防不勝防任非其人糜費雖多仍歸無用擬乘此發令之初明罰敕法以警其餘人心畏法而後弊竇可除良材畢至也至船廠之興固須收羅工匠輪船下水則舵工水手缺一不行非徒習慣風濤尤須熟精槍礮蓋國家之創造輪船譬諸千金買駿衝鋒陷陣不持寸鐵雖有千里之馬安足成功見在洋匠尙未至閩船成尙需時日擬先調閩中舊撤礮船十隻派練水勇二百三百名未成船以前藉以巡緝近洋成船以後即可擐甲登舟駕輕就熟此臣近日考校學堂分飭採辦及招募水勇之情形也報聞九年丁父憂十一年內閣學士宋晉疏請暫停製造上下其章於葆楨酌議具奏尋密疏言自強之道與好大喜功不同即使中國礮船遠勝西國我皇上斷不肯勞師異域爲漢武唐宗之所爲至自固藩籬爲民禦災捍患非惟聲勢所不容已抑亦覆幬所不可遺查宋晉原奏稱此次輪船如謂以之制夷則早經議和不必爲此猜嫌之舉果如所言則

道光年間已議和矣此數十年列聖所宵旰焦勞者何事天下臣民所痛心疾首不忍言者何事耗數千萬金於無底之壑公私交困者何事夫恣其要狹爲抱薪救火之計者非也激於義憤爲孤注一擲之計者亦非也所恃者未雨綢繆有莫敢侮予之一日耳若以此爲猜嫌有礙和議是必盡撤藩籬並水路各營去之而後可也原奏稱用之外洋交鋒斷不能如各國輪船之利名爲遠謀實同虛耗夫以數年草創伊始之船比諸百數十年孜孜汲汲精益求精之船是誠不待較量可懸揣而斷其不逮然亦思彼之擅是利者果安坐而得之耶抑亦苦心孤詣不勝糜費而得之也且各國輪船亦有利有不利其創之也各有後先其成之也互相師法久於其道熟能生巧則利鹵莽從事淺嘗輒止則不利加意講求兢兢惟恐失之則利恃其精巧疏於防範則不利此中人事居其半天事亦居其半卽如廠中新造之萬年清伏波輪機購諸外國者也安瀾輪機成諸本廠者也萬年清船下屢作屢改伏波安瀾漸少更張而試諸海邦則伏波穩於萬年清安瀾穩於伏波前者生後者熟也勇猛精進則爲遠謀因循苟且則爲虛耗豈但輪船一事然哉原奏稱捕盜已有師船運糧不若沙船前年浙江成案師船出則洋盜悍然

戕官輪船出則洋盜弭首就縛前年運米成案沙船自滬達津以月計輪船自滬達津以日計此其利鈍贏絀尙待辯而明哉至謂成造船隻撥給殷商收其租價以備修理不知兵船與商船迥別商船務高其頂廣其艙以受客貨兵船則避槍礮壓風濤歛之惟恐不密以兵船界之商人卽不索其租彼亦不以爲利也船政洋料購自香港木料購自暹羅此皆與洋人交接不居奇則幸耳不受我擾也當設廠之始地本水田所需木樁不可勝數省城木價爲之驟昂且丈尺不敷因而委員赴上游採辦嗣木商聞風自至卽時停止臺灣曾委員採辦樟木嗣後洋人踵行亦於前年停止惟雞籠之煤炭無日不需辦運亦源源不絕然價值水腳均照民間一體通行公平交易從無派諸官累諸民者當左宗棠之議立船政也中國無一人曾身歷其事者不得不問之洋匠其約自鐵廠開工之日起立限五年成船一十六號估價三百萬惟中外員匠有生熟巧拙之殊銅鐵木料有貴賤之異零星物件外國取諸市肆而皆足中國非一一木廠自造卽購諸重洋然所估之數不甚相遠以結款四十萬爲購器募匠買地建廠之需則昔之所估與今之所費相去懸絕專就建廠而論一椽未立一瓦未覆第購民田釘木樁培山土地

基甫固而所費已不貲矣蓋洋匠所見者外國已成之廠而不知當日經營締造之艱難所以臣任事時卽有應辦工程應發款項多從前未經議及之奏也原議鑄鐵爲一廠打鐵爲一廠模子爲一廠水缸兼鑄銅爲一廠輪機兼合櫓爲一廠合共五廠後增拉鐵槌鐵鐘表帆纜火輓舳板六廠又立打鐵輪機分廠共添八廠添廠則添機器添匠徒並添公費原議學堂兩所藝童六十名後添繪事院駕駛學堂管輪學堂藝圃四所藝童徒共三百餘名均係不容已之需懍遵我皇上勉爲其難毋得瞻前顧後之旨不追繩其原估之疏漏而務責其全局之必成所有添設緣由均經奏明在案各廠工九年夏間甫畢拉鐵槌鐵兩廠十年秋間始畢此微臣辦理不善工遲費鉅之實在情形也夫辦理不善臣百喙難辭然不當以承辦者之乖方疑創議者之失策儻因是而廢之機器所置甚鉅發賣無承售之人存儲有看守之費積日朽蠹卒亦歸於無用輪船無一歲不修者數歲則一大修且須撤換機器工停而船無可修則廠廢而船隨之俱廢然猶曰舉已費者棄之耳驟籌七八十萬金遣散不做工之洋人清還不適用之物價海關釐局未必具此巨款更挪解部之款協餉之款以應此急需是省費而費逾迫也然猶曰

一勞永逸耳外人之垂涎船廠非一日矣我朝棄則彼夕取始也以借用爲言無辭以卻之也繼必於他處故啟費端勒賠兵費而以此爲抵枝節橫生有非意料所及者且當日左宗棠與洋匠堅明約束各國周知今無故而廢之一則謂中國辦事毫無把握益啟其輕視之心一則謂中國帑項不支益張其要求之燄此臣所以反覆再三竊以爲不特不能卽時裁撤卽五年後亦無可停所當與我國家億萬年有道之長永垂不朽者也臣志廣術疏拙於居積或滋糜費夏獻綸精覈遠過於臣接辦以來無日不兢兢以撙節爲念然用款之鉅猶昔非不痛減此減而彼旋增臣交卸時尙有存款儲材尤富今則截長補短銀垂盡料亦垂盡海關五萬按月解給且恐萬萬不敷欲求減省或在五年限滿洋匠遣散後乎禦侮有道循已成之法而益精之耳洋人來中國教習未必皆上上之技去年曾國藩有募幼童赴英國學藝之舉閩中欲踵而行之以艱於籌費而止擬限滿後選通曉製造駕駛之藝童輔以年少技優之工匠移洋人薪水爲之經費以中國已成之技求外國益精之學較諸平地爲山者又事半功倍矣西法雖千頭萬緒要權輿於算學中法與西法派雖別而源則同臣嘗會同前督臣英桂有請設算學科之

奏部臣因無人可以閱卷議駁然聞京師同文館教習李善蘭通西學者也前任山西河東道楊寶臣通中學者也儻廢無用之武科以勵必需之算學導之先路十數年後人才蒸蒸日上無求於西人矣然而外侮之來何能待我但就已成之船礮訓練精熟未嘗不可轉弱爲強否則士卒不習雖極精之船礮亦塊然一物耳前蒙特簡福建水師提督李成謀爲輪船統領俾常川訓練惟是訓練不能無費該提督素性廉介必不思藉潤乎其中而缺瘠家貧力不足以賠墊臣旋即丁憂交卸未及奏請應懇敕下督撫臣按月籌解五百金爲該提督出洋操費但凡閩局之船無論留於福建及分撥外省者統領均須逐時校閱其高下其藥彈等項則撥歸何省之船由何省應付毋令缺乏縱事變猝發不至倉皇無措矣至養船經費原不在造船所估之中若慮兵船過多費無從出則間造商船未嘗不可亦不患領者之無人但兵船爲禦侮之資不容因惜費而過少耳上嘉納之尋服闋仍接辦船政于三年日本國尋覽琉球窺我臺灣泊兵船於廈門四月上命葆楨渡臺巡視兼辦各國通商事務葆楨具疏會同閩浙總督李鶴年等言會議洋務者非一味畏蕙祇圖有日置身事外不恤貽患將來卽一味高談謂義憤快心

不妨孤注之一擲於國家深遠之計均無當焉臣謹以管見所及陳之一曰聯外
交倭奴狡譎非常其稱兵也西人斥其非彼則以商諸中國業經見許對中國據
理詰之則互相推諉閃爍其詞西人雖疑其奸終無從遽發其覆臣等擬將疊次
洋船遭風各案摘要照會各國領事其不候照覆卽舉兵入境並與生番開仗各
情形亦分次照會公評曲直日本舉動西人纖悉必知之如其怵於公論歛兵而
退上也否則輾轉時日我得集備設防其鬼蜮端倪亦可隨時探悉一曰儲利器
議者咸謂日本迥非西洋之比然有明中葉全盛之時萃俞戚譚劉之將才竭蘇
浙閩粵之兵力狼噬豕突數十年而後定不可謂非勁敵其陸戰雖西人亦憚之
臺灣與之鄰壤形勝扼要物產富饒彼旣利欲熏心未必甘爲理屈而所以敢於
鷗張者則又窺中國器械之未精兼恃美國暗中之資助其已抵臺南各船均非
中國新船之敵而該國尙有鐵甲船二號雖非完璧而以摧尋常輪船則綽綽有
餘彼有而我無之水師氣爲之奪則兩號鐵甲船不容不購也海疆守口之利莫
若水雷中國雖能自製而力量單薄不足以破巨艦則水雷不能不購也陸路之
利莫如洋槍操演則宜用前膛臨敵莫便於後膛閩局雖有之而不足於用添募

陸師則各種洋槍並其合膛之子不能不多購也。水路之利在輪船巨礮船無煤炭與無船同礮無子藥與無礮同。則洋煤洋火藥合膛之開花彈以及火龍火箭之類不能不多購也。明知所費不貲必有議其不量力者。然備則或可不用不備則必啟戎心。乘兵燹未開之時尙可爲牖戶綢繆之計。遲則無及矣。一日諸人材閩省陸勇寥寥。因臺北查辦匪徒已調兩營東渡。其分防馬尾廈門及上游三營均不可動。水師除輪船外亦無可量移者。若待弁兵厚集誠恐稽期。見在福星長勝海東雲三船已在臺灣揚武在臺歸添子藥。又卽日赴臺靖遠在廈門振威經臣鶴年派令齎摺赴滬。浙江之伏波山東之飛雲天津之萬年清濟安永保均調而未歸。聞廣東之安瀾卽日可到。到時當飭其裝足子藥煤炭。臣葆楨卽乘之東行。並咨調提臣羅大春卽日赴臺。與臣葆楨及鎮道會籌一切。此時消除萌蘖須得折衝樽俎之才。查有籍隸廣東之前署臺灣道黎兆棠。膽識兼偉。洞悉洋情。威惠在臺。民懷吏畏。臣葆楨謹飛函赴粵。調之前來。並以共事日久。深相倚仗之吏部主事梁鳴謙等諸文士隨臣葆楨東渡。以期集思廣益。毋失機宜。一日通消息臺洋之險。甲諸海疆。從前文報恆累月不通。有輪船後乃按月可達。然至颶風大

作時雖輪船亦爲所阻欲消息常通斷不可無電綫計由福州陸路至廈門由廈門水路至臺灣水路之費較多陸路之費較省合之不及造一輪船之資瞬息可通事至不虞倉卒矣疏入均從之時臺地額兵多不可用葆楨赴臺後倭兵登岸設營社番伺隙待動葆楨據理責之曉諭諸社宣布皇仁番族悉遵約束倭人氣奪隨修城垣築礮壘練營勇備器械不先開釁端而無一不爲可戰計衆心益安倭人亦如約撤兵遂籌善後十二月與幫辦臺灣事宜福建布政使潘蔚疏請福建巡撫移駐臺灣北路增設府縣略言洋務稍鬆卽善後不容稍緩惟臺地之所謂善後卽臺地之所謂創始也善後難以創始爲善後則尤難臣等曩爲海防孔亟一面撫番一面開路以絕彼族覬覦之心以消目前肘腋之患固未遑爲經久之謀數月以來南北諸路縋幽鑿險斬棘披荆雖各著成效卑南奇萊各處雖分列軍屯祇有端倪尙無綱紀臺地延袤千有餘里官吏所治祇濱海平原三分之一餘卽番社耳國家並育番黎但令薄輸土貢永禁侵陵意至厚也而奸民積匪久已越界潛蹤驅番占地而成窟穴則有官未開而民先開者入山旣深人迹罕到野番穴處涵育孳生則有番已開而民未開者疊巘外包平埔中擴鹿豕遊竄

草木蒙茸地廣番稀棄而弗處則有民未開而番亦未開者是但言開山而山之不同已若此生番種類數十大概有三牡丹等社恃其悍暴劫殺爲生啓不畏死若是者曰兇番卑南埔裏一帶居近漢民略通人性若是者曰良番臺北阿史等社雕題勢面向不外通屯聚無常種落難悉獵人如獸雖社番亦懼之若是者曰王字兇番是但言撫番而番之不同又若此夫務開山而不先撫番則開山無從下手欲撫番而不先開山則撫番仍屬空談今欲開山則曰屯兵衛曰刊林木曰焚草萊曰通水道曰定壤則曰招墾戶曰給牛種曰立村堡曰設隘碉曰致工商曰設官吏曰建城郭曰設郵驛曰置廨署此數者孰非開山之後必須遞辦者今欲撫番則曰選土目曰查番戶曰定番業曰通語言曰禁仇殺曰教耕稼曰修道途曰給茶鹽曰易冠服曰設番學曰變風俗此數者又孰非撫番之時必須並行者雖然此第言後山耳其繁重已若此山前之入版圖也百有餘年一切規制何嘗具備就目前之積弊而論班兵之情竄也蠹役之盤踞也土匪之橫恣也民俗之悖淫也海防陸守之俱虛也械鬪紮厝之疊見也學術之不明庠序以容豪猾禁令之不守煙賭以爲饗殮官斯土者非無振作有爲正己率屬之員始苦於事

權之牽制繼苦於毀譽之溷淆救過不遑計功何自使不力加整頓一洗浮澆但以目下山前之規模推而爲他日山後之風氣雖多一新關之區適多一藏奸之藪臣等竊以爲未可也嘗綜前後山之幅員計之可建郡者三可建縣者有十數固非一府所能轄欲別建一省又苦器局之未成而閩省向需臺米接濟臺餉由省城轉輸彼此相依不能離而爲二環海口岸處處宜防洋族教堂漸漸分布居民向有漳籍泉籍粵籍之分番族又有生番熟番屯番之異氣類既殊撫馭匪易況以創始之事爲善後之謀徒靜鎮之非宜欲循例而無自使臣持節可暫而不可常欲責效於崇朝兵民有五日京兆之見儻逾時而久駐文武有兩姑爲婦之難臣等再四思維宜仿江蘇巡撫分駐蘇州之例移福建巡撫駐臺而後一舉而數善備何以言之鎮道雖有專責事必稟承督撫而行重洋遠隔文報稽延率意徑行又嫌專擅若駐巡撫則有事可以立斷其便一鎮治兵道治民本兩相輔也轉兩相妨職分不相統攝意見不免參差上各有所疑下各有所恃不賢者以爲推卸地步其賢者亦時時存形迹於其間駐巡撫則統屬文武權歸一尊鎮道不敢不各修所職其便二鎮道有節制文武之責而無遴選文武之權文官之貪廉

武弁之勇怯督撫所聞與鎮道所見時或互異駐臺則不時採訪而耳目能周黜陟可以立定其便三城社之巨姦民間之冤抑見聞親切法令易行公道速伸人心帖服其便四臺民煙癮本多臺兵爲甚海疆營制久壞臺兵爲尤良以弁兵由督撫提鎮抽取而來各有恃其本帥之見鎮將設法羈縻祇求其不生意外之事是以比戶窩賭如賈之於市農之於田有巡撫則考察無所瞻徇訓練乃有實際其便五福建地瘠民貧州縣率多虧累恆視臺地爲調劑之區不肖者翫法取盈往往不免有巡撫以臨之貪黷之風得以漸戢其便六向來臺員不得志於鎮道及其內渡每造蜚語中傷之鎮道或時爲所挾有巡撫則此技悉窮其便七臺民游惰可惡而戇直實可憐所以常聞蠢動者始由官以吏役爲爪牙吏役以民爲魚肉繼則民以官爲仇讎詞訟不清而械鬪紮屠之端起奸宄得志而豎旗聚衆之勢成有巡撫則能豫拔亂本而塞禍源其便八況開地伊始地勢殊異成法難拘可以因心裁酌其便九新建郡邑驟立營堡無地不需人才丞倅將領可以隨時札調其便十設官分職有宜經久者有屬權宜者隨事增革不至廩食之虛糜其便十一有一開煤鍊鐵有第資民力者有官參用洋機者就近察勘可以擇地而

興利其便十有二夫以臺地向稱饒沃久爲異族所垂涎今雖外患暫平旁人仍
眈眈虎視未雨綢繆之計正在斯時而山前山後其當變革者當創建者非十數
年不可成功而化番爲民尤非漸漬優柔不能渾然無間與其苟且倉皇徒滋流
弊不如先得一主持大局者事事得以綱舉目張爲我國家億萬年之計況年來
洋務日密偏重在於東南臺灣海外孤懸七省以爲門戶其關繫非輕欲固地險
在得民心欲得民心先修吏治營政而整頓吏治營政之權操之督撫總督兼轄
浙江移駐不如巡撫之便臣等明知地屬封疆事關更制非部民屬吏所應越陳
而夙夜深思爲臺民計爲閩省計爲沿海籌防計有不得不出於此者上悉如所
請十二月臺事粗定乃內渡未幾獅頭社兇番狙殺遊擊王開俊光緒元年正月
又東渡討平之故例禁內地民人偷渡臺民私入番者治罪葆楨奏准盡弛舊禁
以廣招徠四月授兩江總督兼辦理通商事務大臣二年疏陳江寧府城屬彫敝
狀請酌減上元五縣本年漕糧下部議行十二月以病乞休自此至四年二月凡
四請均賞假慰留之四月請停武科詔以其率改舊章不准行五年四月入覲賜
紫禁城騎馬仍回本任十一月舊疾增劇復請開缺得旨賞假兩月安心調理尋

卒遺疏入諭曰兩江總督沈葆楨秉性沈毅練達老成歷受先朝恩遇由翰林外任知府洊擢封圻前在江西巡撫任內籌辦軍務悉協機宜嗣因殄除粵匪餘孽賞給一等輕車都尉世職朕御極後擢任兩江總督於地方利弊認真整頓任事實心不避勞怨前因舊疾增劇賞假兩月方冀調理就痊長資倚任茲聞溘逝悼惜殊深加恩追贈太子太保銜入祀賢良祠照總督例賜卹任內一切處分悉予開復應得卹典該衙門察例具奏靈柩回籍時著沿途地方官妥爲照料伊子附貢生璋慶賞給舉人瑩慶瑜慶以主事用璘慶璿慶瑤慶琬慶俟服闋後由吏部帶領引見復諭曰已故兩江總督沈葆楨自咸豐五年出守九江調署廣信當粵逆鷗張之際嬰城固守力戰解圍嗣補授吉南贛寧道幫辦江西團練事務同治元年奉命巡撫江西該故員膺兩朝特達之知力圖報稱維時粵逆併力窺伺江西沈葆楨相機堵剿連戰皆捷保全實多厥後綜理船政殫心竭慮創立規模其巡視臺灣於撫番開山各事尤爲不辭勞瘁弭患無形迨總督兩江實心實力整頓吏治保惠民生與巡撫江西時先後一轍實屬功績昭彰著將該故督政績宣付史館立傳並准其在江南省城及立功各省分建立專祠以彰忠藎尋賜祭葬

予諡文肅六年閩浙總督何璟疏言葆楨生長福州夙爲人望文章經濟冠冕一時當船政開辦之初成萬年清等輪船二十餘艘俾海埔收利涉之效嗣復開山撫番居民至今感之請於福建省城建立專祠葆楨妻林氏雲貴總督林則徐女也當楊輔清擾廣信時葆楨出籌餉於河口林氏聞警以死自誓刺血作書乞援於饒廷選略謂夫婦受國厚恩徒死負咎因爲七邑生靈請命喻以駐軍玉山若廣信失事則衢嚴之屏蔽盡撤援廣信正以固浙防又引睢陽嬰城許遠亦以不朽爲勗而望其不爲賀蘭進明廷選得書馳援葆楨亦歸城虛無人供億胥缺林氏躬執汲爨以犒將士獲保郡城曾國藩奏稱其深明大義光緒十年六月江西巡撫潘蔚以其書稿呈進疏請附祀葆楨廣信專祠上許之十二年詔圖葆楨像於紫光閣子瑋慶恩賞舉人瑩慶湖南候補知府璘慶四川馬邊廳同知瑜慶光緒十一年舉人江蘇候補道璿慶南河候補同知瑤慶琬慶均欽用主事孫翊清光緒十五年舉人江西候補道襲一等輕車都尉世職勳清江蘇試用縣丞贊清廣東試用通判

清史列傳卷五十三終

清史列傳 卷五十四

大臣畫一傳檔後編十

布彥泰

布彥泰顏扎氏滿洲正黃旗人父珠爾杭阿鑲藍旗滿洲副都統嘉慶八年賞騎都尉世職布彥泰由廕生於十二年賞藍翎侍衛十二月襲職十三年陞三等侍衛二十三年授二等待衛充伊犁領隊大臣道光二年擢頭等待衛調喀什噶爾參贊大臣旋授辦事大臣三年回京當差四年充考試翰詹監試大臣五年四月在尙茶正行走六年復授伊犁領隊大臣八年賞副都統銜調烏什辦事大臣九年正月擢喀什噶爾總兵六月因病開缺十年閏四月賞副都統銜頭等待衛在乾清門行走五月授哈密辦事大臣八月調西寧辦事大臣時伊犁邊外不靖將軍玉麟以布彥泰前曾兩任領隊大臣情形熟悉請調赴伊犁藉資助理詔如所請尋授伊犁參贊大臣十一年正月因浩罕在吹塔拉斯築城疏言吹塔拉斯在伊犁西南卡外恐逆匪據爲巢穴似宜及早查辦請敕揚威將軍長齡等於派兵

出卡捕拏逆匪之便順赴吹塔拉斯確切察勘如實有聚衆之事無難藉南路兵力使該處震懾軍威庶卡外邊內千餘里之地可期肅清旋擢鑲紅旗滿洲副都統是月疏陳新疆茶政及洋商貿易情形請酌復舊章從之十二年二月調塔爾巴哈臺參贊大臣七月疏言塔爾巴哈臺所屬巴爾魯克蒙古內之額魯特察哈爾哈薩克各部落請酌添佐領三員領催五名官兵五十名其巴爾魯克坐卡官兵祇領給本身口糧將伊犁換防蒙古官兵例支跟役口糧全行裁汰如所請行十三年十月調伊犁參贊大臣十一月以副將金和詳揭布彥泰辦理平糶前後不符經伊犁將軍特依順保查明入告得旨降四級留任十四年四月因病開缺回京十八年署正藍旗漢軍副都統旋陞察哈爾都統二十年三月擢伊犁將軍四月入覲命在御前行走五月赴將軍任二十一年二月授鑲黃旗蒙古都統二十二年疏陳開墾事宜略言惠遠城東三顆樹地方計可墾地三萬餘畝請就本地民戶選擇安設種地輸糧阿勒卜斯地方計可墾地十七餘萬畝卽請責成阿奇木伯克等籌計戶口之數酌量勻撥諭曰民戶應如何選充授田回屯應如何安插移住以及籌備牛具籽種各事宜仍著該將軍飭令委員等趕爲布置二十

三年以天津添設總兵諭令體察新疆兵制情形可否裁改尋疏言查伊犁總兵駐紮綏定城係伊犁所轄八城之一不與將軍參贊同城近來卡外夷情與從前迥不相同設遇裁官減弁更必妄生揣測涵播謠言似與鎮靜邊防大有關係該鎮兵丁以耕種爲餬口俱各安土重遷勢難驟予裁移儻將總兵易爲將領若兵數仍舊則於營制不符兵數稍裁又與屯務有礙不敢遷就目前致貽後患惟天津旣須添設總兵自應於各鎮中量行裁改茲就西路一帶而論口外實難議撤惟陝西西安鎮總兵本係將軍標中軍副將嘉慶年間改爲總兵查陝西全省情形以南山爲最重見有漢中陝安二鎮重兵駐守北山臨邊一帶亦有延綏鎮足資控制其西安省會有將軍巡撫副都統駐紮滿營兵丁六千餘名撫標參將城守營參將各一員滿漢兵丁不下萬名大員不爲不多兵力不爲不厚且該鎮轄境俱在平原與其裁撤邊陲重鎮致費周章似不若議裁此缺移置天津較爲妥便應請敕下陝甘督臣富呢揚阿悉心籌議據實覆奏再查嘉峪關外共設總兵三員除伊犁鎮外一爲巴里坤鎮實缺總兵係乾隆二十七年由西安移駐一爲喀什噶爾換防總兵係道光八年以換防副將改設巴里坤界在哈密烏魯木齊

之中係屬腹地較之伊犁鎮情形輕重稍有不同喀什噶爾改設總兵原因彼時換防兵丁多至六千五百名是以必須改協爲鎮方資表率十餘年來防兵陸續裁減僅存三千五百名較之從前多寡懸殊若將該鎮仍改爲換防副將歸於該城領隊大臣統轄與體制邊防均有裨益即將該鎮換防總兵改爲巴里坤換防總兵在該鎮以額缺作爲換防體制無異即可騰出一缺移置天津亦尙簡易惟是新疆重地外人環列而居一切機宜總宜率由舊章方爲鎮定庶幾中外帖服歷久相安疏入下部議行十二月疏陳開墾地畝分安民戶回屯覈辦章程下部覈議二十四年二月疏報塔什圖畢等處開墾地畝豐著成效上嘉其忠誠爲國督率有方賞加太子太保銜仍交部優敘又以烏魯木齊未墾之地未據都統奏辦命布彥泰會同該都統惟勤體察情形派員確勘並詳查伊犁已開地畝外及各城地方如有曠地可以招墾一律奏辦尋疏言伊犁各城曠地向於操兵查馬之便留心相度並與文武員弁加意講求令其廣諮博訪如有可墾之地卽行呈報是以節次奏明辦理之案幸皆有成此外未經開墾者大抵窒礙多端不能確有把握緣新疆地多砂磧雨澤又稀專賴人力灌輸無論石磧鹹地不堪開墾卽

或土本膏腴而無水泉可引則亦不能耕種終致荒蕪見於未墾各荒地中不得已而思其次查惠遠城東六十餘里之阿齊烏蘇有廢地一區頗爲寬廣嘉慶八年間經前任將軍松筠奏撥八旗閑散餘丁赴地耕種許以作爲己產未幾乏水接濟遂卽廢棄該旗人久經散去此項廢地已與舊派旗人無干其所以廢棄之故係因當時未開水利僅恃巴燕岱灌田之水暫行分漑其勢自難爲繼今欲重行墾復必將該地迤東各屯原用之水逐段開渠引而西下遞相轉輸其極東須引哈什河水方可用之不竭如此設法挹注則各屯田地皆可澆灌不致顧此失彼而阿齊烏蘇荒地亦得灌溉成田似可以垂久遠惟統計遞開渠道須繞越五百餘里其間橫崖斷澗土石參差卽使人力可勉而成而經費浩繁較前次各案開墾之資不啻數倍伊犁爲極邊僻壤瘠苦異常迥非內地勸捐可比臣雖倡率捐廉而一時未具規模不敢遽行入告茲疊奉宸謨指示益切服膺見委歷次總辦開墾之撫民同知慶辰印房章京塔那泰等前往勘估一面通盤籌畫俟立定章程卽當專摺奏辦儻該處實多格礙亦必設法另籌總期地利無遺獲收實效至前次開墾案內捐辦各員經吏部奏請敕查所捐銀數及所墾頃畝若干固

爲覈實起見惟查伊犁歷屆捐墾成案皆係收工而非收銀緣口外辦工與內地情形互異內地人員衆多每遇大工由總局彙收經費發交工員領用雇夫購料皆可專司卽工匠人等亦有行市總頭承領雇募故捐銀者不必經手工程若伊犁則管理地方者只有廳員巡檢在官人役亦屬無多若捐工之員交銀卽爲了事則辦理乏人是以所派工員不但捐資並皆出力始敢奏請鼓勵且墾田必以開渠爲第一要務其挑挖出土有力者皆當能之而築壩造橋安插建屋則非土木工匠不能如式造成儻不各認各工各雇各匠卽恐互相觀望催促不前卽以挑工而論除回夫一項每夫照案發給鹽菜銀五分外其他民匠民夫雇資每增至數倍緣回夫有限當各員一體開工不能不於民人或遣犯中各自擇人議價而道里之遠近工力之優絀亦伸縮不齊故每日工價止能聽各員自行給發其督工監工之員但能覈計工數而銀錢非其經手無從查悉其詳臣赴工驗收亦惟覈其已辦工程作爲定準且各員尙有給予夫匠飯食製辦器具以及格外犒賞不一而足彼此相形之下踴躍爭先倍易刻期集事又如所捐木料樹株等項大小價值不同遠近運腳亦異與捐給之牛具籽種均難瑣屑覈開並因歷奉上

諭捐辦之工概免造冊報銷是以興工之初卽奏免造報奉旨允准今若事後仍令開造不惟記憶難周且恐經手丁胥倚恃工已驗收任意浮報徒煩駁飭竊惟辦工以工爲主計銀似不如計工之直捷亦不如計工之覈實所有前次用過夫匠五十三萬四千工業經於開墾完竣摺內奏明確數在案可否仍遵前奉諭旨免其造冊報銷至所墾頃畝之數查三棵樹紅柳灣共實得地三萬三千三百五十畝阿勒卜斯實得地十六萬一千餘畝亦經前次奏明在案但荒地之開墾成田由於渠工之迄通水利故開渠雖各分工段而著效則一氣呵成似不能劃出某頃某畝爲某員所捐辦者此係工次實在情形不敢稍有隱飾如蒙聖慈俯鑒並乞恩免飭查疏入從之時上命布彥泰傳諭前兩廣總督林則徐前赴阿克蘇烏什和闐周勘可墾荒地並選派明白曉事之協領一員隨往勘視布彥泰以此次勘地須體察回疆一切情形何處可招戶民認種能否相安何處祇應撥給回子耕種有無流弊全在揆情度勢務爲久遠良圖旗營協領各員識力未周職分較小疏留喀喇沙爾辦事大臣全慶暫緩更換與林則徐會同履勘允之二十五

年四月英吉沙爾布魯特滋擾圖木舒克卡倫派兵擊走之九月疏報查勘新疆

開墾事務完竣得旨嘉獎十一月陞陝甘總督二十六年正月以伊犁新開渠水暢旺灌溉勻霑奏獎出力人員六月以黑錯寺番匪滋事派兵剿毀具疏以聞諭曰布彥泰奏官兵勦毀番匪所辦可嘉之至該處番族衆多素稱獷悍其膽敢出巢肆搶者歷有年所從前總督提鎮等辦理番案一味因循遷延敷衍了事以致該番等習爲故常肆行無忌此次黑錯寺番族恃強抗拒經該督等示以兵威添調官兵帶領進剿經過番莊隨燒隨進斃賊多名該匪皆奔竄逃命見經查拏餘匪緝捕漢奸酌量撤兵辦理妥速布彥泰等調度有方均著交部優敘尋疏言黑錯寺敗匪竄匿果岔地方經官兵窮追搜捕業已殲擒殆盡見在拉布魯寺僧衆收合散還番族帶領來營匍匐乞命當爲嚴立條約准令悔過自新官兵卽日凱撤上嘉獎之先是英吉沙爾拏獲逆犯胡完解經布彥泰覆審供詞不符奏請提訊得旨交伊犁將軍薩迎阿覆審至是訊明胡完本名薩密斯項並非逆子布孜爾罕亦無從逆情事上以布彥泰首先平反冤獄交部優敘二十七年正月命查陝甘營務三月以保送甘肅學習期滿之雲騎尉泮魁箭射無準降一級留任六月復以保送陝西寧羌營年滿千總鄒步雲箭射無準下部議處八月馳奏喀什

噶爾卡外安集延布魯特糾約本地回子屯聚城外尋釁肆擾刻已咨會提督卽行帶兵出關一面帶兵親赴肅州策應奉諭安集延布魯特等回衆性類犬羊反覆靡定膽敢煽結近城回衆困踞城垣藐法已極必應速伸天討以靖逆萌布彥泰著授爲定西將軍軍務一切悉聽節制奕山著作爲參贊大臣襄辦軍務均著豫給關防其所需軍餉卽由陝西甘肅兩省藩庫支發該將軍等務宜激勵將弁除暴安良一切相機剿辦迅速蕝事俾根株盡絕邊圉肅清以副朕望九月以大兵獲勝二城解圍命仍回陝甘總督本任十月以軍務告竣請撤軍需局並請將見存銀二十八萬兩分撥新疆各城從之二十九年七月因病請假嗣病勢增劇籲請開缺許之時布彥泰爲固原州知州徐采鎮稟計上命協辦大學士戶部尙書祁寯藻會同陝甘總督琦善查辦三十年正月查明覆奏諭曰此案布彥泰雖查無贓私重情惟封疆大吏關防不密辦理清查致多歧誤並令屬員虛報到任任聽家人售賣衣物種種蠱率殊負委任著交部嚴加議處卽行回京聽候部議尋得旨布彥泰著照部議降四級調用任內本有革職留任之案著卽革職三月賞二等待衛充葉爾羌幫辦大臣五月以前在陝甘總督任內派委人員不實降

二級留任十一月調伊犁參贊大臣咸豐元年六月以俄羅斯請赴伊犁會議通商上命將軍奕山與布彥泰熟籌具奏八月布彥泰等擬定章程奏入諭曰此次俄羅斯使臣來伊犁會議通商事宜該將軍參贊公同酌定條款內如卡外搶案中國不管及在內地竊案分別酌辦等情所議均屬周而並將喀什噶爾不准通商一層據理折辯該使臣無可置對給予文憑以爲回國銷差之據文內仍正色拒絕杜其日後請求辦理尙屬妥協見在該使臣已回本國所有伊犁塔爾巴哈臺二處貿易是否卽自明春試辦其辦理通商安插情形如何分別奏咨存案並內地商民如何稽查約束一切未盡事宜仍著該將軍等悉心妥議具奏單內第一條商人與外商交易彼此設官照管由營務處派員前往各自秉公辦理經此次議定後常時貿易全賴所派之員彈壓撫綏管照一切遇有爭鬪小事公同剖斷不至因小釀大邊防所繫最爲緊要必須遴委廉明公正之員通曉事理而不貪小利者方能辦理得宜彼此歷久相安免啟外人輕侮該將軍參贊及塔爾巴哈臺大臣遇派委時切宜加意慎重如何酌定年限輪替之處詳晰議奏另片奏會議將來有犯罪名一條儻遇人命重案卽照恰克圖見辦之例辦理措詞尙爲

得體至摺內所稱嗣後遇有殺傷俄羅斯人等犯均解往陝甘總督衙門訊辦等語甘肅相距遼遠若將人犯解往訊辦轉多未便應否仍由該將軍參贊等就近訊明定罪再行解往甘肅辦理之處一併詳議具奏十一月賞副都統銜先是上命奕山等將俄羅斯貿易章程再行妥議並國子監祭酒勝保奏宜思患豫防嚴定限制一併妥爲籌計至是布彥泰偕將軍奕山覆奏語詳奕山傳二年正月授正白旗漢軍副都統仍留伊犁參贊大臣任六月以夷匪鐵完庫里先後竄擾喀什噶爾烏什卡倫上命布彥泰馳赴葉爾羌確查七月復奉寄諭奕山等奏稱六月初九日又有逆裔倭里罕帶領布魯特賊匪自圖舒克塔什卡倫竄入經官兵追至巴爾昌卡倫逃出是該匪等仍在卡倫窺伺並未遠颺守卡官兵何以任其出入毫無抵禦著布彥泰仍遵前旨速赴葉爾羌逐細詳查相機妥辦並迅飭各城一體嚴防務期弭患未萌毋稍疏懈三年二月以捐銀一千兩交部議敘九月命回京當差四年正月到京旋奉諭前有旨令布彥泰馳赴王慶坨軍營因該員患病賞假著卽加緊醫治迅赴軍營毋稍遲緩旋以捐銀五千兩賞戴花翎復以病難速痊懇請開缺詔允之布彥泰先後在新疆呈進馬匹賞蟒服文綺等件凡

四次光緒六年五月卒遺疏入諭曰前任陝甘總督正白旗漢軍副都統布彥泰由嘉慶元年廕生藍翎侍衛歷陞喀什噶爾參贊大臣伊犁將軍陝甘總督宣力有年嗣因案革職旋補正白旗漢軍副都統於咸豐年間因病奏請開缺在旗養疴年屆九旬茲聞溘逝軫惜殊深著加恩照都統例賜卹任內一切處分悉予開復應得卹典該衙門察例具奏伊子候選主事松岫著俟百日孝滿後由該旗帶領引見以示篤念耆臣至意尋賜祭葬

覺羅樂斌

覺羅樂斌正黃旗人由印務參領於道光二十二年九月授正紅旗蒙古副都統十一月充烏里雅蘇臺參贊大臣二十六年回京署正藍旗滿洲副都統二十九年授盛京副都統咸豐元年擢烏魯木齊都統三年二月以倡捐軍餉下部優敘旋陞綏遠城將軍四月奏稱烏魯木齊刑名事件日繁請添設印房委署章京一缺如所請行八月調成都將軍四年五月復因捐助軍需下部議敘九月兼署四川總督五年新津縣匪徒滋事逃入蒲江知縣韓一松督捕遇害匪益熾遂撲縣城樂斌檄官軍討平之旋即署總督任時馬邊廳夷匪滋事於沿山漢地搭蓋夷

棚樂斌會同總督黃宗漢調集兵團進剿殲匪千餘毀夷棚二千餘間匪首就戮各夷悉降六年六月復以捐助軍餉移獎子弟八月復署四川總督九月授陝甘總督七年果落克賊番在嘉峪關外劫掠復插帳索賴地方樂斌飭官兵剿辦賊踞雪山抗拒官軍由閒道繞賊後來攻賊平得旨嘉獎八年三月因甘省綠營停募兵丁糧缺過多奏言甘肅地值邊陲幅員遼闊額設綠營兵制甲於他省至咸豐四年前任總督易棠因外省協甘兵餉欠解過多無可籌墊奏請將各路咨回甘省糧缺暫停募補並將軍營撤回歸伍兵丁抵派操防本營所出糧缺亦暫停募在易棠所議原爲稍減兵額卽可以少發餉銀固屬權宜之計第當日並未議及應行停補數目見經飭查各營停募糧缺已積至四千餘名實存營兵止有二萬六千三百餘名設有差遣無從調派所關非小擬請將見在各營未補糧缺斟酌地方情形量爲攤派共停補一千二百分以省餉需下餘糧缺卽行照數募補疏入下部議行十年六月入覲九月署陝西巡撫譚廷襄奏請將陝西各鎮兼歸巡撫節制諭令樂斌抵陝與譚廷襄妥爲商略尋覆奏擬照河南山西巡撫之例請旨將該撫賞加提督銜遇有征剿防堵要務陝西各鎮協官兵由該撫行文酌

調仍咨總督查照下部議行旋復捐助軍餉移獎子弟時津沽一帶海疆不靖諭樂斌帶兵來京尋事平回任初撒拉回民馬朵三糾黨滋事十一年正月三月間復糾黨擾及西寧碾伯等縣九月樂斌以匪衆悔罪投誠首犯伏誅邊圉肅清入告並請獎出力文武員弁尤之十二月復請入覲諭曰甘肅爲西陲重地該督身任兼圻應如何力圖報稱茲乃仍以叩謁等詞瀆請並歷述寵遇語多鄙瑣不知大體至於此極著傳旨申飭初以樂斌辦理撤回經前任都察院右副都御史張芾御史陳廷經裘德俊等先後奏參上命兵部尙書麟魁戶部尙書沈兆霖前往查辦同治元年正月麟魁等奏稱樂斌辦理撤回實有縱匪殃民情事復諭將樂斌被參納賄營私各款澈底根究二月沈兆霖奏查明撤回滋事大員不能實力剿辦捏稱悔罪投誠奏結請獎致該回仍肆侵掠其被參納賄營私各款查無實據惟失察侍妾與屬員之妻往來復以候選知縣爲幕友屢爲保奏並於家人等盤踞把持不能覺察以致聲名狼籍疏入上以樂斌昏庸乖謬有心欺飾著卽革職並發往新疆效力贖罪八月到戍三年以報效鉅款經伊犁將軍常清奏請釋回並稱其當差奮勉未便沒其微勞上不允四年伊犁被圍常清會同新任將軍

明緒奏言樂斌籌餉籌兵不遺餘力復請釋回諭曰革員樂斌既在伊犁尙能出力著加恩准其釋回仍著留於伊犁幫同辦理一切兵餉事宜但能始終出力並准明緒酌量保奏光緒元年故

李宗羲

李宗羲四川開縣人道光二十七年進士以知縣卽用分安徽三十年四月署英山縣知縣八月補婺源縣知縣十二月調太平縣知縣咸豐三年廣西賊洪秀全率黨陷安慶旋踞江寧宗羲奉調隨軍協理糧餉旋赴廬州大營兼管軍裝製造五年官軍解柘皋圍保陞同知十月克廬州府賞戴花翎七年以剿辦來安棚匪出力晉知府八年侍郎曾國藩以楚軍進規安徽潛太舒桐調充營務處九年署安慶府知府以疾去官同治元年河南巡撫嚴樹森疏薦宗羲孝行純篤歷著循猷得旨敕部調取引見未至而樹森調撫湖北又疏調宗羲得旨交嚴樹森差遣委用三年兩江總督曾國藩檄赴江南管江北釐金總局嚴剔諸弊裁定沿江釐捐科則十一月曾國藩續保克復江寧籌餉各員宗羲以道員歸兩江補用四年又以宗羲嚴正明慎能持大體特保之旋署兩淮鹽運使三月陞安徽按察使曾

國藩奏請暫留鹽運使任允之八月擢江寧布政使五年清水潭決漕高郵等七州縣宗羲設法籌款工賑並行又詳定招墾荒田酌緩升科限制章程及江寧七屬民衛丁漕酌定折徵等次分上下兩忙徵收八年四月入覲五月授山西巡撫尋諭曰晉省沿河要隘近接陝疆甘回未平河防仍須籌辦務臻嚴密該省吏治民生及籌防籌餉各事宜務當斟酌盡善宗羲奏言山西急務首在河防見督同署按察使李慶翱等分段駐守並查看河堡情形請添募勇丁交提督宋慶就近節制允之旋劾布政使胡大任廢弛因循命勒令休致十一月陝回乘河冰來犯宗羲檄各營堵擊三戰皆捷自是賊數由延川韓城竄出均擊卻之九年七月丁繼母憂十一年服闋十二年正月授兩江總督敕即馳赴新任並辦理通商事務宗羲疏辭上優詔褒勉時日本尋釁宗羲購備軍火築烏龍山礮臺十有六江陰十有五都天廟六象山十有一焦山八下關四又建吳淞口礮臺江陰北岸瀏聞沙烏龍山北岸沙洲圩一律添築成犄角之勢九月宗羲疏陳外侮內患天時人事皆有可慮請省營繕減服御不以爲泮奐優游之日而以爲臥薪嘗膽之時十三年五月疏言星變屢見外患方熾上年御史沈淮奏請停止園工臣亦冒貢愚

忱言不足采工仍未停茲復總總過慮有不能已於言者時局之艱難度支之短絀特一端耳今洋人近在肘腋之間圓明園距京城數十里既無堅城管鑰之固復少大枝護衛之兵頻年以來每遇民教爭鬪之案洋人要求不遂動挾兵船兵船所指先以天津天津朝警則海淀夕驚此事勢之必然者燕居無戒備之虞而西山爲逋逃之藪島人有反側之心皇上奉皇太后於此此臣所萬分不安者也如蒙皇上乾綱立斷速諭停工天下臣民知皇上有臥薪嘗膽之思必共振敵愾同仇之氣加以磨厲積以歲年不患不斬月氏之頭而繫樓蘭之頸也異日百姓阜康四夷賓服靈臺經始不日可成奚必亟亟以圖其艱哉昔漢文帝惜露臺百金之費而南越稱臣宋仁宗罷玉清舊址之苑而西夏款塞蓋未有內政修明而外侮不潛戢者也周公之輔成王也侍御僕從罔非正人出入起居罔有不欽蓋人主居崇高之位持威福之柄苟不以敬畏爲心其英睿之君必萌驕肆之念苟無正人在側因事進規則小人務爲諂邪以竊祿位近日大學士文祥之引疾侍郎桂清之外調道路頗有惜詞臣竊謂老成憂國者宜留之左右以輔成聖德忠直敢諫者宜導之使言以恢張聖聽疏入上皆留覽會總理各國事務衙門條陳

六事曰練兵曰簡器曰造船曰籌餉曰用人曰持久上寄諭各疆臣詳議以聞宗
義奏言用人尤萬事之根本第就海防言之則以求將才爲最要宋臣楊萬里有
言相不厭舊將不厭新蓋言用兵忌暮氣宜年壯氣銳素有遠志未建大功之人
至宿將勳臣老而益壯帝心簡在任用自有權衡固無俟臣下之論列也自古有
海防無海戰今日練兵仍以水陸兼練爲主先就水師言之戰艦不及輪船輪船
又不及鐵甲船而船之得力與否仍視乎駕馭之人今之戰艦卽不能一時更換
似應就弁兵中挑赴輪船學習仍歸水師提督節制則事權一而經費省更招集
沿海熟習沙綫能耐勞苦之人參用西法庶可漸收實效然沿海之地廣勢不能
徧設輪船敵乘無備處舍舟登陸則我船礮皆無所用夫外人涉重洋而來志在
登陸非在海中中國惡其來者惡其登陸非惡其在海中則陸軍宜急講矣練陸
兵之法查同治十年曾國藩奏稱沿海之奉天直隸山東江蘇浙江福建廣東七
省共練陸兵九萬沿江之安徽江西湖北共練陸兵三萬合成十二萬以陸兵爲
禦敵之資以輪船爲調兵之用海道雖極遼遠血脈皆可貫通今誠踵其議而力
行之各省分定數目各專責成貴精不貴多宜聚不宜散從前缺額之兵不必再

補見在已募之勇更加精練練兵尤須練藝選兵必須選將是在平時之實力講求矣西洋火器日新月異疊出不窮今日之所謂巧卽後日之所謂拙論中國自強之策決非專恃火器所能制勝然而風會所趨有不能不相隨轉移者近日各國之礮其後開門者首推德國之克鹿卜英國則首推烏理治洋槍則以美國林明登爲最臣陸續購買迄未運到夫欲自強而必倚西人以爲強亦必不可恃矣見在上海機器局已能如式製造惟火器不難於用而難於不用有事之時日日試演尙可經久無事閑置立形鏽壞以後購造槍礮應發交該管員弁操演之後時時磨洗不許鏽壞違者罪之是亦珍惜巨帑之要義臣聞自古覘國勢者在人材之盛衰不在財用之贏絀在政事之得失不在兵力之強弱未聞以器械爲重輕也且西人之所以強者其心志和而齊其法制簡而嚴其取人必課實用其任事者無欺誑侵漁之習其選兵甚精故臨陣勇敢而不畏死不察其所以強而徒效其器械豈足恃哉自福建創設機器局上海繼之江寧天津又繼之皆由槍礮而推及輪船當輪船初成之時已有橫絕四海之勢及西洋各國鐵甲船出而輪船爲之減色近日英國復創蚊子小鐵船載數百磅巨礮狙擊鐵甲船三里之外

而鐵甲船又爲之減色臣愚以爲造船仍以兵輪爲主如大沽吳淞直東閩廣等口各駐鐵甲一二隻蚊子船三四隻佐以兵輪安配重大擊遠之礮與礮臺相輔屹成重鎮以戢戎心惟泰西各國輪船以百數十計鐵甲船以數十計大礮以千計小礮以數千計即使中國歲籌巨款多方製造亦必不能如彼之多且精且即使百方搜括船礮皆可相敵仍不能禁其不登岸據臣愚見船礮不可不辦亦當量力徐圖稍蓄財力以練陸防之兵以備有事之用而仍汲汲以修政事造人材爲本使各國嚮風慕義或外侮可以稍紓近年勸捐收釐津貼無法不備民力竭矣於此而欲開源竊恐無源可開今之言理財者或謂煤山鐵山乃中國自然之大利若一一開採不獨造船造礮取之裕如且可以致富可以自強見在磁州業已奏明試辦而湖南福建江西山西等省已成之煤廠鐵廠擴而行之果能有效何必舍近求遠取給外國爲目前權宜之計惟有暫將各口洋稅通提六成專供海防之用五年爲限當可集事若夫節流之法非甚高難行也其效亦非難致也自古能節用者國必富謀聚斂者國未有不貧蓋利端一開則上下交征人主之侈心必生貪吏之盜心愈熾而所入轉不敵所出竊謂欲求節用必自朝廷始誠

能罷土木之工省傳辦之費減宮中之用則一歲所省何啻百萬各省督撫悉心籌畫盡裁不急之費而於州縣之錢漕關局之稅釐實力稽察勿使乾沒則一歲所增何啻百萬請敕下戶部統籌全局分別出款入款界限於綜覈各項之外指定籌防專款應用若干俾中外上下曉然於經費之有限財用之有制力求撙節不必言利而度支可裕矣以上四條皆就原奏推廣言之要必得人而後可以言持久臣周諮博採覺事之可行者尙有三端查沿海各島大都土瘠產薄惟臺灣一島形勢雄勝與福州廈門相犄角東南俯瞰噶囉巴呂宋西南遙制越南暹羅緬甸新嘉坡北遏日本之路東阻泰西之往來實爲中國第一門戶此日人所以垂涎也且其地產蓄富有山木可採以成舟航有煤鐵可開以資製造其客民多漳泉潮嘉剛猛耐苦之人足備水師之選乘此倭事初定番民感激國恩之時如得幹略大員假以便宜俾之輯利民番兼用西人機器以取煤鐵山木之利遲之數年該處自可開製造之局自練防海之師爲沿海各省聲援絕東西各國窺伺此中國防海之要略事之可行者一也海外新嘉坡檳榔嶼舊金山新金山各埠頭均有閩廣人在彼貿易每處不下數萬人此皆世沐聖恩榮懷故土中國人至

款接甚殷其爲領首之人必有幹濟之才足以提倡全埠如從泰西原請派領事出洋之議物色人才不論官階文武大小有能任此事者給以虛銜令前往各埠結納首領婉轉勸導發其同仇之念示以加秩之榮由各省督撫奏給職官派爲練首令其團練壯丁隨時操演約計經費有限而獲益無窮事之可行者二也西洋各國考諸地球參諸天度皆距中國數萬里卽電報極迅而兵船之來究須六七十日見在通商各口洋人星羅碁布中國情事無一不偵察周知而彼都情形中國皆未深悉自斌椿志剛孫家穀出使後至今無續往之人竊謂通商各國宜選有才略而明大體者隨時遣使設有交涉之件可辯論者與之辯論可豫防者密爲設防且於彼國有用之人才新造之精器均可隨時採訪以爲招致購買之地事之可行者三也十二月因病乞罷得旨准其開缺安心調理光緒元年回籍四年命查四川東鄉讞獄宗羲以袁廷蛟聚衆算糧始則因官紳通同浮收繼則因知縣孫定揚冒昧請兵其後提督李有恆妄殺平民千百餘人等情據實入告遂平反六年召入都以疾未愈疏請暫緩起程允之十年閏五月卒遺疏入諭曰前任兩江總督李宗羲由州縣洊擢封圻勤勞素著前因患病准予開缺調理茲

聞溘逝悼惜殊深李宗義著照總督例賜卹任內一切處分悉予開復應得卹典該衙門察例具奏尋賜祭葬十一年兵部尙書彭玉麟奏言宗義由知縣洊擢封圻所在著聲請舉其卓卓者言之署兩淮鹽運使時淮南鹽艘亂後改道泰輿河淺難運宗義於瓜洲之東別濬新河一千五百餘丈沿河築壩壩內濬塘曰新河塘於是舊河可屯小船沿江可建倉棧外江停泊鹽艘永無風濤之險至今商民賴之爲江寧藩司時大難初平宗義創招墾法以安殘黎圖籍無存請無論民衛丁漕按各縣科則酌中折徵錢文以應正供助軍需民皆以爲便清水潭決口籌款辦工賑活三十餘萬人淮軍剿捻北行督辦後路糧臺歲給餉需四百餘萬大功以成巡撫山西時回逆方熾晉省屏蔽畿疆關繫綦重宗義添募勇丁五千擇要扼紮冰橋凝結時回匪三次搶渡均力擊卻之及總督兩江以其俗尙華靡黜浮崇實力輓澆風講求海防廣置船礮以蘇松門戶吳淞爲最要長江關鍵江陰爲最先鎮江之焦山象山江寧之烏龍山均爲長江險要之區酌於各處創建礮臺至今遂爲重鎮其行政之可稱者如此黃河石莊戶決口山東大吏以防範誘諸下游宗義言自古宣防之方不外審地形順水性未有上游決口不堵而下游

能防範者力疏爭之卒如其議而河患以塞洋人以吳淞漲沙澆瀆總署議行挑挖宗羲上書極言不可逐層辯論實關海防形勢水利大局事得不行其遇事之有執如此宗羲內行純篤已故豫撫嚴樹森曾以其孝行特薦於朝從事軍中每遇保薦輒辭不與大府以介之推目之嘗以卓薦分發湖北差遣委用宗羲力請回皖不能得大吏委令代理荊州府事力辭之時兵燹之餘鄂粗完善皖則糜爛已極或謂既改官湖北卽任荊州何害宗羲則謂先以皖員乞病不仕則已仕則必仍歸皖不得曰鄂安而皖危鄂肥而皖瘠也荊州雖善地於心能安乎其制行之不苟如此臣考之輿論質所見聞略得其真竊謂宗羲節概置之古名臣中殆可無愧請將宗羲歷官政績事實宣付史館立傳詔如所請子本方舉人花翎兵部郎中

張樹聲

張樹聲安徽合肥人咸豐三年粵逆竄皖北樹聲由廩生倡練鄉團助剿疊有斬獲累功洊保同知同治元年兩江總督曾國藩檄令守蕪湖旋調赴無爲州防剿出力以知府留於江蘇補用二年六月剿賊江陰與遊擊周盛波攻毀麥市橋賊

營捷入命以道員仍留江蘇請旨簡放並賞戴花翎九月隨官軍進規無錫金匱擊賊於芙蓉山賊分股襲官軍後路樹聲麾隊迎擊賊大潰奪戰艦器械無數江蘇巡撫李鴻章上其功賞卓勇巴圖魯名號時僞忠王李秀成僞侍王李世賢率黨十餘萬來援樹聲會周盛波軍分路奮擊大敗之十一月克無錫金匱縣城李鴻章奏稱樹聲謀勇兼裕功績甚偉賞三品頂戴樹聲乘勝率十二營趨常州連破白家橋三里橋賊卡拔附城石壘多座三年正月敗賊於西石橋復敗丹陽援賊適華市場舍賊爲官軍所敗將他竄樹聲遏三河斷浮橋擒斬甚夥三月連毀常州城外賊壘四月克之七月復湖州府城上以樹聲堅忍百戰積功甚多賞二品頂戴以按察使遇缺題奏四年五月署江蘇徐海道十一月授直隸按察使六年擒匪由河南之南陽竄洧川尉氏中牟等縣敕樹聲馳赴直隸大名督辦防務七年以防剿出力下部優敘八年三月調補山西按察使直隸總督曾國藩奏暫留樹聲清理積案允之九月兼署直隸布政使九年授山西布政使尋護理山西巡撫十年授漕運總督十一年七月署理江蘇巡撫十月署兩江總督兼辦理通商事務大臣十一月奏江南北款收情形請分別蠲緩上元等屬錢漕詔如所請

十二年正月授江蘇巡撫十三年六月奏請以江蘇太倉州先儒陸世儀崇祀文廟敕下部議行九月丁繼母憂光緒三年服闋五年正月授貴州巡撫閏三月調廣西巡撫先是總兵李揚才在廣東靈山等處糾集匪徒肆擾越南詔褫李揚才職命督撫臣派兵馳截泊樹聲之任仍命會剿十月平之十一月授兩廣總督時苗匪王么糾黨竄擾西林縣界武宣縣積匪黃老受等亦圖撲縣城樹聲檄討悉平之六年八月劾廣東按察使張銑精神委頓瓊州鎮總兵殷錫茂器識庸暗均請勒令休致允之十月因兩廣鹽務疲滯運司何兆瀛年力衰頹委用非人頗招物議奏開何兆瀛缺八年二月署理直隸總督兼署辦理通商事務大臣四月以擅調翰林院侍講張佩綸幫辦北洋水師事宜經侍講學士陳寶琛劾論命交部議處七月交卸通商篆務先是六月朝鮮內亂燬日本使館上命樹聲派軍援剿時日本兵艦連檣至日使花房義質以五百人駐王京與朝鮮議約百端要挾樹聲檄提督丁汝昌等會同提督吳長慶率師疾馳至日使不虞大軍之突入也遂成約尋盟而退於是吳長慶等宵攻亂黨悉殲其渠亂遂定八月奏入上嘉樹聲相機調度督率有方賞加太子少保銜十一月因病奏請開缺諭賞假調理毋庸

開缺九年正月署北洋通商大臣六月命回兩廣總督任十年三月駐防越南官軍爲法人所敗北寧失守樹聲自請嚴議上以樹聲職任兼圻咎有應得但屬鞭長莫及加恩改爲交部議處四月復因病請開去總督專治軍事允之尋奏廣東積弊上責以在任數年何不早爲整頓直至交替在卽始行陳奏實屬意存諉卸先是內閣學士周德潤劾巡撫倪文蔚於知府鄒觀舉徇私濫保命樹聲查奏樹聲覆稱查明無弊請免議周德潤復劾樹聲覆奏欺飾詔下部議處議上奉旨加恩改爲革職留任仍督率所部辦理廣東防務十月卒總督張之洞等代進遺疏並奏稱樹聲忠偉誠懇識量過人平時治事纖悉縝密若拘謹已甚遇大利害當機立斷無稍回惑卽如朝鮮之役非樹聲赴機神速其不爲越南前事者僅矣時事方艱一時封疆舊臣如樹聲文武兼資通達中外機要者已不多有不獨臣等痛失同志之助尤不能不爲國家惜此人也諭曰前兩廣總督張樹聲才識優長勤能練達咸豐同治年間從事戎行戰功卓著由道員洊擢封圻於吏治營伍馭遠籌防諸務均能實心規畫前因患病准其開缺仍留辦廣東防務正資倚畀茲聞溘逝悼惜殊深加恩著照總督例賜卹並將事績宣付史館立傳任內一切處

分悉予開復應得卹典該衙門察例具奏尋賜祭葬予諡靖達十一年大學士李鴻章奏言樹聲前在江蘇剿賊大小數百戰疊克名城嗣官直隸政績卓著請於立功地方一體建立專祠尋復奏言廬州合郡紳士江蘇題補道吳毓芳等三十人稟稱咸豐三年以後粵逆竄擾皖北廬郡一帶土匪蠡起內外交訌幾至不可收拾經張樹聲與其弟原任廣西右江鎮總兵張樹珊毀家紓難倡辦鄉團擒治土寇復率練勇出境剿賊疊克含山六安英山霍山潛山太湖無爲等州縣太湖一役以五百人陷陣破逆酋陳玉成數萬之衆嗣桐城官軍潰退廬郡失守粵賊到處裹脅焚殺捻逆龔張孫苗諸大股往來肆擾張樹聲嚴申禁令不准鄉民從賊先平肥西匪寨繼敗捻酋張落刑於官亭就周公山下堅築堡寨阻河爲險陳玉成又率悍賊兩次圍攻皆設計敗之遠近襁負來歸之民咸知其制寇有方相依爲命力行堅壁清野之法張樹聲與諸團長聯絡援應如劉銘傳周盛波周盛傳唐定奎等皆同時築堡禦賊百數十里間寨壘相望耕戰相資屹立賊藪中六七年南仇粵逆北拒捻氛大小數百戰斬馘無數厥後練成淮軍剿平粵捻實由此立其基張樹聲以一諸生倡率忠義支柱艱危罕有其匹迄今父老追思往往

隕涕惟原籍合肥縣祀典尙缺請一體建立專祠以資報享疏入均得旨允之子
華奎四川建昌道

丁寶楨

丁寶楨貴州平遠州人咸豐三年進士改翰林院庶吉士請假歸丁母憂四年遵
義教匪楊隆喜犯平遠寶楨募勇擊走之進剿普定狎夷破水塘各巢又敗賊定
番州擒首逆吳瀾祥等敘功賞加五品銜並賞戴花翎六年服闋會苗教蠡起巡
撫蔣蔚遠奏留寶楨協防省城得旨免其散館授編修尋馳解平越州圍破甕安
土匪賈復保等八年記名以知府用十年授湖南岳州府知府同治元年正月調
長沙府十一月特旨署理陝西按察使未履任二年正月授山東按察使命募軍
隨剿捻匪科爾沁親王僧格林沁奏令剿辦東昌賊宋景詩旋劾寶楨擅議招撫
下部議擬降三級調用上改革職留任三年遷布政使四年僧格林沁戰歿曹州
以所轄境內未能加意協助下部議議上得旨加恩降四品頂戴留任如故五年
給事中孫楫御史朱鎮劾寶楨貽誤各款敕督辦三省軍務大學士曾國藩查覆
略言寶楨帶兵剿賊俱奉僧格林沁劄委而行原參各節多係傳聞失據其截賊

臨城時所部亦無淫擄重情功多過少官民尙無閒言疏入諭免置議旋以保守省城功賞二品頂戴十一月命暫署山東巡撫出東平督防六年二月陞授山東巡撫寶楨以制捻非馬隊不利而綠營馬兵旣難得力招募馬勇絕不可用東三省營兵又與勇不相聯絡疏請挑募東三省壯丁三千赴山東訓練剿賊上以所籌洞中窾要如所請行山東鹽岸疲弊寶楨奏請改歸官辦先課後鹽運至河南設局派員經理於藩司鹽道兩庫借銀五萬兩限二年歸還下部議行三月挑濬沈口河宣洩東西兩岸積水涸出民田二十餘里增築河牆五月捻匪由河南入鄆城鉅野攻沈口而分股從濰河海神廟偷渡河牆不守上以寶楨籌策無方下部嚴議褫失守地段總兵王心安職斬都司朱萬美以徇先是湖廣總督李鴻章奉命督師剿捻建議於膠萊河及運河築牆遏賊蹙諸海隅以淮軍山東軍南北分段認守賊之隙牆西竄也嚴旨責李鴻章與淮軍統領山東布政使潘鼎新均交部議處寶楨在防守禦未能嚴密扼截致賊飽颺厥咎尤重褫職留任並摘去頂戴十二月逆首賴汝洸就擒復寶楨職賞頭品頂戴七年捻酋張總愚自河南北趨定州近畿戒嚴寶楨聞警卽馳至東昌調集各軍挑精卒八千馬隊千人率

已革總兵王心安副將莫組紳齎五日糧倍道北援上以寶楨一軍北上迅速奮勇可嘉疊諭褒獎賊以北軍大集遂南陷饒陽寶楨亟遣王心安等回擊敗賊魏家村復饒陽城敗賊菜園又遣莫組紳追賊至肅寧諭曰丁寶楨由山東督兵北上首先奮勇派兵擊賊獲勝保衛近畿深堪嘉尚著卽整頓師旅相機進剿寶楨慮賊回竄山東仍率軍駐防東昌旋敗賊在平海豐七月張總愚敗死捻逆蕩平賞太子少保銜十二月入覲仍回任八年太監安得海私出山東矯稱採辦御衣寶楨奏聞卽飭屬嚴拏獲之泰安訊實具奏得旨就地正法並隨從太監人役等斬絞如律九年法蘭西以教案啟釁寶楨密請於山東各海口酌定兵數分別布置並練兵駐德州等處備緩急上韙之十年疏請整飭水師提關稅銀十萬購礮船練兵分防榮城縣石島海口及登州府天橋海口並分守各礮臺十月以病乞罷賞假三月毋庸開缺時鄆城侯家村河決注運運道被阻州縣多淹河東河道總督喬松年請俟次年興工上以水涸堵築易爲力命速塞之十二月寶楨力疾奏請自往督工上深嘉其獨任艱鉅十一年二月決口合諭曰丁寶楨勇於任事督率有方未及兩月克竟全功著交部從優議敘先是河決銅瓦廂穿運入大清

河至是寶楨偕署河東道總督文彬疏請堵合銅瓦廂決口復淮徐故道疏下廷臣會議十二年九月疏請開缺回籍修墓得旨賞假一年毋庸開缺瀕行疏言銅瓦廂決口情形在東省自宜先塞張家支門防黃大局宜先就石莊戶施工其築隄界連直隸計二百七十八里此次河水東趨東省受害甚深運道關繫亦重不得不亟圖辦理凡應行事宜自當悉心覈議籌定全局俟後任查照興辦不致誤時並繪圖具說以上十三年十月回任石莊戶決口猶未舉辦河水奪溜南趨山東江蘇安徽水患延數百里自濟寧至宿遷運河南北兩岸長隄衝刷殆盡上方詔直隸兩江山東及漕河各督撫會議奏辦寶楨至卽奏言臣方回任非不知河務之難儘可俟各督撫臣委員查明在同覈議會奏時已交春勢難舉辦卽可卸責竊見目前水勢泛溢民生既遭沈淪運道亦同廢棄祇以今春事機一誤功倍大而費倍增再不及時籌辦明歲伏秋汛臨淮徐以下何堪設想而災區之蠲緩窮黎之賑濟度支所損尤多請敕下部臣籌撥實款百五十萬迅速解東以應急需奏上卽率道員潘駿文赴勘石莊戶情形復奏言石莊戶口水勢寬深勢已無從著手由石莊下行十餘里南爲荷澤之賈莊北爲開州之藍口水勢稍束然口

門尙寬二百六十丈兩厓水深七八尺中間深一丈五六尺請卽以此作壩基從
賈莊堵合正溜由藍口分溜引歸舊河則由張家支門王老戶下注東南漫水皆
可斷流然後並籌上下游兩岸隄工疏入上是之敕戶部照所請款數卽行指撥
毋誤要需先是日本因通商構釁頗以兵船窺伺福建臺灣命下沿海各督撫會
籌寶楨在賈莊工次密疏大要請精練水師各技經營船政機器各局購船則鐵
甲宜防海口戰宜兼用輪船舳板籌餉宜就釐金照各州縣錢糧正雜之例不容
弊混舍此而別求掘煤開礦卽使獲利亦多隱患至海疆有事則利於持守而不
利於輕戰戰勝彼不過損一二船而止不勝則我損實多又以蒙古黑龍江人樸
勇可靠請并吉林奉天四省精練四萬人以防北邊報聞光緒元年三月賈莊口
合上嘉寶楨力膺艱鉅督率有方予優敘十一月遵旨籌辦海防疏言山東宜防
要害三一於煙臺之通神岡八蜡廟及之罘山東莊各築圩設礮一於威海衛劉
公島及島口兩面各築礮臺並於海外密布水雷閉一門留島北口門爲我師出
入一於登州城北彈子渦山頂及城南沙埂並長山島西各築沙土礮臺並於省
城外濼口創設製造機器局上悉如所請二年八月擢四川總督十二月入覲賜

紫禁城騎馬三年三月瀝陳川省敗壞情形請裁總督司道節壽陋規撤各州縣夫馬局清理積案劃清交代虧挪嚴拏咽匪鹽梟整飭邊務操練兵勇並以四川歲有按糧捐輸八十餘萬病民爲最將徐圖蠲除得旨嘉勉七月以四川行黔滇兩邊鹽岸廢弛鹽引積滯至八萬七千餘張羨截積欠一百三十六萬六千餘兩請改爲官運商銷於瀘州置總局井竈分置廠局鹽岸分置岸局廠局就井竈市鹽授之岸局岸局受而售之商人凡黔邊額引及近邊各屬計引悉令鹽道移交總局並清釐從前各積引以次帶銷又帶行近邊之永寧瀘州納溪綦江合江涪州江津南川各計引及酉陽秀山黔江彭水各邊引以杜侵越又以貴州徵權有礙運銷請旨敕禁貴州鹽釐各局卡由四川歲濟銀如其權數奏定章程十五條派候補道唐炯督辦於藩庫鹽庫川東道夔州府各關釐稅借銀五十萬兩舉辦限八年歸還疏上得旨下部議行灌縣都江堰舊制用竹籠盛石子作人字隄歲費千金寶楨議改易巨石籌費九萬派署成縣龍茂道丁士彬及署灌縣知縣陸葆德興辦又奏請於四川省城創設機器局製造槍礮火藥上皆報可四年以疏保永不敘用之已革道員李燿南開復頂戴留川差遣未將原參情節詳敘坐降

三級調用上加恩改爲革職留任寶楨復請舉辦滇岸官運并帶行近滇邊之宜賓南溪屏山慶符長寧高珙筠連興文江安馬邊雷波各計引仍帶銷滇岸歷年積引下部議行先是東鄉縣役袁廷蛟聚衆算糧知縣孫定揚妄稟請剿前總督吳棠遣記名提督李有恆率軍彈壓李有恆稟護總督文格告變遂劫殺民寨文格查辦不實自請議處及寶楨到任奉旨查辦寶楨擬結袁廷蛟論斬李有恆革職孫定揚軍臺效力尋翰林院侍講張佩綸劾寶楨輕縱上再命四川在籍前兩江總督李宗羲查奏仍諭寶楨覆覈據奏更正比宗羲寶楨奏上情節仍不符又前修都江堰隄工復壞言官交章論劾官運鹽務及機器局事多不實詔遣禮部尙書恩承都察院左都御史童華往按之先翰東鄉獄以情節不符不卽定讞疏請敕刑部詳覈又奏都江堰工續撥款項未經奏明隄工能否足恃尙未可知機器局應請停辦寶楨時以都江堰事先下部議降三級調用卽行革任上加恩降三品頂戴留任如故褫丁士彬陸葆德職恩承童華又奏官運鹽務利少弊多請或由官運或改官督商銷寶楨爲權官督商銷官運官銷三者利害得失奏上之而恩承等續劾鹽務出納不實疏下戶部酌覈具奏奏入諭曰據戶部

奏稱川省自開辦官運後疊據該督奏報邊計額引全數銷完復銷滯引至一萬餘張所收稅羨截釐暨雜款至一百餘萬兩是該局之有益課款似尙可憑滇黔引岸久懸見在甫經著有成效未可遽行更改各等語卽著丁寶楨將官運商銷各事宜悉心區畫慎始圖終封疆大吏整頓地方公事固不可動於浮言亦不可操之過蹙務令裕課恤商便民均無窒礙方爲不負委任其在事官員尤宜隨時督率勿令日久生懈設有始勤終怠或將來徵收漸絀不能如前撥款不能按期解足及不恤商力不便民用等情則咎有攸歸必惟該督是問尋刑部讞東鄉獄孫定揚李有恆擬斬監候上以寶楨擬罪輕縱曾面諭兩司將原詳內李有恆輕視民命等語刪去迨經覆查又不悉心斟酌始終偏執下部議革職諭曰丁寶楨平日勇於任事操守甚好惟性稍褊急遇事操切是其所短四川吏治廢弛民風浮靡該督到任後竭力整飭不避怨嫌且於鹽務力排衆議變通辦理規復滇黔引地及爲復還淮岸之計自應責成一手經理以觀後效丁寶楨著賞給四品頂戴署理四川總督該署督當仰體朝廷棄瑕錄用之意於力求整頓之中仍勿操之過蹙凡用人行政一切虛心體察實事求是務令吏治奮興商民樂業方爲不

負委任儻辦理無效辜負殊恩必當重治其罪懷之慎之尋疏劾四川按察使方
濬頤優柔瞻徇鹽茶道蔡逢年貪劣朦混各款並發前道傅慶貽撥釐填羨弊分
別褫職發遣六年以新疆平定錄籌餉功予優敘出使臣崇厚之獲咎也寶楨奏
請出使俄國自效並請於直隸東三省選募精壯五六千人駐直東交界歲需餉
銀約三十萬卽就官運鹽局撥濟得旨覽奏慮遠思深於此事辦理一切情形極
爲透澈所請前往與俄人辯論一層與朝廷意旨正相符合見已有旨令曾紀澤
前往東北邊防亦漸布置川省一切事宜正資整頓該督惟當悉心經理以副委
任會有旨保舉人才寶楨薦四川建昌道唐炯文武兼資山東濟東道薛福辰精
廉強正山東候補道張蔭桓爲守兼優足備任使時言官復奏劾都江堰奏報不
實上命成都將軍恆訓查奏恆訓覆陳堰工分水不勻致有衝損亦無涸出民田
八百餘畝之多並奏鹽務病商病民流弊甚大上仍命寶楨據實明白回奏旋諭
曰隄堰保衛民田大利大害關係甚重鹽務改章創辦尤宜慎始圖終該署督惟
當實力實心認真經理以期經久可行固不可憂讒畏譏稍易初念亦不可剛愎
偏徇自護己非朝廷實事求是丁寶楨將來功罪總以有無成效爲斷不在此時

之剖辯也是年裏塘土司所屬查朶野番叛附瞻對圍攻土司寶楨遣員剿撫事定爲勘界立碑杜藏番侵越又剿峩邊廳雷波廳夷匪平之七年以官運鹽務處查明歷年遺失無著水陸殘引三十一萬八千八百十三道疏請造冊咨部註銷又請豁免歷年積欠屢追無引之羨截五十五萬五千二百三兩九之四月復授四川總督十一月撥解官運鹽務徵收釐稅銀三十萬兩交北洋大臣充購船防海用先是寶楨以川省年豐飭屬勸辦積穀備荒百石取一至是報存積穀一百七十三萬餘石又以川北米少爲撥鹽釐買儲倉穀二萬七千六百餘石十年法蘭西稱兵越南雲南巡撫唐炯出關督師擅自回省致山西等處相繼失守嚴旨革職解京交刑部治罪寶楨奏陳唐炯四川雲南政績代爲乞恩又於援黔官弁殉難懇請建祠摺內鋪張唐炯從前戰績上切責之下部議降三級調用仍加恩改爲降三級留任十月皇太后五旬萬壽懿旨嘉寶楨轉餉援兵共據忠愛予優敘尋屆京察上以寶楨久膺封疆任事實心交部議敘十一年英吉利遣使馬科蕾來議印度西藏通商事出使大臣曾紀澤謂宜先與藏番議定目前卽不遽許通商亦當准其遊歷令無阻闕上命寶楨覆覈疏言西藏戾很勢難理論若臣遽

派員往說該番不從勢難姑容必將生釁未與洋人通商先與喇嘛構禍似覺不合臣已馳書駐藏大臣先爲開說然後委員入藏又言英人此舉決非注意西藏殆借以通四川大道耳夫通商本有重慶之約特因輪船不能上駛故別出此計以求遂其欲但藏路一開則四川之全境失四川失則中國之藩籬破臣年來製器練兵縱不敢全操勝算而勝負之數差可自主惟有竭盡心力以冀上報朝廷他非所計也既而藏番堅持不可遊歷之議不行而英吉利尋併緬甸復命寶楨密籌熟計先事圖維寶楨請於川藏接界之巴塘駐防二千人於裏塘駐防千餘人豫籌三四月米糧資令前往因奏言數年前俄羅斯曾遣官赴藏遊歷擬從新疆哈密由川前往嗣亦慮有阻闕遲遲未進見聞改由新疆取道和闐可經達後藏並募纏頭回民爲導似此無怪英人畏彼通其後路故欲與藏通商也以西藏一隅而兩大並爭其間籌辦亦殊不易臣初到川曾請賞准廓爾喀循例入貢實以西藏爲全蜀藩籬廓爾喀又西藏屏蔽用示羈縻去年廓國商民爲前藏喇嘛番衆所劫廓酋噶箕謂非前次展覲蒙大皇帝厚恩難與唐古忒罷兵又去年法國越南事劇廓酋曾越藏呈訴自請助攻法人是其感恩嚮義確有明徵當此英

俄窺藏事機緊要懇恩准予該番嘉獎益堅其內嚮之心不但邊域增一障蔽兼使異族少一援助川藏全局均有裨益奏入報聞九月以病乞罷上慰留之十二月再疏陳請諭曰該督莅川有年辦事認真成效卓著朝廷倚畀方深豈可遽萌退志著再賞假兩月安心調理毋庸開缺十二年三月寶楨力疾銷假四月卒遺疏言外洋和約萬不足恃止可以安爲攘不宜重外輕內皇上春秋鼎盛指日親政應請舉行日講以裕聖功帝道之隆要在近賢人君子遠宦官宮妾勿以財用不足而進言利之臣勿以時局多艱而行苟且之政固結民心卽所以深培國脈疏入諭曰四川總督丁寶楨秉性忠誠清勤練達由翰林帶兵剿賊歷受先朝恩遇外任知府洊擢封圻前在山東巡撫任內籌辦軍務悉協機宜朕御極後擢任四川總督於地方利弊認真整頓實心任事勞怨不辭前因舊疾增劇籲請開缺豐經賞假調理嗣已力疾銷假方冀醫治獲痊長資倚畀遽聞溘逝悼惜殊深著加恩追贈太子太保銜入祀賢良祠照總督例賜卹任內一切處分悉予開復應得卹典該衙門察例具奏靈柩回籍時沿途地方官妥爲照料伊子丁體晉著賞給郎中伊孫丁道臣丁道源丁道津丁道敏均著俟及歲時由吏部帶領引見用

示篤念盡臣至意尋賜祭葬予謚文誠嗣山東巡撫陳士杰奏陳寶楨勳績請於山東建立專詞諭曰已故四川總督丁寶楨前在山東帶勇剿賊勳勤懋著於地方賑務河工清理獄訟興建學校等事無不實心經理洵屬功德在民丁寶楨著准其於山東省城建立專祠又以雲貴總督岑毓英等請於貴州省城建立專祠允之十五年慈禧端佑康頤昭豫莊誠皇太后歸政追念功績最著諸臣各賜祭一壇寶楨與焉子體常甘肅鞏秦階道體勤山海關通判體仁候選知縣壽鶴進士刑部主事體晉恩賞郎中孫道臣兵部主事道源光祿寺署正

劉長佑

劉長佑湖南新寧人道光二十九年拔貢生成豐二年廣西賊洪秀全率黨犯長沙長佑團練鄉兵防堵剿瀏陽土匪平之浚保知縣三年平衡山安仁土匪以同知直隸州知州用賞戴花翎尋奉檄援江西解泰和城圍擢知府留江西補用五年湖南巡撫駱秉章疏請留長佑軍剿湖南賊六年正月郴桂賊平敘功以道員用時江西賊復熾詔長佑赴袁州一帶進剿二月復萍鄉賞按察使銜三月克瀘溪進規袁州敗賊鳳凰山下遣同知蕭啟江復萬載五月賊糾黨來犯長佑親然

大礮殲執旗賊日賊卻走遣同知曾國華復新昌上高袁州賊棄城遁進逼臨江合長圍困之七年八月僞翼王石達開竄峽江踞羅坊長佑遣總兵普承堯同知劉坤一馳剿失利賊突入大坪墟長佑恐腹背受敵乘賊築壘未定夜襲之賊潰走追至黃岡與諸軍合擊連獲大捷論功上嘉其不避艱險奮勇決戰賞齊普圖巴圖魯名號十二月復臨江殲賊酋張發紀賞布政使銜八年七月賊竄廣豐長佑撥兵扼瀘溪率全軍駐新城賊出黃土關戰卻之又敗賊於熊村呂公嶺等處賊走南豐於甘家隘踞險拒守長佑乘夜直薄隘口麾軍衝入賊殲焉江西邊境肅清巡撫耆齡疏稱長佑謀勇兼備戰功最多命軍機處記名遇江西道員缺出請旨簡放九年三月回剿郴桂賊解永州圍諭免選道員遇按察使缺出由軍機處題奏八月石達開竄廣西襲桂林駱秉章檄長佑偕道員蕭啟江赴援九月授廣西按察使十月遷布政使長佑馳抵全州擊賊於永福十二月進軍規柳州府克之十年閏三月擢廣西巡撫四月遣軍攻慶遠破之六月石逆撲思恩長佑調軍堵禦擊敗之八月遣副將鄢世堂破石達開於興安十一年正月遣道員劉坤一剿柳州土匪陣斬匪首伍聲揚餘黨就撫七月調水陸軍會剿潯州艇匪焚其

船剽平烏江口賊壘遂復府城磔逆首陳開貴縣賊首黃金義投誠復叛遣廣西按察使蔣益澧擒斬之餘黨殲除殆盡同治元年賊陷杭州長佑檄蔣益澧率師援浙以潯州爲餉源所出親督弁兵防剿奏入溫諭褒勉時南寧逆首吳凌雲襲踞太平府並陷養利州檄左江道吳德徵等復之五月長佑師次平樂擒逆首譚吉兆毀蓮塘賊卡六月進軍潯州連破麻風坳平田諸隘賊走貴縣荔浦逆首張皋友陷陽朔飭道員易元泰復之閏八月擢兩廣總督九月剿平貴縣南岸進復修仁十月飭易元泰會克桂嶺礮臺鄭金華軍破武樂蒙垌伏賊移擊登龍橋賊卡戰大捷十一月遣遊擊郭承鳳等扼龍巖敗黃逆疏陳所部楚軍交布政使劉坤一接統赴任廣東會張錫珠宋景詩降而復叛近畿騷動十二月調直隸總督命由海道刻日起程赴直准酌帶舊部員弁二年二月至天津卽赴衡水大營視師並陳布置大概情形得旨該督久歷戎行聲威頗著直隸馬步軍將及萬人如申之紀律布以方略定能所向有功至所陳治兵籌餉其源皆出於察吏洵爲探本之論直隸吏治廢弛清釐整飭自當積漸爲之不求速效不恤人言方能有所裨益該督惟有殫竭心力無所顧慮朝廷亦斷不爲遙制也長佑練勇五千選馬

隊二千挑選營兵三千爲援剿之師三月敗賊東鹿陣殲張錫珠四月命督辦直隸山東河南三省交界地方剿匪事宜旗綠防剿弁兵均歸節制參將王恩第與宋景詩交通長佑斬以徇宋景詩踞劉貫寨甘官屯以偪臨清長佑議調山東按察使丁寶楨軍扼東昌防賊東竄直隸軍由西北渡河力剿杜賊北犯上嘉長佑老成持重籌畫深中肯綮六月率按察使王榕吉軍於館陶部署諸軍偪甘官屯丁寶楨及總兵保德後至官軍戰不利上聞報以師屢愆期顯屬號令不齊敕嗣後兩省員弁如有觀望不前不遵調度者從嚴參辦毋得姑容八月科爾沁親王僧格林沁劾保德丁寶楨擁兵堂邑擅擬受宋逆降並劾長佑督剿遲延長佑亦自請議處坐降一級調用詔改降三級留任九月敗賊張秋鎮陣殲賊目楊殿一宋景詩僅以身免十月三省漸就肅清請撤銷督辦允之三年九月以永定河流北徙八九兩汛淤墊議於柳坨挑挖引河其舊有河形之處設法疏濬由天津溝入海四年四月僧格林沁戰歿曹州賊麕聚鄆鉅濮范勾結河套股匪德州恩縣復有馬賊應之長佑以下游河防空虛飭副將崔福泰等自開州八公橋至山東張秋鎮分營扼要嚴密防堵上嘉其調度得宜不分畛域並以張秋爲黃運交匯

之區詔與山東巡撫閻敬銘籌備礮船豫杜賊船北渡閏五月因曹州伏莽煽動
飭屬仿行堅壁清野法七月奉天馬賊突入喜峯口復竄出鐵門關長佑以疏防
轄境下部議處五年正月偕兼管順天府府尹萬青藜等會籌試墾稻田疏言海
河東北岸縱四十餘里橫六十餘里土脈肥饒惟閒有鹽鹵若開渠引水時其潞
蓄節宣可一律化爲沃壤擬先開環渠一道西起邢家沽而北而東南出海河長
二十七里中開洩水渠一道自北而南亦通海河長十一里渠旁約可墾稻田五
百餘頃需工銀八千餘兩官爲籌辦令墾戶按年交納水利歸償工費爲續行推
廣之用詔實力試行八月議覆御史王朝榮條陳整頓長蘆鹽務請規復永平七
屬官運設汛緝私下部議行時擒匪竄近山東濮范南岸謀搶渡長佑馳赴大名
擊敗之收復范縣舊城並沿河圍寨十月奏覆直隸分練六軍營制並請增廣二
軍下部議行六年滄州梟匪張六糾黨劫慶雲鹽山寧津南皮各鹽場長佑派兵
剿捕餘孽向隆平東南竄逸七月復奏匪黨被剿竄過滹沱河岸人數加多更向
東北狂竄詔切責長佑調度乖方大負委任交部嚴議議上命改爲革職留任十
一月匪黨增至千餘日漸北趨由涿州竄擾永清霸州詔褫長佑職交署總督官

文差遣責令帶隊自效十二月長佑親赴前敵督戰剿除匪黨殆盡因請回籍遣散楚勇官文入告賞三品頂戴命管帶所部弁勇回湖南本籍妥爲安置尋捻首任柱賴汝洸伏誅上以長佑一體有功賞二品頂戴十年四月授廣東巡撫六月調廣西巡撫時越南逸匪竄擾關外不靖長佑奏言荒服之寇可近擊而不可遠追邊隘之師能協防而不能越剿誠以窮追則必深入後路或致空虛越剿則必添兵餉需倍形竭蹶應如何相機援撥以安內攘外之處見與督臣瑞麟悉心商度粗有端倪擬過梧州時函約提臣馮子材會商儻未便暫離卽飭營務處各員詢商妥辦上韙之十月以越南從化府陷於賊調軍進剿克之十一年正月破潞瀝陣擒匪首何三餘黨悉平七月撤兵入關分兵搜捕思南大鎮暨北流岑溪股匪十二年關外白苗勾結匪首黃崇英竄撲越南保樂州擾近鎮安派兵擊走之並略定越南太原北寧十三年三月貴州上下遊軍務底定上以長佑協濟黔餉不分畛域敕部優敘光緒元年黃崇英糾黨再犯保樂長佑飭軍分擊淦台社平那晚各匪巢先後攻拔同文土州暨茶平等城寨斬黃崇英於河陽越南賊平十一月擢雲貴總督三年尋甸回匪王發有等突入昆明州屬焚掠老玉屯長佑飭

知州王履亨會防營圍擊平之七年疏陳病狀諭曰劉長佑久膺疆寄辦事實心朝廷深資倚任當勉力從公以副委任八年三月再疏引疾並請陛見復諭曰雲貴地方緊要該督任事有年素稱得力將應辦事宜認真整頓不必來京所請開缺毋庸議五月詔來京十二月以病賞假兩月九年復請開缺回籍就醫允之尋以前在雲貴總督任內聽屬員挪用公項津貼雲南報銷一案事覺下部議降三級調用十三年卒事聞諭曰前任雲貴總督劉長佑持躬端謹辦事老成由拔貢生效力戎行剿辦廣西江西湖南湖北安徽等省賊匪疊著戰功洊擢監司旋膺疆寄歷任兩廣直隸雲貴總督於地方事宜盡心籌畫克稱厥職前因患病准其開缺回籍調理茲聞溘逝軫惜殊深劉長佑著加恩照總督例賜卹任內一切處分悉予開復應得卹典該衙門察例具奏該故督有無子嗣著卞寶第查明具奏候旨施恩用示篤念蓋臣至意尋賜祭葬予諡武慎十四年允護理廣西巡撫李秉衡請於廣西省城建立專祠十月復命於新寧縣建立專祠十五年慈禧端佑康頤昭豫莊誠皇太后歸政追念功績最著諸臣各賜祭一壇長佑與焉十月湖南巡撫王文韶以長佑有功原籍請於省城及郴桂等處立功地方捐建專祠十

八年雲貴總督王文韶復以功德在民請於雲南省城建立專祠以順輿情而彰臣節均允之子思詢甘肅候補知府思謙二品廕生通判用孫繩武光祿寺署正

何璟

何璟廣東香山人道光二十七年進士改翰林院庶吉士三十年散館授編修咸豐二年充順天鄉試同考官三年記名以御史用十二月丁母憂六年服闋七年授江南道監察御史時廣東肇慶屬客民借名團練糾衆殘害地方府縣吏受制姑容璟疏陳隱患請敕督撫迅速辦理十一月英人攻陷廣州璟疏請敕陸路提督崑壽酌調弁兵進駐三水佛山等處並激勵民團環集城外一面嚴檄英將限日退出省城靜候覈辦不遵則督師進剿並傳諭省垣居民與大兵內外應援其能縛英人來獻者破格重賞卽將軍巡撫各官尙在城內亦不得稍存投鼠忌器之見又疏劾廣東巡撫柏貴坐視貽誤與葉名琛厥罪惟均將軍穆克德訥副都統雙禧雙齡一籌莫展請籍葉名琛家產從重治柏貴罪並將穆克德訥等嚴加議處八年英船入津沽璟疏陳戰守之要略言馭外之策不外和戰兩途必能戰而後能和亦必能守而後能戰唐臣陸贄有言平時不曠武以邀功則外夷心悅

而樂從有事不退縮以示弱則外夷心畏而折服雖今東南多故軍餉拮据戰守固未易言然而國體宜伸人心宜順於萬難措置之中亦必思爲自固有餘之計而後可使英人降心相從不然任其要求不獨後世功過所關抑亦目前利病所繫非細故也從前琦善耆英辦理洋務惟知屈己求和致有今日之患若仍循故轍恐後患更甚於今日也守戰機宜莫要於上海天津海口中多橫沙出入至爲艱險濱海一帶盡係沙灘無高山隱蔽所謂天險足恃者也防守之法當於內河岸邊多築碉樓墩臺安列礮位分飭兵團守護港口多栽木椿盡收漁船入港嚴防勾結絕其交通最爲要著上海自英人設立馬頭圍聚貨物貲本數十倍於中國之商深恐朝廷震怒絕其交易焉肯在彼滋擾但今江寧未復萬一英船駛入人心震動於軍務大形牽掣查上海距蘇州雖止二百里然皆淺水小河英船不能進泊惟松江濱海宜選重兵扼守並勸諭紳民團練互相保衛其餘各海口均宜一律布置海濱居民生長風濤風氣大都强悍上之人鼓舞而激勸之皆勁旅也此先爲可守以待戰之說也至於用戰則練舟楫募水勇利器械備火攻一一皆須講求臣愚尤以爲不如投其所忌則其兵不得分散其所交則其勢

不得不弱廣東百姓素不畏夷且連被荼毒銜恨次骨屢欲同伸公憤奈撫臣柏貴從而制之若皇上密諭湖南撫臣駱秉章勸其鄉人廣設方略共擒省城英人番禺順德新會東莞香山新安沿海村鄉之團練各守其方多以小船載石夜至大石獵德烏涌諸海口沈之使外船不能往來並撥新會新安香山精壯揚言奪取香港英人聞風必將飛楫回救天津英船可以不擊自退迨其餒而求和然後示以懷柔此兵法所謂攻其必救也英人爲華夏首惡情理難容其或利之或畏之而助之者法蘭西美利堅也從而爲之調停旣圖分潤又將索酬於我者俄羅斯也從前英人桀驁葉名琛禁其通商不應並禁他國以致各國助逆披猖應請明降諭旨正葉名琛乖謬之罪謂本與各國無涉此次通商之後各安其業儻附和英人卽斷上海交易各國斷不願塞此利源又俄羅斯嘗與英人有隙比來向其索債欲英人取中國之財以相償耳是可以理折之以利誘之以術閒之若使反擊英人准其一例通商卽或議卹賞賚亦勝於受英人要求此郭子儀用回紇攻吐蕃之謀兵法所謂親而離之也璟抗論洋務先後八疏凡數萬言其大要類是九年五月陞戶科給事中八月充順天鄉試同考官十年轉工科掌印給事中

十一年正月疏言軍興以來奏調部員往往不次驟遷至在部當差人員循資按格辛苦有年將補缺矣而儘先壓班將銓職矣而遇缺居上辦事者無得缺之日得缺者非辦事之人請嗣後各省奏調人員止准保陞外官不准保留京職其已得保舉回部當差而資俸淺者無論遇缺儘先概不准補題缺遇有本部留選缺出仍先補資深次補保舉班其帶實缺出京者係題缺卽行開缺係選缺保陞後亦卽開缺不准留任其勞績保舉仍准照本職實缺保陞其候補人員出京不得奏補選缺以歸畫一所有廉俸俱行停止至道府選法擬於保舉遇缺班內插選在京當差人員不得概選保舉班庶不至外重內輕而奔競之風亦可少息下部議行三月記名以道員用九月授安徽廬鳳道同治元年兩江總督曾國藩方以全力規取江寧留璟於軍總辦營務處二年奏署按察使三年江寧克復加布政使銜賞戴花翎九月授按察使十月兼署布政使捻匪竄望江圖犯安慶巡撫喬松年方駐壽州璟居守省城稟牘往返旣遲調度每不相應璟偕總兵喻吉三以便宜應敵賊不得逞時省垣收復未久文案蕩然璟擬章程十三條次第舉行焉四年授湖北布政使督撫臣疏留之尋以湖北督撫奏催赴鄂五年抵任是歲黃

一
陂縣被水民就食江漢璟詳請奏撥帑銀三十萬賑之通檄州縣積穀備荒越一年報積穀者四十餘屬六年護理巡撫時曾國藩咨撤霆慶十營璟以霆營兩撤皆生變密其事陽令分防上下巴河調水師及提督劉維楨所部屯其後到防始出示令繳械領餉多給十日糧舟送之歸無譁者時蘄水奸民欲爲亂見官軍來疑事洩遂糾衆反璟檄巴河軍就便討平之七年裁釐捐分局小卡五十四所八年調山西布政使九年陞福建巡撫旋調山西巡撫時甘回未靖記名總兵羅承勳統精銳四營扼河曲保德閒璟察其馭勇過寬易記名提督高占彪統之飭以分段設防視地勢之險夷爲疏密不以道里之長短爲段落閏十月甘肅金積堡回逆潰圍走綏德州河保一帶冬結冰橋防務喫緊璟出省巡閱歷河曲保德及吉州鄉寧先後疏陳穩固情形並言河防兵力尙單惟恃河西有湖南提督宋慶一軍扼賊來路一時不可移調報聞十年調江蘇巡撫十一年二月命署兩江總督兼署辦理通商事務大臣時內務府傳辦大婚備賞緞匹璟以鉅款難籌疏請覈減事下內務府尋得旨減半織辦節省經費一百萬兩十月丁父憂光緒元年服闋屢奉命召以疾未果二年九月入覲卽日授閩浙總督賜紫禁城騎馬十二

月命兼署福州將軍閩自前總督左宗棠裁兵加餉凡存兵三萬一千餘名歲徵地丁鹽課稅釐等銀三百萬有奇而京協各餉及本省支應綜計歲五百餘萬奏准鄰省協閩之款輒不應備倭議起致全力於海防巡撫帶兵渡臺開山撫番內地陸軍益少三年三月璟疏請敕催江南淮軍統領福建陸路提督唐定奎選步隊數營隨帶來閩以專職任詔下兩江總督沈葆楨尋以未能赴閩遣總兵宋國永二營應之五月遵旨疏請停解京協各餉九十八萬籌辦海防是月福州大水璟坐城上督拯難民凡七晝夜捐賑銀二千兩爲官紳倡水退濬洪塘江導支流匯入海後患遂殺五年六月兼署巡撫時上以長江水師提督李成謀前在廈門極爲得力命赴廈門臺灣一帶總統水師將船政局輪船先行練成一軍歸南洋大臣節制隨時與閩省督撫妥籌備禦之策璟疏言日本議廢琉球其兵船時時游弋閩滬海面心殊叵測而其國距臺灣最近全臺形勢南路二口曰安平日旗後而澎湖居臺廈之中北路二口曰滬尾曰基隆均與省門對峙基隆尤爲外人垂涎自防倭事起臺南稍有布置安平旗後俱建礮臺臺北則因費絀尙未籌建昔時北路未開澎湖實當形勝今臺北關地日廣漸及後山則基隆尤扼全臺之

要且此口不必候潮輪船隨時皆可出入似應將各輪船調集基隆合操每月以一船分巡各口有警則立時馳應地勢既得運掉亦靈見擬添募營勇以三營分駐基隆滬尾以一營駐臺灣府城歸鎮道就近督操有事則調赴澎湖更於基隆起建洋式礮臺購置巨礮十二月疏陳籌款定購蚊船二號又疏陳基隆起建洋式礮臺均報聞時上以閩省水師駐紮地方環意在基隆船政大臣吳贊誠意在廈門沈葆楨以澎湖爲適中之地而前福建巡撫丁日昌謂宜駐大支水師於南關而以陸師輔之諭璟等再行審察地勢熟籌定議六年三月璟等疏言南關山爲閩浙洋面分界所在與浙屬之北關山峙立海中相距約十餘里水深數丈礁石林立外接大洋絕無門戶屏蔽東南風盛湧浪直拍山隈附近皆封禁荒山素無居民山下亦少商漁船隻停泊其山峭削磽瘠卽有平地亦乏水源輪船向繞外洋來往蓋其地爲温州福寧兩鎮舟師分界會哨之所並非船隻出入海口此南關之大略情形也竊查閩臺濱海港口紛歧觸處成險勢無節節爲防之理見既會操兵輪冀成勁旅則其駐紮所在必當統籌全局以扼險要必爭之地庶形勢既得脈絡貫通不致猝然不可相救臺北基隆密邇琉球物產饒富港口深闊

足避風颭又無礁石暗浪之險此爲要害必爭之區康熙中初取臺北時僅有臺灣諸羅鳳山三縣臺灣居中而廈門適與安平對渡故臺地有警督臣必出駐廈門迨後北路日闢府城已偏於南矣同治初年彰化戴萬生滋事大兵直由省門徑渡淡水進師用收高屋建瓴之效是廈門形勢已非昔比特以澎湖爲臺省咽喉而廈澎又輔車相倚究亦要害所在此臣環與臣吳贊誠臣沈葆楨所以各持一說非無見也若南關則僻在一隅實非舟師利泊之處疏入上躔之八年六月復兼署巡撫九年法蘭西構兵越南海防戒嚴先是倭釁既定俄約亦成閩內地及臺灣防勇頗有裁減至是諭飭籌防存兵不敷分布環令建寧鎮總兵張得勝率所部並調集防勇四營增募陸勇六營水師一營分扼五虎門內各要隘續又增募二營並修長門對峙之金牌礮臺以固省防委道員朱明亮募楚勇二營扼福寧海口水師提督彭楚漢駐軍廈門令統水陸六營扼要防守檄道員方勳募潮勇三營扼興泉永各郡要口調臺灣鎮總兵吳光亮署漳州鎮率粵勇二營防漳州並整頓泉永一帶兵勇固廈門後路調陸路提督孫開華率擢勝三營渡臺督辦臺北防務以福寧鎮總兵曹志忠所部屬之檄臺灣鎮道抽調後山各營並

增募四營分布臺南又飭撥兵勇三千人交澎湖協副將周善豹領之扼防澎湖令提督黃超羣王正和各募勇二營副將張陞楷道員陳維漢各募一營爲遊擊策應之師時兩江總督左宗棠遵旨派撥副將楊在元等率湘淮四營渡臺協防禦以楊在元熟悉形勢卽令暫署臺灣鎮總兵先後偕將軍穆圖善巡撫張兆棟疏陳布置機宜又請由閩海關及藩鹽二庫酌量撥款以濟餉需復自陳審敵所向出省調度均得旨報可十年四月上命侍講學士張佩綸會辦福建海疆事宜巡撫銜前直隸提督劉銘傳督辦臺灣軍務閏五月法兵輪二駛入長門一駛泊馬尾之楊嶼時和戰未定阻攔卽背條約又聞上海法船悉數退出將至馬尾法水師提督孤拔乘鐵甲船卽日進口璟偕穆圖善張兆棟張佩綸疏言伏查馬尾係船政重地亦卽中外商船口岸中法和戰未經定局未便阻其入口惟疊據電傳法人欲取福州爲質今乘議約未定之時借游歷爲名陸續駛入閩口其包藏禍心已可想見而所立條約拘手攣足所占商岸拊背扼吭阻之則先啟釁端聽之則坐失重險仰承諭旨彼若不動我亦不發惟有嚴密布置以免疏虞省城以壺江南茭爲第一重門戶長門金牌爲第二重門戶敵船越各礮臺而至馬尾深

入已百餘里若止一二輪船彼雖足制船局之命脈而身在圍中諒亦未敢輕發如連鯨而至一旦決裂我電未至彼信先聞出我不意登岸擾犯則礮臺之軍不及入援南臺之軍亦難徑渡船局勢殊岌岌則以閩省師船過少水上無游擊之軍故也臣佩綸與督辦船政臣何如璋檄揚武兵船及福勝健勝兩礮船調赴馬尾保護該處原有陸兵兩營水師一營復令參將楊廷輝將南臺所有漳泉精壯悉數編集成軍扼紮馬尾左右與水上軍掎角長門金牌礮臺本有張得勝九營方勳兩營見在法人注意福州省防喫重已抽調分駐興化澎湖等處之潮普三營分布要隘以厚聲勢仍約令紳士辦省城內外保甲以固民志聯壺口各村漁團以絕漢奸臣璟臣兆棟擬卽出省駐紮臣佩綸等以安民馭敵均宜示以鎮靜督撫臣有地方之責省城五方雜處民情浮動有事時須互商彈壓如有戰事臣佩綸臣穆圖善當親赴前敵相機堵禦惟法人形同鬼蜮其陰謀詭計實有密據要害先發制人之意如果聖意決戰務請於覆絕法使之先豫授機宜俾臣等得首尾合擊水陸並舉戰事較爲得算疏上得旨該將軍等當實力備禦妥籌布置嗣法船至馬尾者日衆璟等屢請諭飭南北洋撥師船赴援旨下皆不能應六月

法船入長門者十環馬尾者六而我援師不至璟與張佩綸等議塞河先發電至總理各國事務衙門轉奏尋傳旨見在閩口有英美等國保護兵船德國兵船亦將前往此時堵塞應就地與各國領事說明舉行庶免與國藉口著何璟等相機妥辦見經美國調處局勢未定所稱先發尤須慎重勿稍輕率時法船在臺北者已攻陷基隆礮臺有旨戰局已成該將軍等戰守事宜悉行整備俟奉諭旨遵辦七月初三日法戰書至璟卽電知馬尾長門長門綫斷不得達馬尾甫得電音法已開礮水軍大挫法船十一毀其三我船悉數沈毀遂攻略廠圖登岸陸軍黃超羣方勦合擊卻之明日復以排礮攻廠陸軍力禦敵不得逞先是張佩綸悉調舟師衛船局璟商分數艦外扼長門內扼臨浦不納及戰璟欲率兵馳援而臨浦無舟可濟又奉諭省防緊要毋得藉詞出城璟乃塞臨浦重兵守鼓山敵不敢深入退攻館頭嶺營次及田螺灣閩安金牌各礮臺皆爲官軍所遏臺毀而撲岸者悉被擊去退至長門穆圖善先轟傷其大兵輪一艘至是又沈其二艘乃遁璟上章自劾時已有旨飭璟來京另候簡用疏入諭曰閩浙總督何璟在任最久平日於防守事宜漫無布置臨時又未能速籌援救著卽行革職十四年卒子耀章廣西

候補知府翰章舉人

楊岳斌

楊岳斌原名載福湖南善化人原籍乾州廳祖勝儒從剿乾州苗匪在永綏王瓜寨殉節父秀貴直隸宣化鎮遊擊載福幼嫻騎射道光二十六年由行伍補長沙協左營外委二十九年新寧匪首李沅發就擒載福在事出力賞戴藍翎咸豐二年粵匪竄湖南載福守湘陰有功陞宜章營千總三年在籍侍郎曾國藩督辦團練治水師於衡州調載福領右營四年四月偕生員彭玉麟攻湘潭踞賊載福骸臂俱傷裹創鏖戰八日十捷克之擢守備賞換花翎六月進規岳州載福率水師伏雷公湖彭玉麟伏君山別隊趨南津港誘賊船出佯卻賊追之伏起盡焚其船官軍入岳州七月賊再至載福駕艇沿湖東岸斜行捷如飛鳥揮旗發礮斃賊多名僞丞相汪得勝護衛甚衆載福飛槳挺矛刺殺之奪其船追奔至臨湘逆船無一還者捷入以都司補用賞彪勇巴圖魯名號越一日擊賊於擂鼓臺日暮北風大作賊艘五六百挂帆直上我水師船僅七十餘載福親操舳舫率所部駛入賊隊繞扼其背斷賊後至者乘風縱火賊陣遂亂大破之擢遊擊尋破賊於城陵磯

閏七月追剿至湖北倒口殲港汊踞匪於是岳州門戶始固而賊由荆入蜀之路塞矣八月偕都司蕭捷三夜襲嘉魚之黃蓋湖賊駭竄載福先入中火傷舟覆落水躍上別船大呼陷陣焚賊船四十餘盡洗沿江各村市之賊乘勝下金口沌口燒鹽關賊船二百餘破漢陽關等賊營直趨塘角兩岸賊壘俱燬嗣見賊船下竄載福急槳出賊前逆擊之盡焚其輜重駛入漢口毀船隻無數遂會陸軍攻武昌漢陽克之曾國藩等疏稱載福廉明愛士膽力堅定從下游逆擊而上甚合機宜詔陞參將加副將銜尋又以二十餘船迎剿襄河賊焚其船千官軍自此一意東下無後顧憂矣是月詔授湖南常德協副將仍督勇剿賊曾國藩奏定三路進兵中路令載福等率師船先發九月克黃州府武昌縣順流而東截擊下游援賊載福等以爲賊至而迎敵不若及其未至擊之遂駛至蘄州賊張礮拒戰勢衰而潰載福等分兵之半追毀其船於骨牌磯以其半環攻未開之賊船殲焉十月陸軍破半壁山水軍進徧田家鎮時賊守備甚嚴上游逃賊麕集載福彭玉麟密與陸軍籌破賊策分舟師爲四隊一專斷其橫江鐵鎖一專轟賊船一候銷毀下駛火燒賊船一守老營防賊上犯而陸軍列陣南岸壯水師聲威又議先燒上游逆船

則下者遠竄不如窮追數十里從下游延燒而上及戰先擊其護鎖船二須臾鎖斷奮呼乘之賊大潰追至武穴出其前乃縱火大燒東南風甚賊船不能下駛無一遺者載福以武穴之下尙有賊船窮追至龍坪是役凡毀賊船四千餘皆歷年所擄民船也遂拔田家鎮而蘄州賊亦遁去載福以宵行追賊積勞嘔血詔嘉其勤勩最著加恩賞總兵銜於是水師進攻江西九江載福以疾留武穴既而疾甚假歸五年九江水師失利賊上犯再陷武昌漢陽三月湖南巡撫駱秉章奏言載福忠勇善戰廉明樸訥衆心素附宜令招集部曲修船添械督師東下重清江面與曾國藩湖口一軍會合得旨令統率師船速赴武昌軍營七月偕各軍攻拔漢口鎮平漢陽城外賊壘與知府彭玉麟毀襄河口鐵索浮橋血戰十日斬獲無算九月退屯新隄修船汰各營水師十之三簡練精銳以圖大舉十月湖北布政使胡林翼疏稱載福每戰必先病不言勞功不言賞志識高出尋常爲水師將才最時載福已擢湖北鄖陽鎮總兵疏入命兼署湖北提督十一月軍至金口遣都司鮑超等環擊賊船悉沈之岸賊亦棄壘遁進屯沌口十二月敗賊鮎魚套及南岸觜六年四月會陸路攻漢陽飭李成謀等下駐沙口斷賊水運自督所部攻兩岸

賊壘時漢陽東南沿江一帶賊船二百餘排礮堅守阻遏官軍載福密備火船乘南風一炬空之又敗黃州等處來援之賊五月率李成謀等躡進至黃州歷蘭溪武穴龍坪直抵九江盡掃各岸賊船還泊沙口七月九江逆首石達開糾黨來援江寧將軍都興阿擊之黃州載福以水師策應尋破油坊嶺上青山賊巢九月敗援賊於蘄州十一月水陸會攻武昌漢陽水師上下夾擊載福督陣指揮盡燒賊船兩城同日克復賊衆萬餘斬溺無遺捷入賞加提督銜載福乘勝偕記名按察使李續賓陸軍拔樊口破武昌縣克黃州卽日下駛克蘄州軍至九江先剿北岸小池口賊船盡爲我有遂會陸軍攻府城七年正月曾國藩自吳城迎勞諸軍疏言載福與李續賓都興阿等積勞之後屢勝之餘猶復日夕兢兢夜不解帶軍威嚴肅士氣樸誠實爲不可多得之勁旅二月曾國藩丁憂離營疏請將外江內湖水師特派載福總統以彭玉麟副之上嘉勉載福卽命統帶曾國藩一軍與彭玉麟協力督剿四月賊復犯蘄州羅田號稱十萬都興阿等分軍上援載福亦分水師扼蘄州要路五月親臨布置之六月派都司胡友亮先繞廣濟搜剿內湖平童司牌逆壘七月蘄州水師屢戰屢勝八月蘄黃肅清載福會陸軍攻拔小池口僞

城九月克湖口得旨遇有提督缺出由軍機處題奏尋借陸軍攻拔小孤山克彭澤及安徽望江東流直抵安慶克銅陵至蕪湖魯港與江南師船會詔嘉載福轉戰千里用兵謀略實有過人之處尋授福建陸路提督敕專摺奏事賊酋林啟榮踞九江者六年官軍屢攻不克八年三月李續賓謀開地道轟之賊殊死堵拒士卒多傷四月城東南地道復成約載福水師攻北門臨江一帶藥發城圯百餘丈奮呼齊登戰竟日擒林啟榮磔之復其城擒斬二萬六七千名其逸出者水師盡殺之捷聞賞穿黃馬褂下部優敘並諭載福等統領得勝之師迅速東下時江西賊竄偪楚境載福奏言九江克復臣應卽會合都興阿馬步隊伍急趨安慶刻下陸師以援剿麻城肅清北岸爲先駐皖官軍防剿太湖石牌各路尤爲緊要必俟楚境肅清始能會合東下查安慶上一百二十里之華陽鎮爲江防要地卽率領礮船進駐其閒以爲水師老營不時出擊使安慶之賊不遑他顧俟北岸肅清再與馬步隊拔營前進報聞五月再克東流進屯黃石磯連攻安慶焚奪鹽河船壘六月督師船越安慶至李陽河率副將王明山攻樅陽盡焚港內賊船飭丁泗濱等攻大通奪其石壘載福自銅陵經魯港直抵蕪湖審察形勢仍回黃石磯分兵

復建德七月調福建水師提督九月都興阿陸軍來會破集賢關載福豫派師船繞入內湖三面環擊牽制城賊陸軍遂毀北門外多壘池州賊萬餘掠民船來救安慶載福派陳金鼈王明山大戰樅陽以遏之十月李續賓三河軍陷賊謀犯楚境官軍暫解安慶之圍賊復四出載福屢擊退之十一月分撥礮船上扼湖北之龍坪武穴田家鎮九年督剿南北兩岸援皖各賊大小數十戰並隨時派隊薄城以牽賊勢設資遣難民局於東流先後遣十三萬六千餘人十二月韋志俊以池州降令攻蕪湖其部下復叛還陷池州載福知志俊無異志卽其衆分別遣留得精銳二千五百人令統率助剿時逆首陳玉成李侍賢率衆萬餘竄楚及皖水軍移屯觀音洲策應皖北十年四月會江南師船攻蕪湖對岸蠓磯大捷五月督都司韋志俊等拔殷家匯進攻池州毀城外石壘卽日盡撤水陸各營襲樅陽出賊不意拔其僞城先是總兵吳全美等率江南紅單師船駐蕪湖以上之魯港載福以江寧尙須礮船議請敕江寧將軍和春調吳全美等赴下游而自任蕪湖以上江面六月曾國藩以載福謀勇器識度越諸將疏請將蕪湖以上江面戰守機宜由載福會同彭玉麟妥辦八月遣遊擊陳代友等攻池州奪青溪關九月僞忠王

李秀成循岸上竄載福派隊敗之三山夾穴子橋白茅菁運漕鎮等處分隊入內湖圍攻神廟山鎮山斷松林口浮橋十月親督師船由魯港潛行百里解南陵之圍拔出總兵陳大富一軍救護難民十餘萬置之東流一帶十一年正月曾國藩疏陳戰績詔嘉載福出奇制勝調度有方賞大小荷包搬指翎管小刀等件時道員曾國荃副都統多隆阿臬司李續宜等軍會攻安慶逆首陳玉成率衆萬餘來援屢攻樅陽載福飭李成謀等百計守禦賊不得逞四月督剿赤岡嶺援賊屢爲賊礮所遏傷亡頗多卒與陸軍合力破之擒僞先鋒劉瑋琳蓋破我江寧大營連陷蘇常劇賊也五月督剿無爲州之神塘河平其壘並焚城外賊船遣副將唐學嚴摧棋盤嶺下逆壘六月剗凌湖兩岸諸壘令副將周萬倬陸師與唐學嚴合攻東門外壘卡乘勝攻城北諸壘悉拔之城賊窮蹙整隊出撲水陸大戰八月克安慶斃賊一萬六千餘名載福卽日派總兵王明山黃翼升進克池州及桐城捷聞賞雲騎尉世職下部優敘先是載福以省親請得旨賞假四月至是始歸同治元年正月以母病未痊舊傷復作疏請展假諭曰見在水師分防池州等處江面正須會合陸軍直擣金陵殲除首逆機會萬不可失水師雖有得力將領必得該提

督躬親調度方能動合機宜該提督忠勇性成朝廷正資倚畀值此時事多艱自當移孝作忠力圖挽救卽著迅速起程前赴池州軍營與曾國藩剿辦沿江一帶賊匪勿稍延緩三月遵旨銷假五月會曾國藩於安慶率師船東駐烏江以其爲上下游適中地足資策應故也八月更名岳斌赴勘下游要口疾作還烏江九月聞金柱關有警率丁泗濱彭楚漢等力疾赴援敗之龍山橋殲賊萬餘十一月僞侍王李侍賢由東壩再犯金柱關岳斌苦戰急擊之斬賊酋陳緒賓破護駕墩石垵等處賊壘於是金柱關蕪湖一帶肅清江寧大營後路始固二年二月曾國藩來烏江偕岳斌至大勝關入雨花臺與弟國荃商定合圍江寧之策三月攻克黃池悉收內河三里埂伏龍橋花津護駕墩各隘以通寧國蕪湖之氣五月克巢縣含山和州及江浦浦口破下關草鞵夾燕子磯趨九洑洲力戰拔之自此長江南北數千里無一賊船皆水師酷暑鏖戰之力也十月克高淳寧國府建平溧水奪東壩要險大軍尋合圍岳斌以水師防剿稍鬆瀝陳親老病劇懇開缺回籍養親諭曰楊岳斌督率水師剿賊十年戰功懋著此時長江肅清雖水師防剿稍鬆而金陵合圍正賴該提督等和衷努力共奏膚功同膺懋賞未便於軍務喫緊之時

遠易生手著俟克復金陵後再行請旨惟念楊岳斌軍旅羈身伊父母年老多病未能歸省著加恩賞給人蔭四兩藉資調攝時髮逆羣竄江西及安徽徽寧一帶三年四月詔岳斌以提督督辦江西皖南軍務該處帶兵員弁及赴援江西各軍均歸節制五月授陝甘總督命迅赴江西督飭諸軍力圖掃蕩俟江皖賊氛淨盡卽行前赴陝甘任事六月江寧克復賞一等輕車都尉世職並加太子少保銜岳斌抵南昌卽日出師督剿察看各路形勢調回水師五營分部贛河七月分遣諸將拔崇仁東鄉金谿宜黃南豐解寧都州圍馳抵贛州八月克瀘溪新城雩都先後收降十餘萬衆自是建撫贛南廣饒各路及皖南徽寧各防次第肅清九月瀝陳傷疾難支親老多病懇請開缺諭曰楊岳斌統兵十餘年衝冒矢石力疾苦戰傷病交作且其父母年皆七十有餘原應俯如所請惟甘省軍情關繫極爲緊要朝廷正資倚畀自未便遽令回籍著賞假一箇月在營趕緊醫治假滿卽赴新任毋庸開缺岳斌疏言甘省逆回黨羽衆多心志齊一必得一二萬生力之師方能挫其兇鋒惟舊部本屬水師並無陸隊此次來江剿匪僅由金陵大營抽帶千餘人勢難遠調惟有親赴湖南募勇卽輿疾南歸先遣得力營官認真招募精勇七

八千人即可趁此訪醫調治就近省親至招募經費及製辦軍械等件所需甚鉅擬於各近省設法籌撥並請以安肅道蔣凝學署皖南鎮總兵唐義訓兩軍赴甘助剿詔嘉其勇於任事所籌周妥悉從之四年以總兵彭楚漢等新募十營從行四月至西安河西軍潰東竄與巡撫劉蓉籌堵剿之策議通東南餉道催提江楚協餉時科爾沁親王僧格林沁曹州陣亡捻氛大熾有旨令移師東向保衛京畿岳斌疏請開缺專任剿匪上不許五月仍敕赴甘肅六月履任疏言甘省回匪以河狄爲最強狄道之西鄉河州之東鄉爲最衆勾結陝回竄突靡常隴西安定金縣皋蘭接壤之地防不勝防岷洮爲狄道後路循化爲河州後路處處竄通寧靈逆首馬化龍負隅抗拒時出鈔襲斷我餉道西寧大會花寺兩教藉圖構釁大通失陷丹噶爾被圍郡城附近岌岌可危肅州一帶兵力過單又值哈密之變賊勢愈張此外零星細股不可枚舉甘省營兵擾民有餘剿賊不足大都橫索供張不知講求實際東南數省不患無糧患無餉甘省旣虞餉乏又虞糧少查諸營所須麪斤或自行採買或指地派捐皆由就近州縣轉運自回匪焚掠村落爲墟地方無以應之臣今由陝入甘所部僅五千人經過之處先期委員帶銀購買米麪從

未能籌十日之糧將來大張撻伐調兵愈多追賊愈遠千里饋糧士有飢色況外省餉項尤難源源接濟甘省官員赴任無論實缺委署必須先以捐輸雖因公項支絀萬不得已然自不肖者視之則以爲既有所捐於前不能無所償於後而民氣之彫殘案牘之積壓一切皆基諸此臣入境以來竊見人煙稀少田土荒蕪屋廬灰燼幾於赤地千里緣回匪蹂躪之餘官弁兵勇又從而朘削之勒捐不足加以窮搜遂至攻山薰洞無復生機閒有存者不過鳩形鵠面略具人形東路如是他處可想五中焦灼寢饋難安伏願皇上寬以時日假以便宜俾得從容整理於賊勢則先剿狄河再圖西北於軍務則先懲擾害再汰疲羸於糧餉則先籌採買再議轉輸於吏治則先儆貪墨再振因循於民生則先去煩苛再謀招墾疏入上嘉其切中竅要先是上以關外匪勢日張敕西安將軍都興阿寧夏將軍穆圖善等軍俟楊岳斌抵甘後卽令酌量出關七月岳斌奏言臣所率楚勇入甘僅步隊十營西北諸路力難兼顧提督雷正綰總兵曹克忠攻金積堡新敗都興阿等規取寧夏猶未得手中衛古浪平番武威俱有賊股竄擾北路喫重若遽調二軍出關則正綰克忠兵力遂單斷難遏賊肆竄不獨甘省受禍卽秦晉邊界亦恐防不

勝防請敕都興阿穆圖善先清關內暫緩出關諭曰關外地方糜爛亟須添兵協剿著傳知成祿聯捷令率所部星速出關楊岳斌務當統籌全局於各路防剿機宜妥爲布置並將近省一帶逆匪先圖撲滅以固省防再行分路剿辦是月靖遠香賈丁建善謀反督彭楚漢討平之八月疏陳支絀情形略言甘省額徵地丁課稅歲不過四十萬兩軍興逐年遞減權宜之計惟仗釐金而道梗商稀省垣月可數千隨收隨散秦州稍旺向給曹克忠營餘並不敷局用司庫僅存銀一千餘兩此銀錢之短絀也軍營所需鐵斤硝磺布疋竹木甘肅皆仰給外省販運日稀增價數倍本地有硝無磺外省撥解亦少軍需局造報僅存火藥六兩此用物之短絀也糗糧芻茭士馬所恃以飽騰尤望市價公允近則視臣初入甘時一倍過之且又缺市此食物之短絀也臣此次出省由金家崖取道至靖遠繞越北山而回途次所歷有求斗粟勺水束薪之炊寸草之牧不可得者營中或終日不舉火戰馬飢斃二十餘匹臣忝任兼圻須顧大局不但本營月餉因兵多而遽增或各營有缺乏地方有急需斷不敢意存歧視惟開銷愈多本地實無可生發即使曾國藩奏定撥甘十萬五千之餉按月悉數前來已覺入不敷出況自五月至今除江

南已報解三月浙江已報解兩月外湖南僅報解一月湖北止報解布疋洋藥而銀數尙未提及卽抽收最旺如江海關亦僅報解一月並聞有兩月一解之語在愆期省分想亦急其所急而以他人之急爲可緩詎知甘省情形如此哉請敕下江蘇湖南湖北江南浙江各督撫務將奏定協甘之餉源源接解毋令愆期並將上年冬間戶部奏定有著之款如四川山東河南江西每月協撥者亦遵照解運來甘至甘省滿漢營兵欠餉已歷多年鼓譟不止一次並請敕下歷年欠解省分酌量按成補解庶軍實有資而無飢疲之患九月雷正綰兵變岳斌疏請敕下四川總督駱秉章迅調建昌鎮總兵周達武一軍自帶餉銀赴甘助剿又言甘省自八月至今糧食缺市臣所部各營計日授糧每名僅得數兩衣不被體竟成坐困曹克忠所部勇冠諸軍金積堡失利後收合餘燼了解鹽茶城圍攻克白季村堡正在得手忽以雷軍之變糧運不繼見在該勇每日僅麵水一餐殊慮因飢生變當卽飭令暫捨鹽茶空城移營靖遠爲就糧計以固軍心臣莅任三月協餉分文未到各局羅掘已空甘省產糧之區北則寧夏尙爲賊踞南則秦州供應雷正綰林之望兩軍早已窘竭西則西寧各回陽奉陰違道梗運艱情形岌岌荒期正長

聞陝西秋收豐稔懇敕下撫臣劉蓉於該省上中二等州縣設法捐辦麥糧並於邠乾鳳鄜各屬州縣先提倉糧四萬石運交秦州涇州慶陽等處再四川保寧一郡毗連階州歲亦豐收並請敕下督臣駱秉章於保寧所屬州縣籌捐米糧一萬石輓運階州以支危局疏入上憫之悉如所請行是月鞏昌寧遠被圍岳斌調曹克忠援剿一戰圍解十一月拔熟陽城賊巢及董家堡鴛鴦鎮十二月奏言臣抵任後本擬先攻狄河再圖西北自陶營潰於金縣雷營變擾平涇賊燄益張兵力漸弱計可移攻狄河者惟曹克忠暨臣所部二軍耳而該逆盤踞二城依山阻寨兼踞洮河之險勢若長蛇必須分道出師方能奪所憑依遏其奔竄查甘省見有兵力或扼涇州或駐慶陽在在爲逆回牽制不能調赴前敵都興阿穆圖善頓兵堅城若不濟以援師孤注不無可慮爲今日計非調防守之兵盡爲攻剿之兵不可欲調防守之兵盡爲攻剿之兵非藉防陝之兵暫作防甘之兵不可請敕陝西撫臣將鄜定防兵就近移紮慶陽汧隴防兵越境移紮鞏昌扼截狄河之賊不能出擾南路俾甘省各路防兵得以次第調出分道進剿夫甘回一日不靖則甘防一日難鬆在陝兵自近而遠各邊仍在屏蔽之中爲人適所以自爲在甘兵戮力

同心踞賊自有可殲之日制人乃不制於人如蒙允准擬令記名提督張石山接統慶陽各營由環縣進譚玉龍統涇平各營由固原進曹克忠一軍由四百戶一路會擣靈州臣將省防布置周妥卽親率一軍出省策應視其所偏重攻其所必救俟該三城克復然後會合都興阿穆圖善移得勝之師規取狄河得手似較容易上躉之諭劉蓉如所奏行五年正月督師出省二月次涇州梟雷營倡亂之總兵雷恆等首奏免雷正綰罪令立功自贖三月省標兵變劫總督署戕幕友委員親兵俱盡脅布政使林之望以岳斌重勇輕兵積憤所致入奏岳斌已抵慶陽聞警還涇州上以岳斌未能防範降二級留任命速赴蘭州力顧大局時羣回乘鸞思逞環向省城東路隆德失守莊浪被圍岳斌奏飭曹克忠移鞏昌之兵先馳入省得旨著謀定後動不可徒逞憤兵輕於一擲五月布置東路防剿各營單騎馳赴鞏昌撫循部衆籌糧濟省會及曹克忠飢軍寬其後顧之慮保秦州等完善地藉護南路餉道尋標兵就撫岳斌回省誅亂首百餘人餘釋不問六月以在涇州拆閱林之望摺報自請議處部議降五級調用上加恩改革職留任並改爲三品頂戴七月疏言臣以微賤武夫被荷殊恩膺茲重任苟可稍效寸功無論如何爲

難亦不敢不竭犬馬之力願抵甘經歲迄少成功推求其故固屬糧餉奇窮亦因臣向帶水師未經旱隊於戰守調度地理形勢本所不諳且出身行伍之中籌糧籌餉課吏治民諸大端尤不經習軍務之無起色未始不由於此又臣從軍十餘年屢次重傷向未醫愈舊時吐血之證時愈時作奔馳道路已覺孱弱不勝加以標兵叛亂殆不啻萬弩攢心以至飲食大減寢不成眠力竭神疲益形委頓然使甘事本爲臣所能逮亦復萬死何辭乃時局艱窘百倍尋常若恐獲畏難規避之罪隱忍不言則必有深誤大局之時而轉旋無計伏查甘省回亂沸騰焚掠殘殺之慘幽僻不遺嗣後援剿諸軍日增一日賊糧軍食無一不取給於民循至於今被禍既深子遺無幾田土蕪廢一片荆榛人相剗食去秋奏准於川陝兩省完足之區籌措軍糧數萬石至今運送至秦州者祇數千石秦州以西車贏久已被賊耗盡不能再前目今已倍極艱危轉瞬更不知作何究竟此軍糧窘竭已極之情形也去年兩江督臣曾國藩奏明江南等省每月協臣十萬五千兩卽令如額如期概行運到尙不敷十之二三今臣每月僅得六萬兩除製造火器軍裝以及運費等餉實僅得三四萬兩以之勻給雷正綰曹克忠等各軍及臣所部每勇夫兩

月之久始可得銀數錢此軍餉拮据萬難之情形也甘中食用奇貴每勇所費日過百錢今得餉無多久將衣被鬻盡形同乞丐况糧食缺乏終日或不舉火再宿始得一餐甚或掘別草根樹皮苟延殘喘每遇進戰必須籌措十數日始能裹帶一二日之糧卽或戰勝而飢疲無力不能追賊臣每覩此情心酸泣下雖加意拊循究屬徒託空言終無實惠故屢次潰散莫之能止見在所存營壘雖幸勉力支撐然逃亡亦踵相接凡營哨官盡懷去志曹克忠因此焦急竟至成病此營務危迫萬分之情形也逆回股數繁多搜括數年民間一馬一羸盡爲所有每接仗千羣萬騎以相抗拒敗則行走如飛我軍多係步隊倍道而馳日僅百餘里未及數日輒復疲勞往往出截其前反落其後馬步之勢旣異飢飽亦復相殊故攻剿尙易而攔截終難此賊勢飄忽難制之情形也以事勢而論則如彼以臣才病而論又如此臣所以旦夕憂慮知必不能了甘肅之事若再戀棧日久必至貽誤益深臣罪原不足惜而甘事益不可挽回其將如大局何也疏入詔准開缺調左宗棠爲陝甘總督命岳斌俟宗棠到任再行交卸時陝回羣竄入甘蔓延清水秦安閒岳斌以秦州完善地賊所垂涎且甘省轉輸餉道止此一綫之路至是戒嚴不可

不急救遂布置省防出駐秦安之隴城鎮調度各軍分股截剿賊不得逞八月狄河踞賊潛襲鞏昌防軍失利城陷岳斌飛檄總兵傅先宗即日克之斬獲甚多岳斌坐降二級留任時曹克忠因病就醫西安岳斌以一身力疾往來督戰九月蘭州糧餉告匱岳斌以南路稍定疾馳回省籌支危局十月橫河川塬回逆被剿窮竄闌入平涼府城翼日收復自是西路各軍攻拔裴家營鎮虜堡各回巢餘衆就撫平番古浪一帶驛路暢通東路亦屢報勝捷拔橫河川塬老巢十二月病劇乞假一月允之六年正月再陳病狀請救將軍穆圖善就近赴省暫署督篆二月詔可又諭曰楊岳斌病勢甚篤情詞懇切若再勉強挽留朝廷亦有所不忍惟穆圖善剿辦東南回匪並安撫已降之衆一時能否遽赴省垣尙須斟酌情形不致顧此失彼方爲妥善楊岳斌俟穆圖善到省接署督篆後將一切情形詳細告知再議起程毋得遽行回籍致誤公事四月解任遂回籍光緒元年叩謁穆宗毅皇帝梓宮仍懇回籍養親諭曰楊岳斌於水師一切事宜最爲熟悉著前赴長江一帶每年與彭玉麟往來巡閱將各營水師認真整頓並准其會銜奏事該前督巡閱之餘隨時回籍省親仍可藉修子職也二年賜剿平粵匪捻匪方略各一部三年

巡閱畢遵旨繪呈長江江防全圖諭曰長江地方要緊該前督巡查一切悉臻周妥洵堪嘉尙所繪圖幅詳明尤見實心辦事著隨時周歷以副委任圖留覽四年以父病奏請開去巡閱差使得旨暫緩巡閱旋遵父母命捐助山西直隸河南陝西等省賑銀五千兩上嘉之五年三月再懇開去差使詔如所請八月丁父憂六年呈請湖南巡撫奏建楚軍水師昭忠祠列入祀典九年法人構釁沿海戒嚴詔令岳斌會辦福建海防事宜十年正月岳斌以母老病重辭上原之令俟母病稍愈卽遵前旨赴閩七月諭湖廣總督卞寶第曰戰局已開軍情萬緊楊岳斌深諳兵機當移孝作忠力圖報稱著傳知剋日成軍出膺重任岳斌於是再出視師九月命迅往江南幫辦軍務與曾國荃隨時會籌戰守尋諭曰法兵見在基隆臺北府城萬緊著派楊岳斌幫辦左宗棠軍務迅赴福建駐紮漳泉一帶聯絡紳勇設計渡臺速圖逐法之策岳斌疏報募勇成軍並請在長沙添募合成三十營上不許飭卽將所選十二營迅速赴援十月奏言兵事一簡練京外制兵分扼險要一團練海上民兵合力防衛一豫籌屯糧以充軍實一重防陸地以出奇制勝一量移機器局以免疏失上韙之是月恭逢皇太后五旬萬壽上以岳斌奉詔治軍不

遑將母賞其母御書教忠衍慶扁額一方大緞二匹尋又加賞紫檀三鑲如意一柄大卷江緞袍褂料二匹十二月軍至泉州時法兵以輪船扼我渡臺海道十一年正月岳斌率所部由秀塗口夜渡埤南二月駐軍臺灣籌布臺南防務聯絡紳民數日間集團勇萬餘人排日操演嚴爲之備馳抵淡水與巡撫劉銘傳所部進薄基隆互相犄角法人久不得逞旋乞和八月班師仍請回籍養親允之十二年紫光閣圖像錄其長江戰功最著者數事十三年丁母憂岳斌在籍捐修文廟書院籌添乾鳳永保鄉試號舍建節孝祠再遇歲歉出家資運穀米平糶全活頗衆十六年卒於家遺疏入諭曰前任陝甘總督楊岳斌忠勇性成勳勞卓著咸豐初年隨同前大學士曾國藩剿辦髮逆創立師船由湖北江西安徽直薄江寧肅清江面數千里厥功甚偉同治三年克復江寧省城蒙穆宗毅皇帝眷念勳勤賞給一等輕車都尉並賞加太子少保銜復由福建提督簡授陝甘總督嗣因親老准其回籍終養朕御極後命巡閱長江水師上年服闋後奏准在籍養病方冀調理就痊長資倚畀茲聞溘逝軫惜殊深楊岳斌著追贈太子太保照總督例賜卹任內一切處分悉予開復應得卹典該衙門察例具奏加恩予諡勇愨並於立功省

分建立專祠其生平戰功事蹟宣付史館立傳伊子附生楊潛儀著賞給舉人准其一體會試伊孫候選縣丞楊鎮榮著以知縣用楊道灑俟及歲時由吏部帶領引見用示篤念蓋臣至意尋賜祭葬十七年兩江總督劉坤一以岳斌功德在民請於安徽采石磯地方建立專祠以彰蓋績而順輿情允之子正儀花翎二品頂戴福建候補道懋儀江蘇候補道潛儀恩賞舉人孫鎮榮以知縣用

嚴樹森

嚴樹森原名澍森四川新繁人祖籍陝西渭南道光二十年舉人由捐納內閣中書改捐知縣咸豐元年授湖北東湖縣知縣五年報捐軍餉以同知陞用旋以防剿粵匪出力陞知府賞戴花翎是年署武昌府又以辦理糧臺實力籌畫巡撫胡林翼疏請免補本班遇有湖北道員缺出請旨簡放允之八年授荆宜施道九年擢按察使遵旨改今名十年閏三月陞布政使以捐廉助餉下部議敘胡林翼復薦樹森綜理精密才勝吏事十月擢河南巡撫十一年正月捻逆劉狗等竄擾朱仙鎮偪近省垣樹森率屬籌防飭黃河渡船悉泊北岸咨會四品京堂聯捷扼守黃河下游派總兵成景候補道張曜領軍夾擊之賊竄南陽一帶樹森劾成景進

兵遲延褫職留營效力三月奉督辦剿匪事宜之命時南陽股匪遁還亳州老巢而另股捻首陳大喜等犯汝寧踞永夏叛練苗沛霖之黨王全奎等犯沈邱項城開封以東幾無完土髮逆陳玉成由安徽霍山竄湖北蘄水與豫省光州固始毗連邊防同時喫緊上命樹森籌兵扼守四月汝寧陳逆勾結平輿股匪擾新蔡上蔡飭張曜等擊敗之時督辦團練大臣毛昶熙疏報各營戰績樹森以其單銜入奏並不會已確查虛實因上疏言事權不一政出多門難免掣肘諭曰前因各省軍務未葺特派督辦團練大臣勸辦民團以輔兵力原以該員等於本省地利民情較爲熟悉督撫大吏若與虛衷商榷共濟時艱於軍務不無裨益毛昶熙係幫辦之員此次單銜奏事本屬非是如果虛報勝仗爲所部員弁冒功地步嚴樹森亦應據實參奏乃不肯明言撤去毛昶熙輒以事權不一等詞空言動聽其器量褊淺意在獨斷獨行豈能逃朕洞鑒嚴樹森毛昶熙同辦一事惟當共矢公忠同心戮力不得意存畛域以小節微嫌率行入奏儻仍前各挾私意是已非人以致貽誤地方則是自取罪戾不得以事多掣肘藉詞推諉也五月官軍攻霍莊踞匪陳逆來援樹森檄張曜迎擊誅其酋朱全喜等賊竄確山遂平營總蘇謙復兜擊

之按察使鄭元善會張曜等軍進毀賊寨俘斬無算又翦滅會匪李占標等於新鄉滑縣等處河北肅清先是苗沛霖在安徽潁州集衆數十萬潛蓄異謀陷壽州並受髮逆僞封已而就撫授四川北道六月樹森疏陳苗沛霖叛迹請決計擊之略言苗逆謀叛之心久堅且決今合皖豫兩省兵力明彰撻伐各團寨視官爲從違必皆倒戈相向撫之難不如剿之易也七月陳大喜竄沈邱項城檄張曜迎剿大捷平小王張七等寨賊壘另股劉狗宋喜元等亦飭副將圖塔訥等擊退之時毛昶熙以事鐫級樹森疏稱昶熙數月以來整頓宋軍調度合宜戰功疊著請開復處分得旨允准九月賊擾滎澤滎陽汜水鞏縣及鄭州樹森檄副將穆正春等擊之賊敗竄省北三道隄外穆正春等邀擊大捷近省方報肅清適劉狗等肆擾鞏洛祥符陳留復有匪蹤上命樹森迅速調兵進剿實力掃蕩十月翰林院侍講學士顏宗儀奏各省團練大臣諸多弊竇請仍責成地方官辦理上以毛昶熙應否仍令督辦河南團練命樹森妥籌速奏尋奏請仍留辦理團練並幫辦剿匪事宜允之時穆宗毅皇帝御極下詔求言十一月樹森條上十二事一簡輔導以養主德一辨賢否以嚴黜陟一興實學以育人才一澄敍官方以清亂源一開武

備館以裕將略一整飭京營以重根本一慎簡大僚以重屏藩一彰善癉惡以礪節義一豫籌蓄積以復民氣一嚴究服制之案以重倫常一禁淫靡以惜物力一廣言路以通下情疏入上嘉納之又言苗逆經楚軍追剿逼近光固難保不乘間西趨邊防喫緊藩司鄭元善等未能赴防請調副將周鳳山招募湘勇迅速赴豫又毫捻劉老淵有出竄之勢東路告警省兵未能南行請留駐省防以備策應逆匪焦克昌等糾黨數千由東竄豫撲犯滑境擾及濬縣派兵渡河號召鄉團力保河北均如所請行先是御史劉毓柎劾河南布政使邊浴禮不職狀命樹森查實褫職遣戍上以樹森並未露章參奏鑄級留任十二月派張曜剿退平輿竄匪副將楊飛熊復敗東匪於衛輝大楊隄豫境無賊蹤是月調湖北巡撫同治元年正月疏調總兵穆正春等四員赴鄂詔如所請並諭樹森到任後務當振刷精神一切防剿事宜與官文等和衷商辦以比美於胡林翼三月粵逆石達開自廣西竄犯鄂境樹森派兵會同湘黔各軍三面兜剿隨克來鳳縣城四月粵逆陳德才等由南陽竄內鄉擾及浙川圖犯陝境捻匪竄撲永寧延及雒南劉老淵股匪亦由陳州西竄樹森疏言當今形勢不慮粵捻各匪併力南趨特慮皖匪撲雒南粵逆

窺伺陝境蓋陝西西同鳳三府全陝菁華薈萃惟有先驅賊出關然後會合夾擊以保完善五月賊犯鄖西檄總兵何紹彩敗之於何家店又飭道員金國琛赴鄖策應尋以將軍多隆阿由潼關進剿髮逆樹森並檄金國琛等督軍入陝扼賊竄山陽之路並疏陳陝省漢回搆叛實在情形諭令有所見聞隨時具奏又言湖北按察使閻敬銘磊落光明綜覈精密實爲湖北第一賢能使綜鄂省用人理財之大綱則胡林翼已成之規不致頽廢未竟之志必可踵行武昌道栗燿端正明通練習體要堪勝臬司之任奏入上嘉其得以人事君之義八月繪湖北全省地圖以進諭曰行軍之道以審地勢爲先鄂省居天下之中爲自古用武要地該撫宦楚十年足迹所至悉行記識並於鄖陽施南二府未曾親歷者飭屬繪圖加以咨訪參覈具見該撫留心軍事圖內所繪山川險要朗若列眉足爲發縱指示之助近來督撫中如曾國藩左宗棠等均能講求地理是以所向有功嚴樹森惟當益勵精神於戰守機宜實心講求務期四境乂安庶不負其所志時順天府府尹蔣琦齡條陳選練民兵按糧派費下各直省督撫議樹森就湖北情形臚陳十弊上聽之先是逆首石達開由四川犯湖北之竹谿竹山並擾陝西之平利樹森檄

何紹彩覘賊所向實力堵剿並檄周鳳山等分剿正陽羅山一帶攻克梅黃老巢進規邢家集龍井陡溝明港克之至是淮南肅清而髮捻自老河口陷隨州逆首陳大喜陷京山應城馬融和入德安另股捻匪姜苔凌等復由河南新野犯楚境九月檄穆正春等克復京山應城陳逆潰走馬融和亦爲護軍統領舒保擊敗又逆首賴汝洸陳得才等犯襄河多隆阿由陝回援賴逆敗走桐柏襄河池北肅清是月以星變疏列侍郎勝保罪狀略言七月夜有衆星流向西南復有彗星見西北上天垂象變不虛生皇上朝政清明南方軍務漸有起色惟以西北重地軍務委之勝保一人此則用人之一失也勝保督辦皖豫軍務其時河南陝西湖北三省並無髮逆竄擾乃勝保不能密籌堵截而放賊入豫入楚入秦滋擾完善之地致回匪乘釁而起糜爛至今髮逆之縱橫於楚豫秦三省者雖經楚師疊剿而忽此忽彼到處沸騰不特增西北之憂抑且掣東南之肘不知勝保督辦皖豫之名何在乃猶毫不知恥竟以解穎圍擒狗逆爲己功不知穎圍之解乃賊震於廬州之捷與楚師之至也狗逆之擒乃苗沛霖懼多隆阿李續宜等率師進剿始俘獻以圖功也不然楚師未至之先何以穎圍不解狗逆不擒髮逆不竄東南而竄西

北則勝保防剿之疏可見及督辦陝西軍務臨潼一役又捏報戰功據陝西官紳函稱勝保之兵日以縱酒宣淫爲樂有目不忍見耳不忍聞者輿論如此則其爲天怒人怨極矣查勝保自請入關之時正兩次星變之時又皆見於西方或者天心眷顧見民情不得上達特垂象以示儆歟東南竄亂十餘年賴諸臣戮力同心始補救於萬一何堪復以西北重地任勝保一人敗壞耶先是光祿寺卿潘祖蔭順天府府丞卞寶第御史華祝三丁紹周等先後劾勝保擁兵縱寇山西巡撫英桂將軍德興阿等亦劾其剋扣軍餉至是科爾沁親王僧格林沁查明勝保欺冒貪污各款與樹森劾奏合有旨逮問論如律十月應詔條陳四事一保舉記名藩臬應請停止也藩臬事賅六部之全秩居百僚之上督撫兼軍務不過總兩司之成而已是兩司之難與督撫無異近年來不論其人品行經濟何如或應募到營或隨仗出力數年之內陳臬開藩問刑名不諳律例問錢糧不識度支以殺賊之心殺民以選兵之法選吏紀綱敗壞賢否混淆蠹政殃民流毒曷極朝廷但以其戰功焜耀謂非此不足以報耳不知由軍功而虛銜而實職而翎枝而勇號而紀錄加級層累曲折保至道府以上可以酬大功數十次如果人品經濟體用兼

賅堪勝大任止宜臚陳事實特疏上聞聽候簡用不得擅請記名藩臬卽或荷蒙超擢如係軍營出身亦宜令原保之人出具切結決不貽誤地方然後試以吏治否則令於軍務省分以本職帶勇免致用違其才至甫經收復之省招集流亡培養元氣生聚教訓藩臬兩司責任尤重更非徒諳武事者所能勝任查例保舉道府記名簡放已不准行況兩司位在道府上乎一各省綠營兵額概請停補也我朝定制各省督撫提鎮及漕河諸帥皆有標兵要隘之區必設塘汛布置不可謂不周將弁有廉俸有薪乾兵丁有銀米徵調有行糧待兵不可謂不厚乃平時武官奴婢皆食軍需遇有空曠都守千把以及字識層遞蠶食兵籍所存老弱者半油滑者半分處城汛寥寥數人以錢糧爲世業視訓練爲虛文一旦有警湊雜成軍百里赴援兼旬始至未及見敵望塵先奔而殺賊轉藉民丁戎事反資文吏以有用之餉項養無用之官兵國家何賴有此武備耶近年被兵省分綠營額兵城破以後逃亡殆盡收復之餘依然入伍而凡籌剿籌防專恃招募之勇攻城奪隘陷陣衝鋒者名爲官軍何曾有一弁一兵出自營伍夫用勇之力旣勝於用兵則養兵之糧當移以養勇臣愚以爲徽安一省甫經收復江蘇浙江兩省尙陷賊中

營制盡廢兵籍無存所有兵糧宜全行截止僅留武營員缺敘補帶勇出力之人惟直隸京營及山西陝甘等處邊要情形不同仍照舊例辦理其餘各省應請敕下該管總督及提督銜之巡撫覈實稽察遇有缺額卽行扣除不准再補以所省之餉爲練勇之資事平之日卽於戰勇中擇其質性樸實膽技優長膂力方剛者編入行伍充補營兵願歸某標悉聽自便則行伍悉皆精勁庫儲得以稍紓而將來無用勇丁亦不難遣散矣一軍營卹賞銀兩急請變通也自粵匪構禍以來搢紳荼毒將卒淪亡赴義捐軀所在皆有例邀卹典在朝廷有此善舉愈足昭死事之誠在私家沐此皇仁亦足慰幽泉之憾惟刻下庫儲匱乏各路徵兵月餉百方搜括尙慮不敷安能籌給此款而死事之家知有此項或藉以歸櫬或待以養生欲不行給發而呼籲頻聞欲概行給發而庫款支絀軍務一日不竣此款逐日加鉅應請敕下戶兵二部通行各省將咸豐十一年以前所有此項銀兩覈計實數查照籌餉例及見行例不准減成准其作爲子孫捐項於世職外另行議敘官階仍予武職俾得及時效力如本係讀書子弟准其指捐文職儻爲數無多或准作貢監或議敘職銜其子孫若已出仕或加級紀錄或請封典均聽其便庶積年鉅

款藉以消除在忠節之裔世受皇恩亦必樂於從事至同治元年以後除臨陣傷亡者當由糧臺發給外其餘此項銀兩應俟庫款稍充再照舊章給領如願議敘官階者仍准照此案則德澤旁敷而存歿均感矣一部院司官廉俸應給實銀也京官之職翰詹原無專政閣部院寺皆爲辦事衙門而六部尤劇查部屬一途捐班本係有資廕生保舉推陞各班人數較少惟拔貢朝考及進士分部者最多此項人員半皆寒士定例於正途出身分部學習者給俸銀之半俸米與實缺同當捐例未開讀書釋褐觀政數年既能補敘而科道出其中卿貳出其中若京察外用郡守監司循資可得是以明知其清苦而猶勤於供職也乃近聞翰詹科道多願外遷部院司員紛紛告退或別謀差使或投效軍營或榜下到部而呈請歸班或捐爲郎而改捐外吏其辦事者或已得實缺或力難改圖踴躍從公朝不謀夕其故何歟士大夫遠離鄉井服官中朝溫飽固非所求飢寒亦所難忍若謀生之不暇何盡職之能言應請敕下部議於部院五六品以下司員所有俸銀不必折抵概與實銀至內閣翰詹等官均係朝廷清要之職其五六品以下者計階授祿亦屬無多並請一體給發實銀見在各省軍需每歲糜餉不下千萬此等經制之

費上足以崇國體下足以養人才何惜區區數萬金耶疏下部分別議行二年二月御史朱文江以湖北髮捻各逆悉數敗遁全楚肅清疏請裁撤湖北釐局丁紹周亦請撤各省釐局委員歸地方官辦理疏下樹森偕湖廣總督官文查明覆奏尋以湖北通省釐金每年抽收實銀約在一百三四十萬兩全賴分局稽查偷漏礙難議裁並臚陳八弊奏寢其議時匪首陳得才等由房竹犯陝西陷興安府城上命樹森出省駐紮秦鄂交界地方督軍越境馳剿樹森疏稱總兵穆正春等軍扼駐黃州德安等處南禦髮逆東防皖捻竟無一兵一將堪以抽調隻身前往無濟於事三月髮逆李秀成圍江浦樹森以扼防緊要親赴黃州查閱營壘就近調度時逆匪陳大喜糾合皖捻南竄麻城穆正春敗之於白杲鎮復敗之於上巴河賊西趨蘄水窺伺武漢樹森檄護軍統領舒保等夾擊之賊大敗遁四月苗逆復偪楚疆李逆又糾合皖捻疾趨麻城上伺荆襄樹森飭穆正春等扼要防剿九月捻逆程大老砍等由河南闖入湖北鍾祥擾及應山甫經總兵楊朝林等擊退陝西滇逆藍二順復陷漢中鄖西戒嚴匪首張總愚亦竄撲河南內鄉浙川上命樹森等派兵馳援毋許稍分畛域三年二月蘇杭克復官軍圍攻江寧漢南髮逆圖

擾楚豫爲回救江寧之計諭樹森等嚴扼要隘俾該逆不得越境三月捻逆陳大喜由老河口下竄上命樹森等派兵會剿嗣以日久未見覆奏深恐鄂省各路官軍事權不一命官文刻日出省將襄樊等處水陸各軍力加整頓省城防務著嚴樹森認真經理九月官文劾樹森把持兵柄楚省舊營悉改隸撫標上責樹森任性妄爲命以道員降補四年五月授廣西按察使時翰林院侍讀學士景其濬劾貴州巡撫張亮基玩兵侵餉縱暴殃民上命樹森查奏尋查明被劾各款請交部嚴議五年擢貴州布政使以前在湖北巡撫任內動用竹木商捐部議降一級調用尋有旨改爲降四級留任六年疏請開缺諭曰嚴樹森係曾經獲咎之員疊蒙擢用上年簡授廣西按察使命往貴州查辦事件旋授貴州布政使乃沿途逗遛延不到省疊次藉詞巧飾且奉特旨交查事件並不親臨其地安坐鄰省卽行查覆向來亦無此體制又見貴州事務棘手亟思規避率行奏請開缺來京似此畏葸取巧實係溺職辜恩若僅予罷斥轉得置身事外遂其私謀嚴樹森著卽革職發往雲南交雲貴總督張凱嵩差遣委用十一年賞四品頂戴署廣西按察使光緒元年四月授廣西布政使十一月擢巡撫二年卒遺疏入諭曰廣西巡撫嚴樹

森由知縣洊擢兩司簡授封圻自到廣西以來於地方軍情吏治認直籌辦克稱厥職茲聞溘逝悼惜殊深嚴樹森著照巡撫例賜卹任內一切處分悉予開復應得卹典該衙門察例具奏伊長子知縣嚴薦昌著加恩以直隸州知州用長孫祖衡著加恩以主事用用示篤念蓋臣至意尋賜祭葬子薦昌湖北荆門直隸州知州勳昌江蘇候補道孫祖衡主事祖彭知縣

翁同爵

翁同爵江蘇常熟人本生父心存體仁閣大學士自有傳同爵由蔭生用主事分兵部咸豐九年補官十年三月陞員外郎十一月以辦練勇出力加知府銜同治元年二月京察一等記名以道府用十一月丁本生父憂二年服闋三年七月因充馬館監督籌備馬匹接遞軍報均無貽誤命專以道員用九月授湖南鹽法長寶道十月再敘辦理練勇功加鹽運使銜五年三月署按察使十二月署布政使六年八月擢四川按察使湖南巡撫劉峴疏請暫留布政使署任允之十一月籲請陛見有旨卽赴新任七年陞陝西布政使九年甘肅回逆竄陝境偪近省垣同爵拒卻之賞戴花翎十年十一月授陝西巡撫倡捐銀一千兩修理周陵十二月

丁本生母憂十二年正月服闋十三年來京九月授湖北巡撫光緒元年五月兼署湖廣總督七月疏免湖北米穀釐金詔如所請二年正月疏言襄陽屬之均州僻處山陬幅員遼闊又有武當山路徑紛歧林深箐密最易匿匪非專員稽察不足以清奸宄擬請於州治西南八十里孫家灣添設巡檢一員孫家灣附近黑虎廟前本設有巡檢順治年間裁今孫家灣人煙稠密又爲商旅往來要道亟應添員彈壓查有江夏縣屬滄黃巡檢汛地無多可以移駐孫家灣作爲繁缺巡檢隨時揀員調補至滄黃所轄多在濱江查江夏縣縣丞向駐省垣本有水利之責並無分管汛地卽以該縣丞移駐滄黃專司水利於地方公事各得其宜下部議行三年三月交卸督篆八月卒遺疏入諭曰湖北巡撫翁同爵由部屬簡授道員洊擢封圻歷任陝西湖北等省老成練達辦事實心克勤厥職茲聞溘逝悼惜殊深翁同爵著照巡撫例賜卹任內一切處分悉予開復應得卹典該衙門察例具奏伊孫廕生翁奎孫著加恩賞給舉人准其一體會試用示篤念蓋臣至意尋賜祭葬子曾純浙江候補知府孫奎孫舉人工部主事

清史列傳卷五十四終

清史列傳 卷五十五

大臣畫一傳檔後編十一

福濟

福濟必祿氏滿洲鑲白旗人道光十三年進士改翰林院庶吉士十五年散館授編修尋擢侍講充文淵閣校理十六年充日講起居注官十七年轉侍讀十八年陞侍講學士十九年五月轉侍讀學士管理左翼幼官學七月充河南鄉試正考官十二月擢詹事府少詹事二十三年三月大考二等賞文綺八月署國子監祭酒九月遷大理寺卿二十四年五月陞都察院左副都御史七月陞盛京兵部侍郎十月調兵部右侍郎二十五年二月授鑲白旗蒙古副都統總管內務府大臣調工部右侍郎兼管錢法堂事務四月充殿試讀卷官朝考閱卷大臣管理雍和宮事務尋因兵部堂官違例派署掌印失察司員索詐書吏事發福濟奏參不實部議革職上加恩改爲革職留任五月充教習庶吉士二十六年二月署戶部左侍郎兼管三庫事務閏五月授右翼總兵調吏部右侍郎正藍旗滿洲副都統六

月充崇文門副監督八月充順天鄉試副考官十二月上御門聽政福濟侍班遲誤降一級留任二十七年正月署戶部右侍郎兼管錢法堂事務三月充會試副考官八月管理武英殿事務二十八年正月管理戶部三庫事務充經筵講官五月因御史方允鑲奏參河南歸德府知府胡希周等貪劣各款敕偕詹事府右庶子駱秉章往按鞠實科斷如律時御史楊彤如適有河南賈魯河挑挖糜費之奏上命福濟等逐細查勘尋奏言該省興挑賈魯河三次共用銀五十四萬餘兩錢八萬串數與原奏幾及百萬不符且甫經完工卽行淤墊總由勘估未能認真承挑工員復草率從事糜帑誤工咎無可辭所有承挑各員請分別革職議處仍勒限賠修河南巡撫鄂順安於此等鉅工未能先事詳勘及辦理不善又未將承辦各員據實嚴參洵屬草率於前徇隱於後請旨交部議處從之十月御史曹楙堅奏參江蘇署蘇州府知府鍾殿選等濫刑諱盜各款上命福濟偕駱秉章前往查辦尋查明分別定擬如所議行旋命折回山東審辦運司韋德成呈控撫臣勒令開缺藩司挾嫌傾陷一案旋奏言供詞各執請提交刑部審訊從之十二月調戶部右侍郎兼管錢法堂事務二十九年二月充紫禁城值年大臣授正白旗護軍

統領先是御史楊彤如奏參山西巡撫王兆琛贓款昭著各州縣餽送營求上命福濟偕刑部右侍郎陳孚恩馳往查辦六月奏稱王兆琛以封圻大吏失察巡捕家丁婪索規禮復收汾陽霍州兩處紅封銀兩又受鹽商規銀一萬四千餘兩霍州知州楊樹年於陽曲縣任內索借王凝一銀一萬餘兩均請革職嚴訊得旨王兆琛楊樹年著派員押送來京交軍機大臣會同刑部覆審七月充江南鄉試正考官三十年二月充實錄館副總裁署理奉宸院事務三月轉左翼總兵稽察內七倉四月充朝考閱卷大臣五月復充教習庶吉士六月醫生薛執中以治病爲名編造妖言經巡城御史拏獲審訊牽涉福濟上褫福濟職八月賞給四品頂戴署理山西按察使十月授山東按察使咸豐二年十月遷奉天府府尹因在山東按察使任內捐備軍需銀兩賞戴花翎十二月擢河道總督三年三月調漕運總督命暫行督辦淮北鹽務時粵逆竄踞江寧蔓擾江北福濟帶兵會同欽差大臣琦善攻剿揚州踞匪九月逆匪三百餘人由揚州缺口門縋下乘小船木筏過河福濟督兵馳往擊退復捐養廉銀兩交糧臺備用下部優敘十二月調安徽巡撫因揚州儀徵先後收復奏留揚州東路漕標兵三百名河標兵二百八十名赴臨

淮關相機籌辦四年正月奏言用兵之道先資地利查關山係古清流關爲自江入皖門戶北則溯溪爲東達臨淮要隘皆遠在廬州後路勢難兼顧臣行營兵祇四百名廬州業經失守卽當兼程銳進斷不能留兵分守應請飭下琦善等速撥精兵二千赴關山溯溪臨淮一帶實力堵禦防賊北竄又奏言淮北鹽課前經陳請撥充安徽軍餉業蒙允准以目前而論不重在督運而在督銷適奉諭旨補授安徽巡撫則督銷之責更無旁貸應請將淮北鹽務仍歸臣一手經理俾可儘力催解俱允之二月福濟至廬州時六安州爲土匪所踞上以福濟籌防未周下部議處福濟又奏言自到廬後統計調撥兵勇約二萬有餘每月兵勇口糧及各項應付不下十五六萬前在臨淮途次奏請廣開捐例提用安徽地丁銀兩原爲接濟軍需起見乃到任以來體察情形江南各屬皆逆匪出沒之處自難徵收滁和泗鳳穎各屬捻匪肆起民不聊生且皖省向多大商富戶自逆匪盤踞江面四出擄脅商賈不通農民益困旣難賦課何有捐輸於此而議開徵開捐民力更有所不給斷不敢因前次奏請稍涉迴護惟刻下軍費浩繁不能不豫爲籌撥請旨速飭浙江撫臣除前撥五萬兩外再趕解五萬兩並請敕令山東山西陝西各撫臣

每省撥解五萬兩以濟要需詔從其請三月奏請派前江南河道總督潘錫恩安徽學政孫銘恩會辦甯國徽州廣德三府州防剿事宜允之五月會同欽差督辦軍務江南提督和春攻克六安州城六月奏請豁免六安州咸豐三四五年地丁錢糧永加文武學額時賊踞英山福濟等檄飭候選知州李元華等會同紳勇直抵城北之竹絲嶺奮勇進剿賊衆驚潰官軍由南城蟻附而上復英山城旋克霍山九月奏免英山霍山欠完錢糧永增學額又奏言皖省自軍興以來各邑紳士藉團練之名擅作威福甚至草菅人民搶奪民財焚掠村莊無異土匪應請嗣後凡辦團練無論大小紳士胥歸地方官節制均允之五年二月督軍進攻廬州踏平城外賊壘命官兵詐爲援賊旗幟乘賊不備擊破之十月遂克廬州上加福濟太子太保銜並頭品頂戴尋偕和春奏免廬州咸豐四五年錢糧並加文武學額六年正月奏請分別蠲緩安徽被兵各府州縣漕糧均允之七月因江北各屬亢旱請暫緩抽稅得旨允行時賊踞三河福濟偕和春督參將程智泉等擊敗之復其城冒雨進攻廬江克之九月克巢縣並復合肥等州縣上以福濟親督兵勇攻克堅城命交部從優議敘並賜以御用駝色棉袍一件白玉喜字翎管一枝白

玉搬指一箇大荷包一對小荷包四箇福濟復奏免巢縣合肥等州縣被兵以後三年錢糧增廣學額十一月移營桐城七年正月逆匪復陷無爲廬州各州縣疊次圍撲桐城均經擊退二月賊四面磨集官軍以衆寡不敵潰圍出上以福濟督辦無方交部議處賊復陷六安州福濟因病奏請開缺專辦軍務得旨福濟以巡撫督辦軍務責任至重何得以微疾輒請開缺所奏著不准行時軍餉支絀楚廣兵勇索餉大譁致巡撫關防遺失福濟自請嚴議上加恩改爲交部議處十月賊由湖北折回皖省句合捻逆竄撲石皋下閣等處福濟飭總兵吉順等進剿踏燬賊木城四焚賊船七埽平下閣賊壘賊復陷桃鎮竄擾派河時福濟已駐兵廬州派兵攻桃鎮派河各要隘賊鋒大挫賊復由巢縣繞至含山圍和州河村鋪軍營福濟等分路迎剿賊衆潰逸八年四月奏言滁州來安縣相繼失守北路宿靈驛站已被捻阻東路全滁餉道又被賊踞廬州四面受敵其故由於皖地當衝江寧圍急則粵逆句捻裹脅蔓延另圖占踞東南瞰淮揚則牽掣江南大兵竄宿徐則爲中原巨患所可慮者一又由於廬兵太單以萬餘兵勇兼控數百里平曠之區光固之軍偪賊入皖西境斬黃之軍偪賊入皖南境浦六之軍偪賊入皖北境區

區之皖實爲賊壑所可慮者二臣以一旅常數面之賊餉需久缺又無以鼓勵軍心前歲總兵鄭魁士桐城潰退各營元氣大損節次奏調添兵未蒙俞允卽撥防各兵如吉林黑龍江馬隊熱河密雲陝甘山東山西等處均以留標乏兵爲詞儻仍僅此兵力責令支持全滁不復禍猶淺全皖盡陷禍更深所可慮者三皖餉專待外撥乃陝西奏定按月二萬數月不解山東更屢催罔應江蘇及鹽課撥款或斷或續見各營被困數日斷炊協撥不來潰散立見所可慮者四臣懷救民之志實無辦賊之才際此一籌莫展懇皇上將臣嚴加議處速敕德興阿勝保等無分畛域聞警必援攔頭會剿並請添調重兵添撥多餉特派大員分辨淮南北賊捻以專責成而速殄滅奉旨滁州來安相繼失守福濟株守廬州一籌莫展各無可辭著交部議處福濟尋派兵擊退臨淮捻匪克復六安來安賊復竄陷懷遠分股攻撲鳳陽府縣城垣同時失陷定遠危急廬州後路梗塞六月因病請假旋奉旨福濟自克復廬州後未能振作日久無功以致賊勢蔓延實難辭咎著革去頭品頂戴並太子少保銜卽行來京另候簡用九月授內閣學士兼禮部侍郎銜十月賞給副都統銜作爲西寧辦事大臣九年以安插投誠野番辦理妥速賞還頭品

頂戴十年六月授工部左侍郎九月署陝甘總督十月兼正黃旗漢軍都統十一年正月授成都將軍七月調雲貴總督八月逆匪藍大順圍攻綿竹福濟飭參將徐邦道等迎剿綿竹圍解逆匪竄遁十一月以兩次奏請叩謁文宗顯皇帝梓宮穆宗毅皇帝諭曰雲貴總督福濟由翰林洊擢侍郎旋因獲咎褫職我皇考大行皇帝棄瑕錄用復擢安徽巡撫辦理軍務種種乖張貽誤以致地方糜爛蒙先皇帝再造之恩僅予處分未經治罪嗣又擢任將軍朕於御極之初復簡放雲貴總督疊經諭令查辦事件並諭各直省督撫毋庸來京叩謁梓宮迨該督具摺陳請復批令毋庸前來迅速赴新任該督自應以地方爲重兼程前進將應辦事件次第辦理方爲不負委任乃該督於接奉後並未赴任仍折回西安專差遞摺懇請仍准叩謁梓宮並稱滇黔軍務諸多棘手非奏牘所能罄述必須泥首闕庭詳細面陳於拜摺後竟自起程北上而於查辦事件並催令赴任諭旨無一字提及覽奏不勝詫異福濟接奉前次毋庸來京諭旨已可不必奏請迨經接奉批摺後豈尙未能深悉而故爲是曉曉瀆請卽滇黔軍務事多棘手何難於到任後詳細籌畫據實密封上陳今該督並未行抵新任豈能悉知其情形卽以面陳爲請不候

諭旨擅自北上顯係存心畏葸飾詞取巧福濟以屢經獲咎之員受兩朝知遇厚恩當此軍務喫緊不思力圖報效輒敢巧爲嘗試實堪痛恨若僅予革職轉得置身事外福濟著革去總督賞給四品頂戴仍令迅赴雲南交新任署總督潘鐸差遣儻再不知愧奮定當重懲治罪同治元年西藏喇嘛構釁以駐藏辦事大臣滿慶等前後奏報支離賞給福濟副都統銜前往查辦嗣因道路梗塞驛站不通未能前進三年撤副都統銜留四品頂戴四年回京六年授科布多幫辦大臣七年調布倫托海辦事大臣八年授烏里雅蘇臺將軍九年五月疏稱查同治四年西北軍興以來由喀爾喀四盟汗王貝勒貝子公台吉各官喇嘛等捐助駝馬牛羊有卽撥用者有飭候提者並有徑交官廠牧放者乃以災瘟爲詞任意倒斃若漫無限制聽其取巧效尤恐難收實用請飭部妥議蒙古捐輸牲畜無論官收私存應否每年若干匹內准其報斃多少嚴定簡明章程以示限制章下所司十月回匪陷烏里雅蘇臺諭曰烏城被匪竄入福濟等旣不能先事豫防臨時又不能力圖堵剿本當治以應得之罪姑念該城兵力甚單勢難堵禦尙屬可原福濟著革職留任以觀後效仍著督飭蒙古官兵及派出察哈爾吉林黑龍江等處馬隊迅

將竄去賊匪悉數殄除旋以烏里雅蘇臺參贊大臣錦丕勒多爾濟奏參福濟謬妄貽誤得旨福濟身膺邊寄不能振作有爲力圖報稱實屬有負委任著卽行革職十二年因捐銀助賑經直隸總督李鴻章奏陳在皖戰功並請獎敘奉硃批賞還原銜花翎光緒元年三月卒鴻章奏入諭曰前烏里雅蘇臺將軍福濟於咸豐年間在安徽巡撫任內辦理軍務宣力有年見在因病身故殊堪軫惜福濟著加恩照巡撫例賜卹尋賜祭葬子長霖戶部員外郎孫善佺舉人花翎候選員外郎

晏端書

晏端書江蘇儀徵人道光十八年進士改翰林院庶吉士二十年散館授編修二十三年充順天鄉試同考官二十四年充雲南鄉試正考官二十六年京察一等記名以道府用二十七年授浙江杭州府遺缺知府尋補湖州府知府三十年大計卓異咸豐元年調署杭州府知府二年四月復署杭州府知府六月署杭嘉湖道尋護理鹽運使七月以捐軍需銀下部優敘十月捐陞道員三年六月擢福建汀漳龍道未及行八月署浙江鹽運使十二月奉旨開缺留於浙江以道員候補四年正月以辦理海運全竣下部優敘四月授寧紹台道九月陞按察使五年二

月江蘇蘇松太道吳健彰以通夷養賊被劾上命新授四川總督黃宗漢查辦宗漢密飭端書赴上海查訪得實健彰抵罪如律時粵匪陷江西玉山縣浙江衢州戒嚴四月巡撫何桂清檄端書赴衢防剿六月賊踞安徽休寧端書以兵駐南源口是時安徽官兵克石埭端書飭知府石景芬至祁門追剿六年二月遷江西布政使四月調山東布政使七月諭曰晏端書見留浙江辦理防堵著俟浙西防堵事竣卽行來京陛見先是逆首石達開擾撫州端書偕道員周起濱馳援之至是皖南軍情緊急回軍杭州八月總辦籌防助餉事十一月入覲擢浙江巡撫七年三月疏報官軍收復婺源並布置徽衢各路堵擊情形時江南各營欠餉甚鉅譁潰堪虞先後寄諭端書等體察情形妥行籌辦又以安徽廬州官軍餉竭兵單危在旦夕命端書籌解銀四五萬兩尋疏陳皖南及浙之衢州同時告警自顧不暇狀上切責之初督辦軍務兵部侍郎銜曾國藩奏准借撥浙鹽三萬引赴江楚銷售收課濟餉督辦鹽運事務前吏部左侍郎萬青藜請俟引數行完再籌接辦是月端書疏言曾國藩軍營需餉浩繁江西力難支應今以浙鹽濟餉一舉兩得且兩年來所運之鹽均扣收淮南正雜課費及浙省抵解協餉共十五萬有零應俟

河口道路肅清力籌接辦七月請添設皖南鎮總兵酌改營制武弁各缺下部議行時婺源又陷於賊九月安徽統兵大臣張芾疏稱婺源界連江浙徽防兵力不敷分派晏端書議由衢州撥兵三千前往扼守臣請浙軍紮婺源西之中雲臣援兵紮婺源北之清華街乃遊擊楊國正謂中雲不可紮營宜守婺城臣與江長貴力爭不可端書卒從國正議派知府畢大鈺遊擊楊金榜於婺城外分紮數營且有在東門外者似係豫爲退步迨賊至楊金榜棄營走畢大鈺力竭陣亡向使中雲紮營何至任賊直入使楊金榜固守婺城則清華一軍亦可赴援今乃片刻不守縣城失陷是楊國正倡議貽誤於前楊金榜棄軍潰敗於後臣屢請端書分別參處未見施行請旨嚴究端書疏辨之略言中雲踞婺源城四十里北通景德鎮西南通樂平東南通德興臣議以徽衢之師合守婺源先經衢州鎮總兵饒廷選委遊擊楊國正往度地勢其時樂平德興均有股匪景德屯匪尤多其竄襲婺城不必由中雲且中雲三面受敵無險可扼若浙軍由婺城策應清華路尤平坦婺城四面皆山登城東之程家山俯見全城又可遙望西北遂議以楊金榜所部分紮西北門外畢大鈺所部紮程家山此楊國正議紮婺城及東門外亦有數營之原委

也楊金榜至婺甫立營而樂平賊已竄近中雲楊金榜畢大鈺前往迎剿小挫之
詎該逆結連浮梁景德賊進逼縣城又以一股襲畢大鈺營一股由西門外襲楊
金榜營鏖戰半日之久逆援盜至畢大鈺力竭陣亡楊金榜亦被重傷潰圍而出
臣責令立功自贖暫緩查參此楊金榜受傷退守之情形也應請旨將楊金榜革
職留營以觀後效從之十月疏報徽衛官兵克復婺源又言將才難得所有皖南
鎮總兵一缺請卽以署總兵江長貴補授允之八年正月省城籌防需款端書倡
捐助餉上嘉其急公移獎子弟二月疏言江西臨江克復後潰匪由進賢東鄉竄
擾貴溪安仁金谿各縣境又引撫建之賊東渡圖犯廣信河口當飭副將周萬選
遊擊黃熊飛守玉山參將胡定國守廣豐遊擊楊國正守江山饒廷選親統漳勇
相機援剿計衛防各軍六千餘名分撥各路已去五千有餘常開兩防存兵不敷
調遣惟有駐守婺源之兵一千餘名由臣咨商張芾將前項浙兵飭赴玉山以重
防務得旨保障完善之區固屬緊要然近防不如遠剿若稍有畛域之分信郡不
守浙境焉能獨全懷之三月以江山縣失守自請議處並劾楊國正等臨陣退避
分別懲處賊既入浙又陷開化常山由衢州延入處州陷縉雲宣平松陽雲和壽

昌圖竄金華既而處州亦陷上聞浙人歸咎杭州將軍福興及端書辦理不善命兩江總督何桂清確查具奏四月疏言端書平日不能與官紳聯爲一氣是以一旦有事卽衆議沸騰然其任事老成穩練勝於侈口而談者多矣際此時艱不圖集思廣益徒歎無可咨謀實不免拘謹之失五月賊由縉雲竄陷永康武義先是端書調候選道李元度總兵周天受江長貴周天培李定泰由江南江西徽寧等處統師援浙至是客軍漸集端書以地勢軍情必先克壽昌始杜內竄飭李定泰疾攻之周天受江長貴周天培等堵下竄杭嚴之路李元度以玉山之師剿賊曹全關六月克壽昌解衢州圍周天培等復武義永康諸軍遂攻常山江山開化悉拔之有旨嘉獎端書促周天受等乘勝攻處州又復縉雲宣平七月復處州府城暨松陽雲和全浙肅清疏入推功張芾及各鎮道得旨陞賞有差旋命來京另候簡用九年七月授大理寺卿八月充江西鄉試正考官十年四月充督辦江北團練大臣陞辭日疏陳擬辦情形略言軍興以來江北團練早經舉行而少成效查徐邳一帶捻匪爲患淮徐道吳棠爲紳民所愛戴督辦各路築圩寓練於團漸有頭緒淮揚西北逼近天長六合賊氛正熾各州縣雖有民勇以戢土匪則有餘以

禦大敵則不足此時軍情緊迫自當講求團練之方惟辦團先須勸捐江北地方僅襄下河十餘州縣尙稱完善近年捐款繁多民力拮据未易措手本年二月道經江北於集團勸捐情形略知大概見擬親赴各處督同官紳就見集之勇挑選精壯分別去留不准稍有浮冒濱江濱湖衝要地方未經辦團者勸諭紳民一律舉辦收捐一節日久不無滋弊惟有嚴加釐剔不令稍有虛糜報聞尋以倡捐銀兩充團練經費得旨優敘十二月授都察院左副都御史十一年二月疏劾沈陽令宋秉中玩視築圩集團要務黜之八月疏言捻匪竄過運河闌入海流圖擾裏下河與漕督王夢齡調集民團分投布置副將袁世功等更番轉戰殲除殆盡淮海肅清同治元年三月命馳赴廣東駐紮韶關督辦通省釐金接濟江皖等省軍餉八月疏報馳抵粵省會籌釐金大概情形因省城應辦事宜尙未就緒是以未赴韶關諭曰晏端書到廣東後辦理釐務未得頭緒已可概見迄今數月未據該副都御史將辦理章程及解過浙皖軍餉數目詳晰具奏其爲諸事掣肘更屬顯然近來外省官吏於勸捐抽釐等事往往侵蝕分肥飽其私橐遇有他省人員前往試辦必多方掣肘不使其廢然思返不止殊堪痛恨著晏端書督飭派出道府

會同曾國藩所委人員實力籌辦儻有該省官紳暗中作梗卽著晏端書據實從嚴參辦十月命暫署兩廣總督尋兼署廣東巡撫先是戶部尙書羅惇衍給事中吳焯疏劾知縣許慶瑤等營私納賄遊擊章昇耀等走私漏稅上命粵東督撫查辦至是端書覆奏屬實許慶瑤等分別降革治罪又前督臣勞崇光疊次被參遵旨自行查覆並自請嚴議上命端書會同提督崑壽按款覆查尋奏言勞崇光措置乖方由於誤用陶昌培等今陶昌培章昇耀俱已明正典刑許慶瑤劉承緣亦分別參辦其釐金一節經臣端書奏明更正辦理勞崇光尙無始終迴護等情得旨廣東釐金事務仍著晏端書嚴剔弊端實力整飭又以湖南巡撫駱秉章奏言粵省有應解京餉及本省籌備經費復經雲貴總督張亮基調派多員前往勸捐以致晏端書抵粵東後商貨日稀來源不旺恐釐捐並舉咸思哀多以益遂致竭澤而漁民困商疲不免漸生寇患上命端書體察輿情因勢利導不可一意掎克置地方利害於不顧時京餉支絀戶部請催廣東應解鹽課等銀有旨著趕緊籌畫毋得存五日京兆之心又以浙江巡撫左宗棠奏兵增餉絀大局堪虞請催撥粵東協餉得旨著迅速籌撥源源協濟二年二月劾前署鹽運使羅勳招權納賄

請革職等問又廣州將軍穆克德訥辦事沽名布政使伊霖措置未能裕如請調取回京知府段鼎牟利分肥行同市儉請褫職查究又薦前湖北按察使裕麟江西道員李瀚章請留廣東差委均如所請行是時高州股匪陳金缸久踞信宜負險難制新寧開平土客仇殺客匪遂踞廣海寨蔓延陽江陽春電白等縣端書檄按察使吳昌壽副將衛佐邦剿辦廣海客匪偕崑壽疏請敕廣西提督江忠義移師高州會剿略言督臣劉長佑未卸篆時臣與熟商以蓮塘一股先經江忠義派兵援剿首逆張高友伏誅平樂漸就肅清應遵旨令江忠義移師東下與劉坤一會剿潯匪惟潯州距高州甚遠中隔鬱林一州北流博白等縣劉長佑原奏令江忠義俟蓮塘事竣山容縣進規高州第容縣逆首范亞音與信宜賊名分而實合范逆勢微不及陳逆二三若江忠義先取容縣范逆必傾黨以附信宜副將卓興方耀二軍皆東省勁旅兩年百計進攻僅得保守高郡若陳范合股鋌而走險高廉雷肇數府州難保必無蹂躪復容縣彈丸之地貽數郡不測之憂非計之得劉長佑前在西境不知高州情形今到此間與臣等所見相合籌商既定應飭江忠義先赴高州並於蓮塘凱撤營內選勇數千分紮梧鬱之交以堵信容後路東可

與高州夾剿西可以策應潯師至卓興方耀各營內潮勇居其七莞勇居其三言語性情與楚軍恐難聯絡臣崑壽屆時親赴高州率卓方兩軍與江忠義相機並進以免齟齬惟東省餉需匱竭高州各營積欠甚鉅益以江忠義全軍五千酌添西勇數千月餉更重與其連年防守歲耗百十萬金孰若合力並舉作一勞永逸之計江忠義但可提師東下臣端書誓矢血誠盡力設措斷不敢諉延貽誤儻陳范二逆圍逼一隅聚而殲旃彼時潯匪如未蕩平江忠義可由鬱林直趨橫水與劉坤一前後夾擊不難殄滅如潯州先已竣事擬留江忠義暫駐東省會辦廣肇兩府土客仇殺事宜抑臣端書更有請者土客之禍始於咸豐四年自肇慶恩平至廣州新寧縱橫八九縣前督撫臣以其釁屬因仇情非叛逆力主撫議不知愈撫愈玩若不懼以兵威則燎原之患不堪設想如高州以次肅清土客以剿撫平定則廣東爲各省餉源所自出於錢糧釐稅獲益非輕三月再署兩廣總督時副將卓興方耀剿高州賊毀羅山賊巢吳昌壽等剿廣海客匪五戰五勝平蛋家山古隆村旋克南塘逆壘又攻西寧踞匪復其城五月以江忠義未能援粵請敕崑壽督辦高州軍務從之是時曾國藩奏餉需奇絀請將廣東釐金全解皖浙得旨

曾國藩從無益餉之請今瀝陳各情定屬非常緊迫著晏端書等將釐金全數解赴皖浙不准再有截留尋命端書回京供職授毛鴻賓兩廣總督九月疏報高州官軍剿賊獲勝並克復廣海寨城得旨毛鴻賓未到以前仍著晏端書會同崑壽妥籌攻剿十月交卸署篆具疏乞假兩月回籍省親允之三年丁母憂五年四月服滿因病不克赴都光緒八年卒遺疏入諭曰前署兩廣總督都察院左副都御史晏端書由編修簡放外任洊擢浙江巡撫嗣由左副都御史署理兩廣總督兼署廣東巡撫素著勞勩前經賞假回籍茲聞溘逝軫惜殊深晏端書著照巡撫例賜卹任內一切處分悉予開復應得卹典該衙門察例具奏尋賜祭葬子方琦花翎鹽運使銜山東候補知府孫振恪舉人直隸候補道振怡五品銜山東定陶縣知縣振怙句容縣學訓導

劉典

劉典湖南寧鄉人咸豐六年由增生奉湖南巡撫駱秉章檄辦寧鄉團務七月縣境齋匪倡亂秉章飭典會縣查辦典以禍福曉其鄉人捕匪百數十人送官訊辦縣境安輯秉章上其功命以訓導用十年四月候補四品京堂左宗棠奉命襄辦

署兩江總督曾國藩軍務進剿粵匪新立楚軍典總司營務九月進軍江西安徽之交屢敗劇賊黃汝金李世賢截剿南贛竄賊復德興論功擢知縣加同知銜十一年三月李世賢糾衆二十餘萬圍陷樂平宗棠令典與道員王開化等分道搏戰大破之世賢敗遁遂復樂平是役轉戰月餘六獲大捷斬馘近二萬解散賊黨無算江西東路肅清國藩奏典善審地勢身先士卒擢直隸州知州賞戴花翎宗棠奉命督辦浙江軍務授浙江巡撫十一月進駐廣信令典統軍由安徽婺源入浙十二月逆酋楊輔清自遂安入徽州其黨鍾明佳藍以道竄衢州開化之張村中村馬金街高坪高環等處踰嶺犯婺源典擊卻之越嶺奮剿大破之於張村中村明佳遁回馬金街徽防官軍亦破走輔清同治元年正月宗棠踰大鱗嶺進典踰濟嶺進合師馬金街賊據險爲巢環立卡柵守禦甚固宗棠攻高坪典攻高環分兵捲旗度嶺賊方憑卡抵禦嶺後伏兵突起鼓角齊鳴賊大驚潰官軍前後夾擊陣斬藍以道明佳單騎遁宗棠奏典謀勇兼優材堪重任擢知府留浙補用加道銜時世賢踞金華逆黨徧布浙東州縣二月宗棠督軍復遂安典力戰有功世賢犯江山分股踞招賢斷衢州官軍糧道典破走之進擊江山竄賊斬獲甚衆偪

花園港賊巢疊毀卡壘世賢由小清湖過河狙伺典擊走之四月輔清窺遂安聞典軍至亦遁去上以浙江按察使簡用乏人諭宗棠保奏宗棠奏典與武昌殉節前寧紹台道羅澤南相處在師友間諳練兵事廉幹有爲五月擢補浙江按察使六月破賊蓮花洋塘裏黃外黃等處衢州東南北三路肅清世賢復窺遂安典倍道馳援與道員王文瑞合擊敗走之七月回軍攻龍游破賊於蘭溪之油埠賊退踞裘家堰等處九月與浙江布政使蔣益澧合兵大破賊於裘家堰毀其巢進奪龍游湯溪要隘二年正月諸軍復龍游湯溪金華嚴州各府縣典復蘭溪進復浦江諸暨浙東肅清得旨交部優敘宗棠奏典軍仍須由嚴赴徽爲肅清皖南計必江皖邊圉乂安後顧無虞方可一意進取命如所奏辦理二月逆酋譚星由浙竄偪徽州典抵徽屬之屯溪以賊未知官軍虛實利速攻約徽防官軍疾馳進大破之三月大戰於巖寺街潛口疊勝賊走太平黟縣上以賊窺伺江西諭典軍無分畛域隨時相機援剿尋與道員王沐合兵破賊黟縣復其城嶺內肅清宗棠奏典身先士卒屢瀕危險忠憤之氣不衰賞阿爾剛阿巴圖魯名號五月首逆黃汝金竄江西巡撫沈葆楨檄典赴援奏典智勇兼備諭葆楨飭各營悉聽典調度典分

軍扼守徽婺自率所部趨饒州六月會合江軍大破賊於崇光渡陶家渡賞布政使銜賊遁洋塘石門追擊敗之浮梁鄱陽縣境肅清七月大破賊於青山橋湖口鄱昌圍解餘賊竄皖葆植奏典星夜赴援血戰而前保障江西厥功甚偉賞玉搬指煙壺荷包典回軍顧徽浙之防八月太平踞賊犯徽州截剿疊勝九月丁父憂請開缺回籍諭曰浙江按察使劉典自咸豐十年以來隨同左宗棠剿賊戰功卓著此次丁親父憂自應准其回籍治喪以遂孝思惟該員帶兵攻剿皖匪分剿浙逆軍務正當喫緊該員尤爲得力未便遽易生手劉典著改爲署任浙江按察使俟軍務稍定再行回籍治喪事畢卽行赴浙統帶原部剿賊是月賊由寧國竄浙陷昌化典遣軍復之十二月以皖南軍務漸定請給假治喪諭曰署浙江臬司劉典丁憂懇請回籍治喪情詞極爲迫切已由左宗棠飭令起程惟見在浙西軍務攻剿正形喫緊該臬司帶兵甚爲得力著左宗棠飭令趕緊料理一俟治喪事竣卽令赴浙剿賊以副委任三年二月諭曰臬司劉典旣經左宗棠飭其在湖南募勇赴浙著飭令迅速督勇起程卽於路過江西時察探賊蹤迎頭剿擊以保完善而維大局四月命幫辦江皖軍務時逆首李世賢汪海洋分道入江連陷州縣典

至江西六月會督諸軍攻崇仁屢戰皆捷七月復之進復宜黃東鄉各軍擊賊豐勝江西肅清汪李二逆竄閩兇燄復熾宗棠督師入閩檄典率所部取道汀連進剿奏典墨經從戎義無可諉而服官從政心有未安再四呈請開缺俟閩省軍務完竣回籍終制十二月命開浙江按察使署缺仍以二品頂戴幫辦福建軍務汪逆踞長汀連城上杭三縣交界之南陽鄉新泉爲老巢衆十餘萬典進軍連城之楊家坊將士違節制輕進先勝後挫典退保連城自請議處上以官軍援救漳平冒險急攻情有可原免其置議尋與按察使王德榜合軍進擊賊遁回巢分股踞古田下車南嶺馬洋洞涂坊等處典與德榜總兵王開琳破走之四年正月與德榜大破海洋於新泉二月復龍巖州進拔南陽賊巢海洋遁南靖永定交界之奎洋梅林場校等處典進擊大捷三月毀下奎洋中奎洋賊壘疊破上奎洋梅林場校賊卡四月移軍復南靖五月收降詔安逆首丁太洋股賊萬餘與道員康國器合軍追擊汪逆於永定大破之汪逆竄廣東時李逆已破滅閩境肅清上以典督軍入閩庸功疊奏優詔嘉獎賞玉搬指小刀火鏹荷包八月官軍復鎮平典遣部將白下壩邀擊擒斬甚衆汪逆將竄江西典自南安踰嶺出南雄扼之賊見典軍

至駭走乘虛回踞嘉應典回軍入閩與宗棠畫合圍聚殄之策督諸軍併進偪圍十二月大破賊於塔子壘陣斃汪逆餘黨悉平宗棠奏言典盡瘁馳驅忠勤卓著此次髮逆撲滅實由典先數日將數十里大小路徑與各營履勘指畫瞭如指掌故臨時衝堵鈔截各盡其能雖百戰兇悖之餘無能逃其規畫臣駐漳州僅親兵八百飛檄各軍回剿典相距較遠馳援最先卒能掃除巨寇俾無遺種昨來營面晤服闋後仍素服堅請回籍守制臣以典禮攸關過猶不及典在籍居喪已逾百日自無庸補行守制惟其至性過人每言及未克終制聲與淚俱茲當大局戡定可否賞給三代一品封典俾慰孝思奏入賞雲騎尉世職並三代一品封典典請回籍省母諭曰該臬司久歷戎行素稱得力若令投閒殊屬可惜著左宗棠諄飭該員於省親後卽行銷假應派往何路軍營帶兵剿賊並著左宗棠斟酌奏聞五年正月凱撤繳歷年截曠銀六萬餘兩宗棠以聞時陝甘回亂未定捻逆由豫入關上命宗棠移督陝甘八月起典署甘肅按察使十月命幫辦陝甘軍務尋實授按察使賞假兩月回籍募勇六年正月開按察使缺賞三品卿銜仍留二品頂戴幫辦軍務六月抵陝與宗棠會商戰事先捻後回又以夾渭而軍地勢平行不利

分布議偪賊涇洛間殲之擒擾同州各屬典與提督高連升劉松山等相犄角擊之渭水南北擒不得逞竄出陝西宗棠督軍追剿奏典留陝剿回七年正月命督辦陝西軍務二月署陝西巡撫三月奏陝省糜爛秋收歉薄倡捐銀米通飭助賑又奏查明災區逋賦分別蠲緩以蘇民困並請敕催奉撥各省賑款給予捐賑紳民獎敘均從之回逆疊擾麟游靈臺隴州汧陽宜君甘泉諸縣典督飭諸軍截擊屢勝九月奏言陝省見無回蹤北山土匪除袁大魁一股撲滅外尙有扈彰董福祥高姓毛姓諸大股到處擄掠鄜州中部洛川宜川等處匪徒千百成羣兵至爲民兵退爲匪宜分別剿撫甘回以寧州之董志原爲老巢時竄陝界其崇信靈臺正寧合水另股回巢去來無定鄜州以北府縣及寧條梁係鹽固叛回分股馳騁寧夏靈州已撫叛回時多反覆潰勇會匪勾結窺伺偵知何路兵單卽行撲入欲剿甘回必先保陝疆陝境又安則兵糧可籌運道可通西行無憂後顧自左宗棠追擒東去更無進剿之師若抽動各隘防營該逆乘虛而入又須回顧腹地不能不以防爲剿幸官軍練陣有年每戰克捷本年嚴守邊隘堡寨辦成該逆無從掠食一擊卽敗所傷實多不敢輕窺邊隘尋派員收撫扈彰二萬餘衆董福祥旋亦

投誠土匪漸清十月奏被擾地方酌籌銀糧撫恤十二月奏災區逋賦仍懇蠲緩從之八年正月奏甘肅難民入陝派員賑濟救全甚衆五月諭曰陝省自董志原克復後回逆西竄境內漸就肅清左宗棠統師入隴陝省應辦各事該署撫責無旁貸所有安撫難民開墾荒地一切善後事宜均著劉典盡心籌畫典奏言扈彰董福祥等股均經理妥協不至復聚爲匪未墾之地涇陽三原高陵爲多固由人民逃亡亦因無水灌注不能種植龍洞渠湮塞前撫臣劉蓉修治未竟臣籌款開濬加築隄防即可歲事禍亂之興半由貪吏陝省民力已竭臣總期一洗從前陋習咸與維新北山地方人每視爲畏途凡委最苦之缺墊發養廉俾官吏足資辦公斯閭閻可期安輯斷不敢以朝廷赤子付諸貪官酷吏之手七月奏蒲城荒歉酌量緩徵難民日衆借動各州縣倉糧賑濟均從之十一月奏言節壽季規名目實爲吏治之害見俱嚴禁小民苦累首在差徭次卽完納地丁於正耗銀兩外又有平餘差徭能省不能全裁平餘可減礙難盡革去冬將各屬里局支差章程釐定各衙門軍營流差不准支應惟令供軍務轉運仍酌定運價計里給發里民攤派錢文專貼發價之不敷行之經年攤派較前減半民頗稱便平餘一項各屬徵

收不同若不事功之實僅循裁革之名勢必另生他弊轉恐累民尤甚見令裁減三成以紓民力暫留七成分給辦公並將通省公事攤捐各項酌量減派由臣與藩司養廉內幫捐辦理以期積弊永除十二月請開缺回籍養親允之九年正月以捐廉助賑交部議敘光緒元年命左宗棠督辦新疆軍務七月起典以三品京堂候補幫辦陝甘軍務二年正月抵甘接統防營籌辦後路事宜七月授太僕寺卿三年九月宗棠請獎後路籌兵轉餉各員賞典頭品頂戴四年二月宗棠奏回疆肅清諭曰幫辦軍務太僕寺卿劉典布置後路事宜悉臻妥協允宜一體施恩以獎勞勩劉典著遇有應陞之缺開列在前五月擢通政使司通政使是月因病陳請開缺宗棠奏言典幫辦軍務於今三載漢回乂安凡整軍節餉可以裨益地方及生聚教誨可爲民生久遠計者無不殫誠竭慮黽勉圖之臣一志經營關外新疆內顧無虞實賴典之同心贊助屢次函稱久病之餘精力頓減母年八十有七時深憂懼臣雖再三慰留然覩其情狀不敢壅於上聞得旨准其開缺回籍未行卒於甘肅軍次五年正月宗棠以聞奏言典伏處滄山不求聞達讀書講學立志不苟與臣爲布衣交迨襄辦軍務典與道員王開化前浙江撫臣楊昌濬同

參戎幕每戰臣與僚佐皆帕首韉刀分路殺賊典善審地勢未戰之先跨馬掠賊壘詳覽一週然後潛師夜起乘之每得奇捷轉戰各省秋毫無犯士民感其保全之德致饋鹽米蔬菜絡繹不絕及移師陝甘決策施行事無巨細與臣意見均相印合軍民利洽官吏敬畏凡有興革衆論翕然每力疾見賓客治文書無一刻停滯秉性清嚴自奉儉約人以爲難堪者處之怡然楊昌濬曾赴其家環堵蕭然一如寒素之舊出處進退之際志存忠孝道合經權一時賢豪不逮也諭曰前幫辦陝甘軍務通政使司通政使劉典於咸豐同治年間轉戰浙江安徽江西福建廣東等省所向有功嗣奉旨督辦陝西軍務署理陝西巡撫剿撫兼施肅清回匪此次幫辦陝甘軍務於關內防營兵事餉事一切殫心區畫贊助成功前准其回籍養親治病甫經交卸遂聞溘逝悼惜殊深劉典著照侍郎例賜卹並加恩予諡任內一切處分悉予開復應得卹典該衙門察例具奏其生平戰績一併宣付史館立傳靈柩回籍沿途地方官妥爲照料伊子同知劉本鑑著以知府用主事劉本鐸著以員外郎用尋賜祭葬予諡果敏四月兩江總督沈葆楨奏典轉戰各省保障功高請准建立專祠命安徽江西福建各督撫於各該省建典專祠以彰功績

九月閩浙總督何璟奏請於福建省城及典立功所在之汀州府城各建專祠報聞十月湖南巡撫邵亨豫奏據寧鄉紳士呈稱咸豐六年齋匪之亂遠近驚惶典捕匪多名地方以安九月粵逆石達開攻寶慶寧鄉當西路之衝典毅然以殺賊自任練勇數千分扼要隘大兵進剿恃其聲援賊不敢犯同治十年龍陽益陽匪徒滋事典在家聞警密爲布置挑選練卒令其弟知府劉倬雲出境剿賊居民藉以安堵保衛之功有未見奏報者至於建書院修試館設賓興公車學租卷費建立節孝忠義祠宇廣置育嬰安良產業凡百義舉或首倡或獨任悉底於成又仿義莊法捐廉俸置腴田百數十畝以贍族人而自奉如寒素尤爲人所難及懇在原籍建祠崇報臣維典學術湛深制行篤實在在以輔翼名教濟時利物爲懷該邑紳士公懇建祠意出至誠懇恩俯准詔如所請六年五月宗棠奏據甘肅紳士稟稱典權陝撫時甘民逃難絡繹於陝委劉倬雲等設局發賑或擇地安插貸以牛籽或編列成營給以薪糧數萬哀鴻免填溝壑其德澤淪浹隴人之心嗣幫辦陝甘軍務治軍之暇首培學校士之向學者多方獎勵俾其有成兵車供自民間故多擾累典裁撤書吏宿弊一清上年山陝災旱飢民入隴甘肅東路收成亦歉

典豫爲籌維捐廉爲倡省東州縣遵其條約居者無離散之虞來者有安全之樂他如依水造車傍山修道廣招輯賑孤寒墾荒蕪除殘暴開紡織之館嚴罌粟之禁開渠修井以備旱澇築城建堡以資保衛皆就各處防軍分任其勞難民還定坐享其成卒後甘人無論老少男女欷歔泣下請於甘省建立專祠用永思慕懇恩俯准以存遺愛而愜輿情從之嗣浙江巡撫譚鍾麟陝西巡撫馮譽驥各請於該省建立專祠均奉旨允行

黎培敬

黎培敬湖南湘潭人咸豐十年進士改翰林院庶吉士同治元年散館授編修三年提督貴州學政貴州白苗教倡亂大定府黔西州相繼陷遵義路久斷四年三月始開關抵任時雲貴總督勞崇光駐黔與貴州巡撫張亮基論兵事各持意見培敬密疏督撫不和恐誤大局時言黔事者皆依違疏入始得實情六月案試貴陽府革除棚規供應捐廉自辦八月試安順府未歲事賊虜至與安順知府嬰城固守援至賊解圍去遂調考普安廳武生童荷戈助登陴聲威甚壯賊不敢偪時都勻知府改駐獨山州並移試院校士甫戒裝獨山報賊警請緩行培敬不顧至

賊已退屯州城三面三十里而近試畢捐廉爲倡令各學教職視力所能及集資爲木城以資捍衛次試黎平府間道由廣西湖南乃得達廉知苗民學籍不樂漢民侵占出示以安苗召試爲言苗民翕應方試銅仁鎮遠荆竹園賊驟至府縣力請緩期並議就城外禹王廟作試院培敬駐城外如期屆試時道員岑毓英方爲滇軍統領道過黔西培敬與語稔其知兵疏請以毓英專辦滇中軍務六年八月滿任得旨仍留貴州學政旋以太常寺卿石贊清條奏黔省剿撫事宜稱培敬深得民心懇請量加擢用上命會同該省巡撫辦理剿撫屯田事宜准專摺奏事尋賞四品頂戴署貴州布政使是時寇患方棘賊渠潘名桀堅守龍里久不下培敬籌捐米石索庫儲得二千金以兵三路進攻七年六月克之旋復貴定名桀遁去黔省出軍克捷自此始詔嘉其悉合機宜授貴州布政使先是學政任內密陳降寇林自清屢戕官吏請旨交張亮基查辦未果行至是請於巡撫曾璧光設法誅之函首省城八年五月上其功賞戴花翎旋獲匪首陳喬生定番軍務平十年復都勻府城賞加一級紀錄三次十一年大軍平牛角坡苗巢七月曾璧光疏言培敬忠以運謀和以濟難自克龍里貴定後南平陳喬生西除林自清東定都勻北

靖開修以通中路關鍵大轉氣象日新培敬勞心焦思卒以艱難著效且講求吏治教養兼至剿撫咸宜十年以來軍事雖交提臣而左右維持每恐糧餉告缺前敵滋譁賴培敬竭力籌思始得挹彼注茲藉資騰飽其始終勞績在身立行間之右十二年官軍會克新城老巢黔省上游一律肅清上以培敬在事出力賞頭品頂戴並三代一品封典光緒元年九月擢貴州巡撫是年川滇逸匪竄擾黔邊粵賊竄陷永從下江六洞苗騷動遣將討平之尋奏設軍民待質公所請推廣各直省一體照行得旨允准復奏請設立貴定至黃平州沿途碉屯石堡撥兵駐守衛驛道四年二月奏請停止各營兵米採買輓運先是藩司任內以各綠營兵額虛懸空支兵米而地方丁糧徵收匪易仍仿照閩陝裁兵節餉章程詳請通飭各營認真簡練汰弱留強擇荒絕之地撥爲兵屯以資開墾通行有年兵食稍足至是遂請停止採運兵米從之六月定番苗民吳琴高等謀亂旋卽撲滅嗣因奏請開復已故革職雲南總督賀長齡處分並請予諡建祠奉詔切責下部議降三級調用五年閏三月授四川按察使入覲六年正月抵任清理積案九百餘起立投到所更定結案章程裁鋪司雜款一萬餘兩六月超擢漕運總督十一月勘禮字河

堵壩水勢震蕩親駐隄監工十二月合龍又籌修堰澗汛十七十八堡石工奏請
丁順間砌以節帑項疏入報聞七年二月擒斬積年海寇朱振剛三月偕兩江總
督劉坤一等會奏導准要工先擬興挑揚莊舊黃河爲導准始基並籌常年經費
得旨允行五月授江蘇巡撫是月堰澗汛石工成七月葦蕩營颶風災海潮湧沒
田廬無算奏請以工代賑從之八月將赴巡撫任忽禮壩替河口門決冒雨往勘
飭河弁設法堵閉露處隄上三晝夜以是得風疾賞假未愈開缺回籍調理八年
卒湖南巡撫卞寶第爲遞遺疏臚陳政績以聞諭曰原任江蘇巡撫黎培敬前在
貴州藩司巡撫任內籌兵籌餉克復城池平定苗匪著有勞勩歷任四川臬司漕
運總督亦均克稱厥職前因患病開缺調理茲聞溘逝軫惜殊深著加恩照巡撫
例賜恤任內一切處分悉予開復應得卹典該衙門察例具奏並將該故員生平
事實宣付史館以彰政績尋賜祭葬又從貴州巡撫林肇元大學士兩江總督左
宗棠之請予諡文肅敕於貴州省城江蘇清江浦建立專祠子錦纓以廕生官光
祿寺署正承禮舉人

丁日昌

丁日昌廣東豐順人由廩貢生捐教職咸豐五年敘隨剿潮州土匪功陞用知縣六年選瓊州府訓導九年選江西萬安縣知縣十一年粵匪陷吉安府城日昌方署廬陵縣事卽隨知府曾詠督團進剿克之因未能先事豫防坐失守地方律擬職同治元年兩江總督曾國藩疏報日昌隨征有勞開復原官二年江蘇巡撫李鴻章奏設上海機器局仿製外洋開花礮彈自來火以日昌留心西法調滬督造尋隨官軍克無錫金匱陞直隸州知州並賞戴花翎三年四月隨官軍復常州府殲擒僞護王陳坤書等陞用知府十一月大學士曾國藩續保克復江寧員弁日昌與焉得旨以道員留江蘇遇缺卽補四年正月授江蘇蘇松太道五月李鴻章奏援閩官軍會克漳州府城日昌籌濟餉項軍火不遺餘力請賞加三品頂戴並三代封典允之八月陞兩淮鹽運使五年揚州清水潭池下隄工漫口李鴻章偕漕運總督吳棠勘估堵築請調廉幹大員綜理上命日昌就近督工嗣以隄工合龍賞加布政使銜六年正月擢江蘇布政使十二月授江蘇巡撫七年奏設局編刻牧令各書又酌定江蘇錢漕科則泊前被賊擾最重之丹陽金壇溧陽三縣原墾熟田銀米折錢徵收豁免被擾之山陽阜寧清河桃源安東五縣同治六年以

前民欠錢糧及泰州海州場竈舊欠並勒限各屬清理積案而獎其勤明奮勉者皆得旨施行八年奉敕訓勉臣工力戒因循日昌因條奏時事略曰一賢才宜亟舉也國家之有賢才猶魚之有水木之有根火之有膏故一縣得人則一縣治一郡得人則一郡治一省得人則一省治今身係地方之責除趨踰應對以外讞獄付之幕友催科付之吏胥皆由其平日所學不能推之於用故臨事所用不能本之於學夫今日之盜賊皆昔日之百姓也百姓何以爲盜賊以偪於飢寒百姓何以致飢寒以有司不能撫字然則此時有司之循良貪酷卽關繫異日之治亂安危臣觀三代兩漢之初治理最盛循吏最多由登進廣而任用專也請敕下中外大臣各舉所知並開賢良方正科以行舉不以言舉稱職舉主共其榮不稱職舉主同其罰但責大吏以地方治與不治不苛求用人與資格合與不合各省之大吏得人則州縣得人州縣皆治而天下治矣一冗員宜變通也軍興以來捐例徧開而又減價以招之軍功本易而又積年以增之其不能不冗者勢也捐輸減至數成可謂體恤極矣而又有鐵錢票本米捐籌補捐歸補捐諸名目名爲一成二成覈其實銀到部不過數釐且卽此數釐之中有書吏之費有局員之費除捐銅

一局外其餘外省捐輸足恃以濟餉者恐寥寥矣況捐例既寬人懷僥倖往往釀貲以官爲市千數百金捐一官職到省一有差使月支數十金便可收數分之息如或署事補缺少者數千多者數萬但圖一身之有益不顧大局之有損然則捐員以所入較所出其本可謂極微其利可謂極厚國家以所得較所失其失可謂極重其得可謂極輕且各省請開捐例之時以爲捐員所得不過部文一紙耳不知其持文到省得缺之後侵吞正款欺壓小民聽訟可使曲爲直緝捕可誣良爲盜設收捐之時卽豫計其造孽之時雖捐數盈千累萬亦何肯作飲鴆止渴之計哉凡人情於得之不甚艱難者視之必不甚愛惜今以自視不甚愛惜之官而令治甚可愛惜之百姓吏治之不能蒸蒸日上也亦固其所至於軍功保舉賢否亦屬不一在帥臣當軍書旁午不能不寬其格以資指臂在疆臣當瘡痍滿目不能不苛其格以覓循良見在捐班軍功二途紛至沓來處處有人滿之患尤不可不豫籌變通以防冗滯卽如江蘇一省外補道缺不過二三府州縣同知通判缺由外補者亦止數十而候補道約六七十人州縣同知通判約一千餘人夫以千餘人補數十員之缺固已遙遙無期卽循資按格而求署事亦非十數年不能得一

年其捷足先登者非善於鑽營卽有所繫援者也此輩性成浮薄安望其能牧養小民至於數十年而得署事一年前此十數年中衣服飲食養家應酬之費皆須於一年中取償後此十數年中衣服飲食養家應酬之費又須於一年中豫蓄置犬羊於飢虎之前而欲其不搏噬雖禁以強弓毒矢勢固有所不能無恆產因無恆心非獨人盡無良抑亦窮困有以致之也計惟將已然之官設法裁汰疏通未然而官暫且停捐截選擬請敕部通計京銅局每年所收實銀上庫若干酌提外省洋關釐捐撥補外省捐例尤宜暫停庶根本既清而枝葉漸可茂矣一廉俸宜加增也我朝定例正俸之外有恩俸常祿之外更給養廉固以體恤臣僚實以豫絕貪黷惟二百年來風俗由質而趨文日用有增而無減京外官已有入不敷出之勢加以丁耗畫爲軍餉漕白紉於轉輸扣俸折廉所得彌寡故京官不足以養其廉則不能不典質挪移以免飢寒之偏外官不足以養其廉則上司不能不取之下屬下屬不能不取之百姓上下相漁以爲利藪是非由之不明舉措由之不公侵吞所至倉庫之盈者可虛掙克所及百姓之富者可貧極其終足致禍亂之相尋原其始則由支用之不給夫古者重祿勸士庶人在官祿足代耕蓋必使其

心無內顧之憂然後其身能爲國家之用且京外官同係勦力從公何以京官廉俸不及外官十分之一厚薄懸殊必馴致外重內輕之漸臣以爲欲正人心澄吏治當自各官之加廉俸始京官有職掌之員似應分別等差或如外官之半使一身一家終歲足以自給外官督撫廉俸較重足額之後自可毋庸再加司道以下或酌量加增公費而將所有陋規全以充公如此而猶有執法營私則嚴刑峻法以隨其後庶法令可行而政體可肅清矣一書吏宜整頓也唐臣劉晏理財不用胥吏而用士類前湖北撫臣胡林翼辦理釐金亦不用吏而用士誠以士之心名重於利吏之心利重於名夫至利重於名則非舞弊無以遂其營私之願矣近來權歸書吏而致積重難返者其故有三官之任事多者四五年少者不過二三年而書吏則長子孫於其中官於律例不過淺嘗輒止治兵者未必知兵治禮者未嘗習禮而書吏則專門名家各有所司夫以視同傳舍之官而馭世長子孫之吏是欲去弊而不能專門名家之術非淺嘗輒止者所能窺其底蘊是雖有弊而不知此其故由於任不久而術不精也官僅一人朝綜兵刑之任暮有錢穀之司案僅一事而有律中之例有律外之條同一案也有賄賂則可援已准之案以償其

欲無賄賂則可援已駁之案以神其說此其故由於任太繁而法太密也漢廷公卿由吏掾出身者不可勝數今假之以事權而又限之於流品彼既不能自奮於功名則必將財利之是求而且人多財薄以有限制之辛工養無限制之書吏若奉公守法其勢將不足以自存此其故由於出身不優而廩祿不厚也臣以爲宜專設律例一科三考得雋然後准充書吏優給薪水仍復每年一考士類皆得入選數不在多而在精限滿者優予陞轉之階與正途無異其有才識閎遠者准本官加結特保人既不以書吏薄之彼亦庶知自愛官復久任而專其責任久則底蘊可盡知責專則嫌疑不必避並請敕下王大臣選舉精通律例之員以律爲經以例爲緯定爲畫一不變之條刪繁擇要勒成一書頒行天下凡百有爲不出此書範圍書吏之權將不收而自輕矣一漕運宜妥籌也國家歲漕東南粟以實京師轉輸之道有二道光以前專行河運道光以後河海兼運邇經兵燹河道阻淺江浙之漕全歸海運河運不能遽復而上海從前有沙船三四千號今則減至四五百號卽蘇浙漕糧尙且不敷周轉何能接濟他省此又海運之窮也夫物無窮而不變事因時而制宜請擴充海運沙船之外以津衛夾板火輪等船輔其不及

以濟全局海運當可無虞缺乏惟有漕各省臨江處所與天津收漕之處似宜建設漕倉隨到隨收隨運免致停泊稽留如是則各省全漕均可漸次起運卽偶爾偏災東南之粟亦可源源轉運京師以固根本此固百世之利也至各處所建漕倉必須寬籌經費優給薪水工倉庶免刁難剋扣以正供資中飽矣一武科宜變通也武科試士皆用弓箭營伍補缺亦如之及至見諸實事則又舍弓箭而用槍礮此亦所習非所用之一端頃歲以來軍旅之事全賴募勇於是武科直成具文臣以爲武科之設旣重其名卽當循其實應否將武科分爲三途一取深明韜略熟習險要沙綫之士一取諳通機器製造精能之士一取槍礮命中勇敢善戰之士如此量爲變通當可稍收實效至於綠營兵制必認真整頓而後卒旅可爲干城關稅釐金必澈底澄清而後涓滴皆歸公府錢糧力禁浮收而後草野之元氣可復詞訟力除積壓而後閭閻之疾苦易通是又在乎大小臣工恪遵聖諭力戒因循庶不至徒託空言而治理可以蒸蒸日上矣四月入覲尋回任飭所屬禁火葬並查明未葬尸棺分別有無親屬勒限一體收埋又濬常熟昭文二縣境之白茆河又改築蘇常石牖以興水利均於八月奏聞九月出省查勘水災有族人都

司丁炳同日昌家丁冶遊與水勇邊有得忿爭遊擊薛蔭榜巡夜棍斃有得日昌奏請褫治薛蔭榜丁炳因自請議處上以日昌雖事前公出究屬疏於防範下部議處案交總督馬新貽提訊九年七月日昌奏言臣公出時囑臣子丁惠衡約束親丁乃敢任聽閒遊滋事迨臣訪聞有丁惠衡跟丁范貴在內疑伊亦在場當時忿怒所偏欲以家法處死丁惠衡畏死潛逃至今半年之久猶復懼責不歸致臣九旬老母寢饋難安請旨將鹽運使銜知府丁惠衡卽行革職丁日昌所請交部嚴加議處以爲辜恩溺職者戒得旨丁惠衡卽行革職丁日昌所請交部嚴加議處著加恩寬免是月偕馬新貽奏重修江南通志十月丁母憂十二年七月服闋自陳回籍營葬兼受山嵐溼疹乞緩入都允之十三年以巡撫江蘇時協濟貴州餉需下部優敘光緒元年三月陛見五月因病請假回籍調理上命幫同北洋大臣李鴻章商辦事務並賞假兩月假滿復申前請仍賞假兩月賜人潑十一月授福建巡撫幫辦船政三年兼臺灣學政三月請自光緒三年爲始永蠲臺灣府屬雜餉詔如所請七月以病劇乞假回籍調理得旨賞假三月回籍就醫尋以病難速痊屢乞罷任四年四月得旨准其開缺五年特賞總督銜命駐南洋會辦海防事宜水

師弁兵統歸節制旋充兼理各國事務大臣又以上年勸募鉅款解賑山西河南荒旱下部優敘八年卒遺疏入諭曰總督銜前福建巡撫丁日昌由知縣洊擢封圻在江蘇巡撫任內整頓地方尙有政績旋任福建巡撫因病准其開缺回籍調理茲聞溘逝軫惜殊深加恩著照巡撫例賜卹任內一切處分悉予開復應得卹典該衙門察例具奏尋賜祭葬

郭柏蔭

郭柏蔭福建侯官人道光十二年進士改翰林院庶吉士十三年散館授編修十六年記名以御史用十七年補浙江道監察御史十八年轉掌山西道十九年巡視西城轉京畿道二十年京察一等記名以道府用六月轉掌京畿道遷刑科給事中稽查戶部銀庫尋授甘肅甘涼道柏蔭任御史時海事漸起條奏臺灣情形請勤撫字嚴番界覈倉庫察偷渡防兵丁頂冒戒人命盜案消彌又奏懲泉漳二府械鬪禁洋煙入閩省海口並內地栽種罌粟均得旨飭議施行二十三年七月銀庫虧短事發柏蔭查庫時未及覺察有旨革職十二月庫款賠補完竣以主事用咸豐三年在籍會辦本省團練克廈門賞四品頂戴以員外郎選用七年以延

平防剿功陞郎中九年團練事竣賞加三品銜並戴花翎同治元年引見奉旨交
欽差大臣曾國藩軍營差委二年三月授江蘇蘇松常鎮太糧儲道十二月擢江
蘇按察使以蘇州克復辦理善後尤爲出力賞二品頂戴五年四月陞江蘇布政
使並護理江蘇巡撫時中外臣工有請減江浙浮糧之奏奉旨允准柏蔭議請覈
減蘇松太三屬漕額三分之一常鎮二屬十分之一又以太倉州及鎮洋縣境之
劉河歲久失修疏請借款挑濬於均沾水利州縣按畝攤徵歸款又請蠲緩被兵
各屬民欠漕糧均如所議行六年二月擢廣西巡撫未赴任調撫湖北仍留署江
蘇巡撫先是江浙界間有小船攜帶火器在太湖一帶打捕水鳥名曰槍船後漸
相聚爲匪有卜小二父子聚黨橫行剿捕未獲柏蔭會同浙江巡撫馬新貽飭員
擒獲之及悍黨四十餘人寘之法永禁槍船名目令另改船隻驗烙編號設立牌
甲約束稽察民以安謐六年十二月奉敕赴湖北巡撫任尋署湖廣總督時值各
省遣散營勇會匪蕭朝翥潛約其黨分布黃梅武穴龍坪各水次阻截散勇倡令
從逆柏蔭飭將弁迎擊擒獲多名朝翥圖竄河南追及之草鞋店其黨殺之以降
上嘉其辦理妥速又剿平京山教匪吳世英蘄水教匪馮和義沔陽教匪劉維義

等七年疏言湖北武漢等處向爲水陸通衢人情浮動而漢口一鎮舟車輻輳華洋雜處散勇游匪往往廁匿其間既無生理可安復無恆業可守飢寒所逼必至流爲盜竊且每遇鄂省撤營之際卽布散謠言勾結入會拜盟乘機挾制疊經查拏懲辦此風少息然欲圖久安長治必先求正本清源是以臣等會商在於武漢襄樊地方設遣勇總局專派委員經理一而出示曉諭並通飭各屬州縣稽察保甲凡有在鄂散勇均令赴局報名由局雇船委員押送回籍酌量道里給予川資庶幾無業之徒均可早歸鄉里而五方雜處之地不致容納流亡又言淮南鹽引向以楚岸爲大宗自粵逆踞擾長江梗阻運道當事者議以淮北票私暫濟民食江皖克復以後北私駕輕就熟浸灌漸多而淮南商販銷售甚滯亟應截止淮北私販雖北私堵後鄂省每月少數千緡課錢然與其抽收零星任鄰私之充斥何如規復引地冀官引之疏通請自本年六月爲始嚴禁淮北票私卽將前設抽課之處一概裁除又襄鄖德三府前此兼銷潞鹽亦一律禁止原設抽課各卡一體裁撤八年卸署總督回巡撫任時夏秋多雨湖湘之水下注武漢各屬隄垸潰決田廬盡淹柏蔭遴員分帶錢米往沔陽嘉魚黃梅孝感四州縣分別賑恤武昌監

利廣濟三縣酌量安撫嗣以節屆秋分水仍未退因疏言鄂省武昌漢陽黃州安陸荊州等府屬州縣非濱臨江漢卽附近湖河或修長隄以爲保障或築子堦以固田廬無如地勢低窪頻苦水潦本年雨暘失時又值湖南大水建瓴而下川水襄水同時併漲以致隄垸多潰田禾沈沒廬舍被淹小民蕩析離居殊堪憫惻業撥款備穀委員分散各邑暫作急撫一面在武漢城外搭蓋草棚分設粥廠陸續撥用官捐銀兩又動碾倉穀六千石安置外來災民棲止就食並分飭被水各州縣設法平糶立粥廠以濟飢黎滿擬水退迅速補種雜糧菜蔬稍資餬口詎節逾秋分水仍未退補種失時小民欲歸無所待哺情殷臣查業已成災約十州縣若俟水落勘齊再行覈辦勢必緩不濟急且轉瞬秋盡冬來飢寒交偪難保不羣聚爲匪是賑撫不能不急爲請帑也至有隄州縣歷年冬修按畝集費已極艱難矧值大水成災謀生無術若不豫爲一併籌畫各隄斷難修復來年水仍汎濫與國賦民生皆有所損是隄工又不能不急爲籌辦也兩事分辦約需銀五六十萬兩當茲庫藏支絀再四籌思擬將有隄未成災者僅准借款修隄已成災者以工代賑其老弱婦女及無隄州縣概行酌發賑濟似此撙節辦理亦非三十萬兩不敷

仰懇天恩俯念災黎待救急切准將應解京餉之司庫地丁暨江漢關六成洋稅各撥銀十萬兩並在本省貨釐鹽釐項下各撥銀五萬兩則工賑兩有所濟疏入上悉從之九年閏十月復署湖廣總督十年湖南會匪糾黨連陷益陽龍陽二縣柏蔭飛飭岳州鎮派船赴澧州防守又飭宜昌鎮及荆宜水師分段稽察並咨湖北提督郭松林駐軍荊州相機進剿得旨布置尙爲周妥惟楚鄂會匪實繁有徒恐到處勾通暗中響應必須乘其初起就地殲除方免蔓延爲患常德近接鄂疆當嚴飭派出各營實力堵遏毋令匪蹤侵軼荊州地方險要並著會商郭松林嚴密布置常德兵力甚單如該處情形喫緊該提督自應出境進兵協力助剿但須兼顧荊州防務不可稍有疏虞是在該督等酌度事機妥籌進止旣而該匪回竄桃花江一帶官軍分路進剿悉斬首要各逆地方肅清旋卸署總督任十二年十一月湖北各屬被水復奏請蠲緩新舊錢糧有差得旨允行十二月以病奏請開缺允之光緒十年正月卒遺疏入諭曰前湖北巡撫郭柏蔭由翰林院編修洊擢封圻歷任江蘇廣西湖廣等省整頓地方著有政績嗣因病准其開缺回籍調理茲聞溘逝軫惜殊深加恩著照巡撫例賜卹任內一切處分悉予開復應得卹典

該衙門察例具奏尋賜祭葬

林肇元

林肇元廣西賀縣人咸豐十一年以廩生從軍湖北時髮逆馬清太踞隨州道員劉嶽昭屢攻不拔十月用降人劉維楨計給賊出城乘勢克之嶽昭追剿與伏兵夾擊連敗賊於西河塔兒灣萬家店擒馬清太斬馘萬餘肇元在事出力湖廣總督官文敘功以州判選用並賞戴藍翎時來鳳城亦爲賊踞賊首石達開竄踞城西之忠堡連營犄角同治元年正月城賊分股趨牛欄卡龍橋圖撲施南郡城官文復派劉嶽昭等剿之肇元與焉敗賊於蕉塘龍橋等處遂會別軍復其城復擊忠堡賊走之敘功免選本班以知縣留湖北補用並賞加同知銜時石逆竄四川官軍沿途追剿解綦江涪州城圍復長寧縣城四川總督駱秉章彙案請獎肇元得免補本班以同知直隸州知州仍留湖北補用並賞換花翎三年六月以克復高縣城並攻克雙龍場賊巢得旨免補本班以知府選用先是陝西寧羌告急肇元率軍馳援復剿平石逆餘黨克復城固洋縣等城經巡撫劉蓉疏保四年五月賞加道銜又以截剿髮逆並擊滇黔邊匪疊次獲勝克仁懷縣城五年正月詔免

補本班以道員選用是年春肇元偕援黔官軍攻克天臺山賊巢進規綏陽克之成都將軍崇實暨駱秉章疏陳肇元功請以按察使陞用上以與吏部奏定章程不符命另覈請獎尋復疏稱肇元隨軍轉戰數省勞績最著前次攻克綏陽肇元躬冒矢石督陣衝鋒尤爲異常出力請以道員歸部遇缺前先用並賞加按察使銜從之六年三月授貴州糧儲道初貴州逆匪黃洪順等勾結苗教各匪由安順猝擾黔西堅踞龍安屯爲老巢肇元擊破之生擒黃逆等乘勝克蔡板壘殲賊無遺黔西平捷入賞加布政使銜七年貴州巡撫曾璧光以肇元總理軍需出力疏請獎勵命交軍機處記名遇有按察使缺出題奏是時肇元已署貴州按察使念滇禍無已黔川亦受其敝疏請敕四川提督周達武一軍取道會理州渡金沙江出永北以攻迤西之背敕廣西別籌一軍從百色入廣南規楚雄以扼迤西之吭使杜文秀首尾不顧滇圍可解迤西可復川黔可無唇齒之災疏入諭成都將軍崇實四川總督吳棠廣西巡撫蘇鳳文議行八年己革總兵林自清擁衆滋擾四川攜黨回貴州焚殺擾害私設釐局至興義縣知縣陳世鎮不令入城卽戕世鎮及其子先洋曾璧光檄肇元與提督陳希祥布政使黎培敬擒斬之下部優敘

九年實授按察使十年曾璧光疏稱肇元徵兵議餉籌剿設防從無貽誤收復都
勻府城贊畫尤多復下部優敘十一年逆回金萬照等踞新城雲貴總督劉嶽昭
飭各軍會剿擒金萬照等復其城黔省上游肅清賞頭品頂戴光緒元年擢布政
使二年六月入覲十月回任五年正月護理貴州巡撫六月回布政使任七年四
月復護巡撫八月陞授巡撫八年以貴州欠撥紳團丁勇餉項計銀數四百三十
餘萬兩疏請加廣文武鄉試永遠中額八名得旨下部議行先是道員夏聲律同
知蕭兆芬知州周尙文副將謝世貴武舉羅應堂均以私罪被議革職至是肇元
以夏聲律等捐資帶練殄擒首要各逆疏請開復處分經給事中孔憲毅論劾上
命將夏聲律等保案撤銷並將肇元交部議處九年肇元上疏曰古之言兵者有
合拳之喻謂舒卷因心也亦有使臂之喻謂指揮如意也否則失機勢爲兵家所
忌黔省章程一營也分守兵爲綠營馬戰爲練軍數各半也練營仍隸本營名色
設官管之亦綠練合一不亂營制之意然營之大小不同卽兵之多寡互異故練
軍有祇百餘人一營者拘於本營名色各分界限以之守隘則嫌其單薄調操則
覺其零星黨因事徵調又須酌分留守則幾不成隊伍況小營亦係一官雜於大

營勢每不能相下加以營哨薪水糜費亦多夫軍以練名當得練之實非變通而整齊之則勢散而機不靈臣愚以爲練軍不必仍隸本營名色擬就撫提四鎮各標營各隸各標分爲六軍名曰貴州某標制兵練軍將本標營之大小多寡不一者悉平而一之另立五百人或四百人爲一營分左右中前後等名每營設一管帶每軍立一統帶轄之以撫提兩軍駐省會爲中權策應四鎮四軍分駐上下游爲四方遊擊任各路巡防之事擇扼要之地結成大營無事則時其訓練嚴明紀律使兵將相習有事則相機徵發彼此響應亦氣勢聯絡去畸零扞格之患以變通爲整齊與綠營之制仍不甚悖而適以相成似足收合拳使臂之效營旣整齊設官亦少卽薪水亦可稍爲撙節矣又言鎮遠等處苗民向化改裝者已三千餘戶但改裝以革其面尤須設學以革其心將所刊訓苗義學章程功課暨纂輯族譜婚喪禮簡明儀節並多購小學應讀各書派員攜往苗疆各屬會同地方官實力董勸使之讀書明理又念黔省自兵燹後地方荒蕪可令練軍開墾以足民食疏言黔省前辦善後將逆絕各產一律查清招墾迄今十有餘年生聚尙未蕃庶土地不免荒棄固緣僻在邊徼資用維艱亦因地實苦寒招徠不易查大學士直

隸總督李鴻章前辦津沽防務令該弁兵等操練餘閒在沿河一帶開墾田畝播種稻禾成熟至數萬頃大學士前陝甘總督左宗棠於廓清關隴後自涇州至玉門沿途長戍之兵悉令就近耕耨兵食以足臣思黔省磽瘠利之所在田土之外尤在山林不得不於開墾之中兼籌樹藝見與善後局司道籌商擬請寓行屯法於練凡練軍駐紮之處操防巡緝是其專責暇則責成管帶官弁督令將附近荒地設法開墾其有不能開墾成田之地卽令分別土宜樹以桐漆桑棉麻葛菸茶等類酌定年限課其效驗藉以稽察統率之勤否所有一切章程俱參酌津沽關隴成法審時度地權宜試辦至墾荒規則陝西前辦營田刊有條目斟酌仿行是年御史熊景釗署左副都御史張佩綸先後劾肇元貪黷營私上命岑毓英按其事毓英疏言肇元賦性優柔遇事遷就與署藩司糧儲道松長當餉需奇絀之時支發款項不能破除情面量入爲出以致庫儲空虛得旨交部嚴加議處尋照部議革職以張凱嵩代之未到任肇元猶理巡撫事十年正月擒土匪黃五王科童念香等斬之搜獲故明石阡府印一顆咨送禮部肇元旋卸任十二年卒是年貴州紳民以肇元克復多城肅清全省追念功德呈請奏懇開復革職處分岑毓英

入告允之宣統元年貴州巡撫龐鴻書奏肇元功德在民懇予建立專祠並將事蹟宣付史館立傳以彰忠藎得旨准其附祀曾璧光之祠二年奉上諭都察院奏據貴州京官翰林院學士許澤新等呈稱已故貴州巡撫林肇元功德在民請另建專祠等語林肇元著准其在貴州省城捐建專祠子世燾翰林院編修

潘鼎新

潘鼎新安徽廬江人道光二十九年舉人以臚錄議敘知縣咸豐七年投效安徽軍營八年以克復霍山功擢同知十一年官軍圍攻懷寧桐城賊將下廬江踞賊往援時鼎新之父璞督鄉團襲賊兵敗被執不屈死鼎新慟且憤力請分兵攻三河鎮克之負其父骸骨歸哭而誓曰不盡殺逆黨非人子也時欽差大臣曾國藩督師安慶聞而壯之檄將淮軍募立鼎字營同治元年率軍從署江蘇巡撫李鴻章援上海兩月間連拔柘林奉賢川沙南匯各城降賊數十萬敘功以知府留江蘇補用七月克金山破賊虹橋浦東肅清擢道員並賞戴花翎二年二月攻福山鎮鼎新以開花礮炸倒港壘乘勢渡浮橋賊鉛丸掠頂過髮燎幾半屹立不少卻遂克之尋授江蘇常鎮通海道以父喪改爲署任八月敗賊楓涇鎮移軍浙江嘉

善之西塘平賊壘十數得旨加按察使銜進克平湖乍浦海鹽三城獲賊銀三十餘萬悉歸公海鹽賊酋左元興自瓊城來犯擊敗之遂復瓊城移攻沈蕩新豐各鎮皆捷三年二月會各軍攻嘉興鼎新破城東南鹽倉橋賊壘三大軍克嘉興下部優敘六月進軍吳淞南潯鼎新大小戰多捷然所部兵單上命添助勁旅協攻湖州時烏程劇賊悉聚晟舍鎮鎮爲府城屏蔽賊死守鼎新攻兩晝夜槍子洞脅藥彈燕衣身不卻卒剗昇山九壘奪三里橋遂克湖州捷聞加布政使銜並賞敢勇巴圖魯名號八月賞穿黃馬褂四年正月服闋仍補授常鎮通海道時擒匪北竄畿輔震驚鼎新整所部十一營航海抵天津旋奉命移駐濟寧固直東門戶八月授山東按察使時擒首賴汝洸糾髮賊竄荷澤東明兩縣境鼎新遇賊豐縣陳家莊擊敗之又敗賊豐沛魚臺定陶等處五年敗賊鉅野解鄆城圍逐北至蕭家亭賊自是不敢北犯嗣以擒成流寇督師大臣議創長圍制賊之法繕築運沿岸垣墻開黑風口淤河四百餘丈引泗水灌之賊道蹙官軍攻之豫境西華太康俱大捷追至油坊崗擒首任柱率悍黨來犯鼎新揮軍夾攻殲其驍酋任柱遁高陽集乘機築賈魯河隄牆及汴城黃河牆二千餘丈又追賊鄆城荷澤曹縣東明等

處賊窘甚遁出山東境鼎新追擊於杞縣柿園嘉祥臥龍山皆敗之六年授山東布政使築新河濰河長牆旋追賊昌邑濰縣斬其目黃得宜等又戰於海州石榴橋先據坊山瞰賊戰於馬陵山臥龍寨等處賊張兩翼圍我軍鼎新令爲圓陣士卒跪伏持槍指擊翼以長矛賊不能撼又追敗之郟城賊奔柴戶店殪其目楊天燕陳金福斬首千級又敗之上莊受賊酋李宗世等降賞頭品頂戴時東捻賴汝洸任柱甫蕩滅而西捻張總愚復犯保定竄易州鼎新以陵寢所在督兵出賊前迎敗之移軍滄州破賊郭橋柳橋追之崔寨殲其酋羅六又敗賊高唐於是髮捻肅清七年七月敍功賞雲騎尉世職晉一等輕車都尉時欽差大臣左宗棠督辦陝甘軍務十月奉命交左宗棠差遣委用鼎新請開缺省親九年丁母憂十一年服闋直隸總督李鴻章奏留辦理津沽冬防十二年隨辦日本換約事宜十三年授雲南布政使抵任後減兵節餉每歲減存庫款八十餘萬光緒二年三月署雲南巡撫時騰越三府廳爲苗獠所陷鼎新遣將討平之上嘉其辦理迅速擢雲南巡撫九月疏陳他郎廳屬之猛野井出產生鹽有礙石膏黑磨二井銷路乞如舊封閉詔從之三年以清釐報銷與總督劉長佑意見不合命來京另候簡用道病

請假回籍五年俄羅斯以伊犁起釁召赴天津隨辦直隸防務七年與俄羅斯定約鼎新乞假歸十年法人與越南構兵詔起李鴻章於家鴻章奏以鼎新幫辦軍務命署湖南巡撫抵任奏稱湖南水陸防軍有由鄰省撤回者有係本省設立者營制參差不定餉項多寡不等見分五軍糧制均歸一律報聞三月授廣西巡撫奉命赴鎮南關先是法蘭西兵攻越南出扶良江進犯慈山新河等處提督黃桂蘭陳朝綱軍敗命鼎新查辦以擬罪輕縱傳旨申飭革生莫夢弼叛於思恩府檄按察使李秉衡等討平之閏五月與法蘭西使臣福祿諾議調北圻防軍回邊境旋奉旨進紮諒山守屯梅谷松堅牢等要隘幕僚吏士染瘴多物故鼎新奏請將諸軍歸雲貴總督岑毓英節制身爲幫辦不得請八月與法人接戰毀其兵船一艘平陸岸礮臺敵增兵攻船頭提督蘇元春總兵陳嘉擊敗之十月法兵退駐越南紙作社沿江築壘鼎新命設伏敗敵斃其酋四斬教民二百餘人奪獲槍械無算法懼堅壁不出捷入賞賚各有差皇太后頒內帑銀五千兩犒軍十二月法糾麻那教匪二萬餘自船頭進攻鏖戰兩日陳嘉等受重傷鼎新調各軍赴援無至者遂退師諒山陷鼎新電請治罪十一年正月廣東高州鎮總兵楊玉科至軍率

所部守海村龍州要隘也法大隊來攻鎮南關失守玉科力戰死喪提督劉恩河都司劉映豐以下十餘人鼎新傷肘墜馬詔准鼎新帶罪立功各軍悉歸調遣既法由芄封圖龍州官軍擊敗之二月法增調北寧兵三千至諒山勒派越夫運餉碼麪餅揚言取龍州時諸軍四會提督馮子材率部將王孝祺先進湖北統領道員魏綱居中截擊布政使王德榜尤奮力殺敵法分三道來攻礮落如雨官軍堅陣不爲動俟敵入濠漸近翻牆突出排槍轟擊敵潰自相踐踏伏兵起躡其後法大敗奪獲軍火無算遂復文淵次日進紮巴平法又增兵來戰交綏卽退躡剿至諒山鼎新檄各軍進偪界牌敵奮死拒守鼎新巡軍懸令下此城者賞銀三萬兩衆軍冒礮而進克諒山鼎新率軍復觀音橋屯梅法退駐谷松餘屯威坡越日克復谷松追至堅牢法之在威坡者皆震懾潛徙船頭先是奉上諭廣西關外各軍上年十二月暨本年正月疊有挫失巡撫潘鼎新身爲統帥雖經親臨前敵並受槍傷惟未能策勵諸軍力圖堵禦實屬調度乖方著卽行革職至是捷入和議旋成鼎新解任回籍十四年捐海軍銀一萬兩得旨賞還原銜翎枝五月以瘴疾卒於家九月李鴻章臚陳其功懇恩開復原官入祀淮軍昭忠祠二十一年安徽巡

撫福潤以鼎新功在桑梓請於本籍廬江縣捐建專祠並列入祀典由地方官春秋致祭以彰蓋績而順輿情均允之子永受舉人二品頂戴卽選道永芳二品廕生

張曜

張曜順天大興人祖籍浙江由監生捐縣丞咸豐初年依河南固始縣知縣蒯賀孫固始近擒匪窟穴曜佐賀孫謀守禦有功大吏檄曜帶勇剿匪以千餘人破巨擒李士林胡金斗丁心田等又敗安徽霍邱股匪李昭受之衆河南巡撫英桂保奏以縣丞留河南補用並賞戴藍翎四年請假回籍五年二月有稱曜力平巨擒地方愛戴者詔英桂調令回豫差遣委用時擒匪易添幅等連陷息縣光山曜招集練勇會南陽鎮總兵邱聯恩躡賊追剿擒斬五千人敘功擢知縣加同知銜六年署固始縣事光州被圍急曜赴援一戰解之七年七月禦皖擒張落刑等十餘萬衆屢戰屢捷詔以直隸州知州用賞換花翎十二月粵匪僞丞相李秀成僞國宗韋志俊糾皖擒長驅而北爲蹂躪全豫計圍固始數市地雷三發曜嬰城固守七十餘日城卒得全上嘉曜力保危城厥功甚大先行賞給霍欽巴圖魯名號八

年二月率勇開城與各路援軍內外夾擊圍解擢知府八月卸固始縣事巡撫恆福檄領陝西延榆綏官兵防剿粵匪十月以出境剿賊不分畛域加道銜九年署光州直隸州知州事十年正月以母憂去官會張落刑之黨蔓延中原巡撫慶廉奏留剿捕曜屢敗大股皖捻詔以道員補用並加按察使銜八月丁父憂請咨回籍團練大臣毛昶熙等復疏留帶隊剿賊十一年汝南匪徒陳大喜張瀾林王有聲劉興陳汝等結寨二百有奇肆出焚掠曜以計解散其黨又攻拔霍莊等十餘寨擒王有聲等汝郡以安五月奉旨以道員記名遇缺簡放並加布政使銜十二月授河南布政使仍帶勇剿賊同治元年二月督軍拔楊寨連克范寨二莊樓九月擊援賊破其堅壘二十七座遂進拔陳逆老巢擒陳汝平項城荒坡等五十餘寨會言者劾曜戰將不知書不應驟涉文職大員有旨開缺以總兵簡用歸僧格林沁節制二年克項城之尙店正陽之張岡生擒巨酋張瀾林霍光玉等其黨相繼乞降豫南平賞加提督銜三年粵匪僞啟王梁成富率衆七萬人屯內鄉之馬山口曜連戰破之餘黨竄陝南時僞遵王賴汝洸與僞福王陳德才圍攻湖北麻城欽差大臣博多勒噶台科爾沁親王僧格林沁以城外稻田縱橫騎失利檄

曜會同福州副都統蘇克金統馬步進援七戰皆捷陳逆解圍去四年移軍援安徽雉河集以功下部優敘會僧格林沁戰歿山東有劾曜養賊貽患統兵二萬有餘不進致督師重臣捐軀上命河南巡撫吳昌壽確查具奏昌壽覆奏張曜在豫帶兵有年不無微勞足錄至養賊貽患以及所帶兵勇到處搶掠均無實據又前後數年所帶之兵多不過五六千人並無二萬有餘之數疏入諭以奮勉圖功是年八月乞假葬親五年皖賊復熾河南巡撫李鶴年請於朝趣曜復出六年五月曜統嵩武軍駐許州八里橋騎賊擁至見曜大驚卽退追殺至潁橋石固驛擒斬悍目林慶禧胡福禧李貴如李順子等賊竄中牟鄭州出睢州蘭儀考城入山東曹縣境日馳二三百里骸足腫潰官軍亦以疾追疲乏暫住考城遏賊回竄於是賊由戴家廟沈家河竄運河曜偕南陽鎮總兵宋慶並赴山東六月抵安山宋慶迅築長牆留副將蔣東才四營參將李承先二營歸曜節制曜以沈家口運黃交匯之處河汊寬廣陸營難以周顧請調黃河水師入運助守會任賴大股駛入江南爲淮軍所敗全股蕩平捷聞以提督記名遇缺簡放其時張落刑遺孽張總愚竄陷陝西綏德分擾米脂由龍王越渡黃河出絳州曲沃垣曲山中間道竄豫疆

上命宋慶軍與秦晉之師前後夾擊以張曜一軍專防河北與宋慶爲援從吏部侍郎毛昶熙奏也十二月賊至獲嘉輝縣新鄉原武諭旨嚴切曜與宋慶晝夜冒風雪追賊湯陰宜溝驛敗之七年正月拔賊所踞村莊二十有奇賊東竄入直隸境曜等追敗之廣平又敗之河間府臥碑集賊南奔復沿河東駛官軍至深州偵張總愚踞錢莊以夜襲擊敗之張逆又北竄深澤負嶠西華集曜等毀卡猝進賊驚潰復蹙於饒陽方賊之南竄也諸將咸請率師逐之曜謂賊勢未蹙而遽南奔必有陰謀乃捲旆疾馳而北果與賊遇斃總愚姪張五孩五孩極兇狡張逆夙倚之由是氣奪捷入得旨優敘曜回軍入豫三月由輝縣之雲門馳至修武恩村適賊黨由清化斫竹回駛驟遇官軍黎明渡衛河走延津曜及宋慶督總兵程之偉參將李永芳與賊鏖戰賊大潰是日騎賊李全義來降言賊謀由衛輝折而東北奪我輜重曜回擊敗之會湖廣總督李鴻章與李鶴年議困賊於黃河北運河東徵各省兵臨河而壘以馬軍守東昌而以淮豫健軍當賊凡三月壘成降者接踵六月戰於玉林鎮其地在徒駭黃運河之間值大雨河漲曜與宋慶誘賊入河套合擊之賊人馬陷泥淖中死者萬餘餘黨竄去自是張逆不復能軍曜等晝夜躡

剿至山東境再遇賊於在平西南擒斬無算賊愈孤疾駛而北曜率諸軍邀截痛
剿張逆祇存十餘騎自沈於河捷聞賞穿黃馬褂並騎都尉世職八月凱撤回豫
時陝西回匪方張官軍戰不利山西巡撫鄭敦謹臨河設防詔曜帶隊赴援賊既
度隴曜移兵甘肅寧夏將軍金順以曜爲後路策應駐紮蒙古準格爾旗杆直漢
般一帶八年轉戰至烏拉旗蘭鎮爾壘次獲勝解阿拉善之圍寧夏回民爲賊誘
脅者踞寨拒官軍曜與金順協力剿之破賊寨數十滅王家疇踞匪寧夏平九年
二月授廣東陸路提督十年賞加雲騎尉世職十月大學士陝甘總督左宗棠督
師圍肅州曜率軍繼進遂克之關隴肅清諭曰張曜扼紮寧夏剿辦王家疇等處
踞匪地方得以安謐近由涼州馳赴肅州勇往可嘉賞戴雙眼花翎尋詔接辦沿
邊防剿事宜進援哈密時伊犁爲俄人所踞哈密巴里坤屢瀕於危曜聞命卽日
啟行以爲哈密出關二千里沙磧彌望少水草轉輸不便乃議屯田光緒三年克
復吐魯番城賞一等輕車都尉仍兼一雲騎尉世職復合軍進攻烏魯木齊規復
八城回酋白彥虎遁入俄俄歸我伊犁西疆底定左宗棠奏曜不以搏戰爲良堪
膺重任六年詔幫辦軍務喀什噶爾爲中俄分界扼要之區曜移師駐之兼轄西

四城督辦善後十年奉命入關移防北路特賞巡撫銜尋賞頭品頂戴十一年授廣西巡撫修濬京師城河竣役賞兵部尙書銜旋命赴山東勘河建南北分流之議事不果行十二年五月調補山東巡撫疏云海防一事煙臺登州原駐廣武中後兩營經前撫臣陳士杰減撤以後防營並形單薄頭品頂戴記名提督孫金彪生長海疆久歷行陣見令先行統率原帶嵩武馬步五營前往煙臺擇要扼防兼顧登州河務一事本年春汛以來沿河漫決隄埝惟王家圈姚家口兩處最爲寬大黃河全溜已趨徒駭而上游齊河長清等處隄埝尙多卑薄見正汛漲水偪隄岸險工疊出日事搶修至於徒駭河北岸隄埝商河臨邑亦多卑薄合段迅速加培不准敷衍了事曹州府屬近年盜賊橫行嚴緝重懲不過除一時之害如能力行保甲奸宄無從混迹足清盜賊之源一面於鄉鎮分設義學以冀漸化風氣曹州府知府積慶素有能名見令會督營汛認真捕務並將保甲義學各事督同州縣次第舉行由該管道秦鍾簡隨時稽覈報聞八月勘估黃河工程入奏略曰黃河連年爲患內外臣工多方計畫條議臚陳均在聖明洞鑒之中臣莅任以來凡言河務者至布衣之士微末之員無不詳細諮詢虛心體察蓋一人之智慮難周

衆論之利弊較確本年自春歷夏王家圈等處先後漫口見與河防局司道詳慎籌議就人力財力所能爲者勉施補救惟有疏挖海口抽挑淤灘兩岸漫口分別堵留一面將遙隄民埝酌量緩急分年增培並將徒駭河兩岸隄工增培添築以防氾濫從來治河之法總以疏濬之策爲上歷因疏濬爲難專事隄防又因隄防屢潰遂議分減蓋水底疏濬固難爲計若上口下游河身乾涸乘時挑挖人力應所能行然祇有挑挖引河十里至數里不等未見全河挑挖者自屬勢所難行今以挑挖河面寬四十丈底十六丈深一丈二尺計之每里起土六萬餘方每人至多日挖一方計六萬餘人日挖一里已屬工繁費鉅上游堵口之工勢難久待前人罕見舉辦者以此故也今姚家口以下河流自上游漫口以後細流一綫淺不容舟應於淤灘挑挖引河十五里其引河以下至鐵門關勸有淤高磯頭三四十處湊長一萬二千五百丈卽擬抽溝切灘姚家口一經堵築得以引水歸河其自蕭神廟以下三河至牡礪嘴一帶係海潮黃流接連之處距岸稍近者當可挑挖川字引河其中間淤灘人力難施應用機器船隻節節疏濬凡機器船中流挑淤不難於挑挖而難於運送山東無製造機器器具購買機器式樣甚多必須察看河

形方可購辦一面再將竈壩以下隄段接連添築以期攔水歸槽與機船挑淤相輔而成至於隄埝之防非不足恃前因河岸愈刷愈寬溜勢散漫日淤日高及水與岸齊沿河民居築埝而守人力之多寡不齊財力之貧富不同是以工程之高下厚薄未能一律及至河流衝刷低者陷而高者亦陷薄者潰而厚者亦潰其時以爲河身太窄遂興遙隄之工而遙隄距岸近者三四里遠者五六里泰山之陰地勢愈北愈低是以北岸遙隄衝塌尤甚竊維築隄之道必當知河水分數然後定河身寬窄以爲容水之地過寬則停淤過窄則易溢理所必然黃河北徙以後向以歷城境內南北灤口爲準南北灤口兩岸相距寬九十七丈九尺以測土方之法測水方伏汛盛漲之際節節測量深淺牽算計水一千八百零六方以此度之河面寬至百丈兩岸隄埝之工果能堅固即可束水攻沙今上下游河面均較灤口爲寬更有寬至三四丈者宜就向有民埝薄者培之卑者增之坐灣兜溜者取直另築或加月隄或加套埝逐漸工作足可防禦若竟棄之不顧則近河千百村莊勢將盡付洪流殊非救災捍患之意且河面寬溜滾無定不能盡在中流是以南河寬處二十餘里仍不能無患也至遙隄之得地勢者亦當增培查北岸自

東阿以至齊河本年伏汛盛漲險工甚多此段遙隄計二百零四里民埵順河多灣計有二百三十里均一律增培齊河以下遙隄地勢低窪人力經費一時兼辦爲難應先將民埵三百四十二里一律修培估計北岸遙隄經費民埵津貼共需銀五十三萬一千二百餘兩利津下游至竈壩尾隄工九十六里共需銀六萬五千八百餘兩南岸遙隄自長清縣韓家村起至利津縣境梅家莊止三百一十五里應卽一律增培民埵除章邱縣陳家莊以下一帶因何王莊漫口東西兩岸皆被水溜浪淘殘缺已多一時無從修築擬自長清縣符河口起至陳家莊止一律修築計一百二十里估計南岸遙隄經費民埵津貼共需銀二十六萬七百餘兩此籌辦南北兩岸隄埵工程之情形也東省連年漫口專事堵築者原爲拯溺之計而此堵彼開幾窮人力計時遠隔數月近隔數日若今年漫決口門一經悉數堵合恐不待明年汛漲他處又將漫決此不得不變通辦理者至於減水分入徒駭實爲因勢利導之計論者謂上游減水則下游停淤此言誠是然必兩岸隄工堅固無虞潰決自無庸分減黃流以收束水攻沙之益今兩岸之隄工未堅水漲則漫決爲患不得不爲減水之計究之減水與決口情形迥不相同決口則大溜

驟然旁洩水勢頓緩自必因之停淤若減水則於汛漲之時逐漸分流正河溜暢可無停淤之患前河臣靳輔行之著有成效至今徐州上游開壩舊基均可復按查齊河以下陳家林李家岸趙莊等處三年之間四次漫口經過之處村莊衝塌殆盡趙莊一帶坐灣頂衝是以連年漫口均在此段應留趙莊口門減水分入徒駭較爲相宜但此口門可以緩堵而不可以久開將來隄埝之工增培堅固用海口機船挑濬沿河積淤沙觜抽溝切灘之法辦有成效然後於趙莊附近擇地建造減水石壩仍將趙莊口門堵合惟隄留口門必須將兩面壩頭裏修堅固口門以內排釘木椿以防跌塘刷寬之患至於趙莊以北橫築大隄直達徒駭河以免倒灌漫淹禹城一帶其王家圈姚家口兩處口門今春漫口村莊初次被淹口門堵合以後數萬居民尙能整頓田廬自謀生計應卽先後堵合其南岸河套圈口門水行郭家寨入小清河由章邱以至樂安八縣地方入海惟有近海一帶地勢較高疏空無效以致巨浸難消是河圈口門亟應堵築至何王莊口門原擬緩築以目前水勢而論仍應堵築附近數十村莊可期復業所有趙莊口門減水應築橫隄修裏壩頭排釘木椿估計經費共需銀十二萬七千餘兩堵築王家圈等四

處口門估計經費共需銀六十一萬餘兩此籌辦兩岸口門之情形也臣查本年黃河北岸漫口之水悉趨徒駭由流鍾鎮陳家廟入海者不過十之三四其餘漫水均由平地東流是以濱州惠民霑化濟陽四州縣被淹最寬今徒駭河岸若不增隄收束任其散漫東流日久到處停淤下游一經墊高上游又將旁溢見擬自禹城轄境以至商河計二百二十里北岸村莊尙未被水民力尙能自願應辦隄工仍由地方勸諭紳民趕爲增培此外惠民濱州霑化以及徒駭河南岸地方連年被淹民力拮据築隄工程酌量給以津貼下游地段雖夏水冬冰人力難施惟有乘時工作得尺卽尺日久必可有成應辦工程大局攸關豈可畏難而止估計工程共需津貼銀十萬六千餘兩南岸濱州地段長四十里先爲籌辦估計津貼共需銀三萬四千五百餘兩其濱州以上南岸隄工須俟北岸等處口門堵合以後再爲酌辦此籌辦徒駭河兩岸隄工之情形也山東連年辦理河務庫款撥用一空見與藩司等籌商移緩就急僅能湊銀二十八萬兩其餘應用銀兩惟有仰祈敕部覈發以便及時動工其餘未盡事宜隨時續行具陳又曰臣維治河之事如治病然氾濫衝決此河之病也淤灘沙觜橫亘河流此又致病之由也每見此

岸積淤彼岸受衝日久淤高遂成坐灣大溜阻抑動爲險工古人抽溝切灘之法實足消患於無形臣查南河故道曾據舊日河兵僉稱從前經費寬裕遇有險工藉領鉅款是以沿河廳官轉以險工爲得計抽溝切灘之法視爲具文臣思切挖淤灘沙者實爲治河要務擬先趕造平頭圓船五十隻每船十六人各帶鐵鍬鐵爬凡有河中淤灘沙觜水落則登灘挑挖水漲則乘船淘爬再於對岸築壩挑水藉流衝刷惟製造此項船隻及添置器具每船約需銀二百餘兩購料集工一時難以多辦惟有逐漸加增以期敷用疏入諭曰山東黃河連年爲患疊經內外臣工條奏迄未定議見據該撫詳議辦法所籌尙屬周妥所有姚家口以下各處河淤或挑挖引河或抽溝切灘卽著分別辦理並將竈壩以下隄段接連添築以期攔水歸槽其南北灤口兩岸民埝應行增培另築或加月隄或加套埝務當逐漸施工俾資防禦至北岸遙隄等工亦應及時興辦以臻周密趙莊暫留口門裏築壩頭趙莊以北橫築大隄直達徒駭河以資宣洩而免倒灌王家圈等處口門及自禹城轄境以至商河應辦隄工及徒駭河南岸濱州地段隄工均著次第堵築應用經費除該省已籌款項外不敷銀數尙鉅著戶部如數指撥的款以資工用

餘著照所議辦理該省黃流頻年漫溢小民顛沛流離深宮軫恤殷懷無時或釋見經定議將疏濬堵築分流諸策一律興辦朝廷不惜數百萬帑金爲百姓禦災捍患奠厥攸居張曜爲特簡疆臣責無旁貸務當督飭在工員弁實心經理不得稍涉疏虞致滋貽誤如有應行變通盡利之處並著隨時奏明辦理另片奏切挖淤灘沙觜擬造平頭圓船五十隻應用隨後逐漸增添等語卽著照所請十二月疏報惠民縣姚家口合龍奉諭交部議敘十三年四月奏東阿等十四州縣加廣一次文武學額各一名詔從之時張村殷河大寨西紙坊高家套先後漫決曜令規度地勢依王景八渠法建水門三座隨時分洩又以牡蠣口河水入海不能通暢改濬韓家垣海口以疏其尾計一歲中奔走河上幾三百日旋奉懿旨幫辦海軍十五年慈禧端佑康頤昭豫莊誠皇太后歸政奉懿旨賞加太子少保銜十七年京察屆期詔優敘四月命會閱南北洋海軍至煙臺聞臺灣巡撫劉銘傳移疾歸里曜請行優詔答之六月駐河干搶護史家塢王陽家等處險工七月疽發於背回省就醫未旬日卒遺疏入諭曰山東巡撫張曜秉性忠勇歷著勳勤咸豐同治年間由知縣從戎創立嵩武軍轉戰安徽湖北直隸等省疊克名城剿平粵捻

各逆嗣復剿辦甘肅及關外回匪埽穴擒渠戰功甚偉歷蒙先朝知遇賞給騎都尉世職賞戴雙眼花翎陞授布政使改補總兵擢任提督朕御極後因回疆肅清給予一等輕車都尉兼一雲騎尉世職補授廣西巡撫加尙書銜調任山東巡撫於山東黃河尤能悉心擘畫親歷河干督率工員力籌修守實屬勤勞罔懈前經疊奉懿旨幫辦海軍事務賞加太子少保銜方冀克享遐齡長承倚畀昨因患病甫經賞假調理遽聞溘逝軫惜殊深張曜著晉贈太子太保入祀賢良祠並於立功省分建立專祠生平戰績事實宣付國史館立傳加恩予諡賞銀一千兩治喪由山東藩庫給發照總督例賜卹任內一切處分悉予開復應得卹典該衙門察例具奏靈柩回籍時沿途地方官妥爲照料伊子知府張端本著遇有道員缺出請旨簡放主事張端理著賞給員外郎張端謹及伊孫張爾常均俟及歲時由吏部帶領引見用示篤念盡臣至意山東布政使福潤疏言曜疾革時遺書大學士直隸總督李鴻章首言山東爲北洋第一重門戶必應及時繕治礮臺以備不虞次言新疆報銷部文飭令裁營清釐緩不濟急誠恐失信外域貽口舌而負朝廷無一語及家室之私自得疾以迄易簀始終在簿書填委之中身後蕭然一如寒

素又稱曜宅心精白篤志忠貞自守極嚴而不惜巨資以養將士待人極厚而不屑居積以營身家察吏則嚴而不刻治軍則恩威相濟課士講求實學臨民周悉輿情頻年辦賑全活百萬生靈有古大臣忠純之誼尋賜祭葬予諡勤果十八年山東巡撫福潤奏言張曜於同治七年統嵩武軍來東會同各軍剿辦捻逆張總愚於炎天暑日之下追逐數月之久其在臨邑濟陽一戰殄斃悍賊萬餘賊勢遂不復鷓張俾得全股盪平東省實爲該故撫臣立功之地士民感戴不忘遵於省城捐建專祠業經落成懇敕部列入祀典俾彰忠藎而垂久遠允之十九年浙江巡撫崧駿以張曜德澤在鄉紳耆感戴請於本籍捐建專祠並列入祀典二十年河南巡撫劉樹堂以張曜蕩平東捻轉戰西陲厥後敷歷封圻以死勤事至今嵩武一軍尙循該故撫訓練遺規猶稱勁旅洵屬功施彪炳無愧俎豆馨香懇恩將該故撫豫省專祠列入祀典先後均如所請所遺世職併爲二等男爵子端本兼襲

都興阿

都興阿郭貝爾氏滿洲正白旗人祖阿那保父博多歡均正黃旗蒙古都統都興

阿由廕生於道光九年賞三等侍衛十七年擢二等侍衛咸豐三年科爾沁郡王僧格林沁剿賊天津賞都興阿內府銀隨軍擊賊十一月師至獨流敗賊杜家觜賞頭等侍衛四年正月克獨流三月追賊阜城賊南竄踞連鎮五月踏平運河賊壘五年進攻連鎮火其木城賊首林鳳祥就擒敍功賞副都統銜在乾清門行走四月授京口副都統率馬隊隨欽差大臣都統西凌阿擊賊湖北十月復德安府城進規漢陽十一月敗賊沙口焚所築板房十二月再敗之軍薄漢陽西門六年三月賊由金鋪山上竄都興阿揮步隊迎擊分馬隊鈔其後陣斬賊目十餘斃賊三百餘又焚其屯糧於團風鎮斬僞官熊致和等時湖北巡撫胡林翼督軍燔漢陽城外賊艇賊登岸遁都興阿率馬隊截殲之五月陞江寧將軍九月會馬步軍解襄陽圍敗樊城踞匪進圍武昌賊糧盡援絕十一月開城遁官軍水陸夾擊賊敗潰復武昌遂復漢陽乘勝復黃州興國大冶蘄水蘄州諸城十二月率營總多隆阿等大破賊於曹家河復廣濟都興阿身先士卒戰輒勝總督官文上其功賞霍欽巴圖魯名號時上游賊敗竄黃梅提督楊載福等由廣濟進剿賊悉衆出拒都興阿以馬隊衝擊賊亂遂下黃梅七年正月太湖賊上竄窺黃梅都興阿空城

以誘之二月賊果長驅入騎賊千餘繼至獨山鎮亦出賊五六千鈔官軍步隊後都興阿合馬步軍夾擊陣斬悍賊數百越嶺追斃四千餘賊目三人三月攻九江賊於小池口檄多隆阿等破段窰楓樹坳獨山鎮賊巢四月賊酋陳玉成由桐城率賊三萬餘裹飢民數萬分竄黃梅廣濟蘄州蘄水界都興阿時駐下游聞警遣多隆阿率隊赴剿副將鮑超由孔隴驛接應大破賊於渡河橋平二十餘壘俘斬數千六月賊糾合大股築壘廣濟內湖童司箠都興阿令提督孔廣順會楊載福師船繞入內湖攻拔之擒斬三千餘適記名按察使李續賓率軍渡江夾擊盡平童司箠兩岸十九壘七月軍次黃蠟山伏賊突起揮軍奮擊賊大奔潰踏平賊壘四十有八斬馘五千餘尋命幫辦官文軍務時九江賊築僞城於小池口都興阿遣多隆阿等潛師攻黃梅後山賊壘以絕其援李續賓等日夜攻小池口不下都興阿率馬隊進施火箭僞城火起賊狂奔窮追百八十里湖北肅清九月偕李續賓等克湖口攻梅花洲僞城逆酋賴桂普踞彭澤都興阿會水陸各軍擊走之十一月下望江東流銅陵破賊壘數十八年正月宿松賊竄僞蘄州都興阿督兵敗之四月會李續賓等軍克復九江斬賊渠林啓榮等得旨優敘五月復黃安麻

城並飭軍擊敗彌陀鎮南陽河賊七月復太湖賊猶屯聚潛山及懷寧之石簪鎮都興阿與李續賓等分路攻下之九月帥陸軍進規安慶盡奪集賢關賊壘遂克桐城十月復舒城追敗潛山竄賊平三十餘壘尋三河援賊大至李續賓戰歿潛山太湖舒城復陷都興阿退保宿松陳玉成由石簪上竄遣黨犯黃泥巷謀夾攻宿松均爲都興阿所敗十一月援軍皆集與賊戰於花涼亭大捷斬馘萬數千踏平王家畝賊壘三十九年正月上允欽差大臣前兵部右侍郎曾國藩請於安徽上游北岸添馬步三萬人以都興阿領其軍與水師楊載福等爲三道兼進夾江東下之舉二月賊陷湖南桂陽等縣撥馬隊二百赴援都興阿先於八年九月調荊州將軍至是命赴任所部兵勇以多隆阿統之十年閏三月江寧大營爲賊所襲將軍和春退守鎮江上命都興阿帥馬步四五千駐江北進規六合浦口天長等處杜賊旁竄四月常州無錫江陰相繼陷蘇州不守肅州鎮總兵張玉良軍退杭州諭都興阿馳駐揚州聯絡鎮江諸軍策應蘇常十月命督辦江北軍務十二月都興阿親勘湖防令總兵李德麟赴下游會陸路防守十一年正月飭浙江溫州鎮總兵吳全美等駕師船進攻和州江下關一帶轟倒江邊望臺土壘破內江

口賊船追殲賊無算三月以揚防兵力單請留總兵詹啟綸緩赴徐州鎮任從之
四月防守盱眙副將格洪額爲叛勇所戕賊劫其部下礮船攻撲三河甚急都興
阿飭提督黃開榜等剿焚之又飭總兵王萬清會水師渡湖連敗賊於揚州僧道
橋等處盡平其壘時江安大股賊犯揚州復分黨犯儀徵都興阿迎擊賊屢敗之
賊又糾蘇州句容各賊分犯瓜州鎮江都興阿乘賊築壘未定令營總杜嘎爾等
率馬步軍衝擊自督隊繼進賊敗卻尋傾巢出官軍擣其中堅賊大潰陣斬黃衣
賊數人追殺三十里詹啟綸乘勢踏平甘泉山賊壘三十餘鎮江圍解七月疏陳
長江水師南北上下游布置情形並繪圖進八月疏議江北勇糧照湖北新章酌
加銀數如所請行九月逆酋龔長春分路肆擾飭都司李成虎等敗之金家集陳
家集等處江陰賊由金棟橋犯黃山港遣遊擊郭定猷等迎剿燬其船三十餘十
月調江寧將軍仍駐揚州督江北軍務時浙江軍事亟諭都興阿遇緊要軍務會
商曾國藩辦理江北文武人員仍遵都興阿調度尋飭副都統海全等破後石橋
賊營斃賊二千餘十二月蘇常賊犯鎮江飭總兵黃彬等統水師敗之破五壘親
督各軍馳抵天長城下平壘卡數處龔長春率黨遁沿途截殺殆盡又遣黃彬等

截擊賊船於小河口太平港踏平瓜埠賊巢撥師船分防東溝龍子廟等處尋會江南提督李世忠圍攻六合賊乞降都興阿夜遣侍衛色楞額等馳抵天長諭降二城遂復同治元年正月檄總兵李德麟等擊敗賊於蘆涇白茆港追及漕浦焚礮船划船無數又飭王萬清等會剿淮安捻匪連敗之高家洮等處三月賊撲揚州竄儀徵遣都司林成興敗之東門外副將孫文友等敗之悅來集徐家集等處賊合大股撲揚州西南門都興阿親督各軍連戰敗之杜嘎爾率馬隊由汶河追剿三十里黃彬等亦擊退沙漫洲賊揚州境內肅清時上游各軍乘勝東下克沿江州縣攻雨花臺都興阿飭總兵李起高等駛至浦口平觀音門賊卡及燕子磯賊壘與上游師船會進規江寧九月援賊麕集鑿地道轟攻江蘇布政使曾國荃營都興阿遣副將楊心純赴援解圍逆酋李秀成不得逞於江寧由中關上流渡九洲圍官軍陸營分犯浦口江浦防守石埠橋副將龔文林軍不能支十一月都興阿飭黃彬等率師船援之以礮划轟敗賊船平石埠橋十餘壘又以南岸福山白茆等處賊日增計圖北竄飭軍赴通州海門協防調師船守蘆涇老洪牛洪各口二年正月諜知常州賊首圖燒船渡江犯靖江其衆二十萬欲渡九洲洲擾

揚州撤援軍回防二月逆酋李秀成糾常州丹陽各逆由下關中關渡江都興阿
飭軍進防浦口調礮划越九洲迎剿火其船揚防水師亦勝賊於上游之七里
洲下游之圩塘三月擒首苗沛霖句結髮逆擾定邊鑪橋及天長之金家集等處
都興阿派軍迎擊賊遁去四月賊竄六合刈麥爲糧都興阿督軍馳至設伏誘敗
之適曾國荃克江寧之雨花臺曾國藩大兵東下都興阿飭副將梁正源等會楚
師焚中關下關賊艘攻克九洲八月飭李起高會水陸各軍克復江陰九月追
敗賊於劉港包港蘇州既復賊黨四散十月突至丹陽江邊爲李起高所敗十一
月賊數千撲理義港又賊萬餘屯小河西石橋灣梁正源等擊走之十二月飭副
將李榮陞等伏兵敗賊於小河三年正月揚州解嚴上以陝甘軍務急命都興阿
赴綏遠城偕將軍德勒克多爾濟督防時甘肅寧夏漢城陷於賊滿城待援命都
興阿統兵馳赴陝西定邊與固原提督雷正綰軍前後夾擊四月賜紫禁城騎馬
調西安將軍督辦甘肅軍務尋署陝甘總督江寧克復都興阿以前江防功賞騎
都尉世職六月都興阿馳抵定邊奏言定邊距靈州遠與前營隔絕宜進兵駐花
馬池聯絡聲威且逆首馬化澂起靈州金積堡沿途占踞城堡蔓延將及千里非

分兵三路難期得力沙漠無水草繞行甚遠擬由磴口渡河自石觜山八站達平羅較爲徑捷七月飭杜嘎爾等軍由草地繞石觜山渡河攻克姜家村紅柳溝賊巢追賊及寶豐分遣參領德順由橫城順流下伊昌阿軍由二窩子渡河駐石觜山北護糧運靈寧賊自水路援寶豐遣參將趙有勝扼河橋截其竄路復檄陳天佑等進剿賊萬餘分三路出撲杜嘎爾等擊退之遂復寶豐同時解平羅圍八月軍進渠口堡都興阿慮地勢極寬深入無後繼疏請於朝上命荊州將軍穆圖善率所部赴甘肅會剿賊首馬叱吽踞通成堡築數圩堅守不出九月突出大股分撲杜嘎爾等率馬隊分路擊走之十月賊聞都興阿等渡河退踞清水堡都興阿移營偪賊巢賊出衆來撲力戰卻之尋飭杜嘎爾率馬隊越十餘圩邀擊賊糧道殲賊甚多獲羸馬數百頭又合兵過濠築壘攻克清水堡大小各圩軍進金貴堡及王格莊去寧夏城二十里十二月進攻賊圩敗西路援賊城內賊乘官軍方攻圩出鈔我後杜嘎爾等率馬隊衝擊都興阿卽撤攻圩各隊迎剿良久賊潰退四年正月都興阿督師列陣城東遣軍越圩截獲車畜無算誘賊出擊敗之兼拔向南賊圩一日四捷二月鹽池固原等處竄匪擾合水華池各鎮踞安化元城鎮窺

寧條梁糧路都興阿遣營總賽清阿防花馬池副都統西蒙克西克防寧條梁副將趙有勝防定邊是月靖遠南山賊竄過金積堡焚葉升等上八堡據小壩修堰都興阿慮春漲決渠移營屯城東及城東南賊連夜踞護城河隄築壘卡斷汲道督軍攻之並擊退各圩援賊因列隊掘長壕以斷賊路都興阿復親督隊敗賊金貴堡會固原竄匪由元城鎮西竄下馬關遣侍衛壽昌助趙有勝防定邊調西蒙克西克仍駐花馬池三月固原竄匪趨平羅寶豐督軍敗之於金貴等堡偵知賊北竄欲斷磴口餉道飭杜嘎爾迎擊逐北四十里斃賊酋馬生顏花馬池定邊防軍同時疊敗賊於紅柳溝馘逆首孫義保五月寧夏賊勢日蹙詭辭乞撫爲緩兵計而潛挑濠築壘決上游水灌官軍都興阿令於軍拒其降趣糧運修戰備又以援賊堅壁死守時分撲廣武及石空寺等處窺伺中衛遣寧夏道三壽馳防閏五月解滿城圍克城東賊圩敗賊西門橋遣軍擊走大水坑吳中堡踞賊斬逆酋馬有富尋以盛京馬賊猖獗十二月調盛京將軍穆圖善代將其衆寧夏賊尋降納礮械縛賊渠獻軍前五年二月穆圖善奏回衆悔罪投誠都興阿入城時復戮回日章保立兵勇乘機掠殺上責都興阿剿撫無定見下部議處穆圖善又奏都興

阿所部屠戮城內漢回甚衆並焚掠回衆所交銀錢粟米再下部議處旋加恩革職留任六年正月都興阿奏籌奉天西路緝捕章程旋檄參將張得祿剿敗綏爾山馬賊焚其巢獲首犯高廷棟等八月京師饑都興阿捐米助賑得旨優敘七年閏四月命管理神機營事務授欽差大臣馳赴天津會同左宗棠李鴻章剿辦捻匪是年直東捻匪平都興阿仍回本任八年十月捕獲孤山賊犯王慶等十三年偕錦州副都統古尼音布奏陳變通馬政五條光緒元年卒遺疏入諭曰盛京將軍都興阿老成謹恪懋著勤勞由侍衛洊陞將軍克稱厥職從前出師江皖陝西等省辦理軍務均能得力茲聞溘逝軫惜殊深著加恩贈太子太保銜照將軍例賜卹任內一切處分悉予開復應得卹典該衙門察例具奏賞銀一千兩治喪由盛京戶部給發靈柩回旗時著沿途地方官妥爲照料伊子三等侍衛卓勒洪額著俟百日孝滿後由該旗帶領引見伊孫尙安泰著俟及歲時由該旗帶領引見用示篤念盡臣至意尋賜祭葬予諡清愨二年署盛京將軍岐元等奏奉省士民以都興阿與已故署將軍崇實大學士文祥功德在民請合建三賢祠列入祀典允之十五年慈禧端佑康頤昭豫莊誠皇太后歸政追念功績最著諸臣各賜祭

一壇都興阿與焉十八年兩江總督劉坤一以都興阿遺愛在民請於揚州與故吉林將軍富明阿合建專祠列入祀典詔如所請

魁玉

魁玉富察氏滿洲鑲紅旗人荊州駐防父額勒景額京口副都統魁玉由二品廕生於道光十年授驍騎校十三年陞防禦十六年除佐領二十三年擢協領二十九年俸滿引見得旨交軍機處記名咸豐二年髮逆竄湖南荊州戒嚴將軍台湧檄防關沮口三年軍政卓異加一級九月逆匪竄武漢隨台湧駐軍扼沙市尋授涼州副都統台湧疏請以魁玉留防荊州允之十二月湖北巡撫崇綸疏請赴省防剿四年正月營於武昌東境之洪山時髮逆踞黃州總督吳文鎔軍敗賊遂於魯家港聯營七座斷省城糧道六月巡撫青麐檄魁玉馳剿而對岸漢口賊犯塘角鸚鵡洲賊已侵鮎魚套奸黨內應省城遂陷魁玉隨青麐退保荊州有旨革職交署總督楊需酌量差遣七月荊州將軍官文飭魁玉帶勇五千會同湖南提督塔齊布前任禮部侍郎曾國藩截剿上竄之匪魁玉遂屯兵石首之調弦口監利之白螺磯八月師次新隄進規漢陽偕總兵楊昌泗率四千三百人火攻西岸蝦

蟆磯賊驚逸魁玉分隊伏沌口殲賊之竄入裏湖者進拔鸚鵡洲與各軍合擊大別山木壘分兵伏月湖隄賊逸竄蔡店截殺無數遂克漢陽武昌亦復捷入開復原官賊由襄河湏口蔡店擁撲漢口者二千艘魁玉會合曾國藩水陸截剿縱火焚之無一免者九月偕曾國藩塔齊布駐營金口西岸賊千餘猝至魁玉至沌口堵禦擊死黃衣賊目擒斬數十名賊自是不敢上犯連檣而下曾國藩以舟師扼之魁玉誘至楊林溝斬級百餘生擒二百進圖蘄州分扼蒜花壕道士汛渭源口敗賊於骨牌磯既而黃州府及蘄州蘄水次第收復十月駐蘄州三道橋以未能遏截潰匪上竄摘去頂戴進軍清水河追賊崇陽橋抵雙城驛賊三萬人分股來犯魁玉繞其後奮擊大勝平大河埔賊壘克黃梅得旨賞還頂戴五年二月調赴潛江一帶辦賊繼由潛至沔陽州敗賊於里仁口是月命署荊州右翼副都統四月堵剿上竄之賊襲破仙桃鎮吳家橋分兵兩岸轉戰獲勝賊又冒團練由麥旺薺而上魁玉設伏誘至鄢家灣圍殺殆盡荆襄以安尋授江寧副都統官文以魁玉襄河堵剿得力疏請留辦軍務許之七月克漢川八月克沔陽州腰駁均受矛傷自是立營鄢家灣偵賊由侏儒山竄沔陽之周家幫卽夕馳往下查坪夾擊之

賊遁復擣侏儒山賊巢拔之時漢川及仙桃鎮又陷魁玉派隊兩路赴鄭家集麻港斜趨仙桃鎮以遏賊衝自出沙觜橫截之大捷十月重克漢川及蔡甸尋奉檄所部歸大營十二月官文調赴漢川辦理團練事宜六年四月又赴麻城羅田黃岡督催團練辦理捐輸九月以襄陽土匪滋事命馳回荊州整飭團防十月丁母憂詔俟百日孝滿卽赴江寧新任十二月官文彙案請獎賞戴花翎七年抵江寧副都統任隨欽差大臣和春軍營八年六月命暫署江寧將軍七月兼署京口副都統十年四月復署江寧將軍先是魁玉剿賊於丹陽北門失利賊退至是事聞得旨革職留任江寧將軍交副都統巴棟阿署理尋命帶兵赴揚州軍營隨剿九月復署江寧將軍暨京口副都統十一年十月新任將軍都興阿到任上以京口副都統關繫緊要命都興阿於揚州軍營揀派得力旗員署理都興阿尋以魁玉請因是仍署京口副都統魁玉既抵鎮江疏言京口爲江南之咽喉江北之唇齒孤立江濱賊氛四逼都興阿見駐揚州遠隔大江而副都統僅管旗務雖西寧鎮總兵馮子材統兵在此兩不相轄請敕馮子材不分旗綠聯爲一體凡軍務會商辦理從之十二月命魁玉幫辦鎮江軍務時賊大股攻鎮江江寧逆酋洪仁發等

復糾龍潭石埠橋諸賊號稱萬餘人水陸分途來犯官軍餉奇絀魁玉與馮子材激勵飢卒連攻近城逆壘屢勝之同治元年二月詔開復革留處分八月敗陽岡出擾之賊九月令總兵文龍德等戰於甘棠橋斬其酋尋拔陽岡進毀青山賊壘十一月在諫壁陣城上塘等鎮三戰三捷二年正月丹陽踞匪分股來犯魁玉偕馮子材疏陳戒嚴情形諭曰鎮營以有限之兵當逆賊六七萬衆其勢不可以浪戰該提督等令水營先固江防派總兵田宗揚等將東路羣逆殲除西南一帶因有重兵賊未深入擬俟其臨近而痛剿之進止頗合機宜嗣後仍當竭力固守雖賊衆紛乘總示以不可動搖之勢以固要區二月奪牧馬口賊卡進擣句容之薛村乘霧逼柏林村奪其壘直薄丹陽西門先後斃賊酋數十衆三千餘名捷入詔嘉勉之時巡撫李鴻章自上海進兵賊畏滬軍之威知鎮防兵單地蹙擬攻其瑕三月蟻聚駭溪犯我東路魁玉派兵迎剿戰於諫壁斬獲甚多常州江陰賊黨巨萬繼至屯丹陽新豐等處並在越河以南紮筏圖侵南路四月偵知常州十大酋謀分十路出犯江防魁玉飛咨沿江各軍嚴防偷渡撥隊扼東路丹徒鎮之衝分守灣子橋別派遊擊之師覘賊所向擊之既東路賊欲犯丹徒鎮攻我守橋兵以

木鐸伺隙渡河官軍禦之賊不得逞而大隊萬餘繼至抵死爭之魁玉調兵再進一由南門繞東路翦賊尾一由東路馳丹徒鎮堯水奪其筏大捷既而馮子材馳赴丹徒鎮令田宗揚守之自循河以南則賊已由洪山凹而下數里不斷魁玉布置城守分軍策應未幾諸路皆捷賊遁時上游各軍連克要隘雲集金陵敗賊南奔半爲丹陽賊所留廣屯米石意在全力相持水陸各隘拆橋伐木阻我進路馮子材會商魁玉以爲金陵合圍之後賊必號召外援亟圖一逞且逆情旣蹙難保不鋌而走險爲圍魏救趙計正宜因利乘便進剿牽制之遂令田宗揚等更番出擊由馬陵進規丹陽六月奏入諭嘉其尙中窾要惟防兵單薄務當加意防範毋稍大意七月僞忠王李秀成號召大股悍賊厚集丹陽句容謀撲鎮城僞兌王等四酋由常州宜興金壇來挾丹陽萬餘衆一由東南甘棠橋下竄圖撲南門一由西南八公洞謀犯雲臺寶蓋諸山營壘官軍兩路迎戰一出東南在五峯口三里岡殊死鬪多受傷者一出西南戰於觀音山下會東南路已得勝併軍衝突賊大潰自後不敢復出十月上上下下游軍威大振慮竄匪擾及鎮防敕馮子材魁玉隨時會同水師實力防剿毋稍疏虞尋疏言蘇常各逆悉索死黨六七萬分屯句

容丹陽丹陽屏蔽蘇常賊守尤力其水湖博洛餘干等處巢卡槍礮極多鎮防近接丹陽未及百里當此上游埽平羣兇震懼之時正宜乘我軍威用資犄角連日挑派馬步更番哨擊擬先將沿途賊壘設法翦除仍伺賊所向進紮新豐方不至腹背受敵蓋鎮江內外各營合之丹徒屯駐兵勇止一萬二千八百名留守城垣分防營隘僅能抽撥五六千人而援賊屯丹句者尚以數萬計彼衆我寡自夏秋以來部將咸以進兵丹陽爲請臣等以爲賊勢愈蹙官兵愈當謀出萬全未可虛張進取之名轉貽拔本之誚今者金陵圍合東壩諸軍建瓴而下則因利乘便正在此時見已挑勁旅六千以總兵田宗揚張文德等配齊軍火各持一月糧聽候進止另派游兵三千爲後路接應其餘弁勇扼守城池暨雲臺寶蓋諸山俟提督鮑超軍由溧水進攻句容官軍卽由新豐進規丹陽收夾擊之效報聞十一月李鴻章克蘇州有旨令防剿諸軍慎固地方毋令敗匪闖入時丹句各酋注意鎮城魁玉偕馮子材統籌戰守設防諫壁等處丹陽賊覲我兵單謀大舉嗣以越河新豐各防營聯絡謹嚴遂竄句容龍潭而去逆首李秀成潛入金陵其黨數萬仍屯句容丹陽寶堰石埠橋龍潭官軍分紮甘棠橋以扼其衝屢戰屢捷尋李秀成之

子糾句容悍賊二三萬來犯魁玉偕馮子材分路堵禦屬將領勿輕進俟賊逼近以排槍連環擊之斬其酋鎮防以固三年正月丹陽逆首僞然王陳逆往援常州令英逆之子留守魁玉等派兵哨擊多張旗幟以驚擾之刊發告示勸賊反正遣間諜分赴城鄉解散其黨令相疑貳有願爲內應者魁玉等撫之卽乘間平丹陽西路賊卡各村受魁玉等密諭截殺運糧逆目甚多陳酋知人心離散撤回丹陽二月官軍拔白兔博洛水湖等鎮三月張文德進攻餘干新豐賊開壘乞降會攻丹陽時鮑超軍至句容魁玉等派副將楊青山等四營助剿鮑超等克句容魁玉等以寶堰屯甸尙有賊壘飭陶茂森移兵疾擣之張文德合攻丹陽之師連毀西路礮臺賊百計抵禦魁玉飭水師六艘入練湖斷賊運道拔湖頭村未幾鮑超克金壇賊聞風膽落魁玉等遂令張文德會同各軍取城外逆壘四月合圍賊困鬪益厲官軍冒煙填濠而進毀更樓哨臺斬關入立復縣城誅著名積匪數十擒斬盈萬疏入諭曰鎮江官軍圍攻丹陽由西門斬關而入常州鎮江一帶一律肅清魁玉幫同馮子材辦理軍務亦甚得力著加恩賞給巴圖隆阿巴圖魯名號六月上以江寧克復全股悍賊盡數殲滅魁玉幫辦鎮江軍務協同守禦特賞雲騎尉

世職七月復署京口副都統十一月疏言咸豐三年賊陷金陵駐防官弁殉難者二百九十三名經前將軍和春奏蒙恩卹今查殉難官弁有嫡子者十八人有嫡孫者三人有胞弟者二人此外惟就其族中見存之人令領催具結過繼承襲又此項人員例應引見而餉項未復川資難籌請照綠營例試用三年再行送部從之十二月調補京口副都統四年二月署江寧將軍五月陞授將軍七年入覲賜紫禁城騎馬九年兩江總督馬新貽被刺出缺命暫行署理兩江總督嚴審其事又命兼署辦理通商事務大臣時天津教案未結江防緊要魁玉疏上長江防範事宜略曰長江下游扼守事宜與提督黃翼升議於各處安設礮位並將分汛水師查照舊章暫令歸併一處排泊操練另調礮船三十號駐紮金陵爲上下游策應之師得旨所籌均尙妥協卽著悉心區畫慎密布置中外交涉事件責無旁貸著督率蘇松太道涂宗瀛等加意防範弭患未形十年調成成都將軍十二年四川我邊廳蠻匪滋事遣師平之復擇蠻衆之樸誠者充千百戶設立夷兵夷約次第建碉修堡上嘉獎之光緒元年西藏裏塘喇嘛更登培結因番官侵漁土戶聚衆萬餘踞藏里一帶魁玉偕總督吳棠派員帶漢土官兵攻之更登培結自焚餘黨

悉平二年雷波廳蠻匪滋事借吳棠撥營分道進攻殄除首逆三年以舊傷復發
籲請開缺許之五年捐山西賑二千兩下部優敘隨帶加五級十年卒遺疏入諭
曰前任成都將軍魁玉於咸豐年間從事戎行轉戰湖北江南等省疊著戰功歷
任副都統將軍克勤厥職前因患病開缺茲聞溘逝軫惜殊深加恩著照將軍例
賜卹任內一切處分悉予開復應得卹典該衙門察例具奏伊孫一品廕生文沖
著以郎中分部行走用示篤念蓋臣至意尋賜祭葬予諡果肅十八年兩江總督
劉坤一以魁玉輿情感戴請於鎮江府城捐建專祠由地方官春秋致祭允之子
扎勒哈蘇廣東惠來縣知縣扎克丹直隸河間府知府邁拉遜舉人山西河東道
墨德哩候選副將扎勒哈哩舉人花翎三品銜湖北候補道佛遜布候補驍騎校
穆克登布舉人花翎三品銜江蘇候補道孫文通二品廕生文明佐領文輝驍騎
校文沖舉人工部郎中文治兵部郎中文煥江西候補同知文達防禦文蔚文錦
文愷均候選郎中文富盛京兵部郎中文秀候選筆帖式

金順

金順伊爾根覺羅氏滿洲鑲藍旗人吉林駐防咸豐三年隨委營總莫爾賡額奉

調出征山東竄匪由領催洊保驍騎校賞戴藍翎六年粵逆竄兩湖金順隨副都統多隆阿敗賊於湖北麻城蘄州經湖廣總督官文上其功賞換花翎嗣於黃梅縣屬黃蠟山打仗出力賞圖爾格齊巴圖魯名號八年陞防禦九年攻克安徽太湖等處賊壘以佐領補用十年二月隨楚軍克太湖擢協領加副都統銜十一月官軍圍安慶逆首陳玉成等自舒城廬江上竄圖牽制官軍多隆阿列營掛車河西嚴陣以待賊踰河來撲官軍三路接戰金順率馬隊從香鋪街衝擊追殺二十餘里賊壘悉平逆首黃汶金糾捻渡江謀與陳玉成合金順又追擊於新安渡斬馘甚衆同治元年從荊州將軍多隆阿剿辦髮捻攻克河南荆子關二年二月進剿陝西回逆擣王閣村羌白鎮老巢克之七月敗賊於渭河盡埽南岸賊寨賞加頭品頂帶九月進徇高陵縣城克之涇河池北肅清乘勝追剿連破蘇家溝渭城老巢三年二月漢南回逆東竄鳳翔金順帶馬隊趨灃峪堵擊三月全陝回務肅清多隆阿疏言金順入關頻年轉戰勇往冠羣勳勞卓著荊州將軍穆圖善陝西巡撫劉蓉亦稱金順忠實無僞樸勇有謀此次逆蹤竄入腹地不避艱險每戰必先其馭軍嚴明有法命交軍機處記名遇有副都統缺出請旨簡放五月授鑲黃

旗漢軍副都統六月調西安副都統尋髮逆竄徧陝西省城爲官軍所遏西奔金順督隊追及於灃河東岸興隆鎮大敗之嗣僞啟王梁成富悍黨麇聚熬屋之店子頭田峪口等處金順率馬隊進紮南集賢村徧賊而營直搗店子頭賊壘賊三路來撲金順麾隊大呼馳突殪賊千餘人拔其巢七月賊踞鹿門村等處各堡爲持久計金順偵知賊將攻淇水二堡遂率馬隊會各軍痛剿之四年正月進攻寧夏城南賊卡奪其礮臺四月逆回句結固原大股竄匪蔓延黃河兩岸金順抵平羅訶知賊在黃渠橋寶豐南率軍分三路擣之斬僞王孫義保等五年二月調寧夏副都統九月署寧夏將軍七年正月剿賊定邊等處獲勝二月回匪竄踞寧條梁陷懷遠犯榆林南關詔趣金順速赴寧條梁剿賊九月進紮榆林連戰皆捷十一月賊竄葭州金順遣將敗賊於關山苑又敗之於張家坪八年三月復綏德州城擊退榆林之賊八月陝匪竄寧夏金順馳抵纏金會合提督張曜等軍進剿大破之連拔賊寨十二月陝回趙五阿渾來援王家疇金順偕張曜擊斬之並克馬泰納洪兩寨金順身受數創九年二月寧郡降回馬萬選等爲馬化澂誘叛金順遣將擊遁尋以新渠寧郡防兵無多陝甘各回麇集疏請調豫軍來寧會剿上命

提督宋慶率營兼程前往四月王家曠賊由牛頭山竄河西金順會合諸軍敗之於黃渠口斬悍酋梅照喜等十年正月攻克王家曠捷聞賞穿黃馬褂並交部從優議敘二月進規通貴堡克之生擒首逆馬萬選餘匪窮蹙乞降四月擢烏里雅蘇臺將軍十一年五月疏陳赴任未能迅速請暫統全軍進紮甘涼鎮番一帶效力前驅允之尋以馳抵寧夏未報起程前往鎮番命開去烏里雅蘇臺將軍缺交部嚴加議處尋奉旨革職留營責令即日督率所部赴肅州九月拔隊赴肅州剿賊鎮番獲勝是月烏魯木齊提督成祿行抵金塔上命金順速赴肅州統其軍十二月抵涼州派隊赴肅州助剿十二年九月會同欽差大臣陝甘總督左宗棠克復肅州詔開復革職處分賞還黃馬褂花翎勇號尋以烏魯木齊都統景廉駐紮古城兵力單薄敕金順率所部二十營馳赴古城規復烏魯木齊十二月授正白旗漢軍都統十三年逆首白彥虎竄入瑪納斯圖犯古城金順督師出關遣提督劉宏發等馳赴古城自率馬步西進暫紮安西屬境尋命幫辦新疆軍務光緒元年調烏魯木齊都統二年六月攻克瑪納斯北城陣斬僞元帥馬興九月攻克瑪納斯南城十月授伊犁將軍十一月敘攻克瑪納斯城功賞戴雙眼花翎並給雲

騎尉世職四年攻克西四城回疆底定賞加軍功三級十一年詔來京陛見十二年二月疏報交卸營務北上六月卒於途次遺疏入諭曰伊犁將軍金順忠勇樸誠勳勤懋著歷在軍營帶兵剿賊轉戰湖北安徽等省疊克堅城嗣入陝剿辦回逆戰功尤偉洵陞將軍幫辦新疆軍務克復各城收回伊犁撫循安輯克盡厥職上年諭令來京陛見中途患病當經賞假調理方冀漸次就痊長資倚畀茲聞溘逝軫惜殊深著加恩追贈太子太保銜照將軍例賜卹任內一切處分悉予開復應得卹典該衙門察例具奏賞銀一千兩由甘肅藩庫給發靈柩回旗時沿途地方官妥爲照料該將軍有無子嗣著該旗查明具奏用示篤念蓋臣至意嗣福州將軍穆圖善等奏陳金順歷年勳績請於立功省分建立專祠並將生平戰績宣付史館立傳允之尋賜祭葬予諡忠介十三年陝甘總督譚鍾麟以金順在陝甘戰績以寧夏爲尤多請附祀西安將軍多隆阿專祠以妥英靈而順輿情詔如所請十五年慈禧端佑康頤昭豫莊誠皇太后歸政追念功績最著諸臣各賜祭一壇金順與焉

清史列傳 卷五十六

大臣畫一傳檔後編十二

穆圖善

穆圖善那哈塔氏滿洲鑲黃旗人黑龍江駐防道光二十六年由前鋒補驍騎校咸豐三年陞委參領管帶馬隊從征河南逆匪轉戰直隸連鎮山東高唐山西曲沃等處所向有功五年調赴湖北剿賊德安勝之賞戴藍翎六年隨大軍克復漢陽府城賞換花翎七年晉防禦八年陞佐領九年由楚入皖大軍攻克安慶之石碑偽城穆圖善在事有功得旨陞補協領十年太湖圍師四集合擊賊於小池驛尋下太湖潛山穆圖善戰功稱最賞副都統銜十一年偽英王陳玉成率悍黨回襲安慶偽璋王等向桐廬疾趨以應陳逆穆圖善駐守挂車河老營賊分股撲挂車河穆圖善令副將石清吉等三路接戰歷三時許賊奔潰陳逆又糾悍黨分路進擾官軍乘賊遠來築壘未定奮力迎擊斬馘逾萬遂克桐城並復宿松黃梅蘄水廣濟等邑賞西林巴圖魯名號同治元年三月攻陳玉成於廬州陳逆負固多

年深溝高壘恃水爲險穆圖善先破城外賊壘沿河立營晝夜環攻賊悉銳出拒官軍大敗之府城遂復捷入命交軍機處記名遇有副都統缺出請旨簡放七月髮捻各率大股分途西竄欲合漢中回逆肆擾秦豫兩省上命將軍多隆阿督辦陝西軍務取道鄧州先清武關入陝之路穆圖善從之由商州馳駐西安時賊已陷紫荊關穆圖善遂還軍商州出陟嶺僞啓王梁成富率逆黨麕至穆圖善督軍力戰直薄紫荊關斬關而入賊不支潰走八月授西安左翼副都統閏八月捻首姜凌泰率黨襲商州不克旋犯武關又設伏捉馬溝將以昏夜劫多隆阿營穆圖善偵知暗率兵截伏賊敗之多隆阿偃旗息鼓以待武關之賊俟賊近與穆圖善內外夾擊賊潰走自相踐踏墜崖死者無數擒姜凌泰西竄捻匪殲除殆盡捷聞賞都統銜九月髮逆乘多隆阿等軍剿捻楚境兵單欲合四川賊石達開黨上窺荆襄下伺武漢僞曾王賴汝洸僞端王藍成春竄棗陽陳得才梁成富竄安陸多隆阿與穆圖善等拔隊急行奮力追擊大破之賊盡出天河口向界牌走襄河之防遂固二年復乘勝入陝攻高陵穆圖善督兵擣穴首先登陴面受槍傷誓軍血戰立復其城賞穿黃馬褂三年二月進規盤屋多隆阿潛穴城東地道破其月城

賊抵死搶築穆圖善派兵四面環擊遂下之擒僞賢王藍朝元時多隆阿被槍傷
疏請以穆圖善接辦軍務多隆阿尋卒於軍上命穆圖善署欽差大臣統其衆四
月擢荊州將軍五月逆首賴汝洸張總愚分股東竄一由羅山趨光山一由黃陂
偃漢口號稱十萬穆圖善飭將弁分援楚豫時粵匪自荆紫關敗創游弋鄖西境
聞陝防空虛旬結悍賊圖犯西安穆圖善調兵自潼關直擣店子頭老巢擒僞統
領甘潤斬僞都統蔡信於陣賊奔潰沿途追擊賊渡黑水峪河竄焦家巷穆圖善
會合諸軍併力圍攻屢戰屢捷賊勢蹙不復振八月新疆逆回倡亂連陷庫車喀
喇沙爾烏魯木齊滿城關內逆回聞聲響應穆圖善奉命督辦甘肅軍務渡河而
西營於渠口堡與西安將軍都興阿先定規復寧夏之議十一月穆圖善移營偃
賊巢賊出衆來撲官軍力戰卻之諜知賊於圩南接濟不絕飭副都統杜嘎爾率
馬隊分股掩襲奪羸馬數百頭揮軍過濠攻破清水堡大小各圩師次距寧夏二
十里之金積堡十二月攻近城納家牖賊圩敗西路援賊城賊乘官軍方攻圩出
鈔我後急分兵迎戰並以杜嘎爾馬隊截擊之賊返走四年正月偵賊於元日椎
牛置酒不及備攻奪城南礮臺連毀數寨時伊犁赴援巴燕岱之兵中途潰散新

疆徧地皆賊古城待援尤急疊奉嚴旨催令率所部出嘉峪關抵哈密亟籌進兵之策穆圖善瀝陳賊衆兵單官軍如入虎穴利在速戰惟賊環城堅壘抵死固守且日以馬隊截我轉運近與都興阿竭力分防尙時有顧此失彼之慮若遽將一軍調撤則衆寡懸殊滿城平羅等處必愈形危殆當此固原未復河狄鞏秦一帶不能刻期埽蕩全省幾至不可收拾設南勇一聞出關紛紛潛逃是內地之軍心先渙必至貽誤大局自來用兵關外非攜餉裹糧不敢輕進甘省已自顧不遑呼籲鄰餉又緩不濟急況平番告警甘涼驛路中梗無徑可通卽勉強繞越亦必節節阻滯與其有出關之名而無善策曷若合力規復寧靈先清北路第新疆數百萬生靈倒懸未解何忍坐視應以四川調防西寧之總兵鶴齡改援哈密與都興阿前調總兵德祥數營一併兼程前進以救目前之急疏入上寔其議二月靖遠南山賊竄過金積堡焚葉升等上八堡踞小壩修堰穆圖善慮賊乘春漲決渠水灌營分兵扼寧夏城東及城東南賊連夜跨護城河隄築壘斷我汲道官軍立毀之會固原敗賊由元城鎮西竄下馬關穆圖善遣副將趙有勝防定邊副都統西蒙克西克防花馬池三月賊趨平羅寶豐窺鐙口欲絕寧夏圍師餉道城賊復出

撲金積堡營穆圖善留軍禦之親率杜嘎爾等馳解平羅城圍又擊賊寶豐斬賊
酋馬生顏花馬池定邊防軍亦同時獲捷賊勢蹙迫閏五月調補寧夏將軍賊被
圍日久分黨潛襲滿城牽綴官軍穆圖善督親軍戰卻之悉平城東賊還軍郡城
又分軍東至花馬池定邊一帶西至滿城分防數百里賊計愈窮十二月奉旨督
辦甘肅軍務時寧夏賊疊戰不勝欲奪路他竄又以官軍防備甚嚴不敢出各路
援賊皆絕因納礮械縛賊渠以降遂復寧夏五年賊圍慶陽穆圖善遣軍擊走之
解城圍六年三月署陝甘總督值歲大饑商販不通穆圖善飛商阿拉善旗親王
貢僧珠爾默特撥駝招販月得市糧數百石輪回平糶標兵首亂者誅之糧員侵
蝕者劾之民心始定五月剿米拉溝松樹莊賊巢平之九月疏陳甘省兵多糧缺
毫無儲蓄請由四川借給倉糧四萬石自白水江運甘藉資飽騰又言江浙數省
月協甘餉十五萬由楚轉解漢中接運嗣西安糧臺林壽圖因慶涇營餉無措奏
准於漢中酌提致協餉留陝愈多濟甘愈少飢軍譁譟職是之由請自後委員赴
楚領解由漢中徑達秦安其慶涇各軍統歸秦安分贍庶免輻輳皆奉俞允時甘
省回衆與漢圍仇怨日深藉端搆釁十月河州東鄉逆回先出大股襲省城焦家

灣河干鎮各路之賊約期同至穆圖善遣將縋城出與援兵併力夾擊閱五晝夜城圍始解七年正月分軍渡洮河而西剿東鄉回穴擒斃多名奪獲羸馬器械無算遂復渭源三月進攻狄道狄道陷已六年官軍百戰不能拔穆圖善出省督師僅裹半月之食至卽布長圍輪流仰攻賊不能息又豫留間道俟賊出輓運突起伏兵要擊之故藉寇糧以贍飢軍卒平狄道並擊退陝回大股伏莽始清八年以陝西大局平定與巡撫劉典會奏請先補行陝西壬戌甲子兩科鄉試甘肅之毗連陝疆者亦准赴試並留額俟甘肅全境安謐請特開一科上允之九年正月陝回竄永豐堡穆圖善派隊擊之殲其衆四月回逆再陷渭源復陷狄道肆擾秦鞏穆圖善派軍分防鞏昌寧遠禮縣並擊破牟佛諦賊壘連復渭源狄道兩城八月蘭州防軍譟餉變幾不測穆圖善斬管帶親軍中營副將張全魁徇於軍亂遂止十一月卸署總督仍駐邠乾一帶督辦蘭州防務十年五月河狄回逆麇聚西柳溝出擾村堡穆圖善繞道擊之斬馘千餘賊遁走十月穆圖善與左宗棠各軍渡洮河先破高家集分兩路並進連毀黑山頭鄧家灣三甲集賊堡賊見官軍盡奪要隘退扼太子寺大東鄉各土寨官軍偪近立營聚而殲之十二年十月捷入賞

雲騎尉世職十三年二月入覲賜紫禁城騎馬旋命回任光緒元年四月命來京
陛見署正白旗漢軍都統五月吉林馬賊由松花江竄巴彥蘇蘇焚燒衙署東撲
呼蘭復誘竄金開荒等匪出山搶擄六月調署吉林將軍七月呼蘭賊竄黑山八
月賊由三姓竄寧古塔之樺林樹經官軍先後殄滅東山金匪復嘯衆十餘萬烏
斯渾卡倫外亦聚馬賊數百謀掠阿勒楚喀穆圖善派軍防堵因便截剿賊無可
掠食其黨漸散十一月疏言吉林風氣偷弱近來馬賊及徒步之棒子手橫行村
路雖數百戶屯市亦聞而畏避任其飽掠兵至則遠颺入山而山中金匪十餘萬
三姓長春廳亡命賭徒久住城市與金匪暗通聲氣時欲竊發三姓寧古塔琿春
邊外延袤千里外患交乘統籌全局非練馬步隊萬二千不敷守禦計通省制兵
七千七百餘以二千豫備供差外擬挑選西丹練馬隊七千步隊五千分駐操防
三姓寧古塔各駐馬隊一千步隊一千由三姓寧古塔至省以阿勒楚喀爲適中
總路亦撥兵扼紮餘皆駐於省城及各邊隘隨時調派稽查荒佃捕拏金匪冬春
圍獵訓練操演不數年卽成勁旅實爲防邊要策上命戶部等會議以餉需無措
格不行二年以濫保永不敘用之已革道員舒之翰留於吉林差委坐革職三年

四月授青州副都統八月陞察哈爾都統十月復賜紫禁城騎馬五年六月授福州將軍十年七月法人爭地越南又分兵船滋擾閩粵以圖牽掣我軍上命大學士左宗棠爲欽差大臣以穆圖善暨漕運總督楊昌濬幫辦軍務穆圖善以長門爲入省門戶親駐長門晝夜修防時值各國重修條約法人於北洋議款不成折而南走潛駛兵船入泊馬尾先據腹地穆圖善援萬國公法阻之不肯退法人又開礮擊我兵船轟我船廠我軍奮怒擊斃法將孤拔敗其陸軍法人恐長門絕其歸路卽由內攻出會其接濟兵船亦至官軍腹背受敵穆圖善誓師設伏四面抵禦奮自然礮擊沈法船一隻竭力指揮閱四晝夜不稍懈法人見外援已敗急欲出口將各船排列長門對峙之金牌復毀我礮臺二座防兵盡潰惟穆圖善所部隊伍屹立不動法人登岸搦戰我伏兵盡起轉敗爲攻奪獲敵礮二划船一焚燬舢板船二又擊沈烏波船一餘船逃竄穆圖善馳報接仗情形請旨治罪上以穆圖善力戰殺敵功過相抵免議法人尋就撫十月以閩海關積年協解甘肅新疆軍餉功賞頭品頂戴十一年七月命來京陛見十月上授穆圖善爲欽差大臣會同東三省將軍辦理練兵事宜十二月賞還勇號十二年五月至盛京與將軍慶

裕會商練兵章程隨赴吉林黑龍江竟日挑練十三年七月卒遺疏入諭曰福州將軍穆圖善老成練達秉性忠誠咸豐同治年間出師安徽江南湖北陝西甘肅等省歷著勳勤洵陞將軍克盡厥職前年特授欽差大臣辦理東三省練兵事宜馳驅周歷況瘁不辭規畫精詳漸臻成效方冀克享遐齡長資倚畀遽聞溘逝軫惜殊深穆圖善著照將軍軍營病故例賜卹加恩予諡前經得有雲騎尉世職著改爲騎都尉世職任內一切處分悉予開復應得卹典該衙門察例具奏賞銀一千兩治喪由盛京戶部給發靈柩回旗時沿途地方官妥爲照料伊孫那福著俟百日孝滿後由該旗帶領引見伊子恩保承保均著俟及歲時由該旗帶領引見十一月慶裕奏穆圖善前後領兵近三十年轉戰九省大小五百八十餘戰存心謙抑口不言功與諸臣共事虛衷商榷慮以下人故能迅奏膚功蔚爲重望初多隆阿之奏請幫辦也一時統將不下十數員獨以穆圖善厚重威嚴堪膺付託厥後蕩平陝境卒復主帥之仇甘肅久淪兵燹戶口流離各省協濟百呼罔應穆圖善內撫叛衆外禦兇鋒籌備餉需激勵將士西征之局日有起色寇氛稍靖駐節省城凡募制兵懲游勇築碉堡修河橋立社倉利轉運給牛種教耕桑諸實政皆

次第舉行及卸署總督移駐邠乾擇地團防儼成重鎮而左宗棠亦得以一意進兵新疆之平定穆圖善實有力也馬江之戰法人愈長驕心圍臺灣攻鎮海飛駛如電惟不敢再越長門一步以穆圖善捍禦之力也卒之日百姓巷哭失聲謹就見聞臚列懇恩宣付史館並於立功省分及黑龍江地方建立專祠允之尋賜祭葬予諡果勇十六年安徽巡撫沈秉成以穆圖善在皖屢立戰功請於安慶省城建立專祠十九年陝甘總督楊昌濬復以穆圖善在甘厥功最多省城專祠落成奏請列入祀典均允之孫那福襲世職

英翰

英翰薩爾圖氏滿洲正紅旗人道光二十九年舉人咸豐四年揀發安徽以知縣用九年署合肥縣知縣時粵逆竄擾皖北英翰屢率鄉團擊敗之奉旨加五品銜並賞戴藍翎尋敗賊於華子岡小河灣等處敘功以同知仍留安徽補用十一年署宿州知州同治元年擒逆竄犯宿城英翰隨總兵田在田攻克高黃山寨奉旨加知府銜復進攻湖溝擒逆克之漕運總督袁甲三上其功命以知府仍留原省補用並換花翎二年二月擒首張落刑東竄分撲青疇等墟英翰力戰卻之時官

軍攻克雉河集老巢英翰授策降賊李勤邦等擒張落刑誅之捷聞授潁州府知府並賞加道銜三月安徽巡撫唐訓方奏稱英翰人地相宜將來大堪造就奉旨交軍機處存記四月袁甲三奏稱英翰伉爽獨立沈勇有謀在事任勞兼識機變前在臨淮剿辦滄北各匪墟均資其膽略疏入報聞五月叛逆苗沛霖分黨竄犯蒙城壽州等處英翰督軍攻克蒙城附近賊墟並將圍攻壽州之賊追殺略盡六月會同總兵姚廣武軍夾擊韓村賊寨破之諭曰蒙城被圍甚急臨淮尤關緊要著唐訓方妥爲調度令英翰姚廣武兵勇分紮後路通蒙營餉道七月會軍夾擊狼山賊營賊棄壘遁蒙城糧道遂通八月署廬鳳道九月擢按察使十月督軍援蒙城進攻蔡家墟斷賊糧道檄參將程文炳等四路兜剿夷賊壘數十斬逆首苗沛霖於陣殲賊萬餘收撫附苗各墟甚衆蒙城圍解捷入諭曰反正各墟應如何撫循控制之處著唐訓方督飭英翰相機辦理以期次第肅清毋令再萌反側三年英翰軍扼雉河五月髮捻各逆漸次東趨欽差大臣科爾沁親王僧格林沁調英翰移軍正陽關尋賞給格洪額巴圖魯名號七月髮捻各逆圍湖北麻城英翰統軍協剿襲破柏子塔賊館奪賊營十有奇八月逆酋陳德才率衆由白果竄至

閻家河英翰督軍迎擊賊潰遁旋以請獎冒濫撤銷勇號部議降三級調用特旨加恩改爲降五級留任時陳逆率衆由松子關圖竄六安安徽巡撫喬松年奏調英翰回皖協剿敗賊金家寨賊復竄六安青山英翰會諸軍由胡家店繞赴六安擊走之九月授布政使時逆匪竄聚英霍一帶分擾潛山邊境諭令喬松年飭英翰扼要駐紮妥籌援應十月擊賊於樂兒嶺追至黑石渡敗之逆黨窮蹙乞降皖北肅清十二月喬松年奏言英翰一軍應移防潁州以扼自豫入皖之路四年四月復請以英翰移紮宿州上均從之五月賊由山東南犯皖境諭令喬松年卽飭英翰等軍分路截擊毋令竄入腹地致滋蔓延時英翰督率道員史念祖等屯雉河集拒賊賊聚衆圍之英翰夜以二十騎突出挾援師俱進奪回高鑪集要隘並攻克張墟賊壘雉河圍解賞達春巴圖魯名號五年八月陞巡撫十月奏請豁免安徽各屬緩徵錢糧六年十月復奏請緩設鳳陽關稅均如所請行十一月丁父憂奉旨英翰向在安徽帶兵有年頗資得力著毋庸開缺賞假一月經理喪事遇有緊要軍務仍當妥爲籌辦假滿後作爲署理安徽巡撫俟軍務告竣再行扶柩回旗補行穿孝該撫當體金革無避之義移孝作忠以副委任時賊首任柱賴汝

洸自河南竄山東號東捻張總愚自自河南入陝西號西捻勢張甚英翰定計督諸將渡淮併力剿堵東捻之勢以蹙任柱賴洸亦旋被擒斬論功賞三等輕車都尉世職七年正月英翰奏稱軍務肅清籲懇扶柩回旗補行穿孝奉旨見在東捻雖已蕩平而撫輯降衆撤軍籌餉各事宜均關緊要著英翰將一切善後事務籌辦妥協再行回旗補行穿孝英翰回旗後安徽巡撫著吳坤修署理尋奏捻首李允窮蹙詐降請旨就地正法從之七月張總愚戰敗投水死西捻亦平英翰以督軍會剿得旨賞加太子少保銜並交部照一等軍功議敘英翰奏辭不許尋奉父喪回旗八年三月以百日服滿葬事未完奏懇留京當差詔賞假兩箇月假滿卽赴安徽署任七月抵任九年奏言安省漕糧請照案折徵以便輸將詔如所請十年派總兵劉永清於亳州界溝集地方拏獲捻首宋景詩疏入報聞十一年匪徒李四等聚衆皖豫之交糾合捻黨張振顥等負隅抗拒尋討平之上嘉其剿捕安速十三年九月擢兩廣總督初髮逆僞輔王楊輔清自江南肅清後輾轉前逃至是經英翰派總兵馬融和等於福建晉江縣境獲之遂寘於法十一月入觀光緒元年正月上以英翰應併襲父福隆阿所遺雲騎尉世職命晉爲二等輕車都

尉世職二月抵任先是廣東闖姓賭局於同治十三年奉旨嚴禁五月商人潘姓改爲守助會名目在總督衙門呈請捐繳餉銀經英翰批准七月奉上諭廣東闖姓賭局前經降旨裁革該督撫自宜遵旨嚴禁乃本年五月內英翰以此項捐罰收款甚鉅可指爲辦防之用輒於具奏後不候諭旨遽行出示弛禁殊屬不合著交部議處八月廣州將軍長善副都統果勒敏復疏陳英翰隨員招搖滋事遂命來京聽候部議尋議革職十月上念英翰前勞賞還世職旋賞二品頂戴署烏魯木齊都統二年七月補都統十二月卒遺疏入諭曰烏魯木齊都統英翰才猷練達勛績懋昭由知縣剿辦捻匪疊著戰功受穆宗毅皇帝特達之知洊擢安徽巡撫掃除餘逆綏輯地方深資倚畀旋於兩廣總督任內因案革職朝廷念其前勞簡任烏魯木齊都統籌辦一切頗有條理方期久膺重寄恩眷長承遽聞溘逝悼惜殊深英翰著加恩賞給太子太保銜賞還勇號花翎照都統軍營病故例從優賜卹任內一切處分悉與開復應得卹典該衙門察例具奏准其入城治喪靈柩回旗時著沿途地方官妥爲照料英翰之母年逾七旬深堪廬念加恩賞給銀二千兩由廣儲司發給並賞給人漚六兩以示優眷尋賜祭葬四年正月陝甘總督

左宗棠疏陳英翰勞績詔准於安徽省城建立專祠予諡果敏四月安徽巡撫裕祿奏請於鳳陽壽州宿州阜陽蒙城渦陽等立功地方各建專祠並將事蹟宣付史館均得旨俞允十五年慈禧端祐康頤昭豫莊誠皇太后歸政追念前勞命開復總督英翰無子弟英壽戶部額外員外郎襲世職

托雲

托雲彥札氏滿洲正黃旗人吉林駐防由領催保送三音哈哈道光二十六年七月引見賞藍翎侍衛命在乾清門行走二十七年上謁東陵隨扈賞三等待衛並賞穿黃馬褂咸豐二年擢二等待衛三年三月陞頭等待衛十二年以捐輸交部議敘四年三月上閱馬射托雲中箭六枝上嘉獎之命在御前侍衛上行走十二月補正藍旗蒙古副都統八年四月署正白旗護軍統領六月命進圓明園班並管理御槍處事務七月署鑲藍旗護軍統領九月上閱視八旗槍操以托雲等平日訓練認真下部議敘十二月補鑲藍旗護軍統領九年署鑲藍旗漢軍副都統十年調鑲紅旗滿洲副都統十一年署鑲紅旗漢軍副都統同治元年十月署鑲藍旗漢軍副都統十一月補正藍旗護軍統領三年十月調正白旗護軍統領十

二月命兼管火器營事務四年三月擢右翼前鋒統領五月調正紅旗滿洲副都統閏五月丁母憂十月以辦理神機營操務出力交部議敘十年充左翼監督十一年補鑾儀衛鑾儀使十三年署正白旗蒙古副都統光緒元年六月神機營奏保營務出力賞都統銜八月署鑲藍旗滿洲副都統三年二月署正紅旗滿洲副都統四月補左翼前鋒統領九月兼署正藍旗滿洲副都統四年五月調正紅旗滿洲副都統十月賜紫禁城騎馬十一月授正紅旗蒙古都統旋以薦舉營總文忠護軍校國春等卓異經御史鄧慶麟奏參文忠等貪婪各款查訊得實托雲坐濫保部議降二級調用奉旨改爲降四級留任五年十一月因病請假十二月卒遺疏入諭曰正紅旗蒙古都統托雲練達老成道光咸豐年間由侍衛在御前乾清門行走疊受先朝恩遇歷任副都統護軍統領前鋒統領鑾儀使朕御極後擢授都統均能勤慎供職前因病賞假方冀調理就痊長承恩眷茲聞溘逝悼惜殊深加恩著照都統例賜卹任內一切處分悉予開復應得卹典該衙門察例具奏賞銀一千兩治喪由廣儲司給發伊子工部員外郎阿克占著以本部郎中補用以示眷念耆臣至意尋賜祭葬子阿克占工部郎中

卓保

卓保寧古塔氏滿洲鑲黃旗人道光二十五年進士改翰林院庶吉士二十七年四月散館授編修六月充日講起居注官二十八年二月陞侍講七月陞侍講學士二十九年轉侍讀學士三十年充咸安宮總裁咸豐元年署文淵閣直閣事二年五月大考二等得旨記名遇缺題奏並賞緞匹七月授詹事府少詹事四年因署佐領圖記呈遞謝恩摺錯寫名字以庶吉士降補五年三月補右春坊右庶子五月仍充日講起居注官七月授翰林院侍講學士九月轉侍讀學士十二月陞詹事府少詹事六年授國子監祭酒七年丁父憂八年服闋九年充江南鄉試副考官十一年擢內閣學士兼禮部侍郎銜充文淵閣直閣事同治元年正月擢兵部右侍郎兼署工部右侍郎兼管錢法堂事務二月授正黃旗漢軍副都統調戶部左侍郎兼管三庫事務七月命恭理喪儀旋兼署鑲白旗護軍統領閏八月調正紅旗滿洲副都統九月以恭送梓宮禮成加三級十月命恭辦定陵工程尋兼署正紅旗蒙古副都統二年七月兼署右翼總兵十月復兼署工部右侍郎兼管錢法堂事務時給事中博桂疏劾錦州副都統恩合於大凌河開墾牧廠荒地措

置乖方上命阜保偕吏部左侍郎基溥前往查辦旋覆陳恩合開墾牧廠招佃取租辦理尙無不合毋庸再議更張報聞十一月回京十二月仍兼署工部右侍郎兼管錢法堂事務三年七月充冊封朝鮮國王正使尋命暫署吉林將軍時吉林盜匪王五餘黨恚子李等糾衆竄吉林東南復西至大孤山與回匪楊發等四出剽掠上命阜保嚴飭捕盜各官會同黑龍江奉天官兵合力兜拏又以內閣侍讀學士于淩辰奏稱吉林開闢日廣訟獄繁滋請專設理刑大員或仿照臺灣添設道員加按察使銜上命阜保查議十一月疏言吉林地方苦瘠若設監司大員則衙署及僚屬書差廉俸口食所費不貲日後一切公用俱無所出驟難輕議查吉林與熱河俱在關外壤地相接情事頗同應比照熱河設立刑司之例由刑部揀選正途出身漢郎中或員外郎一員使之主臬添主事一員使之幫辦其理藩院郎中一缺本爲辦理蒙古事件其實蒙文無多擬改派刑部滿郎中一員使之掌印卽原設之協佐領仍留一員使之幫印遇蒙文事件亦足辦理辦事衙署仍在刑司統歸將軍管轄三年期滿無過由將軍出具考語備文送部引見疏入從之四年四月以吉林賭風甚熾利重法輕罔知儆畏爲奸宄之藪實盜賊之源疏請

敕下刑部分別覈議酌量變通俾各知警下所司議行五月調鑲紅旗滿洲副都統先是捻逆回竄山東曹州鉅野一帶直隸戒嚴敕阜保與黑龍江將軍特普欽於吉林黑龍江挑選馬隊各五百名馳赴直隸聽候調遣旋命續調馬隊五百名至是上聞派出官兵多以西丹充數復諭令前後所調馬隊選擇食餉官兵久經操練技藝嫻熟者派赴京師及直隸軍營閏五月疏言盜匪出竄奉天鐵嶺開原一帶突由大孤山東南圍場趨吉林放牛溝該處爲兩省毗連此拏彼竄最易藏奸請添兵進剿得旨迅飭添派佐領那斯洪等督帶兵役覘賊所向實力兜擒七月上以吉林將軍恩合署盛京將軍命阜保仍署吉林將軍八月以奏請簡員署理副都統等缺誤寫阿勒楚喀爲寧古塔自請議處得旨著加恩改爲交部察議初上以喀爾喀與巴爾虎爭界一案命阜保馳往查辦嗣因緝捕緊要敕毋庸前往九月以阿勒楚喀副都統德英署理吉林將軍諭阜保俟德英抵任後仍遵前旨馳往喀爾喀巴爾虎辦理爭界事宜惟瞬屆嚴冬如該處大雪封山不能前往履勘卽著先行回京是月以承修定陵工程堅固加二級並賞頭品頂戴仍下部優敘十二月回京五年命往察哈爾照料征兵一切事宜六年正月回京四月授

吏部左侍郎七年三月兼署工部右侍郎兼管錢法堂事務八月兼署禮部左侍郎八年充管理三庫事務十年正月擢都察院左都御史三月充會試副考官十月賜紫禁城騎馬十一年七月陞理藩院尙書十一月充經筵講官十三年正月因承修福陵隆恩殿工程辦理草率下部議處六月授正紅旗蒙古都統光緒元年正月兼署都察院左都御史充實錄館蒙古總裁三月署吏部尙書二年二月兼署正藍旗滿洲都統四月兼署鑲紅旗漢軍都統旋兼署禮部尙書六月兼署正黃旗漢軍都統八月兼署鑲黃旗蒙古都統十月調刑部尙書三年二月兼署禮部尙書三月兼署正黃旗漢軍都統十一月兼署鑲白旗漢軍都統四年二月上以阜保精神較遜命開去刑部尙書仍留正紅旗蒙古都統之任十一月因病奏請開缺從之阜保自同治二年以來充順天鄉試覆試閱卷大臣二次宗室鄉試覆試閱卷大臣駐防繙譯鄉試閱卷大臣考試學正學錄及漢謄錄閱卷大臣各一次八年卒遺疏入諭曰前任正紅旗蒙古都統阜保由翰林洊陟正卿管理旗務宣力有年無曠厥職嗣因患病開缺調理茲聞溘逝軫惜殊深加恩著照都統例賜卹任內一切處分悉予開復應得卹典該衙門察例具奏尋賜祭葬子雙

泰舉人

宗室奕山子載鸞

宗室奕山鑲藍旗人由四品宗室於道光元年充三等侍衛四年陞二等侍衛在乾清門行走六年命發往喀什噶爾軍營差遣七年以克復喀什噶爾等處出力以頭等侍衛陞用九年以試綠營技藝中五箭賞穿黃馬褂充御前侍衛十年命發往伊犁差遣十一年三月署察哈爾柰曼領隊大臣十月補上駟院卿十二月補伊犁領隊大臣十三年調塔爾巴哈臺領隊大臣十五年正月授鑲藍旗漢軍副都統旋授伊犁參贊大臣二月調鑲黃旗滿洲副都統四月補正紅旗護軍統領十六年命赴巴爾楚克查開墾事宜奏言巴爾楚克城之東南先於道光十二年招集民戶引用玉河之水開墾屯田二萬四千餘畝嗣因玉河水勢靡定恐日久水向南趨不特續開屯田水不足用卽已開之田亦不能得水因引渾河水至巴爾楚克城之西南約長八百餘里開屯地四千餘畝此時渾河與玉河相通水勢旣足該處可開之地計尙有十餘萬畝但能招戶漸墾日久皆成土著自獲寓兵於農之效又查喀什噶爾所墾屯地共二萬餘畝見招民認種不得於舊立界

址外侵占回田章程尙臻妥善伏思南疆屯田已著成效巴爾楚克一帶曠土自可盡力開墾惟該處所招人戶多係流民似不足恃思欲皆成土著必須廣招番民庶人戶日增則土田自闢屯政易行矣十七年五月調正藍旗護軍統領十月署伊犁將軍十一月以色呼庫勒回衆情形拮据所有額交貢金折交布匹及應貢硝斤奏請豁免允之十八年二月奏裁葉爾羌滿營官兵二百四十員名只留三百名以資防守並盡撤葉爾羌以東各城滿漢官兵如所請行四月授伊犁將軍閏四月兼正紅旗漢軍都統七月奏請迎母至任賞銀四百兩二十年御史重豫奏新疆歲需官兵俸餉請在南北兩路每年添鑄錢數萬貫以資搭放上命奕山體察情形奏請覈辦尋奏言回疆各城近因銅苗不旺設法覓採未能成數見在銅斤僅敷寶伊局春卯鼓鑄之用秋卯能否照常鼓鑄尙須察看情形酌辦實不能添鑄錢文如所請行是年偕副都統關福辦理額魯特愛曼界內所屬塔什圖畢開墾事宜共開正渠二萬五千七百四十四丈計一百四十三里有奇得地十六萬四千餘畝奏請安插回子千戶依舊案設立五品商伯克六品密拉普伯克七品明伯克各一員玉子伯克十員及愛里巴什溫巴什各項以資彈壓又以

渠道初開必須隨時修補請增設六品密拉普伯克一員專司水務啟閉之事每回子一戶給牛一頭籽種糧一石毋庸按年補還以示體恤報聞九月補正白旗領侍衛內大臣十一月賜紫禁城騎馬二十一年正月授御前大臣時英人犯廣東攻陷沙角大角礮臺上命奕山爲靖逆將軍馳往剿辦兼命戶部尙書隆文湖南提督楊芳爲參贊大臣以副之先是大學士琦善以欽差之廣東持撫外議英領義律索香港爲貿易市埠並索十九年虎門所燒鴉片煙價至是聞大兵將集急欲要盟復請獻出沙角大角礮臺並繳還定海以易香港琦善許之據以入奏上震怒將琦善交部嚴議諭曰覽奏曷勝憤懣不料琦善怯懦無能一至於此英人兩次在浙江廣東肆逆攻占縣城礮臺傷我鎮將大員荼毒生靈侵擾郡邑大逆不道覆載難容無論繳還定海之說不可憑信即使真能退地亦祇復我故土其被害之官弁罹難之人民切齒同仇神人共憤若不痛加剿洗何以伸天討而示國威著奕山隆文兼程前進迅卽馳赴廣東整我義師殲茲醜類務將首從各犯及通外漢奸檻送京師盡法懲治時義律以通商之議已得請於琦善擅出僞示曉諭居民指香港爲英之屬埠行文照會大鵬營副將令其撤回內地營汛事

由巡撫怡良奏聞而琦善猶謂定海收復撫議可成績奏香港地勢及籌辦情形上益怒責琦善辜恩誤國革職逮問二月十四日由六百里驛遞諭曰英人種種不法殊堪髮指前有旨令楊芳先行赴粵會防並令奕山等兼程前進計已接奉遵行該將軍等到粵後務卽會集各路官兵一意進剿不可存一通商之見更不可因有繳還定海之事少加寬縱又將琦善原奏發交奕山等閱看敕令確切查明即使香港並非險要亦必設法趕緊收回斷不准給予英人貿易致滋後患尋十七日上聞英人有先事滋擾之謀復諭曰英人妄肆鴟張見聞內地調兵四出窺伺朕早料必有滋擾之事惟香港距內地四百餘里儻能嚴密防堵彼兵船亦祇洋面游弋虛張聲勢他何能爲定海退出兵船諒必歸併香港恃衆負隅盡力抗拒若兵力單弱遽行進剿恐有疏失本日已降旨飭令阿精阿怡良等暫時協力防守俟大兵雲集再行攻剿著奕山等兼程前進到粵後與楊芳會合統領各省調到兵丁奮勇直前殲茲醜類毋稍觀望是月英人破虎門陷靖遠礮臺越六日楊芳抵廣東美利堅人爲英乞撫楊芳奏聞奉旨切責義律益狡逞四月遂以舟師橫亙省河奕山及隆文皆抵廣東問計於林則徐則徐議先遣洋商設法羈

糜俾各兵船暫退稍遠仍將獵德二沙尾大黃窖等處密運巨石僱齊人夫乘夜填塞一面調撥重兵兩岸防守仍於岸上多備沙袋以爲禦礮之需然是時各隘口兵勇早經琦善遣撤所有前備之木椿石塊悉被英人陸續起去復以舢板小船往來遊弋官兵計無所施但令重閉城門而英舟已銜尾至城下初泊十三洋行河南官兵出而禦之殺傷皆相當繼以火輪船襲我省西之泥城副將岱昌及戴罪留營之劉大忠聞礮聲先遁官兵大潰遂燒我師船六十有奇乘勝回劫十三洋行旋分股登岸焚毀民房火光燭天進攻四方礮臺據省城之後山俯瞰全城城中有閩中新到之水勇督撫檄令救援阿精阿不可四方礮臺遂陷焉英人踞堙而攻火彈射入貢院軍民重足奕山等驚懼失色令廣州府知府余保純出見義律義律索煙價一千二百萬美利堅人居閒議減遂以六百萬許之並給予香港全島英兵乃退行至蕭關三元里復肆淫掠里人皆憤集百有三鄉之衆數萬人圍之數重義律預焉保純慮敗撫議亟出城解散鄉民義律獲免奕山及隆文先退駐離城六十里之小金山越二日英舟方出虎門撫議遂定奕山捏詞奏稱初八日焚擊痛剿大挫凶鋒旋奏稱義律窮蹙乞撫求准照舊通商出具永

不售買鴉片煙土甘結等語將所付六百萬作爲追交商欠完案由粵海關及藩運兩庫給之是役也上覽奏見英人恭順遂允所請未幾閩浙總督顏伯燾奏云粵東辦理洋務全局攸關英人初無受撫之情何以言撫月內據廣東鈔來英人僞文僞示及該省督撫節次知照種種情形決非效命歸誠之象奕山等納賄之後無復亡羊補牢之計若謂彼以銀去必不再來苟且於目前又思彌縫於異日計亦左矣又言楊芳前在江西途次卽有偏僻小港准英人屯集貨物之語甫經到粵撫議又起奕山隆文閱歷未深猶可諉爲不諳軍務楊芳老於疆場坐失事機罪復奚辭廣東以虎門爲門戶琦善弛備撤防開門揖盜楊芳初到並不據實陳奏仰求聖恩寬以時日鑄礮造船訓兵練勇俟奕山隆文到日謀定而與之戰不可一味膽大粗疏至於債事此時奕山若再扶同粉飾君門萬里何以釋主上南顧之慮又片奏云據探報廣東四月十五日一摺已蒙俞允初八日勝戰並懇恩旨等因接閱之下不勝駭異四月初八日廣東業已傾敗安得復有勝戰是所奏以痛剿乞撫欺朦天聽膽大昧良如此之甚臣實無任憂慮憤懣五月奕山補都察院左都御史六月奏稱海洋陡發颶風漂沒大小洋船淹斃洋人不計其數

所築馬頭埧爲平地上覽奏欣慰七月上以廣東漢奸焚燒民房及僧浦大船諭奕山嚴拏正法慎毋姑息養奸二十二年五月奏請將靖遠礮臺逃兵郭標等革伍責懲上責其輕縱又片奏查拏漢奸事諭曰廣東漢奸在在皆有年餘來僅獲一溫東幅而蘇亞馨等三犯又稱赴官投首可見平日並不認真查拏不過以此塞責奕山身任統率乃陳奏事件如是不誠不實迹近欺詐辦理亦屬錯謬著交部嚴加議處尋議革職留任十月諭曰上年英人滋擾粵省特命奕山爲靖逆將軍授以重兵前往攻剿乃奕山抵粵未卽入城遲回觀望迨英兵圍困省城又不能奮我兵威剿除殄滅及至英船退出省河占踞香港事閱年餘一味因循束手無策以致被竄入浙江肆行滋擾是其坐失事機厥咎甚重著交部治罪以示懲儆部議上命革職斬監候十二月至京命在宗人府空室圈禁二十三年八月得旨釋放十月賞二等待衛充和闡辦事大臣二十五年調伊犁參贊大臣署伊犁將軍二十七年調葉爾羌參贊大臣時喀什噶爾卡外安集延布魯特糾約本地回衆屯聚城外尋竄肆擾上授布彥泰定西將軍命奕山爲參贊大臣襄辦軍務

十月奕山奏稱擊賊科科熱依瓦特地方大破之得旨嘉其奮勇賞二等鎮國將軍並賞戴雙眼花翎尋復奏賊竄英吉沙爾官軍進剿破之蘇噶特布拉克地方上嘉其事機順利擢其子三等待衛載鸞爲乾清門侍衛是月喀什噶爾回亂平二十八年二月授內閣學士兼禮部侍郎銜三月調伊犁參贊大臣旋兼鑲黃旗蒙古副都統逆回之擾喀什噶爾也雖至自浩罕其伯克實不知情奕山請准浩罕仍舊通商從之二十九年正月授正黃旗護軍統領三十年八月以與藉醫惑衆之薛執中往來降四級留任十一月復授伊犁將軍時俄羅斯遣使至伊犁請在伊犁塔爾巴哈臺喀什噶爾三處通商得旨准於伊塔兩處試行而拒其喀什噶爾之請咸豐元年俄人復以喀什噶爾爲請奕山函詢葉爾羌參贊大臣德齡德齡回函稱有礙難者三條四月奕山奏言喀什噶爾既有安集延浩罕布魯特克什米爾巴達克山等夷回貿易俄羅斯國諒必稔知且安集延卽代該國販貨之人如喀什噶爾之絲布哈喇等物俱係該國土產安集延由該國運至喀什噶爾易換布茶綉緞其有利無利該國亦必知之甚悉奴才又訪得俄羅斯國於哈薩克地方久已收其租稅用其烏拉今請於喀什噶爾通商則路經伊犁西南之

哈薩克接連布魯特亦必供應烏拉兼收租稅矣該國之一再懇請者未必不意在於此擬俟該國官員到伊犁會請時遵照理藩院咨內各情詳爲譬說反覆開導再將德齡函內所稱礙難等語告以窒礙動以利害該官員或不至再有曉瀆疏入諭曰奕山所慮極是俄羅斯前請三處添設貿易其心本屬叵測因以近邊民人生計爲詞未便拂其和好准於伊犁塔爾巴哈臺試行而喀什噶爾則窒礙之處甚多斷無准行之理奕山務將礙難各情曲爲譬說以我朝平定新疆已歷百數十年該國向於恰克圖通商歷久相安何以至今忽有三處通商之請今三端之中已允其二奕山尤宜堅持定見毋爲恫喝之詞所奪草率定議遷就曲從將來致滋流弊奕山旋偕前任將軍薩迎阿與俄使定約令罷喀什噶爾通商之議並訂伊犁兩處通商章程進呈御覽八月授鑲白旗漢軍都統時國子監祭酒勝保疏言伊犁塔爾巴哈臺兩處通市情形應仿照恰克圖章程自十一月開卡來年二月閉卡平時卽不通往來其夷商運貨至圍城者總不得過二百人事竣卽行出卡不准稽留上命奕山悉心籌計十一月奏言恰克圖距張家口數十站之遙地居曠野並無居民鋪戶內地客商運貨至彼與俄羅斯之定期而來事畢

各返者實由所處之地勢使然也伊犁塔爾巴哈臺兩處商民多係世守其業而貿易亭卽附近城池與恰克圖之商民約時來去者不同前與俄羅斯議與該國貿易商貨每年清明節後入卡冬至節停止夷商販運而來人數貨物馱載入卡由卡倫官點驗及二十駝始准進卡分起而來每月亦祇准兩次與恰克圖之同時併到者有異特貨物慮有餘賸往返維艱該使臣請於貿易亭附近自蓋房屋住人存貨並留官常川照管與恰克圖之約期而散者又不同且出入皆有兵護往返俱有官查斷不至盈千累萬來人漫無限制也伏思撫馭外人之道以信爲主通商一切章程均係與彼使當面議定該使臣早已回國今若自我議改彼必有所藉口未免轉費用章疏入如所請行二年五月喀什噶爾地方有卡外賊首鐵完庫里糾黨擾伊蘭瓦斯卡倫燒燬卡房旋至阿爾胡莊屯聚奕山派兵剿捕並飭阿奇木伯克邁瑪特管帶回兵截賊歸路賊聞風遁奏入諭奕山隨時偵探加意嚴防四年授內大臣五年九月命在御前大臣上學習行走賜紫禁城騎馬十二月授黑龍江將軍六年在任授御前大臣時俄羅斯以分界爲名請將黑龍江松花江左岸及海以內地給與守護上命奕山暗爲設防隨機應付尋俄舟由

水路下駛沿途留船寄存糧石侵我精奇哩江之地建房於我霍爾托庫圖勒密布雅里等處奕山亦有陽撫陰防之奏七年俄人請遣使來京奕山奉命止之六月上以俄羅斯要請通商並請移屯戶命奕山設法拒絕密爲防範且敕令查明俄人所侵地形未幾俄使又以勘界爲請諭曰中國與俄羅斯界地自康熙年間議定以格爾畢齊河興安嶺爲界成約具在原無可議咸豐三年彼國欲會查界牌又據奕山等奏稱惟烏特河一處從前爲兩國公中之地未嘗分界此時普提雅廷來津投文仍以分界爲詞如至黑龍江邊界應如何接待之處必有成例可循務須不亢不卑以符體制八月又諭曰見在俄人復有在黑龍江左精奇哩開懇種菜松花江右圖勒密添蓋房屋並有船隻越卡西上之事其爲圖占地方欲謀久住已屬顯然著奕山等仍遵前諭告以中國與該國和好有年不應擅自蓋房占地見既派有大臣與爾國使臣分勘界址不得任意違例致啓爭端一面密禁沿海奸民私通貿易斷其接濟使彼糧食匱絕必廢然思返該將軍等毋因海濱地廣難於稽查致令奸民勾結自貽後患八年春俄人與英吉利法蘭西美利堅合從請撫舟至天津英法不俟議定遽攻海口毀礮臺於是俄使之在愛璉

城者曰木里裴岳幅乘間要挾期必得地而止奕山遂與畫界自額爾古勒河口順黑龍江至混同江口左岸之地盡屬之俄俄知奕山之昧於地勢也復索我綏芬河烏蘇里江之地奕山雖奏稱未許然已告俄使謂可比照海口等處辦理矣諭曰俄要求黑龍江左岸居住奕山遽爾允准已屬權宜此次無鑿之求著該將軍等妥爲開導諭以各處準添海口皆係大皇帝格外天恩原爲兩國和好多年是以所請各事但有可以從權者無不曲爲允准此後自應益加和好方爲正辦若肆意侵占擾我參珠貂鼠地方是有意違背和議中國斷難再讓況該國人在三姓地方攬擾街坊觸怒軍民若日久占居必至積怨成仇羣起爲難雖天朝法令森嚴亦不能以非理之事強制百姓彼時有傷交誼大非彼國之利如該使聽受開導不復以綏芬烏蘇里爲請即可與之議準界址切實訂定除所議之外永不准肆行竄越如其堅執不遵卽著將該使狡執情形詳細具奏當由理藩院行文該國薩那特衙門與之理論奕山等亦可行知木里裴岳幅據理執辨曉以利害勿任俄官從中播弄事關重大固不宜過於激烈致起釁端亦斷不可一味軟弱總宜詞嚴義正中其隱微庶可漸戢驕心歸於馴服尋又諭曰綏芬烏蘇里兩

處既與俄國地界毫不毗連且係採補瀟珠之地當時卽應據理拒絕何以副都統吉拉明阿輒許木里裴岳幅於冰泮時馳往查明再立界碑至所稱原立字約十四條內尙有三事未妥均未據奕山奏明奕山前次遽將黑龍江左岸允許該國雖係限於時勢究竟辦理輕率且以烏蘇里河亦可比照海口等處辦理致該國肆意要求著仍遵前旨據理剖辨毋得遷就了事自貽後患是年大理寺少卿殷兆鏞奏奕山以黑龍江地五千餘里藉稱間曠不候諭旨拱手授人奕山始既輕諾繼復爲俄所制無能設法轉圜九年遂奏俄人船隻往來黑龍江已成習慣若遽行拒絕恐該國有所藉口又以綏芬河烏蘇里江地屬吉林奏請由吉林勘界先後奉諭旨責其朦混推諉五月諭曰綏芬烏蘇里河均屬吉林並不與俄國接壤亦並非黑龍江將軍所轄地方上年該將軍奕山輕信副都統吉拉明阿之言並不與俄國使臣剖辨明白實屬辦理不善咎無可辭奕山著卽革職暫留本任仍責令將從前辦理含混之處辨明定議又以俄船下駛奕山未能攔阻命革去御前大臣來京當差未幾十一年之約遂因奕山前議自烏蘇里江口而南踰興凱湖至綏芬河瑚布圖河口復沿琿春河達圖們江口其東界皆以與俄羅斯

矣是年三月署鑲白旗滿洲都統九月署鑲藍旗漢軍都統十月授鑲白旗蒙古都統旋授御前大臣調補正紅旗蒙古都統同治元年七月署鑲黃旗漢軍都統九月管理健銳營事務三年封一等鎮國將軍四年三月充總理行營事務大臣五月署正紅旗漢軍都統七月署正黃旗蒙古都統旋充崇文門正監督十年授內大臣旋開御前大臣領侍衛內大臣缺十三年正月署鑲白旗滿洲都統六月以病開缺仍留頭等鎮國將軍賞食全俸奕山前後奉特旨議敘優敘共六次恩賞翎管搬指帶鈎荷包大緞等件四次是年十月恭逢慈禧端祐康頤皇太后四旬萬壽賞御書扁額福壽字玉如意文綺等物光緒四年卒遺疏入諭曰前任都統奕山由侍衛出師回疆等處荷累朝知遇之隆洵陞將軍都統補授御前大臣前因年逾八旬蒙恩准其開缺仍留一等鎮國將軍賞食全俸方冀遐齡克享恩眷長承茲聞溘逝殊深軫惜加恩賞給陀羅經被派貝勒載灃帶領侍衛十員卽日前往奠醊賞銀一千兩經理喪事由廣儲司發給並照例賜卹任內一切處分悉予開復應得卹典該衙門察例具奏伊曾孫頭品廕生毓照著賞給郎中應封宗室毓楷著賞給主事用示篤念耆臣至意尋賜祭葬予諡莊簡子載鸞於道光

十六年由大員子弟賞給三等待衛二十七年命在乾清門行走咸豐元年封三等輔國將軍三年賞給二等待衛因報捐軍餉下部議敘五年擢內閣學士兼禮部侍郎銜旋補奉宸苑卿六年補正黃旗漢軍副統都充管理正黃旗漢軍營房大臣七年八月調正藍旗滿洲副都統九月考試繙譯文童充彈壓左翼副都統八年八月充順天鄉試稽察左翼副都統因提調官順天府府丞蔣達負氣出關載鸞與稽察右翼副都統寶璽合疏糾參奏入蔣達等嚴議議處有差同治元年署鑲紅旗護軍統領三年五月補鑲紅旗護軍統領八月署兵部右侍郎十月署鑲黃旗蒙古副都統四年三月充御前侍衛閏五月充管理新舊營房大臣六月山西巡撫沈桂芬奏請籌費移屯以恤旗民而實邊防諭八旗都統等會議載鸞疏言該撫奏請八旗民丁聽往各省之議與道光初年吉林將軍富俊都統英和等所議章程大略相同自應准其推廣變通詔如所請六年四月調補鑲黃旗護軍統領旋陞理藩院左侍郎仍兼署兵部右侍郎十月命閱看駐防繙譯試卷七年八月充補行武舉覆試大臣十一月充考試筆帖式閱卷大臣八年六月以武英殿救火出力賞加一級八月管理咸安宮官學十二月署理雍和宮事務九年

正月以理藩院柔遠司不戒於火下部察議十月充順天武鄉試較射大臣十二年充管理行營大臣十三年九月因病奏請開去差使允之光緒三年卒遺疏入諭曰前理藩院侍郎載驚由侍衛洊陞副都統護軍統領補授理藩院侍郎宣力有年克勤厥職旋因患病開缺方冀調理就痊長承恩眷茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏尋賜祭葬子溥瀚鑲黃旗蒙古副都統孫毓照一等奉國將軍毓楷候補主事

長麟

長麟烏雅氏滿洲正黃旗人道光二十一年由閒散襲騎都尉世職咸豐四年補鑾儀衛整儀尉六年轉治儀正七年授雲麾使同治元年協理堂務章京旋充神機營幫操章京三年陞冠軍使尋以勞績賞二品頂戴四年加副都統銜七年命記名以副都統用十年調赴直隸防堵又隨軍山西得旨仍以副都統記名遇缺題奏十一年兼公中佐領恭逢皇上下婚典禮奉迎皇后鳳輿詔以副都統遇缺儘先題奏並賞戴花翎光緒元年復經神機營王大臣保獎得旨遇有副都統缺出儘先題奏開列在前尋授吉林三姓副都統五年以剿滅金匪多股營規兵勇

認真整頓訓練吉林將軍銘安等上其功賞頭品頂戴九年五月卒七月署吉林將軍玉亮等疏稱長麟到吉時正值賊氛猖獗幾有岌岌不終日之勢前任將軍銘安等督飭各營將領嚴剿馬賊於腹地而長麟率所部練軍窮搜逸匪於邊隅卒將金匪孫百萬等次第殄除迄今東南半壁安堵無恐者惟長麟之功居多三姓地方幅員遼闊土瘠民貧長麟加意撫綏存心寬厚有古人敬簡之風該部落來往民人無不稱道長麟之德感激涕零臣等又親見該副都統事必躬親案無留牘公暇輒以忠勤大節激勸屬僚志節貞廉尤爲武將中所罕見病劇時惟勸臣以時事多艱竭力整頓是其公忠報國之念固結於中請照副都統軍營立功後積勞病故例議卹允之

吳長慶

吳長慶安徽廬江人父廷香由優貢生就選教職粵匪擾安徽廷香在籍創舉團練咸豐四年死廬江之難有旨賜卹賞雲騎尉世職長慶襲五年安徽巡撫福濟任以舒城廬江團練長慶痛父殉難誓志殺賊六年隨官兵克廬江七年八月會擣桃鎮踞匪立拔之復擊退派河援賊毀賊營三十擢守備九月克舒城十一月

巡撫翁同書檄辦合肥東鄉團練九年以護城出力賞戴藍翎十年大敗偽英王陳玉成於華子岡加都司銜賞換花翎十一年奉兩江總督曾國藩檄攻克三河遂以所部五百人別爲慶字營國藩稱其忠孝堅定不可撓折至手書爲令以勵將士尋江蘇郡縣陷於賊國藩命長慶隨福建延建邵道李鴻章援上海戰捷於虹橋以次克柘林奉賢南漚川沙金山擊退寶山大股悍賊敍功免補都司以遊擊留江蘇補用同治元年冬以江蘇巡撫李鴻章檄回籍募勇國藩復令以三營守廬江二年三月逆首李秀成來犯擊走之繼復糾大股圍廬江長慶登陴固守伺懈出擊城圍遂解復以營隸李鴻章軍七月拔楓涇西塘等鎮毀千竄賊巢超擢副將十月規取浙江嘉善擣張涇漚肉薄先登奪北岸橋賊壘三年進攻嘉興府城左臂中槍丸猶裹創血戰斬士卒回顧者數人以徇遂蟻緣登城且卻且上竟拔之命以總兵記名簡放賞力勇巴圖魯名號並准補官日免騎射五年分援浙閩疊克湖州長興廣德漳州漳浦有旨交軍機處記名遇有提督總兵缺出儘先題奏七年統馬步十一營隨李鴻章剿捻匪轉戰河南內黃滑濬山東臨邑德州直隸寧津間殄除淨盡賞穿黃馬褂換瑚敦巴圖魯名號並正一品封典時曾

國藩再督兩江以宿遷徐海衝要地民俗驚悍剽輕盜賊出沒宜得良將疏請長慶率所部防徐州允之八年潘鼎新軍爭餉忽潰水陸數千人蔽河而南奉曾國藩檄馳往查辦鼎新軍亦准部謀脅長慶軍以擾淮揚長慶偵知潛遣精兵防扼要隘時河漲北風勁疾亂卒乘舟至塞河道數里長慶以溫言召羈其魁有譁擾者立斬之衆大慴乃曉以利害盡收積其衣幟槍礮刀矛而陸卒適至亦就撫遂別築營舍析處其人令軍中不得一卒相通語分別鄉貫資送還家旬日大定漕運總督張之萬疏稱其有條不紊請予獎敘尋賞加一級紀錄二次九年移駐揚州丁母憂曾國藩請照軍營例穿孝百日仍管理營務詔從之十一年移駐江浦督勇濬揚州儀徵鹽河十二年移駐江陰兩江總督沈葆楨奏言長慶一軍號令嚴肅所駐之處官民有戀戀不舍之意十三年以日本肇釁臺灣添募慶字四營籌辦江防築江陰及江寧之烏龍沙洲礮臺時六合鄉民以漕額難復聚城譁訴沈葆楨檄長慶往單騎一夕至城下誘主者至許以不死令立散其衆上書葆楨以爲江寧漕糧之重同於蘇松二府而六合與賊相抗最久被害亦最酷今二府減漕五十四萬而江寧如故富者且不能納則貧者流亡日多奸民得以相煽宜

奏請減之葆楨因有請減江寧五屬漕糧之奏光緒元年授直隸正定鎮總兵沈葆楨疏請留防江南從緩赴任如所請行二年寧國府民教滋事有奸民白會請黃之紳楊琴錫者夙習天主教陵暴鄉里誘匿少婦恣其淫虐會事敗露鄉民累萬人奮呼雲集箠之紳琴錫至死因火教堂白會請僅以身免則益聳西洋教士搆訟務欲雪死者冤民益疑懼沈葆楨又檄長慶往甫至教士指建平人何渚爲首事請殺之何渚者素見信於鄉里者也至是謁長慶以獄急不得主名自請受戮以解覺長慶以爲袒民不可執法徇教亦不可卒廉得獄之始末曲直請釋渚誅會請葆楨復親鞫之如長慶言獄遂以定江浦黑水河舊受滁州來安全椒諸山水以達大江明史水利志紀景泰二年屯田御史上言北城圩黑水河並南達大江請開通備旱澇者也國朝康熙雍正以來更作更輟未有成功諸山水東下既失故道則益橫溢二百餘里漫溢衝決爲民田害長慶嘗以捕蝗行河稔悉所苦於是議疏黑水河下游曰四泉河玉帶河者請於沈葆楨四年秋葆楨遂奏以河事任長慶用軍力治之工作之始規度材木劃量丈尺部責工數計授繩畚車鍤滕扉擔笠增益口食越二年而工成泰半其後大學士左宗棠總督兩江竟因

長慶所疏故迹以底成功六年正月授浙江提督時法蘭西與越南構兵沿海戒嚴命長慶幫辦山東軍務十月調廣東水師提督未赴任航海至登州會右庶子張之洞劾山東四鎮總兵驕悍營規不整上命長慶查閱四鎮皆歸節制八年六月朝鮮禁卒變犯王宮戕大臣倉卒王妃失所在並燔日使館殺館人僉言事由李昰應日使花房義質奔還國日人怒駛兵船來責時道員黎庶昌使日以電告署北洋大臣張樹聲用幕僚薛福成策亟遣兵輪三艘東越二日抵仁川日船後氣爲沮旋奏入命長慶往七月軍次南陽府日使挾兵苛索不饜則悻悻出王京長慶因馳軍入日使悔乃就盟昰應尙踞王宮造兵聚黨長慶誘之來筆談及暮遽揮隊擁赴南海口納於登瀛洲船致之天津越夕擊散亂黨迎復王妃事乃定是役也上以長慶功最賞三等輕車都尉長慶在朝鮮修道途治輿梁救災卹喪示以恩信其歸也國人作歌送之十年四月命移防金州閏五月卒遺疏略謂臣以雲騎尉蒙高厚之恩致有今日死何足惜今醜虜窺邊而臣遽先犬馬填溝壑死如有知必爲厲鬼殺賊以報君父大學士直隸總督李鴻章疏請優卹略云長慶痛父殉難誓與賊不共戴天糾合鄉團屢助官軍攻剿同治元年臣督師滬上

稔知長慶忠勇邁倫令其相從東下協同克復各廳縣城旋移師入浙克嘉善嘉興乍浦平望湖州長興等處其尤嘖嘖人口者嘉興之役長慶督隊徑薄城下賊以槍礮連環轟擊彈如雨下長慶肘骨皆穿裹創血戰奮不顧身用能立拔堅城以疏通由蘇入浙之路迨督師剿捻長慶統率馬步各營隨同北渡轉戰山東江蘇直隸河南等省無敵不摧東西捻股次第蕩平嗣以江淮戎備空虛調駐徐州旋移紮江寧下關浦口烏龍山等處江防水利百廢具舉歷任江督馬新貽李宗羲沈葆楨劉坤一皆倚之如長城光緒六年海防戒嚴長慶率師移駐登州八年六月朝鮮內亂毀及王宮及日本使館日人以兵輪駛入仁川惟時該國內外交訐羣情洶洶安危之機間不容髮長慶拔隊赴援獲致亂首人心始定朝鮮銀錢荒百物昂貴將弁士卒艱苦萬狀毫無怨言蓋由統帥不私貨財故緩急能以相保不避艱險故患難樂於相從其所以致此於部曲者良非偶然而該提督勞身焦思亦遂寢成痼疾平日訓練餘閒惟以經史自娛澹泊寡營雅歌不輟擬之儒將庶幾無愧疏入諭曰廣東水師提督吳長慶前因痛父殉難矢志剿賊隨同李鴻章轉戰江蘇浙江山東直隸河南等省疊克名城嘉興之役戰績尤多駐紮

江南辦理水利江防百廢具舉光緒八年率營馳赴朝鮮戡定亂民勞勩卓著茲聞溘逝軫惜殊深著照提督軍營病故例從優議卹任內一切處分悉予開復應得卹典該衙門察例具奏該提督戰功事蹟宣付史館立傳加恩予諡並准於立功地方建立專祠次子吳保初著賞給主事服闋後分部學習行走用示眷念勳臣至意尋賜祭葬予諡壯武十月浙江巡撫劉秉璋以長慶遺愛在民請於嘉興府城建立專祠允之子保德襲三等輕車都尉兼雲騎尉世職保初刑部主事

周盛波

周盛波安徽合肥人咸豐三年粵逆陷江寧分竄皖北盛波團練鄉勇剿賊巡撫福濟獎給六品頂戴十年正月敗賊於廬州西鄉以把總拔補並賞戴藍翎九月解六安圍陞用守備並賞換花翎同治元年福建延建邵遺缺道李鴻章率師援蘇檄盛波添募淮軍盛字營隨剿七月賊圍北新涇擊卻之擢遊擊九月克嘉定援賊以大股撲四江口水師營盛波與副將張桂芬合兵擊敗之敘功賞卓勇巴圖魯名號二年三月隨軍克太倉州四月進規崑山盛波扼雙鳳鎮擊敗援賊遂復縣城五月進壁麥市橋平賊壘二十三座保以副將留兩江補用七年官軍薄

江陰城下統領知州李鶴章派盛波循城出其右先擊東南大隊援賊又以四營出城西綴無錫援賊會諸軍盡埽壘卡克江陰江蘇巡撫李鴻章奏捷得旨以總兵記名簡放九月官軍復金匱無錫擒僞潮王黃子澁父子盛波燒燬賊船百餘隻破惠山石卡擊斬北門外敗賊二十餘級敘功晉提督並賞從一品封典三年四月合圍常州盛波由小南門攻入僞護王陳坤書就擒得旨交軍機處存記遇有總兵缺出先行題奏七月江寧敗賊黃文英挾洪逆幼子福瑱踞廣德盛波爲前隊進至橫山文英已挾福瑱出走城賊猶拒戰敗之復廣德追文英至寧國境頗有斬獲賞穿黃馬褂四年閏五月擒首張總愚圍安徽布政使英翰雉河集防營大學士曾國藩調盛波偕提督劉銘傳軍赴援盛波攻渦河兩岸之賊獲勝乘勢疾進英翰軍從陣後夾擊之圍得解詔交軍機處存記遇有提督缺出儘先簡放六月授甘肅涼州鎮總兵十月賊竄寧陵設伏敗之五年二月拔荷澤縣屬遊莊寨暨方埠賊巢上以盛波竭力苦戰奮勇可嘉頒賞白玉翎管搬指火鏢大小荷囊五月擒首牛洛紅竄亳州盛波截擊大敗賊於白龍王廟十一月追賊雲夢折回兩河口沙河擊賊胡家店敗之六年四月躡擒首任柱後至信陽由台子阪

山左進其弟提督周盛傳等進中右兩路層巒中賊騎不能馳驟舍騎四竄追及談家河擒賊目汪老魁陳大狗祝老幅等並擊潰賴汝洸等援賊九月擊沈陽程寨賊追敗之石榴寨又敗之高家寨至海州阿湖鎮殲悍黨趙添幅七年閏四月張總愚走陵縣盛波追及於土橋督馬隊合剿賊奔潰五月盛波駐營毛家莊賊由吳橋來犯誘入伏中痛創之斬級數千復襲楊丁莊賊巢陣斬張總愚姪張三彪生擒股首李老懷等六月會諸軍蹙賊在平張總愚投河死西捻平賞換法福齡阿巴圖魯名號尋以母老陳請回籍終養允之十月河南巡撫李鶴年劾盛波於上年五月縱勇攻破唐縣民砦慘斃多命詔褫職交李鴻章查辦奏覆後以盛波身在前敵事起倉猝不科餘罪九年三月大學士湖廣總督李鴻章奏稱盛波剿賊功多乞恩開復原官下部議旋報允光緒十年七月上允北洋大臣李鴻章請添募防軍以盛波夙著戰功臨陣勇往命由淮北選募精壯十營剋日統領來津十一月到防諭李鴻章督飭認真訓練嚴密布置期於緩急足恃十一年五月丁母憂李鴻章奏令盛波弟天津鎮總兵周盛傳回籍治喪七月命署湖南提督疏辭不許十三年服滿實授十四年十月卒李鴻章奏言盛波以鄉兵剿賊兄弟

六人四殉王事痛遭家難誓以死報其治軍嚴而不苟人樂爲用尤善察地勢審敵情部曲將校經其指授輒有家法防海以來添募精練爲淮部最大之軍諸軍勛望無出其右者疏入諭曰湖南提督周盛波歷隨李鴻章軍營剿辦髮捻各逆轉戰各省疊克名城戰功卓著嗣經駐軍天津訓練精勤克盡厥職茲聞溘逝軫惜殊深著照提督軍營病故例從優議卹平日戰功事蹟宣付國史館立傳並著加恩予諡在安徽原籍及立功省分建立專祠以彰忠藎尋賜卹如例予諡剛敏十五年慈禧端祐康頤昭豫莊誠皇太后歸政追念功績最著諸臣各賜祭一壇盛波與焉子家謙舉人內閣中書旌表孝行家慶候選同知祐候選道

周盛傳

周盛傳安徽合肥人咸豐三年粵匪竄安徽陷廬州府土匪亦蠡起盛傳偕兄盛華盛波集丁壯團練守禦賊酋僞翼王石達開等屢擾合肥西鄉盛傳輒率百數十人擊敗之以計擒僞監軍馬千祿等五年安徽巡撫福濟嘉其功給六品功牌嗣盛華陣亡遂與盛波分領各練誓必復讎六年早出倉穀殺牛馬饗衆旣而賊酋陳玉成陳德才等先後分擾華子岡唐家岡董家岡盛傳等以練丁二千隨方

迎剿相持二三年大小數百戰遂越境攻潛太六霍等處餉械皆所自備戰屢有功九年安徽巡撫翁同書咨保以把總拔補十一年欽差大臣袁甲三敘援壽州功以千總拔補會兩江總督曾國藩遣師援蘇道員李鴻章創募淮軍以盛傳充親兵哨官兄盛波亦與焉名其軍曰盛軍是爲盛傳兄弟隸淮軍之始同治元年五月盛傳至上海七月克青浦八月回援上海破僞慕王譚紹洸之衆九月署江蘇巡撫李鴻章彙案請獎陞守備賞戴藍翎旋克嘉定進營江橋擊退四江口大股援賊越河攻賊壘右肋被槍傷十月赴皖募勇二年二月回營敘克嘉定及四江口戰功得旨免補都司以遊擊留於兩江補用時太倉踞逆蔡元濂以城僞降諸軍至倉卒遇伏獨盛傳有備得全軍歸越數日遂偕諸將一鼓克之壁於雙鳳鎮四月官軍圍崑山急賊分股犯雙鳳且攻嘉定冀解城圍盛傳連戰三晝夜大破之遂克崑山五月會攻萬水橋北澗一帶破賊營百有奇松太肅清賞勳勇巴圖魯名號七月攻江陰先毀東門外石營三破其援賊餘壘次第悉毀八月克之進規無錫九月自東亭鎮興隆橋鴨城橋節節進剿十月毀西倉賊營二十餘座偪城而陣十一月克之獲僞潮王黃子澂父子時盛傳已保陞參將加副將銜換

花翎至是李鴻章疏上無錫戰績得旨交軍機處記名遇有總兵缺出請旨簡放旋攻常州營城之南屢攻不下三年二月進偪小南門城下立營未畢賊分股突出盛傳督衆且戰且築營右腕中礮傷三月賊復潛出自後路來鈔盛傳分兵回剿殲其衆又進毀沿城石壘登石橋指麾諸軍橋斷盛傳墜水中城上賊礮石雨下流血竟體幾絕者屢越數日裹創強起會諸軍環攻之四月復冒礮火攀城先登大隊繼進遂復常州捷聞命以總兵交軍機處先行題奏加提督銜六月李鴻章以撫標親兵三營改爲傳字三營盛傳始自領一軍移次溧陽遏蘇常敗賊七月會銘軍攻廣德州拔之時江浙皖南逋寇以次蕩定而捻匪大起由楚竄英霍勢張甚兩江總督曾國藩奉命督師四年四月檄盛傳率所部往剿時捻酋張總愚任柱賴汝洸牛洛紅等踞宿蒙亳三州縣爲老巢安徽布政使英翰軍駐雒河集被圍急巡撫喬松年飛書趣盛傳往援遂自睢寧宿州轉戰而進將抵雒河任柱突至馳驟若風雨盛傳以連環槍礮禦之陣堅賊數衝突不動欲回顧巢穴盛傳從賊後出奇兵夾擊之大潰河南北賊營數十皆遁去六月解雒河圍命以提督遇缺簡放十月移防歸德剿竄捻於寧陵敗之五年二月疊敗賊於考城鉅野

城武荷澤四月移師亳州上嘉盛傳與兄涼州鎮總兵盛波苦戰奮勇各賞白玉翎管一白玉搬指一火鏢一大小荷包各二五月破牛洛紅於亳州之白龍王廟洛紅被創夜奔道死七月追賊扶溝鄆陵許州屢敗之遂扼周家口築賈魯河長牆十月奉調督隊遊擊十一月解柘城羅山之圍六年二月授廣西右江鎮總兵四月蹙賊信陽譚家河叢山中斬馘逾萬轉戰入山東至江蘇海州界捻勢大衰十二月任賴匪股悉數撲滅獨張總愚自陝還竄渡黃河而北七年正月奉調渡河迎剿屢有斬擒二月敗賊於臨清景德諸州東昌大名等府五月賊由武定馳至吳橋撲運河防牆盛傳先伏炸礮於毛家莊而縱馬隊當賊衝以步隊掩其後偪賊入伏炸礮發賊奔潰伏屍蔽野復夜襲楊丁莊暨孫世官莊誅張總愚之姪張三彪獲逆酋李老懷及大小頭目六月諸軍合圍於荏平之南鎮張總愚投水死捻患平欽差大臣湖廣總督李鴻章上其功七月賞穿黃馬褂時盛波以親老歸養盛字軍歸盛傳接統十二月李鴻章調盛傳赴鄂八年營於黃岡九年正月李鴻章督師貴州檄盛傳援黔適回騎內犯全陝戒嚴上改命李鴻章督辦陝西軍務調盛傳隨征添募馬隊立盛字飛騎一軍四月以續查西捻肅清請獎換拉

理巴圖魯名號五月入潼關回逆懾先聲不敢東竄而北山潰勇士匪蔓延綏德延安同州境盛傳馳扼韓城澄城郃陽聞上書鴻章請乘賊未備冒暑速攻滅之六月偵賊在宜川山中卽派隊分道進剿自督親軍連破悍股於河兒川孔巖寨賊瓦解乃分兵四布宜洛郃延之間相屬數百里作遠勢兜圍之先後擒匪酋馬意龍戴得勝等北山悉平七月下部優敘時李鴻章移督直隸疏調盛傳所部屯衛畿輔十年營於青縣馬廠十二年奉檄徧勘海口形勢盛傳建議以故明之新城上蔽津郡旁臨大沽北塘實扼海口之要舊有土城已圯宜興築舊式城用甃甃質脆易毀且門必有樓累動連楹敵礮所及靡不摧礮臺舊式寬至七丈而極守兵與子藥皆無所蔽今礮位長丈餘尤形偪仄請許隨宜不拘常法遂築內外城各一城內大礮臺三城上環置小礮臺七十有一此外兵房藥庫倉廩義塾及城外溝河橋牖惟備十三年九月工竣皆所部任其役捐盛軍欠餉以濟工費十二月事聞有旨交軍機處另行存記遇有提督缺出先行簡放先是上敕大學士直隸總督李鴻章興復京東水利鴻章檄盛傳任津沽屯田事盛傳往來津靜間見海河潮汐一日兩至旣由運河起節節較量高下又測步海河南岸知其利確

然可行而天津東南縱橫三百餘里一片沮洳蕪廢可惜乃議先疏引河溝洫以去積潦多設橋牖涵洞以資蓄洩仿前明汪應蛟葛沽營田遺迹條陳大略謂有三利五難洩南運盛漲澹畿南十數州縣蕩析之災利一海濱棄地數百里若引淡滌鹹斥鹵可變膏腴利二川澮滎洄蹊徑曲折可限戎馬之足助海防利三其五難則以地本斥鹵土更浮鬆河以多泥善淤民以創見猜阻又北省稻田屢興屢廢實因工大費多久難爲繼浮議因之而興乞持定見專委任則功可成書上李鴻章謹其議疏請敕盛傳董其役光緒元年移屯天津新農鎮督將士經營之二年調天津鎮總兵督工至六年開南運減河自靳官屯抵大沽海口減河兩岸各開支河一又濬橫河六溝澮川渠悉如法建橋牖五十餘處蓄洩有時又分別淡水鹹水不相滲混成稻田六萬餘畝濱河斥鹵地沾水利可墾者以億計八年補湖南提督十年皇太后五旬萬壽盛傳母栗氏年逾九旬賞御書扁額一方紫檀玉鑲如意一柄大卷江紬袍褂料小卷八絲緞袍褂料各二十一年四月李鴻章疏言盛傳母栗氏五世同堂得旨賞御書扁額五月盛傳丁母憂命改爲署理湖南提督回籍治喪六月到籍盛傳咸豐初年以練總拒悍匪能以少勝衆嗣隨

李鴻章剿賊辦防近三十年與兵事相終始其屯軍天津也工作餘暇日事訓練於西洋後膛槍礮深窺秘奧著操槍章程十二篇訓迪弁勇令各營以打靶取準校其優劣捐廉獎賞以故士卒技藝精熟盛軍利器足與西洋埒治兵專以不擾民爲主駐軍之處紀律肅然秋毫無犯津屬洊饑集將佐捐資設廠賑粥活遠近窮民無數日短衣匹馬巡視各營與士卒同甘苦醫藥有資殯葬有所人懷其嚴又未嘗不感其惠生性至孝嘗乞假省母母病刲股和藥以進至是以哀毀嘔血創痕迸裂而卒李鴻章臚陳事蹟以聞諭曰署湖南提督周盛傳歷年隨李鴻章各省剿辦髮捻各匪轉戰數省卓著戰功嗣經駐軍天津約束軍士講求操防克勤厥職前因丁憂賞假百日回籍治喪遽因傷發病故實堪憫惻周盛傳著照提督軍營病故例從優議卹平日戰功事蹟宣付史館立傳並著加恩予諡在安徽原籍及立功省分建立專祠以彰忠藎尋賜卹如例予諡武壯十七年兩江總督劉坤一以江蘇爲盛傳血戰立功之地請於江寧省城捐建專祠列入祀典春秋致祭以彰忠藎允之子家駒三品銜江蘇候補道

鮑超

鮑超四川奉節人道光三十年粵逆滋擾超由行伍投效廣西提督向榮川勇營旋入湖南協標咸豐四年侍郎曾國藩治水師調充哨長六月戰雷公湖七月克岳州戰城陵磯道陵磯保以外委拔補並賞戴藍翎閏七月敗賊於金口復敗之沌口八月克武昌漢陽九月擊蘄州賊大敗之十月敗賊田家鎮武穴等處積功洊保至守備加都司銜賞換花翎五年春武昌復陷署巡撫胡林翼委帶中營戰艦防金口屢破漢陽小河口鮎魚套之賊七月超營沌口偕知府彭玉麟援胡林翼於麥山復蔡店克宗關紱勞晉都司加遊擊銜會金口陸師潰黃州德安賊犯胡林翼高廟陸營以礮船偪轟傷斃左右數人勢甚殆超飛棹赴援擊賊走德安應城賊復由涇口新溝下駛超回戰火其舟拔胡林翼於重圍十一月擣金口賊營超奮勇當先右肋中礮裹創力戰軍益奮復金口胡林翼奏稱超屢立奇功膽識過人忠勇冠軍實爲功首詔以遊擊儘先補用並賞給壯勇巴圖魯名號六年正月湖北巡撫胡林翼奏保人材稱超勇敢冠軍曉暢兵略紀律嚴明堪勝水路總兵之任命交軍機處記名二月隨署提督楊載福破南岸觜等處賊四月擊賊漢陽焚樊口賊船五月扼沙口制賊上竄揚載福得以轉戰至九江城下江面肅

清擢參將加副將銜八月赴湘募勇爲霆字五營十二月率新軍攻賊小池口先備茅柴填濠直薄僞城毀南北路土壘關卡爲長塹困賊七年二月補陝西宜君營參將三月僞豫天侯陳玉成由桐城上竄黃梅廣濟總兵王國才陣歿於濯港諸軍相繼敗挫賊燄張甚將窺武漢牽掣援皖之師超獨以五營壁億生寺西北當賊衝賊爲所阻出死力與爭自億生寺至黃蠟山築壘四十有八圖老官軍而承其敝超激勵將士誓不俱生俾各指攻一壘而自指一最大堅壘期在必克七月超將步隊五路進攻賊殊死鬪繼偵知賊留老弱守壘分兵繞攻壘後而以馬隊發其伏諸軍齊進踏賊壘無一存者陳玉成跳而免捷入上以超連日血戰尤爲出力擢副將並賞加總兵銜八月敗賊復麇聚黃梅後山築三大壘阻官軍超分路潛進襲而焚之賊駭潰遂拔小池口僞城全楚肅清超進扼二郎河爲藩司李續賓攻九江軍後路聲援十月破賊楓香驛八年五月克黃安麻城賊壘殲賊黃土岡玉屏港八月授湖南綏靖鎮總兵以破賊平石牌雷公埠得旨優敘九月進規安慶破集賢關九年十月會諸軍圍太湖十二月僞英王陳玉成糾黨十數萬來援超移營潛山小池驛當前敵賊循潛山城西太湖城東表三十里壓超軍

而壘凡百餘座超破其地靈港十餘壘陳玉成憤甚悉銳攻小池驛曾國藩慮超腹背受敵調主事李榕等截賊而援賊更番環逼超軍糧路斷士卒傷瘼然志氣彌厲相持二十五日胡林翼所調各營由山後繞至拊賊背諸軍乃約會攻剿超空壁出直薄賊營賊圍之數日超爲方陣拒戰諸軍合蹙賊大敗之乘勝追擊城賊遁遂復太湖湖廣總督官文與胡林翼曾國藩同奏言是役斃賊二萬餘踏平賊壘百十座焚燬賊棚館數百處爲軍興以來僅見之大戰非鮑超勇摯堅強以三千餘人獨禦前敵血戰兼旬則援應各師必有緩不濟急之勢上嘉其功加提督銜十年二月超請假回籍省親五月賊圍寧國急詔催超赴營未至而寧國陷兩江總督曾國藩劾其遷延請革勇號責令力圖克復上允之十月僞忠王李秀成率逆黨由羊棧嶺竄入斷諸軍糧道圖解休寧圍黔嶺防師潰賊遂陷黔縣直犯曾國藩祁門大營祁門兵本單又兼顧諸路猝難調集曾國藩已鞞刀自誓超在休寧聞警督軍急馳百餘里連戰皆勝驅賊出嶺復黔縣曾國藩亦不意超軍遽至也上以超調度神速賞蘇博通額巴圖魯名號十一年正月破賊石門洋塘再破之黃麥鋪復建德曾國藩疏稱超勇冠三軍每戰必克轉危爲安實屬有

裨全局詔遇提督缺出交軍機處題奏二月曾國藩奏抽超軍作遊擊之師視江西皖北各路尤急者援應之上可其請會陳玉成救安慶時圍師腹背受敵超渡江援剿擊賊赤岡嶺大破之生擒悍逆劉瑯琳六月破賊樟樹鎮火其浮橋追剿五十餘里又於白馬寨小塘墟連破賊曾國藩上其功賞白玉搬指翎管大小荷包八月援撫州敗賊於雙港踏湖坊河口等處七十二壘復鉛山解廣信圍江西全省肅清曾國藩奏超當口糧缺乏之日烈日驟雨之中未滿兩月將江西腹地各賊一律掃除實屬勞苦功多命交軍機處遇提督缺出儘先題奏時曾國藩受命督辦四省軍務以欲援浙江必先復寧國欲復寧國必先克青陽以通進兵之路故詔屢催超赴浙國藩必令先取寧國十二月超規青陽敗石埭太平援賊盡毀東門外賊壘同治元年正月朝廷以東南事機漸轉推恩諸將帥嘉超深諳將略屢著戰功賞穿黃馬褂授浙江提督二月受張遇春降留所統三千人編春字營自效三月賊糾浙江死黨三萬餘撲銅陵超慮其竄大通斷我餉路乘夜疾馳百餘里出賊不意焚其壘卡賊潰走南陵守青陽賊古隆賢偵超離營築九壘踞要害超還軍分攻平之復青陽連克石埭太平涇縣張遇春亦破賊於旌德之三

溪上以超身先士卒調度得宜下部優敘並頒賚珍玩四事四月設伏敗寧國守賊楊輔清復府城賞雲騎尉世職時洪容海自廣德來降受之編啟化營十一月丁母憂乞假終制上念超爲諸軍倚重不准離營改爲署理浙江提督十二月賞福字荷包銀鏢食品自後每歲如之二年正月破賊涇縣二月賊設伏誘超軍超知之亦潛伏山坳以伺賊果撲高祖山營超留兵茯苓山斷賊後而自分三路進與大營夾擊逐北四十餘里並克西河灣汴賊巢賊酋黃汝金竄鄱陽超奉曾國藩檄赴援景德鎮正進兵而李秀成又陷江浦浦口曾國藩改檄超北援破賊清溪鎮拔巢縣克含山和州復江浦浦口兩城斷賊過江路北岸肅清旋會水師克九洑洲九月破水陽新河莊兩隘毀東夏賊壘取東壩僞城建平溧水賊亦以城降曾國藩奏言超旬日之間攻取四城並奪東壩重隘見檄駐兵嚴守保此三省扼要之地卽爲附近遊擊之師三年三月攻破三岔塔岡賊卡克句容敗賊金壇復其城超乞回籍葬親疊次陳情曾國藩入告廷旨慰留以移孝作忠並賞銀五百兩經理葬事會皖北江西告警爭欲得超軍曾國藩奏江西待援尤急上命迅速前往六月留數營駐豐城自整隊進次撫州賊遣人詭稱銅鼓營官兵爲官軍

鄉導豫設伏秀才埠以待別遣賊犯豐城牽綴留駐之師官軍已深入伏中忽聞礮超卽衝擊擒斬甚多亟督隊倍道回援豐城賊方排陣見超至驚散是月官軍復江寧上以超屢克名城使江寧蘇常之賊不能聯爲一氣厥功甚偉賞一等輕車都尉世職七月破許灣賊巢連克崇仁宜黃東鄉金谿南豐陳炳文率六萬人繳兵械降上嘉其破數萬賊如摧枯拉朽實屬勇敢異常戰功卓著陳炳文亦准隨軍自效九月分軍擊賊贛南復親督軍由池埠援寧都殲賊萬計賞戴雙眼花翎僞康王汪海洋遣黨詐降超誘令來迎驟擊之克瑞金尋江西軍搜獲洪逆幼子福瑱全省肅清錫超一等子爵十月復乞歸葬賞假兩月並寄諭甘肅軍務未歲新疆回匪日益蔓延鮑超俟假期一滿卽由川起程出關剿辦其舊部兵勇及得力將弁並准酌量奏調會李世賢撲陷武平官軍失利巡撫郭嵩燾毛鴻賓沈葆楨先後請留超軍埽蕩餘氛四川總督駱秉章則極言川楚兵勇遠征西域甚非所宜且僞康侍等逆兇醜復熾寔營屢挫兇鋒賊聞風喪膽正可藉此以靖餘逆大學士曾國藩亦密陳新疆大漠苦寒艱苦異常雖有名將深得軍心者至塞外亦恐攜貳思歸鮑超出關後儻部曲離怨潰散則叛回大熾全局震動仰懇聖

明垂鑒飭令鮑超隨同都興阿楊岳斌先剿甘省俟內地全敷底定再行大舉出關然超自在江西被命已議帶舊部八千三百人以提督宋國永統領先發四年四月至湖北金口軍潰詔褫宋國永職並諭鮑超所部之勇既多潰散是出關一節勢難成行該提督剿辦粵匪素著聲威福建漳州之賊尙在負嵎並有西竄粵東之意著駱秉章傳知該提督趕緊起程取道湖北一帶招集已散勇丁申明紀律統帶赴閩剿賊以贖前愆超聞變亟遣弁馳赴江楚宣敕招撫並自請處分旋力疾就道七月至武昌復奉命率新募四營改由裕州泌陽一路剿辦河南捻匪會廣東嘉應州失守超馳抵贛州諭令迅由安遠一路覘賊所向扼擊十一月移軍會昌十二月督軍由武平抵相公亭進扼平成鋪賊大股來犯踞嶺布陣超先令總兵婁慶雲等分鈔嶺後而親督總兵唐仁廉等從山下仰攻騰蹕而上賊披靡下竄官軍買勇畢登乘勢壓下分鈔之軍截賊去路擒斬無算超料城賊將遁豫設伏黃砂障遏其前遣將扼北溪白沙壩邀擊自率輕騎偪於後截賊數段殲斃八千有奇降五萬餘人查出叛勇目黃矮子等磔之粵匪平賞加一雲騎尉世職五年正月仍授浙江提督命督所部迅赴楚豫之交剿賊超因軍事未已寔營

積欠餉銀二百萬兩籌補非易激勸將士全數報捐部議加廣四川鄉試文武中額各十四名一次永加超本籍府縣學額有差八月敗賊於河南之裕州追抵魯山遂由汝洛躡追九月諭超移紮陝州專顧西路乃間道出韓城而賊竄商州陝西巡撫劉蓉等請飭超入關助剿曾國藩先留超防豫鄂境會西安戒嚴仍檄入關湖北巡撫曾國荃又奏留鄂詔斥之仍令人陝六年正月超行及樊城曾國荃羽書留超兜剿鍾祥賊超奏請所嚮廷旨切責國荃時賊已突至霸王山距樊僅六十里義難舍近圖遠卽督軍馳抵郢城賊踞楊家泮拖船埠永隆河一帶提督劉銘傳亦追賊至剋期夾擊超隊及楊家泮則銘傳已先出敗潰賊三路張翼緊躡氣甚厲超部署諸將四路迎戰而以總兵楊德琛等馬隊爲遊擊之師諸將陷陣左右偏擊退中路步賊而馬賊馳援我中路策應兵用連環槍礮接戰游師從夾道縱騎蹙之其兩翼馬賊爲我中左中右策應步將所截左右馬隊已包賊後衝出賊惶顧返奔官軍乘勢追擊大敗之俘任柱賴汝洸妻孥於雞鳴山等處賊竄泌陽超奏言賊受大創四路狂奔必無定所官軍人馬罷困擬暫休息樊城仍當乘勢殄滅之乃專意入陝奉寄諭該提督勇於立功所向克捷惟旣與賊相持

自未便舍而之他著卽會合豫鄂諸軍殄滅此股二月超因馳逐太勞掣動傷病增患日疾疏請開缺調理章再上溫旨均不許四月三上疏請員權統霆軍詔賞假一月頒賜人蔭四兩嗣曾國藩疏陳超苦戰功高一時名將無出其右此次傷病大發非驟能全愈請准其開缺回籍允之七年八年兩奉敕問病狀十三年召來京因病未復元續假光緒六年俄羅斯議約多要挾特起超於家授湖南提督尋命與大學士總督李鴻章巡撫曾國荃會辦海防卽募湖南壯勇北上擇駐天津山海關適中之樂亭縣境九月超奏言自古備邊之策能守而後能戰能戰而後能和不可恃其不來當恃我之有備聞俄人將由遼海環春水路內犯儻竟乘虛而來舍戰更無良策臣詳考地勢環春陸路至威遠門不及千里是爲奉天吉林之關鍵儻或由此內犯則進邊門而拊盛京之背西則由馬千總臺出廣寧錦州之後而趨熱河若由錦州循邊牆梨樹溝鳴水門而進喜峯口尤深入內地之捷徑也水路由混同江越黑龍江口逆流西上可直抵三姓伯都訥等處儻或以水師夾攻則黑龍江非復我有而吉林腹背受敵矣若由奉天南循遼海則金州廳屬之大凌灣小平島旅順口錦州府屬之天橋廠寧遠州屬之釣魚臺皆可泊

舟登岸儻或由此進兵則吉林奉天腹背均受敵矣且天橋廠釣魚臺距山海關皆不甚遠儻舍舟就陸越奉吉防軍之前進喜峯口以達遵化勢必震動神京不可不先爲戒備臣秣馬厲兵所挑將領非隨臣身經數百戰者概不入選復親加訓練教以忠義以作其敢死之氣萬一有警無論遠近臣卽親督馬步各軍星馳援剿先以保衛京畿爲第一要著儻敵兵由山海關西北各口入永平之撫寧盧龍界內則霆軍實當其衝誓當四面截擊斷其歸路不難繫夷酋之頸待其窮蹙乞命然後許和庶兵可百年不用疏入報聞七年閏七月俄約議定回湖南任八年三月以舊疾未痊乞開缺賞假慰留八月再疏請從之十年四月法蘭西搆釁越南命超募勇山雲南出關爲總督岑毓英後繼之師十一年正月出馬白關未幾法人行成五月撤防回籍十二年七月卒遺疏入諭曰一等子爵前任湖南提督鮑超忠勇性成不避艱險咸豐年間隨同曾國藩胡林翼轉戰湖北江西安徽江蘇等省每於軍務危急之時出奇制勝殲除巨寇屢克名城積功洊擢至浙江提督同治三年克復江寧賞給一等輕車都尉世職復錫封一等子爵乘勝帶兵隨同左宗棠援剿廣東髮逆餘匪一律肅清又剿辦捻逆於湖北等處疊奏膚功

嗣因病准其開缺回籍朕御極後復簡授湖南提督並疊令其統師防堵上年五月諭令來京陛見該提督因傷病舉發請假調理方冀寵眷長承深資倚畀茲聞溘逝悼惜殊深著賞加太子少保銜照提督軍營病故例從優議卹並賞銀三千兩治喪由四川藩庫給發一切處分悉予開復應得卹典該衙門察例具奏該提督戰功事蹟著宣付國史館立傳加恩予諡並准於原籍及立功省分建立專祠伊嫡長子鮑祖齡著卽承襲子爵毋庸帶領引見伊子鮑祖恩鮑祖祥伊孫鮑世爵著俟服闋後交吏部帶領引見用示軫念蓋臣至意尋賜卹如例予諡忠壯十五年慈禧端佑康頤昭豫莊誠皇太后歸政追念功績最著諸臣各賜祭一壇超與焉子祖齡二品廕生花翎浙江金衢嚴兵備道襲子爵

江長貴

江長貴四川鹽亭人由行伍歷官千總咸豐二年從軍廣西以守桂林功賞戴藍翎四年奏調赴皖連克建德東流等縣洊陞阜和營都司五年正月粵匪竄皖南徽寧戒嚴長貴扼守蕪湖太平等處賊竄黟縣之漁亭長貴偕千總許上達隨福建汀漳龍道徐榮迎剿之榮與上達戰歿長貴以孤軍奮擊賊敗遁竄至休寧復

督兵進剿身被槍傷裹創死戰徽郡既陷退屯深渡上以賊衆我寡長貴奮勇殺賊屢立戰功命以遊擊陞用並賞執勇巴圖魯名號六月兵部侍郎王茂蔭疏言長貴帶勇得力實爲徽民之望浙江巡撫何桂清亦疏薦之命以三品頂戴署理皖南鎮總兵六年正月圍攻蕪湖踞賊疊有斬擒又攻克范羅山等處賊壘會何桂清調赴東夏防堵安營未定賊突至兵勇遽退命下部嚴議敕往徽州交三品京堂張芾差委八月賊竄踞太平張芾檄長貴擊走之賊陷祁門長貴馳剿戰於花橋手斬僞檢點僞軍師二名遂破東門入賊潰走詔以長貴連復兩城尙爲奮勉加恩寬免嚴議處分時江西敗賊復竄徽州連陷婺源休寧分撲各營長貴往援以巨礮斃悍賊楊國宗遂克休寧七年克婺源浙江巡撫晏端書疏言長貴自調防徽郡疊次督剿得力請卽補授皖南鎮總兵以資表率詔如所請八年在營聞赴丁憂命毋庸開缺改爲署理時駐兵徽北崇覺寺賊分股來撲長貴飭所部鈔剿戰於苦竹橋伏賊四起長貴問道馳至力解重圍復分兵設伏毀陳村夏村賊巢乘勝進擣卓村賊退踞陵陽鎮長貴分兵鈔賊後督隊斬關進逼陣斬賊首傅添豫逐北二十里石埭涇太一律廓清敍功賞加提督銜九年長貴駐師祁門

偵宏潭賊無備乘霧夜擊之賊潰走遂平美坑賊壘進攻郭村設伏山陽以遊兵誘敵殲擒略盡賊竄烏石瀧復率輕騎追出桃嶺進襲夏村克之捷聞命下部優敘會青陽賊入涇縣界蔓延數十里勢復張長貴率隊擣平查村包村各賊壘又敗賊觀音巖老莊里十年正月賊陷涇縣旌德長貴往援疊擊獲勝二月賊陷績溪撲徽州長貴冒雨疾戰手斬賊首鄧傳意賊潰復績溪城進規旌德敗賊於白沙嶺又敗之將軍廟遂克旌德並復太平涇縣各城四月命署理湖北提督時常州無錫蘇州並陷詔杭州將軍瑞昌統兵規復並命長貴幫辦軍務長貴行抵吳江以兵單無繼退守平望賊撲營兵潰長貴受槍傷退至嘉興七月賊竄廣德州長貴回援方戰所乘馬中槍遂敗城陷退守安吉上念其平日打仗奮勇命革職留任十一年正月賊犯大紅嶺擊走之五月賊由羊棧嶺繞襲官軍後路突陷夥縣長貴會軍攻復其城並埽平嶺外賊壘進復徽郡詔開復革留處分同治二年八月調署直隸提督會剿直境各匪十一月命仍回安徽軍營剿賊尋以兩江總督曾國藩疏言見在皖省肅清湖北防務正殷長貴久歷行陣素得民心請敕赴湖北提督本任從之八年調補福建陸路提督九年莅任十二年閩浙總督李鶴

年疏言長貴年力就衰上命開缺仍賞食全俸光緒二年在籍卒四年四川總督丁寶楨奏請於安徽省立功地方建立專祠諭曰已故福建陸路提督江長貴曾在廣西浙江等省立有戰功咸豐四年調援安徽連克建德東流兩縣固守祁門功績尤著准於安徽省立功地方建立專祠由地方官春秋致祭以彰忠藎尋又疏言長貴治兵有法凡戰皆勝皖南士庶倚爲長城性復孝友念切斯文曾捐廉請永廣鹽亭學額一名又捐置鄉學請入祀鄉賢祠詔如所請

傅振邦

傅振邦山東昌邑人道光十六年武進士授三等待衛二十三年選湖南長沙協中軍都司二十四年調綏靖鎮右營都司復調鎮筵鎮前營都司七月丁父憂九月湖廣總督裕泰以人地相需請陞署鎮筵中軍遊擊允之三十年剿新寧土匪李沅發受槍傷事平敘功賞戴花翎九月實授遊擊咸豐二年粵匪圍廣西省城振邦奉檄赴援隨大營追賊興安全州至湖南道州屢有斬獲三年正月隨欽差大臣向榮由湖北武昌剿賊東下七月陞湖南撫標中軍參將仍留營效力十二月以圍攻江寧敘勞賞綽克托巴圖魯名號四年三月推補貴州定廣協副將

五月命署江蘇徐州鎮總兵會賊由蕪湖犯東壩陷高淳向榮奏留振邦於江南統兵迎擊水陸均捷復其城旋由小丹陽進規太平府克之乘勝偪秣陵關迎擊采石來撲之賊礮傷手腕戰益力賊遂奔潰六年正月莅徐州署任督軍援宿州解其圍三月敗捻匪張落刑於瓦子口悉毀其巢擊退蒙城北犯灘口之賊五月擒首王得六等踞永城鐵佛寺阻我進兵振邦由青里集會攻擒其渠悉毀附近賊巢以出境累捷實授徐州鎮總兵值江寧大營失利上命振邦馳往向榮軍隨同剿賊八月偕總兵明安泰秦如虎分路破東壩賊肅清高淳縣境乘勝進紮蒲塘規取溧水設伏誘賊疊獲大勝賊百計出撲不得逞先後奪賊壘以百數斃賊二萬有奇七年四月復其城捷入諭嘉其盡心籌畫剿辦有方實屬謀勇兼優五月擊敗湖墅賊追至龍都遂與提督張國樑會攻句容克之論功賞加提督銜八年正月馳援寧國拔灣沚黃池郡城解嚴四月命酌帶兵勇迅赴徐州應援旋敕偕太僕寺卿袁甲三辦理河南山東江南三省剿匪事宜是時捻逆蠡起振邦馳逐徐豫間擒石得珍於山套覆李大瀆於符離蹙孫葵心於茨河歸德陳州一律肅清諭軍機處記名以提督遇缺題奏九年正月命代袁甲三督辦三省剿匪之

任以副都統伊興額副之二月復命幫辦欽差大臣勝保軍務仍留北路督辦三省剿匪事宜先是滄北賊劉添幅等糾黨三萬餘圍團練苗沛霖營意圖開通竄路上敕振邦速解其圍至是督兵進攻苗練亦從內衝出遂毀賊圩二十四座並卻來援之賊乘勢擣滄南陣斬逆首任乾平其圩四月授雲南提督仍督師剿捻滄南自任乾授首蒙城之王家圩等八處均降而淝南板橋集踞捻陸連科恃地險久抗振邦招降其所屬之黃家圩又得被脅之李華東密爲內應擒陸連科置於法遂攻毀南北岸賊圩方家集等圩亦詣營求撫捷入得旨嘉獎六月定遠被圍上命振邦應援振邦奏言宿定相距較遠中間賊巢林立繞道南下緩不濟急如親率一旅以往賊必截我歸路其勢實難兼顧上遽之旣而定遠失守振邦以事機變更西顧爲重擬取道蒙城而南先撥馬隊自南平馳往奏入諭令與勝保聯絡聲勢相機剿辦八月賊由朱家口直撲宿城爲振邦所敗東犯固鎮欲由方家坎渡河振邦於南岸背水而陣張兩翼進戰相持四時許賊始敗退九月孫葵心竄唐家寨將由豐縣窺伺濟寧永城復有馬賊勢欲北趨均經振邦截擊歸巢十月敕太原鎮總兵田在田幫辦振邦軍務十年正月上以袁甲三代勝保爲欽

差大臣命振邦督辦徐宿一帶剿匪事宜毋庸幫辦袁甲三軍務時滄南擒匪潛窺徐宿振邦以袁徐兩圩跨踞滄南河北之臨渙韓村爲渡滄北竄要道而趙家海圩居其中地尤扼要督兵取之斬馘二千餘乘勝克張圩餘均自拔來歸遂渡滄攻袁圩值擒首劉添幅由豫折回先擊之毀其營數十座二月連破賊於褚莊邱家圩檀城五戰皆捷先後殲逆黨五六千獲擒首任護任大牛正其罪東路擒匪分擾宿遷雖寧偪近徐州振邦督隊迎剿疊有斬擒進至苗村賊馬步數萬來撲督軍分路邀擊敗之斬刈殆盡閏三月圍攻閻圩屢敗其援賊李大喜復糾黨五六萬斷我糧道鏖戰半日擒之民人縛匪首任虎等乞降遂克閻圩四月連克解溝五溝賊巢斬匪首李四喜任友得等三十餘名復拔附近之任圩於是童亭等處圩寨四十餘相繼反正五月駐軍孫疇會圍袁圩擒首劉添詳等糾黨七八萬來援分軍擊之平十餘壘而永城擒匪萬餘直趨童亭窺伺孫疇大營以援袁圩振邦飭副將龔耀倫等馳擊敗之擒擒首趙學煥等二十五名尋因暑雨撤師七月拔蒙城西洋集賊圩十四座穎亳擒首姜臺凌等北竄滄南振邦等據險力戰擒大小逆目以百計八月復擊平賊壘二十餘十一月傷病發請假調理旋奏

病重請開缺回籍允之十一年三月命督練民團辦理登萊青三府防堵振邦奏言擇要防堵必於險隘處所臣病未痊訓練布置在在爲難擬專辦團練詔允其請時捻首李成猝至直隸高陽振邦派團勇擊破之遏賊東趨十二月命來京聽候簡用同治元年正月欽差大臣勝保以振邦和平深穩勇敢有爲奏請幫辦皖豫軍務從之嗣因山東巡撫譚廷襄請敕幫辦山東軍務不果行二年欽差大臣科爾沁親王僧格林沁奏調振邦統前軍克緇川平白蓮池教匪下部優敘尋派援安徽會合官軍解蒙城圍擒叛練苗沛霖及亳州賊渠姚得洸等三年隨僧格林沁追捻匪張總愚至湖北隨州疊獲大勝復連破髮捻各匪於應山之孟阪店吳家店陳家阪等處四年閏五月奉撤回籍六月以疾愈咨請山東巡撫閻敬銘入告有旨敕赴曾國藩軍營聽候差遣閻敬銘奏賊圖竄青州振邦熟悉地方情形請暫留山東帶兵駐紮青萊從之旋因河防重要移扼張秋十月錄保全完善功予優敘六年八月直隸梟匪逸入臨清等處振邦帶本部馳擊賊回竄曲周直隸總督劉長佑飭越境追剿振邦與道員余承恩商同計誘賊窮蹙乞撫已而復叛上責振邦輕率收降摘去頂戴仍著迅圖剿洗十二月追至山東夏

津縣殄除殆盡山東巡撫丁寶楨爲請賞還頂戴七年七月復因剿辦梟匪防守黃河出力下部優敘是時西捻蕩平欽差大臣李鴻章以振邦在直東一帶勸集團練挑築運河牆濠深資保障奏請獎勵得旨遇有提督缺出儘先簡放並補給元年應得恩廕八年授直隸提督光緒六年調湖北提督九年正月以傷疾發開缺回籍七月卒事聞諭曰前任湖北提督傅振邦由侍衛洊陞提督前在各路軍營帶兵剿賊疊著戰功宣力有年克稱厥職本年正月因傷病舉發准其開缺調理茲聞溘逝軫惜殊深加恩照提督例賜卹任內一切處分悉予開復應得卹典該衙門察例具奏尋賜祭葬予諡剛勇附祀直隸古北口昭忠祠十四年山東巡撫張曜疏言振邦前在本籍辦團保全鄉里厥功最偉請在原籍捐建專祠列入祀典並將事蹟宣付史館立傳允之

劉厚基

劉厚基湖南耒陽人由武童投軍剿四川賊咸豐十一年六月以攻破蘇家灣等處賊巢保藍翎把總加千總銜十一月官軍克牛腹渡賊巢解大邑縣圍厚基臨陣勇銳以千總儘先拔補加守備銜同治元年二月四川總督駱秉章破賊藍潮

鼎十餘萬之衆解緜州圍又敗逆黨李長毛於略平場厚基在事出力以都司補用並賞換花翎八月藍逆竄踞崇慶州石羊場厚基隨官軍進剿有功以遊擊留於四川儘先卽補十一月以力解眉州圍並克丹棱城以參將儘先卽補時賊首周洸庭等久踞青神厚基隨總兵蕭慶高等分路進剿克之追賊至龍窰場生擒周洸庭等二年二月擢副將並賞給猛勇巴圖魯名號嗣滇逆李永和等竄擾蜀境厚基率所部隨剿悉數殄除七月奏入加總兵銜三年二月陝逆竄犯川境厚基趨新集場會同官軍斬馘過半克漢中府城賊竄踞上元觀外列壁壘厚基設伏誘賊出縱擊之盡毀其壘餘賊竄城固斷橋梁阻隘而守厚基架浮橋麾兵渡河攻其西毀附城賊壘梯城入遂復城固進偪洋縣偕蕭慶高等分路環攻潛遣精銳入城設伏夜舉火爲號各軍登城大呼賊驚遁死者山積陝西巡撫劉蓉上其功命以總兵記名簡放三月追逸賊至大河壩乘賊渡未畢扼吭合戰降二千餘人又敗餘逆於金水河四月剿大莊坪等處踞匪賊退扼八里坪以死拒厚基等從天池梁左右襲破之復敗之於陝南澇擒僞巡捕都統數人逆首曹燦章雍髮遁陝境肅清加提督銜六月移剿石達開於四川敘州之橫江更番疊戰斃賊

萬餘上嘉厚基膽略兼卓動洽機宜賞三代一品封典十一月攻階州擣城西賊壘斬僞都統及僞統領先鋒等八人十二月官軍依山築壘賊率黨來撲厚基卽以築壘之兵迎擊分兵繞顧舊壘而以親兵併力扼剿短兵相接大蹙之乘勝薄其壘拔梅花樁十餘重賊恃險負嵎厚基多設方略大小數百戰破之擒僞啓王梁成幅及逆首蔡昌榮家屬全股盡殲四年閏五月駱秉章上厚基克復階州功得旨交軍機處記名以提督簡放七月髮捻二賊西窺秦晉劉蓉奏派厚基統親兵五營駐潼關東之金陡關上以兵力單薄命護理山西巡撫布政使王榕吉飭在防兵將與厚基防軍聯絡堵禦嗣以鳳邠逆勢猖狂劉蓉復令厚基五營暫紮鳳翔上命劉蓉迅飭總兵劉玉興等軍速赴鳳翔仍令厚基扼守金陡關五年官軍截剿鳳隴逆回追逐出境復攻克故關盡毀其巢又越境擊破尖骨山巨匪疊獲勝捷厚基在事出力賞換西林巴圖魯名號六年鄜延一帶回逆土匪勾結逆首張幅滿等踞安塞縣之橋扶峪等處招納叛勇謀攻延安厚基擊敗之賊匿家屬輜重於馬家莊厚基偕記名提督劉聲集掩擊之大破其衆張幅滿攜家屬投水死旋因母病請假省視陝甘總督左宗棠據情入告上以陝西軍務喫緊厚基

攻剿甘泉安塞等處賊巢正屬得手未可遽令離營有旨慰留並賞厚基母人淺四兩七年二月回匪陷鄜州提督劉端冕統兵攻南門適厚基由牛武鎮馳至敗之立克鄜州城時延安甘泉之賊猶抵死抗拒官軍多傷亡五月厚基督兵勇裹創力戰賊始遁八月西安將軍庫克吉泰等彙案請獎賞厚基白玉搬指白玉翎管大小荷囊等件尋授陝西延綏鎮總兵旋殲回逆於鄜州屬之羊圈等處八年五月左宗棠劾厚基稟報軍情不實又聽其弟總兵劉厚填捏飾鋪張命撤銷記名提督並撤去勇號暫留本任十月以副將劉秀桃等赴河南募勇沿途滋事厚基派委不慎經幫辦軍務署陝西巡撫劉典疏劾之坐革職留任九年二月以擊敗北山各屬回逆開復革職留任處分三月擊滅清澗縣踞匪四月殲賊於榆林定邊等處下部優敘十年遵母羅氏命捐租八十石爲本籍鄉試士子賓興費又捐銀一千兩買田收租爲伊族生童科歲兩試卷價復將歷年廉俸薪水所餘捐銀一萬兩買租一千石爲宗祠義田養贍族中無依之人兼資子弟延師讀書之用湖南巡撫王文韶疏請旌獎賞厚基母羅氏御書扁額一方十三年左宗棠以厚基於陝北各隘口實力設防殄除零匪與有功績請開復記名提督賞還西林

巴圖魯名號允之光緒三年卒諭曰陝西延綏鎮總兵記名提督劉厚基久歷戎行前在楚蜀等省戰功疊著並隨左宗棠剿辦陝西回匪所向克捷延綏一帶邊防辦理亦臻妥協見在因病身故殊堪憫惻劉厚基著交部照提督在軍營立功後病故例議卹尋賜卹如例四年左宗棠等疏言厚基自投湘軍轉戰湘蜀肅清各郡縣嗣率師援陝克復漢南郡城旋攻階州陣斬逆首蔡啓等甘南以靖維時回逆猖獗北山防剿尤殷該總兵統帶各軍分途雕剿攻拔綏鄜二州解榆林圍收復各縣城池駐軍榆郡署理鎮篆整飭營伍百廢具興旋授實缺該總兵安不忘危力籌賑墾設法招徠修城開渠建立書院增置膏火凡地方義舉無不竭力勉爲紀律嚴明兵民和輯聯絡蒙地中外交孚懇請省城及榆林地方捐建專祠二十年湖南巡撫吳大澂以厚基力任義舉保衛桑梓請於原籍耒陽縣建立專祠以順輿情得旨均如所請

陳國瑞

陳國瑞湖北應城人幼爲粵匪所掠出投九江鎮總兵黃開榜營姓黃氏從軍剿賊有功洊陞守備賞戴花翎咸豐九年隨漕運總督袁甲三軍克安徽鳳陽加都

司銜十年七月官軍圍定遠擒首李允等來援國瑞奮勇陷陣脅中槍裹創殊死戰賊辟易官軍共蹙之破其二圩賞技勇巴圖魯名號九月賊復圍鳳陽國瑞力解之超擢遊擊十一年江皖各逆犯揚州國瑞馳剿湖西驍勇出衆荊州將軍都興阿奏捷盛稱其功加副將銜同治元年正月擒匪竄淮安車橋漕運總督吳棠檄令迎剿國瑞率五百人繞賊後出不意擊之總兵龔耀倫遏其前賊潰逐北二十里其大股馬賊屯各村者先遁步賊萬餘出拒國瑞偕總兵王萬清等合戰大捷又敗捻股李城於版牘二月賊數萬由衆興集竄漁溝三撲鹽河犯清江浦國瑞與副都統德楞額副將劉成元等併力堵擊賊退國瑞以礮船三十由中河南岸遏賊之渡運河者夜襲破桃源北岸賊圩四約水師遊擊楊德榮直取衆興連破十餘壘立拔之超擢副將賞總兵銜三月率步隊八百敗李加膺等於涇河累戰至新河隄賊三四千偪隄而陣國瑞麾隊登隄鏖鬪四時許手然洋槍殫執旗賊目賊駭走乘勝追剿先後斬級千餘桃源清河山陽寶應肅清捷入命交軍機處記名以總兵簡放嗣泗州擒首韓老萬等萬餘衆謀渡順清河爲國瑞所遏退踞汶河國瑞突入其圩逸賊潰竄觀音寺呂梁橋越日復來攻國瑞且守且戰相

持未下別選精壯數十人陷陣大隊繼之賊遁四月督同遊擊張振西進軍宿遷
遂移軍邳州六月渡河至新村捻衆互三十里國瑞分三路擊之收附近十餘村
乘勢遮賊沙莊斬賊渠王春玉擲其首賊陣中賊駭亂官軍奮擊俘馘甚夥賊雖
屢挫仍恃衆抗拒斫樹作柵國瑞商之黃開榜夜冒雨襲毀其三營別柵趨救適
遇敗匪疑爲官軍輒自相殺官軍自後蹙之斃數千捻勢遂衰吳棠以國瑞軍務
機宜最爲敏練請令帶所部千人移紮高寶專辦湖防允之十月命赴山東會剿
棍幅各匪時東境幅匪麇聚郟城之長城圩徐家圩等處國瑞先拔徐家圩進圍
長城圩逆首李城糾黨來援戰卻之二年二月破其圩賊首劉兆青等及匪黨千
餘悉殲焉進紮杜家堡附近各圩以次剿撫上嘉其功詔俟總兵缺出儘先題奏
時悍賊孫化詳襲踞中村宋三剛匪圩宋三剛等來降願殺賊自效遂移營中村
圩外先破朱柳莊等賊巢分剿黎墟等附近各賊鋪三月攻中村密令宋三剛等
潛入爲內應而督軍夜薄圩下圩內火四起賊大亂突西門出孫化詳中槍死餘
匪盡殲各圩震懾悉就撫沂屬廓清五月進規兗州鳳凰山棍匪飭副將郭寶昌
參將康錦文分路設伏自率小隊抵白蓮池圩門誘匪首劉雙印出圩引至五里

外國瑞返身與戰伏發截賊隊爲二斃數百名擒劉雙印乘勢入頭道圩門賊酋劉錦春率衆來拒揮軍斬之餘逆退入二道圩國瑞連日偪攻賊棄圩夜遁分兵追擊後者盡殪六月偕副都統舒通額復鳳凰山賊竄上紅山七月國瑞由山北雲蒙寺進各軍繼之遂毀其巢科爾沁親王僧格林沁駐軍淄川聞捷入奏上以國瑞奮勇可嘉賞穿黃馬褂尋又賞頭品頂戴國瑞請歸宗復陳姓許之時逆練苗沛霖就撫復叛擾安徽蒙城僧格林沁檄國瑞赴援吳棠請敕國瑞幫辦軍務駐蒙宿之間徐宿蒙城各軍均歸節制安徽巡撫唐訓方請以蒙城剿務專委國瑞與以調遣之權詔悉如所請國瑞至蒙勘形勢先襲破紅里賊圩以通糧道繼克王圩進圖苗逆時賊壘相屬外限長濠三國瑞約各軍分三路進槍斃賊二百餘越濠二道直偪賊壘九月偵知苗逆結捻酋李大箇仔等擾臨淮阻蒙軍餉道分兵往護之唐訓方以國瑞所部僅四千人益以總兵宋慶一軍國瑞以制勝之術必先渡河立營截賊陸運糧路乃飭總兵郭寶昌等自全家集堯水抵南岸支浮橋令宋慶守之國瑞親督軍渡河接立五營悍賊數來攻不得逞至十月陸續立二十餘營斬運糧賊徐汝璧等焚其屯糧之所乘賊窮窘連拔其營僅餘東北

三壘國瑞又攻破之苗沛霖夜遁爲總兵王萬清所誅蒙城以安得旨著俟補總兵後以提督記名簡放嗣飭宋慶擣苗逆老巢收下蔡壽州苗逆妻子均就戮會宋慶與江南提督李世忠部將爭功鬪殺國瑞奉僧格林沁檄往彈壓遂駐下蔡三年四月授浙江處州鎮總兵六月駐軍正陽關僧格林沁以髮捻各逆竄湖北麻城檄令由商城兼程赴援而安徽巡撫喬松年亦屬國瑞由英山進規羅田七月僧格林沁劾國瑞輾轉遷延貽誤戎機下部嚴議坐降三級調用暫停開缺奪所部隸郭寶昌管帶國瑞怨望人遂言其將反郭寶昌密報僧格林沁國瑞聞之疾馳至營伏地哀訴願作前驅帶罪殺賊時賊集柳林寨大山寨一帶僧格林沁飭同各軍進擊賊敗退官軍入山窮追遇伏失利糧且盡國瑞力戰兩日夜始突圍出賊亦南竄旋自光山新店回竄黃安麻城之交九月偕翼長成保由白果團陂進戰奪壘數處十月追賊土漠河與諸軍合戰斃賊八九百名擒數百名論功免降三級處分尋扼光州杜賊北竄進剿吳家畝山北之賊敗之新店會疾作請假就醫光州而官軍剿賊失利河南巡撫張之萬疏言國瑞驍勇過人每戰必捷所部不過三千而數萬之賊當之輒北宜令速赴僧格林沁軍營辦賊從之國瑞

尋愈四年正月擒首賴汝洸張總愚等竄魯山護軍統領恆齡副都統舒倫保陣亡國瑞見前敵失利立提軍扼橋口賊不能合圍餘軍得還有旨令僧格林沁傳諭嘉獎既而賊圖犯襄城國瑞追及之乘夜大雪出賊不意火其壘賊潰南擾信陽二月與各軍夾擊之賊走確山國瑞又追敗之其悍黨乘馬疾奔由遂平西平郟城鄆陵許州趨睢州日百餘里步軍追之不及三月國瑞至睢州賊過黃河老隄圖擾山東國瑞等自曹縣定陶城武鉅野嘉祥追至汝山賊從臺莊渡運河竄蘭山郟城遂趨江蘇海州贛榆沭陽各州縣國瑞率隊躡追進屯沭陽四月賊復自贛榆入山東國瑞晝夜馳剿賊至郟城西北水套一帶郟北伏莽附之馬步卒至數萬竄曹州國瑞與郭寶昌隨僧格林沁迎戰於高樓集陷賊伏僧格林沁遇害諸將各相失國瑞被重傷突出重圍所部僅百餘人退入西南民寨事聞得旨國瑞身騎俱受重傷不無可憫姑免置議命收集潰散繞赴北面努力擊賊爲僧格林沁復仇國瑞旋收集馬步數百名保衛曹郡尋解嘉祥之圍閏五月欽差大臣曾國藩飭國瑞赴河南聽候調遣六月河南巡撫吳昌壽調國瑞援歸德國瑞馳抵睢州截賊北竄復由通許尉氏追及賊於郟城斬馘無算時國瑞有衆五六

千奉曾國藩批飭所部不得過三千遂遣散五營因病請假令參將黃祥興統其衆國藩疏劾國瑞曹南之役與郭寶昌分統左右兩翼寶昌不顧主將革職拏問國瑞飾詞巧脫逍遙法外請撤去幫辦軍務褫去黃馬褂暫留處州鎮總兵責令帶罪立功詔如所請既而就醫淮安欲殺其義子振邦吳棠派員勸諭突率勇十餘人闖漕運總督衙門肆口詈辱吳棠劾之遂褫職六年八月漕運總督張之萬戶部左侍郎譚廷襄疏列國瑞戰績請加錄用上召之十二月赴部引見賞頭等侍衛以捻逆竄山西逼近直隸命發往欽差大臣左宗棠軍營差遣並令直隸總督官文先撥勁旅交國瑞統帶覘賊所向迎頭截擊七年正月賊渡漳水擾及沙河境國瑞行抵正定官文檄總兵劉景芳所部練兵三營練勇兩營暫交國瑞統帶復令遵化練兵兩營併歸調遣尋偵賊逼近省垣遂率遵化軍馳出賊前兩晝夜卽抵保定並約提督宋慶張曜兩軍同至上嘉之命設防易州爲遊擊之師二月上從神機營王大臣之請敕國瑞充神機營管隊侍衛所部勇丁卽作爲神機營銳勇隊歸該王大臣調撥國瑞在保定募勇扼守省南賊竄渡漳沱河國瑞敗諸河干三月賊入河南竄新鄉獲嘉及清化鎮上命左宗棠飭國瑞馳赴封門口

剿截宗棠尋疏言國瑞在保定開募時遣人潛赴各營勾引成軍勇丁許月給餉銀七兩五錢臣親軍營勇被勾去八百八十餘名又咨奪各營勇夫軍械前敵諸軍無不遭其毒害諭旨祇令招募二三千國瑞馬勇約已千騎又廣收游勇附之據其咨稱每月需餉銀三萬兩則人數不僅二三千可知其軍不著號衣半用全黃馬褂半用全紅馬褂令人稱己爲大帥在順德曾殺傷民團百餘人其狂悖無狀如此見值賊勢東趨已咨其由壺關出天井關扼懷慶之濟源關以資防剿惟該軍漫無紀律勢必縱勇殃民伏乞敕下神機營王大臣嚴加裁抑並懇令國瑞恪遵各省督撫節制遇有干犯卽予嚴參疏入諭曰陳國瑞勇而無禮朝廷素所深悉因其前在山東尙能力戰令其馳赴前敵假以虛名冀策後效並非寵待優崇不料該侍衛謬妄至此本應量加懲處惟念剿賊喫緊之時姑示包容陳國瑞本係交左宗棠差遣嗣因捻氛逼近畿輔改歸神機營節制今捻蹤旣蒙入豫境卽著仍歸左宗棠節制該侍衛所部勇丁並不得逾三千名之數著左宗棠查明妥爲裁撤國瑞旋率隊由武安入山西適陝省宜川等處回匪鴟張諭工部尙書署山西巡撫鄭敦謹飭國瑞自吉州渡河而西相機截剿以固晉疆一切進止機

宜暫歸鄭敦謹調度四月國瑞聞捻逆竄至靜海滄州一帶京畿防務喫緊欲刻日拔隊北援呈由鄭敦謹代奏上不許國瑞已於閏四月馳抵臨清與安徽巡撫英翰面商會剿神機營王大臣疏劾之得旨交部嚴加議處卽著歸英翰調遣責令隨同剿捻以贖前愆尋偕各軍擊賊陵縣平原高唐在平鹽山陽信樂陵德平各境所向克捷五月追賊至武定復至霑化六月戰於濟陽之高橋疊有斬獲尋敗賊德平城外逆首張總愚東竄諸軍分道躡追至徒駭河全股盡殲捻患以平捷入賞還黃馬褂花翎勇號並開復總兵記名提督仍賞雲騎尉世職嗣以傷病乞假就醫揚州李世忠挾前仇計縛國瑞舟載以行國瑞姪澤培呼衆來援李世忠覓小船遁兩江總督曾國藩劾之李世忠革職國瑞以都司降補勒令回籍交地方官嚴加管束光緒元年潛復至揚干預寓居揚州之前徐州鎮總兵詹啟綸主使毆斃監生胡士禮命案兩江總督沈葆楨劾其不安本分請發往軍臺效力特旨改戍黑龍江八年十二月歿於戍所九年七月給事中鄧承脩疏論國瑞功大過小戍死邊荒乞予追錄諭曰已革前任總兵降補都司陳國瑞隨同僧格林沁轉戰數省曾著勞績緣案遣戍上年傷發身故著加恩開復總兵原官並將戰

績宣付史館以獎前勞十二月上允兵部之請賞還國瑞雲騎尉世職尋翰林院編修尹琳基朱百遂等先後呈請在山東浙蘇等省立功地方建立專祠允之十九年山東巡撫福潤以國瑞前隨忠親王僧格林沁來東剿賊大小數百戰多立奇功而於滕縣爲尤著嗣聞緣案遣戍滕民追念前功謳思弗替在縣城東門外繪像建立生祠見知病歿准於山東地方建立專祠請將生祠改爲專祠列入祀典以順輿情安徽巡撫沈秉成復以國瑞爲僧格林沁善戰勇將其在安徽戰勝攻取之勞大有造於長淮全局紳民感頌請附祀蒙城壽州僧格林沁專祠以伸報饗均如所請行二十年湖廣總督張之洞等以國瑞戰功卓著遺愛在民請在本籍捐建專祠諭曰已故記名提督原任浙江處州鎮總兵陳國瑞於咸豐年間效力戎行轉戰安徽江蘇河南山東山西直隸等省所向有功業經恩准於立功地方建立專祠茲據該督等奏稱該故總兵在湖北本省地方剿賊立功戰績尤著實屬有功桑梓遺愛在民著照所請准其於湖北應城縣本籍捐建專祠列入祀典由地方官春秋致祭以彰勳績二十一年江蘇巡撫趙舒翹奏稱高郵州舉人吳杞等以州境閔家橋地方係昔年國瑞駐軍之所專祠告成稟請列入祀典

疏入詔如所請兼祧子觀全襲世職

鄭國魁

鄭國魁安徽合肥人咸豐七年由監生捐都司分發江蘇隨常鎮通海道史保悠會辦溧陽南渡鹽釐局務九年捐加遊擊銜十年三月粵賊偪溧陽兩江總督何桂清檄國魁募勇三千人駐無錫高橋防軍四集四月賊猝至何桂清不戰而奔官軍瓦解國魁孤軍搢拄背股皆傷裹創血戰歷三晝夜軍中子藥盡退守黃埔墩傷重離營就醫未幾蘇州太倉並各屬縣相繼陷十月署江南提督曾秉忠募勇清淮檄國魁爲統領帶赴上海國魁捐貲造戰船二十隻駐金山洙涇泖橋等處十一年二月賊由泗涇來攻國魁令哨官黃金志鄭國俊徐道奎攻賊前後身率鄭國榜沿河橫擊擒斬甚夥賊鋒爲挫時松江府城圍急國魁兼程進援斬黃衣賊目二人破賊營五座圍得解賞戴花翎同治元年四月署江蘇巡撫李鴻章駐師上海規復蘇常檄調國魁所部爲親兵水師後營增戰船泊龍華八月賊酋譚紹洸犯北新涇其地接張官渡實上海西藏國魁隨大軍擊走之九月督水陸軍駐四江口時官軍克嘉定譚紹洸復糾蘇杭嘉興賊分道東犯四江口當其衝

國魁與驍將劉士奇迎擊賊少卻益掠蘇州船千餘艘糾衆水陸並進國魁嚴守糧阻援絕懸賞激勸合軍效命礮子貫劉士奇耳仍堅壁不動時青浦西北各隘賊勢益熾蔓擾重固鎮張堰力守十五晝夜援師至更磨困軍開壁出內外夾擊斬賊逾萬獲賊目數百人賊自是不敢復窺松滬詔以參將儘先補用十二月進攻太倉二年三月克之四月移攻崑山國魁日克賊壘三復敗賊更樓橋各軍咸奮破賊營二十有四真義鎮者崑山達蘇州要道也賊屯四營爲援國魁令哨官劉大海丁全勝李長清擊真義賊與水師鄭國榜相應賊潰譚紹洸統悍黨由小西門出伏軍起水師環攻積屍斷流遂克崑山新陽二縣先後擒斬悍賊以萬數捷聞以副將留江蘇補用六月追擊吳江賊於尹山橋復敗同里鎮援賊克吳江震澤八月增兵屯永安橋進攻蘇州國魁設伏寶帶橋自率親兵誘擊譚紹洸由齊門率萬餘衆直攻國魁軍鏖戰四時賊始敗退走長生橋紹洸恃糧足堅守兩月不下僞納王郜雲官與紹洸不相能國魁遣人說之降偕提督程學啟潛會雲官於陽澄湖命圖紹洸自贖十月郜雲官等七人計殺紹洸開齊門降國魁馳入城僅弟姪數人從宣諭威德賊衆悅服間日各軍始振旅入遂復蘇州始國魁與

郅雲官等約反正待以不死既雲官等嬰挾跋扈程學啟設計誅之國魁涕泣堅臥自謂負約誓不居首功捷聞以總兵記名簡放並賞勅勇巴圖魯名號十一月統兵守濟甯關望亭等處三年正月國魁率部將管松林鄭國謨等攻浙江嘉興府絕其外援城內踞逆殊死戰官軍薄城以炸礮中賊藥倉賊沸而潰遂克嘉興加提督銜初賊窺官軍方攻嘉興常州賊酋陳時永由丹陽糾宜興餘賊掩至江陰進犯常熟國魁於克嘉興次日飛馳往援賊遁而楊舍周莊各竄賊勢猶張國魁更督水陸軍擊走之陳時永夜遁三河口憑河築壘設浮橋六以納敗賊國魁燬營斷橋賊遂潰斬俘踐溺近二萬人沿江賊悉平隨大軍進攻常州四月克之奉旨交軍機處存記遇有總兵缺出先行題奏並賞從一品封典旋率軍駐東壩遏江浙竄安徽各賊四年移守江南省城五年調赴山東剿捻匪駐師嶧縣防大泛口丁廟廂各隘堅守逆河賊不敢犯土匪高觀劉照燦遠遁七年捻匪肅清欽差大臣湖廣總督李鴻章敘國魁功請以提督記名儘先簡放又密陳國魁謀勇兼備久經大敵訓練嚴明堪勝提鎮之任懇另行存記酌量簡用得旨悉如所請十二年直隸總督李鴻章檄國魁隨辦北洋海防事務光緒元年奉旨署理天津

鎮總兵天津爲北洋要隘中外輻輳國魁整頓營伍捕誅劉萬順韓老謝昆王國泰等諸海盜十四年卒於任李鴻章疏言國魁治軍死生禍福無所動雖古名將無以過起家軍旅而愛才禮士將兵居官三十餘年家無餘財卒之日列營將士環視流涕請照提督立功後病故例優卹並將戰績宣付史館立傳附祀蘇州程學啟專祠及無錫廬州直隸淮軍昭忠祠詔如所請尋賜卹如例十六年李鴻章及兩紅總督曾國荃江蘇巡撫剛毅等先後疏言國魁收復蘇州時城內悍黨十萬粟支五年使非國魁定計招降以誠相感則負隅方堅困獸猶奮蘇州闐闐生靈豈堪設想迄今觀殷庶之猶昔比之江寧杭州獨爲完善士民追念保全之德遺愛弗諼請於蘇州省城捐建專祠以伸報饗允之

楊玉科

楊玉科湖南善化人原籍靖州寄籍雲南麗江咸豐六年回逆杜文秀竊踞大理玉科由義勇隨千總張正泰聯團攻剿嗣投效護理維西協副將和耀曾軍營同治三年護理雲南布政使岑毓英剿曲靖賊馬榮和耀曾派營助剿玉科與焉每戰輒跳湯陷陣屢有斬擒遂爲岑毓英所知優給獎賞拔充隊長旋又拔充管帶

隨克曲靖四年岑毓英詳請總督勞崇光破格用之檄玉科以五品軍功護理維西協篆先於曲靖任事隨岑毓英連克霑益馬龍兩州城檄援昭通擒僞帥阮三斬僞王鎖朝升於陣盡平城外賊壘岑毓英進攻大理久不下外爲逆回所困密令玉科添練數營繞道四川會理州出賊不意遂克中甸維西二城乘勝晝夜環攻殲僞武略將軍宋曰晟克鶴慶而所遣取劍川之練目楊紹修取麗江之夷目王廷詔違玉科調度失期援賊大至玉科守鶴慶三月身受重傷賊以地雷轟城遂復陷乃退保中維勞崇光奏言玉科孤軍深入連克三城功甚偉悍賊麇至因距省三千餘里轉餉不繼孤立無援致城池得而復失情節可原且前疊次立功尙未彙獎亦無官可參乞恩免議詔許之六年五月隨雲南布政使岑毓英攻克鎮雄首逆白金品就擒賞都司銜以守備用並賞戴藍翎八月隨岑毓英追賊於雲貴四川三省界連之豬拱箐擒僞王陶三春又破賊於海馬沽殲首逆張項七逆黨三萬餘悉數解散雲南巡撫劉嶽昭以玉科異常出力奏獎得旨以遊擊補用加副將銜七年八年駐防東川值西路賊大股謀襲省城所過輒陷玉科選精兵間道渡金沙江出賊後夾擊之遂進克元謀及武定祿勸羅次三縣進攻富民

降人張遇泰復叛四城以次復陷尋奉檄署維西協事九月留參將徐聯魁乘賊趨注省垣守備空虛圖恢復而自赴省援剿八年正月連平柯渡可耶賊徐聯魁亦復元謀武定祿勸富民雲南巡撫岑毓英上其功得旨以副將儘先補用賞給勳勇巴圖魯名號時省城外賊分踞要隘以阻援師玉科節節迎擊先破十里鋪小偏橋餉道復通而嵩尋告急岑毓英檄玉科進規嵩明以計降偽司寇李芳園偽司平馬興堂其偽帥杜文秀女蔡杜氏窮蹙亦乞降州城遂復並下尋甸州收降二萬有奇岑毓英奏委督辦三姚軍務添募勁旅數千並選精悍降卒萬人訓練成軍七月攻拔黑元永鹽井等處八月復大姚九月復定遠賊後路斷省城之圍遂解乘勝下麗江賓川雲龍各城敘功遇雲南總兵缺出請旨簡放並賞換花翎九年二月進攻姚州賊悉衆死拒玉科徧體受火器傷裹創力戰梯城入賊短兵巷戰相持者四十日城始復誠偽司軍馬金保偽將軍藍平貴殲悍賊萬計拔出難民數萬三姚全境俱平六月捷入上嘉其力疾血戰受傷克復堅城賞提督銜並賞換瑚松額巴圖魯名號玉科先於五月經總督劉嶽昭奏委署理鶴麗鎮總兵至是岑毓英亦檄令督辦池西軍務八月率軍攻鶴慶奮勇先登奪據城樓

各軍齊進城賊遁九月復永北廳分軍援白土營平賊壘百餘連克浪穹鄧州及浪穹屬之鳳羽鄉斬賊渠馬良勳洪志舒丁在星等閏十月劉嶽昭等上其功賜白玉翎管搬指大小荷囊十二月命授雲南開化鎮總兵有裒創力戰奮勇可嘉之諭十年三月僞司衡楊榮率悍黨萬人攻賓川甚急玉科馳往援之圍立解七月移師攻下永昌僞司馬楊德明僞司武馬年三俱伏誅九月捷入命以提督記名簡放大理後路之漾濞險隘也久爲賊踞玉科督兵進攻賊百計援救十一年三月克之四月克雲南縣五月克趙州進規大理分軍爲四一踰蒼山鈔賊後一渡洱海出賊前一攻北路之上關而自攻南路之下關水陸夾擊賊守將董正性獻外關玉科督兵入賊大潰奪下關北路亦同日攻克敍功賞穿黃馬褂予一品封典兩關之初拔也總兵李維述挫衄於蒙化玉科急統精兵千人赴援賊望風披靡復廳城回軍圍大理先破城外守壘賊會岑毓英率師至親督諸將攻剿賊勢愈蹙十一月轟陷大理城東南隅玉科冒險先入諸將繼進破土城直抵蓮花池賊死黨萬餘出拒相持十餘日死傷過半餘賊退保僞城杜文秀服毒死逆酋楊榮蔡廷棟接統其衆抗拒益力玉科密約間諜設伏城內岑毓英師次五里橋

內外夾擊破僞王府戮杜文秀屍並獲其子女四人治如律楊榮蔡廷棟暨賊悍黨悉數殲除以萬計全郡底定十二年正月紅旗報捷上以玉科當兵單餉絀之時能激勵衆心擒渠埽穴實屬謀勇兼裕調度有方賞騎都尉世職並白玉翎管及諸珍玩二月敗賊於蒙化之大小圍埂予優敘總兵段瑞梅蔡標分剿雲州順寧不能拔上命玉科督辦乃率所部併力攻之兩城俱復並克騰越破大小猛統堅巢得旨賞加一雲騎尉世職嗣以全滇肅清玉科戰功卓著合前騎都尉世職改爲一等輕車都尉十三年入覲飭回本任玉科以積年欠發餉卹銀四十萬兩報效岑毓英入告賞正一品封典隨帶加三級光緒元年署雲南提督追錄剿烏索賓川籌餉功賞頭品頂戴玉科服叔把總楊大奇楊郁文千總楊福順陣亡無嗣所得雲騎尉均應玉科兼襲兵部議將各世職併爲二等男爵詔如所請二年調廣西右江鎮總兵玉科以傷病發請開缺調治適潰勇竄踞騰越等處命開缺暫留雲南剿辦玉科力疾視師悉平之雲貴總督劉長佑等上其功賞上方珍玩三年七月以鶴慶浪穹所置田產勻給無業兵勇又將大理城內舊宅改建西雲書院並資以膏火永垂久遠劉長佑等以聞下部議行並請改隸善化籍允之先

是雲南巡撫潘鼎新奏言玉科開缺留滇今軍務肅清請予錄用九月授廣東高州鎮總兵四年入覲請回籍修墓詔賞假三月事竣之任五年奏署陽江鎮總兵六年陞署廣東陸路提督先以元年玉科姪楊汝楫讎殺撤任東川府知府孔昭鈞玉科被劾降三級准其抵銷至是編修何金壽再劾之下部議奏覆得旨楊玉科著降三級調用所兼二等男爵折罰半俸九年免其降調世職七年報效洋槍洋碼得旨開復原官留廣東差委尋兩江總督劉坤一奏請改留兩江從之十年法蘭西爭地越南廣西巡撫潘鼎新奉命督師防邊奏調玉科帶領親兵並舊部弁勇隨剿允之七月統廣武軍三營出關駐諒山十月進扼觀音橋十二月法人萬餘分兩路來犯一撲谷松一撲觀音橋玉科先設三伏親率大隊迎戰伏發法人不能支退守高崗以利礮自衛我軍分據嶺頭槍礮交攻至暮法人始退而我谷松軍失利乃留兵守橋率精銳星夜往援未至谷松已陷官軍退保諒山法人進撲屯梅五臺聞玉科來援遂乘隙攻觀音橋玉科留一軍助守屯梅仍回觀音橋防禦數戰皆捷而法人急攻諒山潘鼎新撤橋屯之師回援玉科突圍而前甫抵三臺諒山已不守頭臺二臺繼陷值陰雨山險路滑勢難衝突乃繞道出諒山

後力堵鎮南關分軍扼文淵十一年正月賊萬餘犯文淵玉科迎敵自辰至午斬
馘無算陣殲法酋一人敵敗走我軍乘勢追擊正鏖戰間玉科中礮陣亡事聞諭
曰楊玉科臨陣勇敢奮不顧身中礮捐軀實堪憫惻著交部從優議卹五月和議
成追錄前功諭曰前廣東高州鎮總兵楊玉科上年帶兵出關勇敢奮發臨陣捐
軀深堪嘉憫前經降旨從優議卹著再賜祭一壇加恩予諡並將事蹟宣付史館
立傳尋賜卹如例贈太子少保銜予諡武愍賞騎都尉兼一雲騎尉世職襲次完
時以恩騎尉世襲罔替十三年正月雲貴總督岑毓英因雲南紳民之請疏言玉
科隨營苦戰恢復多城又於駐軍處所捐資修濬河源培植書院地方攸賴請於
立功死事地方建立專祠上念其戰功卓著以死勤事准於雲南大理府城暨廣
西鎮南關建立專祠由地方官春秋致祭十五年慈禧端佑康頤昭豫莊誠皇太
后歸政憫念亮節孤忠諸臣各賜祭一壇玉科與焉子汝能二品廕生花翎分省
補用道先卒

清史列傳卷五十六終